


# Alkawal Kesal



Portions of the New Testament in the Fulfulde Borgu language  
of Benin

## **Alkawal Kesal**

### **Portions of the New Testament in the Fulfulde Borgu language of Benin**

copyright © 2011 SIM International

Language: Fulfulde Borgu (Fulfulde, Borgu)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-16

---

PDF generated using Haiola and XeLaTeX on 11 Nov 2022 from source files dated 9 Oct 2020

7104dd08-43ed-5b6c-bcfb-9f0e6052d5f3

## Contents

Matiye . . . . .	1
Yuhaana . . . . .	40
Roma . . . . .	67
Korintu Aranol . . . . .	84
Galaatiya . . . . .	100
Efesu . . . . .	106
Filippi . . . . .	112
Koloosi . . . . .	117
Tesalonika Didabol . . . . .	121
Timote Aranol . . . . .	124
Timote Didabol . . . . .	129
Titus . . . . .	133
Filemon . . . . .	136
Iburaninkeeße . . . . .	138
Piyer Aranol . . . . .	151
Piyer Didabol . . . . .	156
Yuhaana Aranol . . . . .	159
Yuhaana Didabol . . . . .	164
Yuhaana Tatabol . . . . .	165
Yahuuda . . . . .	166
Kollitinki . . . . .	168

## Linjiila Yeesu hande no Matiye winniri

### *Haala puusirka*

Binnudo linjiila arandeha kaa do laati nun Yahuduuo jannudo. Diga fuddoode, himbe e miili Matiye jaaboowo ceede faada nun winni linjiila kan. O laati nun bo gooto der aahiibe Yeesu sappo e dido. Yahuduube nun o winnani. O hollitidum e limtango be aayaaje Alkawal Kiinnjal duudde, kollitoje no Yeesu nun laatii kebbindo annabaakuuji duuddi. Linjiila makko e jogii haalaaji mawdi feere feere.

Haala Laamaare Alla nun laatii dadol manjol der ekkitinol Yeesu. Laamaare Alla nen Matiye bo noddata Laamaare kammu. Maytitaago noddugo mo «Bii Dawda», kan nun hollitinta dum. Yeesu laati nun laamiido mo annabiibe batani waran, kan laatii waaji Matiye. Woodube annal waddanii «laamiido Yahuduube», dokke. Yeesu fiinii no Laamaare Alla faanake, tuubube, ko wayliti goonki mum, faami no e haajaa Alla walla dum, kambe nun laamaare nen laatanii.

Baa no laamiido on hollitii maaneesi Laamaare Alla e wadugo kaay-eefiji, o nyawti nyawbe, o nyaanni rafaabe, e non fu, himbe woppii mo hande no o batunoo de duuddsum kanko e hoore makko. Yahuduube daartannoobe laamiido, faamay no e haani laamiido on tooroo.

No Yeesu finti, o hollii no o laataaki laamiido Yahuduube tan. O wi'i: «Mi hokkaama baawde dow kammu e dow leydi fu».

### **Tokkontirki haalaaji**

1. Kaakiraabe Yeesu e dingol mum, 1.1-2
2. Waaju e golle Yuhaana gadoowo batisi, 3.1-12
3. Wadugo Yeesu batisi e jarbeeki mum, 3.13-4.11
4. Golle Yeesu der Galili, 4.12-18.35
5. Ummaago Yeesu diga Galili, yahi Urusaliima, 19.1-20.34

6. Asaweere Yeesu saktiineere, 21.1-27.66
7. Fintuki e holittaaki Yeesu Joomiraawo, 28.1-20.

### *Inde kaakiraabe Yeesu (Luka 3.23-38)*

<sup>1</sup> Nani do inde kaakiraabe Yeesu Almasiihu, taaniraawo Dawda, taaniraawo Iburahiima:

<sup>2</sup> Iburahiima rimi Isiyaaku, Isiyaaku rimi Yaakuubu, Yaakuubu rimi Yahuuda e miiraabe mum.

<sup>3</sup> Yahuuda rimi Fares e Jara, kambe woni be o rindi e Tamar, Fares rimi Hisuruuna, Hisuruuna rimi Aram. <sup>4</sup> Aram rimi Aminadab, Aminadab rimi Nasuuna, Nasuuna rimi Salmuuna. <sup>5</sup> Salmuuna rimi Bo'es, mo o rindi e Rahab, Bo'es rimi Obed, mo o rindi e Ruutu, Obed rimi Yesa. <sup>6</sup> Yesa rimi Dawda, laamiido.

Dawda rimi Suleymaanu, inniko woni debbo mo Uriya acci.

<sup>7</sup> Suleymaanu rimi Robo'am, Robo'am rimi Abiya, Abiya rimi Asa. <sup>8</sup> Asa rimi Yusafat, Yusafat rimi Yoram, Yoram rimi Ujiya. <sup>9</sup> Ujiya rimi Yotam, Yotam rimi Akas, Akas rimi Hejekiya. <sup>10</sup> Hejekiya rimi Manaasa, Manaasa rimi Amon, Amon rimi Yusiya. <sup>11</sup> Yusiya rimi Yekuniya e miiraabe mum. Wakkati mum nun Yahuduube egginaa, yaaraa leydi Babiila.

<sup>12</sup> Baawo no be jaara Babiila, Yekuniya rimi Salaatiyel, Salaatiyel rimi Jorobabel. <sup>13</sup> Jorobabel rimi Abihuda, Abihuda rimi Eliyakim, Eliyakim rimi Ajora. <sup>14</sup> Ajora rimi Sadok, Sadok rimi Akim, Akim rimi Eliyuda. <sup>15</sup> Eliyuda rimi Eliyaajaru, Eliyaajaru rimi Mattan, Mattan rimi Yaakuubu. <sup>16</sup> Yaakuubu rimi Yusufu, gorko Mariyama, inna Yeesu, bi'eteedo Almasiihu.

<sup>17</sup> Jaamanuuji sappo e naay nun wadi diga Iburahiima faa yottii Dawda. Diga Dawda faa yottii wakkati Yahuduube egginaa, yaaraa Babiila, wadii jaamanuuji sappo e naay. Diga Yahuduube egginaa yaara Babiila, faa yottii Almasiihu, wadii jaamanuuji sappo e naay.

*Dingol Yeesu Almasiihu  
(Luka 2.1-7)*

<sup>18</sup> Nani do no Yeesu Almasiihu rimiraa. Mariyama inniiko, e laatii mo Yusufu däbäbi. Amma ko 6e kawta, Mariyama hebii reedu e baawde Ruuhu Ceniido. <sup>19</sup> Yusufu däbbudo Mariyama e laatii neddo poonniido. O yiday sentingo mo, den o resi salaago mo e cuudiidum. <sup>20</sup> Wakkati o woni oo mijjoo ka, malaykaajo Joomiraawo wari e makko, der koydool. Malaykaajo on wi'i mo: «Yusufu, taaniraawo Dawda, taa hulu ettugo Mariyama, debbo maa. Gam binnej nel o saawi, e Ruuhu Ceniido yiwi. <sup>21</sup> O riman biddo gorko, kokkaa mo inne Yeesu, gam o hisinan himbe makko diga hakkeeji maabbe.»

<sup>22</sup> Dum fu, dum wadii gam hebbinga haala ka Joomiraawo batuno diga e hunnuko annabijjo, o wi'i:

<sup>23</sup> «Gatol nel annaa gorko saawan, rima biddo gorko, o wi'ete Emmanuwel.» Maana inne nen woni: «Alla e wondi e meeden.»

<sup>24</sup> No Yusufu fini, wadi ko malaykaajo Joomiraawo bati dum, o banji Mariyama. <sup>25</sup> Amma o hawtay e makko, faa nyaanne o rimi biddo gorko. Yusufu hokki mo inne Yeesu.

## 2

*Woodube annal warii daarugo  
Yeesu*

<sup>1</sup> Yeesu rimaama Baytilaama der leydi Yahudiya, wakkati laamiido Eroodu, go woodube annal yiwoy diga lettugal, wari Urusaliima. <sup>2</sup> No 6e jottii, 6e yami: «Toy laamiido Yahuduube dimaado jooni on woni? Men ji'ii hoodere makko diga lettugal, men garii sujidango mo.»

<sup>3</sup> No laamiido Eroodu nani habaru on, hakkillo mum jibii, kanko e himbe Urusaliima fu. <sup>4</sup> O noddini hooreebe limaamiiße, e moodisbe tawreeta fu, o yami 6e, toy nun Almasiihu rimeetee? <sup>5</sup> Be toontii mo, 6e bi'i: «Baytilaama nun, der leydi Yahudiya, gam nani ko annabijjo winnunoo:

<sup>6</sup> «An, Baytilaama der leydi Yahudiya,

a faanday caka ci'e Yahudiya mawde. Gam ardotoodo yiwan diga e maa, kanko nun durata himbe am Isira'iilaabe.»

<sup>7</sup> Den, Eroodu noddini woodube annal ben e cuudiidum, yami be be laabinana dum wakkati de hoodere nen hollitii. <sup>8</sup> Baawo mum, o lildi 6e Baytilaama, o wi'i be: «Jahee, pumpitee habaru sukayel nel faa laaba. To on ji'ii nel, maatinee am, gam mi yaha, min bo, mi sujidana nel.»

<sup>9</sup> No 6e nani ka laamiido bati 6e, 6e jawti. Den, 6e kollirii hoodere ne 6e ji'unoo lettugal e ardi 6e. No ne yottii nokkuure to sukayel nel woni, ne darii. <sup>10</sup> No 6e ji'i hoodere nen, berde maabbe welii puy. <sup>11</sup> Be naati der wuro, 6e ji'i sukayel e inna mum, Mariyama. Be jicci, 6e cujidani nel. Be pitti gineejii maabbe, 6e kokkori nel kanjeeje, e wardi buudeteedum, e dacce luuttooje, bi'eteede miir. <sup>12</sup> Baawo maajjum, Alla holli 6e der koydool to 6e bittu to Eroodu. Den 6e kootiri leydi maabbe e laawol gonnol.

*Yusufu doggii suudoy Misira*

<sup>13</sup> No 6e jawti, malaykaajo Joomiraawo hollitanii Yusufu der koydool, wi'i mo: «Umma, ettu sukayel nel e inna mum. Doggidin nel, jahaa Misira, joododaa ton faa de bi'umaa mi gartaa. Gam Eroodu waran daartugo sukayel nel, gam halka nel.»

<sup>14</sup> Yusufu ummii jemma, yaari sukayel nel e inna mum faa Misira. <sup>15</sup> O joodii ton faa de Eroodu maayi. Nun nun ka Joomiraawo batuno e hunnuko annabijjo hebbiri, de o wi'i: «Mi noddii 6iyam wurtoo diga Misira.»

*Eroodu halkii sukaabe Baytilaama*

<sup>16</sup> No Eroodu faami woodube annal ben jammike dum, mone makko ummii puy. O lili 6e bara sukahon goron tawaakon Baytilaama e der jeyde makko fu, diga sukahon keccon, faa kon duubi dici. O wadii dum, o foorni deydey wakkati ki woodube annal batuno mo dow hollitaago hoodere

nen. <sup>17</sup>Dum hebbinii haala ka annabi Yeremiya batunoo, wi'i:

<sup>18</sup> «Cimaali nanaama der siire Rama, e bojji, e goytaali duuddi. Rahiilu nun wullata, gam sukahon mum. O nootaaki eyteego, gam kon maayidii.»

### *Yusufu wittii Nasaratu*

<sup>19</sup> Baawo maayde Eroodu, malaykaajoima Joomiraawo hollitanii Yusufu der koydool, der leydi Misira. <sup>20</sup> O wi'i mo: «Umma, ettu sukayel nel e inna mum, bitton leydi Isira'iila, gam yidunoobe warugo suka on maayii.»

<sup>21</sup> Den Yusufu ummii, etti sukayel nel e inna mum, be bitti leydi Isira'iila. <sup>22</sup> Amma Yusufu nanii Arikilawus jaabii laamaare baaba mum Eroodu, laamii dow Yahudiya. O huli yahugo ton. Ko Alla baddi mo der koydool, den o yahi far leydi Galili. <sup>23</sup> O yahi o joodii siire wi'eteene Nasaratu. Dum laatike, gam hebbingko ka annabiife batunoo, wi'i: «O noddete Nasaratujo.»

## 3

### *Waaji Yuhaana gadoowo batisi (Marku 1.1-8; Luka 3.1-18; Yuhaana 1.19-28)*

<sup>1</sup> Wakkati majjum, Yuhaana gadoowo batisi suppiti. Oo waajoo der ladde haro Yahudiya, oo wi'a: <sup>2</sup> «Tuubee, gam Laamaare Alla faanake.»

<sup>3</sup> Kanko nun annabi Esaaya batani, wi'i:

«Daane neddo e bata dow dow, der haro, e wi'a:

Moyyinee laawol Joomiraawo, poonnitee laabi makko!»

<sup>4</sup> Yuhaana e borninoo gineeki cannyiraadi leebi jeelooba, oo habbi 6elbelol gurol dow funjudu makko. Nyaamdu makko laatii babatti e juuri ladde. <sup>5</sup> Himbe Urusaliima, e leydi Yahudiya, e awaaabe takkol maayo Urdun fu, wari to makko. <sup>6</sup> Be tuubi hakkeeji maabbe, go Yuhaana wadi be batisi der maayo Urdun.

<sup>7</sup> No o yi'i Farisaabe e Sadukiibe duubbe e wara wadeego batisi, o wi'i be:

«Bibbe bolle pure! Moy tintini on doggon mone Alla waroore? <sup>8</sup> Gadee golle kollitoje on tuubii. <sup>9</sup> To on miilee e berde moodon bi'on: "Iburahiima nun woni maama amen!" Gam mii wi'a on, Alla e waawi waylitingo kaaye, de laatoo bibbe Iburahiima! <sup>10</sup> Jooni, jammere bantaama gam feyyaledde faa e dad'i mum. Den, leggal jal rimataa bibbe boodde fu wudditinte, faddee der yiite. <sup>11</sup> Min, e diyam nun gadiranmi on batisi, gam hollitingo on tuubi. Amma garoovo baawo am, e burimmi baawde. Mi fotay du baa jimminaago, borta padé makko. Kanko, o wadan on batisi e Ruuhu Ceniido, e yiite. <sup>12</sup> Oo jogii besirdum e junno makko, o laabinan fiyirde makko. O loowa gawri der rummuure makko, o wula nyaane der yiite ne nyifataa.»

### *Yeesu wadaama batisi (Marku 1.9-11; Luka 3.21-22)*

<sup>13</sup> Wakkati majjum, Yeesu yiwi Galili, wari maayo Urdun to Yuhaana, gam Yuhaana wada mo batisi. <sup>14</sup> Amma Yuhaana nootaaki, wi'i: «Min nun haajaa gadanaa batisi, ko an nun wari to am mi wadanee?»

<sup>15</sup> Yeesu toontii mo, wi'i: «Noota dum laatoo non non jooni, gam hande non kebbinirten ko foonnitii fu.»

Den Yuhaana nootii. <sup>16</sup> Don maa don, no Yeesu wadaa batisi, wurtii e diyam, kammu mabbitii. O yi'i Ruuhu Alla e jippoo dow makko, hande tantabaraaru. <sup>17</sup> Don daane gom nanaa dow kammu, e wi'a: «Oo do nun laatii Biddo am jidaado, mo ceyoriimi.»

## 4

### *Seydan jarbake Yeesu (Marku 1.12-13; Luka 4.1-13)*

<sup>1</sup> Baawo majjum, Ruuhu Ceniido yaari Yeesu der haro gam Ibiliisa jarboo mo. <sup>2</sup> O suumii nyaloomaaje lasoy didi. Den, rafio wadi mo. <sup>3</sup> Don Jarbotoodo

on 6attii mo, wi'i: «To a laati nun Biddo Alla, batu kaaye dee do waylitoor peen.»

<sup>4</sup> Yeesu toontii mo, wi'i: «E winnaa: "Neddo wuuriitaa e peen tan, amma e haala burtiika diga hunnuko Alla fu."»

<sup>5</sup> Ibiliisa yaari mo wannarde seniine, bili mo dow suudu Alla to 6uri towugo. <sup>6</sup> Den o wi'i mo: «To a laati nun Biddo Alla, fittu kodaa ley, gam e winnaa der dewtere, Alla batan malaykaabe mum 6e taabbee e juude mabbe gam to koyde maa fergoo kaaye.»

<sup>7</sup> Yeesu toontii mo, wi'i: «Dewtere wi'i kade: "Taa jarba Alla Joomiraawo maa".»

<sup>8</sup> Ibiliisa yaari mo kade dow waanne towune puy. O holli mo laamaareeji duuniyaaru fu e teddujal majji. <sup>9</sup> Den o wi'i mo: «Mi hokkete huune dum fu, to a jiccake cujidandaa am.»

<sup>10</sup> Yeesu toontii mo, wi'i: «Dillu diga don, an Ibiliisa, gam e winnii der dewtere: "Sujidan Alla Joomiraawo maada, kanko tan teddintaa!"» <sup>11</sup> Den Ibiliisa acci mo, go malaykaabe 6attii e jagganoo mo.

### *Yeesu waajake der leydi Galili (Marku 1.14-15; Luka 4.14-15)*

<sup>12</sup> No Yeesu nani Yuhaana gadoowo batisi nannaama, wattaa der kasu, o witti leydi Galili. <sup>13</sup> O eggi Nasaratu, o joodsoy Kafarnahum, takkol fonjo maayo Galili, hakkune jeyde leydi Jabulon e Neftali. <sup>14</sup> Hande non haala ka annabi Esaaya batunoo hebbiri, o wi'i:

<sup>15</sup> "Leydi Jabulon e leydi Neftali, joodiini takkol maayo, fonjo Urdun, Galili, an laatiini joodorde himbe 6e lenyi janani.

<sup>16</sup> Himbe tawaabe der niwre, yi'ii jaynjol manjol. Joodiise e leydi maayde, nibbuni, jaynjol yaynanii dum."

<sup>17</sup> Diga wakkati majjum, Yeesu fuddi waajaago e wi'a: «Tuubee, gam Laamaare Alla 6attike.»

### *Aahii6e Yeesu arandee6e (Marku 1.16-20; Luka 5.1-11)*

<sup>18</sup> No Yeesu woosotoo takkol fonjo maayo Galili, o yi'i suubotoobe liyyi dido, Simon, noddeteedo Piyer, e minyum Andere, e fadda taaruuiji mum der maayo. <sup>19</sup> Yeesu wi'i 6e: «Tokkee am, mi wadan on suubotoobe himbe.»

<sup>20</sup> Don maa don 6e acci taaruuiji mabbe, 6e tokki mo. <sup>21</sup> O yahi yeeso, o yi'i rindaabe dido der laana, Yaakuuba e minyum Yuhaana, bibbe Jebede. Kambe e baaba mabbe, bee moyyina taaruuiji mabbe. O noddi 6e. <sup>22</sup> Don maa don, 6e acci laana 7jan e baaba mabbe, 6e tokki mo.

### *Yeesu e waajoo, e nyawta himbe (Luka 6.17-19)*

<sup>23</sup> Yeesu woositii leydi Galili fu. Oo janjina der cuudi baajordi, oo waajoo linjiila dow Laamaare Alla, oo nyawta himbe 6e nyawuuji feere feere, e toorotoobe. <sup>24</sup> Habaru makko sankitii der leydi Siriya fu. Bee gaddana mo nyawbe nyawuuji feere feere, hande 6e ginnaaji toorata, e yanoobe padde, e moofidinbe, o nyawti 6e. <sup>25</sup> Jama'aare duunne e tokki mo. Be yiway maa diga leydi Galili, e baadeere Gennije Sappo, e Urusaliima, e Yahudiya, e fonjo maayo Urdun.

## 5

### *Waaji dow waanne*

<sup>1</sup> No Yeesu yi'i jama'aare duunne, o eenci dow waanne, o joodii. Aahii6e makko hawritii ley makko. <sup>2</sup> O fuddi waajaago 6e, o wi'i:

### *Haala barke (Luka 6.20-23)*

<sup>3</sup> «Barke laatanii 6e yonki mum humpaa Alla, gam kambe nun jey Laamaare Alla!

<sup>4</sup> Barke laatanii wulloobe, berde mabbe fewtinte!

<sup>5</sup> Barke laatanii diggu6e, gam 6e donan leydi!

<sup>6</sup> Barke laatanii rafaabe, e dondaabe foonnitaare, gam 6e kaaran!

- 7** Barke laatanii endotooþe, gam 6e endfete!  
**8** Barke laatanii 6e berde mum laabi, gam 6e ji'an Alla!  
**9** Barke laatanii daartoþe jam, gam 6e noddete 6ibbe Alla!  
**10** Barke laatanii tooraþe gam sabbu foonnitaare, gam kambe nun Laamaare Alla laatanii!  
**11** Barke laatanii on, to himþe yennii on, toorii on, takki on gaccee baadey fu, sabbu am. **12** Ceyee, belbeltee, gam riiba mawka e hedii on dow kammu. Hande non annabiibie ardiibie on tooriraa.»

*Lamdam e jaynjol  
(Marku 9.50; Luka 14.34-35)*

**13** «Onon laatii lamdam duuniyaaru. Amma to lamdam walaa dakam, e ume dam welinirtee? Dam nafataa godsum, sey dam woppee, himþe yaaba dam.

**14** Onon laatii jaynjol duuniyaaru. Genni mahaani dow waanne suudataako. **15** Fitilla bo hubbataake gam ka ommee gummal. Amma ka filete dow to fitilla filetee, gam ka yaynana wonube der suudu fu.  
**16** Hande non haani jaynjol moodon yaynira yeeso himþe. Den 6e ji'an golle boodde de gadoton, 6e tedinia Baaba moodon gonudo dow kammu.»

*Yeesu e janjina dow haala tawreeta*

**17** «To on miilee mi warii gam moytugo tawreeta, dum bo ko winnaa der dewte annabiibie. Mi waray moytugo ka, amma gam hebbinga ka. **18** E goonja batanmi on, dow e leydi heen-nyan, amma tobbel, dum bo maasel gootel der tawreeta, sottintaake, faa nyalaane huune fu hebboyta. **19** Gam majcum, mo dowlanaaki tobbel gootel, burujel faandugo der tawreeta, go e ekkitina wobbe bo to dowlto, o laatoto paanduso der Laamaare Alla. Amma dowlaniido tawreeta, go e janjina wobbe bo dowlanoo ka, joomum laatoto mawdo der Laamaare Alla. **20** E goonja bi'anmi on, to foonnitaare mon buray ne moodisbe

tawreeta e Farisaabe, on naatataa der Laamaare Alla pay.»

*Yeesu e ekkitina dow haala mone  
(Luka 12.57-59)*

**21** «On nanii ko kaakiraabe meeden wi'ano: "Taa waru neddo, barudo neddo fu, hiitete." **22** Amma min, mii wi'a on, jogoriido banniraawo mum mone fu, hiitete. Bi'udo banniraawo mum: "A walaa hoore," joomum yaarete yeeso hiitorde mawne. Bi'udo banniraawo mum "A haanja nun," o wattete der yiite jahannama. **23** Gam majcum, to a yahii sakkanoygo Alla sadaka, to hisirde, go ciwtordaa aa woodi gokka e banniraawo maa, **24** accu don sadaka maa yeeso hiisirde. Den jahaa taw to banniraawo maa, jaafontiron. Baawo mum, bittaa, cakkaa sadaka maa. **25** To goddo gaccake maa, go oon jaha to kiitotoodo, yawda nannantiraa e makko diga e laawol. To a waday dum, o wattete der juude kiitotoodo, den kiitotoodo bo wattee e juude sandaaji, maabbedaa der kasu. **26** Mii batee e goonja, a wurtataako diga don, to a yobiday nyamaane maa, faranwel mum koriinel.»

*Ekkitinol dow jeenu*

**27** «On nanii wi'aanoma: "Taa wadu jeenu!" **28** Amma min, mii wi'a on, daarudo debbo fu, ko suunii mo, wadii jeenu e makko der berne mum. **29** Gam majcum, to itere maa nyaamoore nun laatantee daliila doyyere, doofu ne, boppaa to woddi! Dum burante jokkulal bannu maa gootal halka, e no bannu maa fu naatirta der yiite jahannama. **30** To junjo maa nyaamo nun laatantee daliila doyyere, wudditin jo, boppaa to woddi, dum burante jokkulal maa gootal halka, e no bannu maada fu naatirta der yiite jahannama.»

*Ekkitinol dow ceergal  
(Matiye 19.9; Marku 10.11-12;  
Luka 16.18)*

**31** «Wi'aama bo: "Ceerudo debbo mum fu, sey hokka mo derewol ceer-gal." **32** Amma min kan, mii wi'a on, ceerudo debbo mum to hinaa gam

daliila jeenu, to o hoowaama, o laatinii mo jeenoowo. Neddo koowudo debbo ceeraado fu, wadii jeenu kantuun bo.»

### *Ekkitinol dow hunayeere*

<sup>33</sup> «On nanii kade, kaakiraabe meeden wi'aama: "Taa firtu hunay-eere maa, hebbin ne yeeso Joomiraawo." <sup>34</sup> Amma min, mii wi'a on, to on kunee. To on kunoree kammu, gam nu laati nun gurol Laamaare Alla. <sup>35</sup> To on kunoree leydi, gam ni laati nun jaabirdum koyde makko. To on kunoree Urusaliima, gam ni laati nun wannarde Laamiido mawdo. <sup>36</sup> To on kunoree ko'e mon bo, gam on baawataa rawningo, dum bo bawlingo baa leebol gaasa mon gootol. <sup>37</sup> Haala mon fu daroo dow: "oo", dum bo "aawo", to yawtu don. Ko beydii dow majjum fu yiwi diga e Kalludo.»

### *Ekkitinol dow wattaago*

(Luka 6.27-36)

<sup>38</sup> «On nanii wi'aama, "Itere yobiree itere, nyiire yobiree nyiire." <sup>39</sup> Amma min, mii wi'a on, to on battee gadando on ko boni. To goddo fiyii maa meenyo dow golal nyaamowal, hokku mo nal to bo. <sup>40</sup> To goddo gacike maa, e yidi teeta dansikiire maa, accu mo o etta gulunfaare maa bo. <sup>41</sup> To goddo doolii maa doonanodaa dum doongal mum kuule ujuneere, roonana mo nal kuule ujune didi. <sup>42</sup> To goddo eelii maa, hokku mo. To goddo e yidi wuyaago huune maa, taa hadu mo dum.»

### *Jidee waybe moodon*

(Luka 6.27-28)

<sup>43</sup> «On nanii wi'aama: "Yidu banniraawo maa, banyaa ganyo maa." <sup>44</sup> Amma min, mii wi'a on, jidee waybe moodon, du'anee tooranbe on. <sup>45</sup> Hande non, laatortodon bibe Baaba moodon gonudo dow kammu. Gam oo fudina naanje dow yeeddube e hallube. Oo tobina bo diyam gam foonnitiibe e be foonaaki. <sup>46</sup> To oon jidi yidube on tan, riiba kaye keboton? Baa jaaboobe ceede faada bo e wada hande non! <sup>47</sup> To oon canna

banniraabe moodon tan, ko haaynii ume gadoton don? Baa heeferbe bo e wada hande non! <sup>48</sup> To non, laatee hebbube, hande no Baaba moodon mo dow kammu laatorii kebbudo.»

## 6

### *Ekkitinol dow wallugo talakaabe*

<sup>1</sup> «Kakkilee, to on kollitee gadu moodon geetu yeeso himbe gam ji'edon. To on gadii dum, on kebataa riiba to Baaba moodon gonudo dow kammu.

<sup>2</sup> To non, to aa hokka sadaka, taa fiyu lenjuru gam himbe yi'ee. Non non nun munaafitiibe wadata der cuudi baajordi, e sera laabi. Bee gada dum gam himbe mana be. E goonja batanmi on, be kebii ko riiba maabbe. <sup>3</sup> Amma, to aa hokka sadaka, taa accu junjo maa nano anna ko nyaamo wadata. <sup>4</sup> To a wadii dum, sadaka maa laatoto e cuudiidum. Den Baaba maa ji'oovo ko woni der cuudiidum, yobete dum.»

### *Ekkitinol dow du'aare*

(Luka 11.2-4)

<sup>5</sup> «To oon du'oo, to on gaddee hande no munaafitiibe wadata. Kambe bee jida du'aago e darorii der cuudi baajordi, e ate cele, gam himbe fu yi'a be. E goonja batanmi on, be kebii riiba maabbe ko. <sup>6</sup> Amma an, to aa du'oo, naatu suudu maa, maabbaa dammugal, eelaa Baaba maa e cuudiidum. Den, Baaba maa ji'oovo ko woni der cuudiidum, yobete dum.

<sup>7</sup> To oon du'oo, to on duudinee haalaaji di galaa nafuwe hande no heeferbe wadata. Bee miili to be duudinii haalaaji, Alla toontoto be. <sup>8</sup> Gam majjum to on nandee e maabbe, gam Baaba moodon e anni ko kaajadon diga on eelay dum.» <sup>9</sup> «Nani do no haani du'orodon:

"Baaba amen tawaado dow kammu, inne maa e senii."

<sup>10</sup> Laamaare maa wara.

Sago maa laatoo dow leydi,

hande no jo laatorii dow kammu.

<sup>11</sup> Hokku men nyaamdu keyannu men hanne.

<sup>12</sup> Yaafana men hakke amen,

hande no minon bo men jaaforanto  
woofananbe men.

<sup>13</sup> Taa accu men naata der jarbeeji,  
amma hisin men diga e Kalludo.  
[Gam an nun laamaare, e baawde,  
e teddujal fu woodani faa abada.  
Aami!]”

<sup>14</sup> To on jaafanake himbe boofi  
mum, Baaba moodon gonudo dow  
kammu yaafanto on onon bo.

<sup>15</sup> Amma to on jaafanaaki himbe,  
Baaba moodon bo yaafantaako on  
boofi moodon.»

#### *Yeesu e ekkitina dow suumayeere*

<sup>16</sup> «To oon cuumoo, to on jurmiki-  
nee hande no munaafitiibe wadata.  
Bee jiba geese maabbe gam himbe an-  
nita bee cuumii. E goona batanmi  
on, be kebii ko riiba maabbe. <sup>17</sup> Amma  
an, to aa suumii, sulma, bujodaa  
wardi. <sup>18</sup> Den himbe annitintaa  
naa aa suumii. Amma Baaba maa  
mo yi'ataake tan anni. Baaba maa  
ji'oovo ko gadudaa der cuudiidum,  
kanko yobetee.»

#### *Jawdi dow kammu* (Luka 12.32-34)

<sup>19</sup> «To on kawritanee ko'e mon  
jawdi der duuniyaaru, to mooyi e  
guyuhon biisata ni, dum bo to wuybe  
yulata cuudi mon, wujja ni. <sup>20</sup> Amma  
kawritanee ko'e mon jawdi dow  
kammu, to guyuhon e mooyi biisataa  
ni, wuybe bo hebataa wujja ni. <sup>21</sup> Gam  
to jawdi maa woni, don berne maa bo  
wonoto.»

#### *Haala jaynjol e niwre* (Luka 11.33-36)

<sup>22</sup> «Gite woni fitilla bannu. To gite  
maa e yandi, bannu maa fu, wonoto  
der jaynjol. <sup>23</sup> Amma to gite maa  
yandaa, bannu maa njol fu, njol wonoto  
der niwre. Den, to jaynjol gonunjol  
der maa laatike niwre, a yi'ii don no  
niwre mawniri!»

#### *Alla e jawdi* (Luka 16.13)

<sup>24</sup> «Walaa baawoowo ko jagganii  
joomiraabe dido, gam o wanyan oo  
do, o yida oo to, o takkontiran e oo  
do, o yawoo oo to. On baawataa ko  
jagganii Alla, e jawdi.»

#### *Hoolaago Alla* (Luka 12.22-31)

<sup>25</sup> «Gam majcum bi'anmi on: To  
on cukulanee yonkiji moodon dow  
ko nyaamoton e ko jaroton. To  
on cukulanee galli moodon dow ko  
bornotodon. Yonki buraa nyaamdu  
na? Bannu buraa koltal na? <sup>26</sup> Daaree  
pooli piirooji: Di aawataa, di dug-  
gataa, di galaa rummuure. Amma  
e non, Baaba moodon gonudo dow  
kammu e nyaanna di. On buraa pooli  
teddujal na? <sup>27</sup> Moy e moodon der  
billaaje mum waawata ko beydi balde  
mum, baa mayyande woore?»

<sup>28</sup> To non, gam ume ko oon  
cukulana kolte? Daaree no pinniji  
gese mawnirta: Di mottataa, di  
cannyataa. <sup>29</sup> Amma mii bata on,  
baa Suleymaanu e teddujal mum  
fu, bornaaki kolte boofude hande  
no pinniji din gootel mum. <sup>30</sup> To  
Alla e holtina kudooji ladde tawaadi  
hanne, jaano di bullee yiite, o holt-  
intaa on buraa non non na? Onon  
be goondinki paanduki! <sup>31</sup> To on  
cukulee bi'on: «Ume nyaameten?  
Ume jareten? Ume bornotoden?»  
<sup>32</sup> Gam kujje dee, heeferbe nun  
daartata de. Amma Baaba moodon  
gonudo dow kammu, e anni oon  
goodi haaje majje. <sup>33</sup> Daartee aran  
Laamaare Alla, e foonnitaare makko.  
Den ko horii fu, on beydante dum.  
<sup>34</sup> To on cukulanee gam jaano, jaano  
sukulanto hoore mum. Nyalaane fu,  
toora mum heyii dum.»

## 7

#### *Hiitaago wobbe* (Luka 6.37-38, 41-42)

<sup>1</sup> «To on kiitee wobbe, gam to Alla  
hiitoo on. <sup>2</sup> Gam no kiitoridon wobbe,  
non kiitortedon. Etorde etirandon  
wobbe, kayre etirantedon. <sup>3</sup> Ume  
wadi go aa daara kudeel der itere  
banniraawo maa, go a faamanay  
legga gonuja der itere maa? <sup>4</sup> Noy  
baawirtaa ko wi'i banniraawo maa:  
“Accu mi ikkinanee kudeel gonunel  
der itere maa”, nani bo, legga e woni  
der ne maa? <sup>5</sup> Munaafitijo, ikkin  
legga gonuja der itere maa taw, den

gite maa laabān, kebāa no ikkinirđaa kudeel gonuŋel der itere banniraawo maa.

<sup>6</sup> To on kokkee dawaadi ko senii, gam to dī bittoy dī ḥata on. To on cankitee kaaye moodon dime yeeso afaaji, gam to dī jaabū de.»

*Alla e toontoo eelanbe dum  
(Luka 11.9-13)*

<sup>7</sup> «Eelee, on kebān, daartee, on jiitan, cilminee, on mařbitante.

<sup>8</sup> Gam eeloowo fu, heban, daartoowo fu, yiitan, piyoowo dammugal fu, mařbitante. <sup>9</sup> Moy caka moodon to 6iyum eelii dum peen, hokka mo hayre? <sup>10</sup> Dum bo to o eelii mo linnjol, o hokkan mo boddi? <sup>11</sup> Onon hallube, oon baawi hokkugo 6ibbe moodon dokke boodde, hakko Baaba moodon gonudo dow kammu. Oo hokka eelanbe mo fu dokke boodde.

<sup>12</sup> Gam majcum ko jidudon himbe wadana on fu, onon bo, gadanee 6e dum. Kanjum woni ekkitinol tawreeta e dewte annabiibe.»

*Dammugal paanduŋal  
(Luka 13.24)*

<sup>13</sup> «Naatiree dammugal paanduŋal, gam dammugal jaajunjal e laawol koyuŋol, e yaara der halkere, himbe duubbe nun tokki ȳol. <sup>14</sup> Amma dammugal paanduŋal, e laawol billiŋol, e yaara to yonki, yiitube ȳol duudaa.»

*Hakkilango annabiibe fewrekuuþe  
(Luka 6.43-44)*

<sup>15</sup> «Kakkilanee annabiibe fewrekuuþe. Be garan to moodon, bee bornii guri baali, amma der mařbe, bee laati bu'i ladde bonudi. <sup>16</sup> E gadu mařbe annitirton 6e. Innabooje borataake dow gi'e, ibbe bo borataake dow gi'e danehi. <sup>17</sup> Leggal booduŋal fu riman 6ibbe boodde, amma leggal kalluŋal riman 6ibbe kallude.

<sup>18</sup> Leggal booduŋal waawataa ko rimi 6ibbe kallude, nun bo leggal kalluŋal waawataa ko rimi 6ibbe boodde. <sup>19</sup> Leggal fu ȳal rimataa 6ibbe boodde wudditinte, faddee der yiite.

<sup>20</sup> Hande non, annitirton 6e diga e gadu mařbe.»

*Mi annaa on abada  
(Luka 13.25-27)*

<sup>21</sup> «Hinaa wi'ooþe am "Joomiraawo, Joomiraawo" fu naatata Laamaare Alla, sey wadoobe ko Baaba am gonudo dow kammu yidi tan.

<sup>22</sup> Nyalaane darŋal, duubbe wi'an am: "Joomiraawo, Joomiraawo! E inne maa nun men gadiri annabaaku. E inne maa nun men diiwiri ginnaaji. E inne maa nun men gadiri haaynaareeji duuddsi." <sup>23</sup> Wakkati mum, mi toontoto 6e: "Mi annaa on abada. Boddee am, onon wadoobe ko halli!"»

*Cuudī dīdī  
(Luka 6.46-49)*

<sup>24</sup> «Hande non, neddo fu kettiniido haala am, go e gollira ka, e nandi e neddo kakkildo, mahudo suudu mum dow teapaare. <sup>25</sup> Diyam tobi, gooruuj hebbi, keni mawdī wifi dow maggol. Amma ȳol yanay, gam dow teapaare nun ȳol daddaa. <sup>26</sup> Amma kettiniido haala am fu, go tokkay ka, e nandi e neddo mo walaa hakkillo, mahudo suudu mum dow jaaneeri. <sup>27</sup> Diyam tobi, gooruuj hebbi, keni mawdī wifi dow maggol. Den ȳol yani yanande mawne.»

*Baawde Yeesu*

<sup>28</sup> No Yeesu heennyi waajuji din, haaynaare nannji jama'aare puy gam waaji makko. <sup>29</sup> Gam o janŋinirii 6e e baawde, hinaa hande no moodibbe tawreeta janŋinirta.

## 8

*Yeesu nyawtii ceccefo gom  
(Marku 1.40-45; Luka 5.12-16)*

<sup>1</sup> Yeesu jippoyii diga dow waanne, go jama'aare duunne e tokki mo.

<sup>2</sup> Wakkati mum, ceccefo gom wari, jicci yeeso makko, wi'i mo: «Joomiraawo, to aa yidi, a waawan ko nyawtimmi.»

<sup>3</sup> Yeesu foorti junŋo mum, meemi mo, wi'i: «Mii yidi, nyawta!» Don maa don, gorko on nyawtii. <sup>4</sup> Den Yeesu wi'i mo: «Hakkil! Taa batu ka goddo. Amma yahu holloy hoore maa limaamijo. Den, gadaa sadaka ka

Muusa wi'i on gadon, gam anninaa 6e a yoofake.»

*Yeesu nyawtii jaggiido hooreejo soogeeji Roma*

(Luka 7.1-10; Yuhaana 4.4-54)

<sup>5</sup> Yeesu e naata siire Kafarnahum, don hooreejo soogeeji gom 6attii mo, eeli mo, wi'i: <sup>6</sup> «Joomiraawo, jaggiido am na'on fukkii wuro, yandaa, faa juude e koyde fu waatii, oo naawee sanne!» <sup>7</sup> Yeesu wi'i mo: «Mi yahan, mi nyawta mo.» <sup>8</sup> Amma hooreejo soogeeji on toontii, wi'i: «Joomiraawo, mi fotay naataa wuro am. Amma batu woliine woore tan, jaggiido am yoofoto. <sup>9</sup> Min e hoore am, mii woodi mawbe 6e downtanii mi, min bo mii woodi downtaniibe am. To mi wi'i, oo do, "yahu", o yahan. To mi wi'i, oo to, "war", o waran. To mi wi'i, jaggiido am, "wadu nii", o wadan.»

<sup>10</sup> No Yeesu nani ka, haaynaare nannji dum, wi'i tokkube dum: «E goonja batanmi on, mi yi'ay iri goondinki kii do dow goddo, baa der Isira'iilaabe. <sup>11</sup> Mii bata on, duubbe waran diga lettugal e gorgal. Be joododo e Iburahiima e Isiyaaku e Yaakuubu, 6e nyaamda der Laamaare Alla. <sup>12</sup> Amma laatiibe biibbe Laamaare, faddete yaasi, der niwre. Ton 6e bullata, 6e yakkontira nyiiye.»

<sup>13</sup> Baawo mum, Yeesu wi'i hooreejo soogeeji on: «Hootu! Dum laatanee hande no goondinirdaa.» Wakkati mum, jaggiido makko yoofii.

*Yeesu nyawtii nyawbe duubbe*

(Marku 1.29-34; Luka 4.38-41)

<sup>14</sup> Yeesu yahi wuro Piyer. O tawi esiraawo Piyer debbo e fukkii, e yontaa. <sup>15</sup> Yeesu meemi junjo makko, yontere nen acci mo. Den o ummii, oo jagganoo 6e.

<sup>16</sup> No kiikiide wadi, Yeesu wad-danaa himbe duubbe, 6e ginnaaji woni e mum. O riiwi di e haala makko, o nyawti nyawbe fu. <sup>17</sup> Hande non haala annabaaku Esaaya heb-biri, ka o wi'i: «O jabii roonaago tampe meeden, o nyawtii nyawuuji meeden.»

*No haani Yeesu tokkiree*

(Luka 9.57-60)

<sup>18</sup> Yeesu yi'i jama'aare fuunne e huuritii dum, o wi'i aahiiibe makko 6e jola fonjo far to. <sup>19</sup> Don Moodibbo tawreeta gom 6attii mo, wi'i: «Moodibbo, mi tokkete to jahataa fu.»

<sup>20</sup> Yeesu wi'i mo: «Dondondehon e woodi gayde, pooli bo e woodi dadda mum, amma Bii neddo woodaa to fukkinta hoore mum gam siwtoo.»

<sup>21</sup> Goddo diga caka aahiiibe wi'i mo: «Joomiraawo, accu mi yaha, mi uwaa baaba am taw.»

<sup>22</sup> Yeesu toontii mo, wi'i: «Tokkam, accu maaybe uwa maaybe mum.»

*Yeesu deyyitinii hennu*

(Marku 4.31-41; Luka 8.23-25)

<sup>23</sup> Yeesu naati der laana diyam, go aahiiibe makko e tokki mo. <sup>24</sup> Don maa don, hennu mawkol ummii e wifa dow maayo. Nol wifi, faa gal-maaji diyam e yidi mutina ja. Amma Yeesu e daani. <sup>25</sup> Aahiiibe 6attii mo, finnini mo, wi'i: «Joomiraawo, faaba men! Men na'on kalka!»

<sup>26</sup> O toontii 6e, o wi'i: «Gam ume ko kuludon? Onon 6e goondinki paanduki!» Den, o ummii, o falmi hennu e maayo. Dum yeewi siriw!

<sup>27</sup> Be fu, haaynaare nannji 6e, bee bi'a: «Iri moy nun oo do, faa hennu e maayo e downtanoo mo?»

*Yeesu nyawtii ginnaajiiibe dido*

(Marku 5.1-20; Luka 8.26-39)

<sup>28</sup> Yeesu joli fonjo maayo, yottii der leydi Gadarena. Don worbe dido woodube ginnaaji wurtii e caabeeje, fotti e makko. Bee kunnii puy, faa goddo suusataa ko tokki laawol nol.

<sup>29</sup> Be darii bee bata e semme, bee bi'a: «An Biddo Alla, ume jidudaa wadugo men? A warii do gam tooraa men diga wakkati waday na?»

<sup>30</sup> Fotii darne afaaji mawne gom e durannoo takkol don. <sup>31</sup> Ginnaaji din eeli Yeesu, wi'i: «To a riiwii men, accu men naataa der darne afaaji nee do.»

<sup>32</sup> O wi'i 6e: «Jahee!» Ginnaaji din wurtii, naatoy der afaaji din. Don

maa don, darne afaaji nen fu diirtii diga takkol waanne, simmitii der maayo, yoolii e diyam.

<sup>33</sup> Duroobé afaaji din doggi, hooti wuro. Be batoy ko wadi fu, e ko wadi woodubé ginnaaji dido 6en. <sup>34</sup> Den, himbe siire nen fu wurtoy fotti e Yeesu. No 6e ji'i mo, 6e eeli mo o wurtoo leydi mabbe.

## 9

### *Yeesu nyawtii moofo (Marku 2.1-12; Luka 5.17-26)*

<sup>1</sup> Yeesu naatilaana diyam, joli, witti der siire mum. <sup>2</sup> Himbe waddani mo moofo, pukkinaado dow daago. No Yeesu yi'i goondinki mabbe, wi'i moofo on: «Suka am, tiidin berne maa! Hakkeeji maa yaafaama!»

<sup>3</sup> Den, moodibbe tawreeta wobbe yanti e miila der berde mum, e wi'a: «Gorko oo do e bata kalluka dow Alla!»

<sup>4</sup> Yeesu e anni miilooji mabbe, o wi'i 6e:

«Gam ume go oon miila miilooji kalludi dii der berde moodon? <sup>5</sup> Ume buri hoyugo? wi'ugo: "Hakkeeji maa yaafaama," naa wi'ugo: "Umma yahu?" <sup>6</sup> Amma, mii yidi paamon, no Bii neddo e woodi baawde yaafaago hakke der duuniyaaru do.» Den, o wi'i moofo on: «Umma, ettu daago maa, hootu wuro maa!»

<sup>7</sup> O ummii, o hooti wuro makko.

<sup>8</sup> No jama'aare yi'i dum, huli, darii e teddina Alla gam o hokki himbe baawde hande dee.

### *Yeesu noddii Matiye (Marku 2.13-17; Luka 5.27-32)*

<sup>9</sup> Yeesu e yawta, diga e laawol o yi'i gorko bi'eteedo Matiye e joodii to ceede faada yobetee, o wi'i mo: «Tokkam.» Matiye ummii, tokki mo.

<sup>10</sup> Baawo mum, Yeesu yahi e nyaama der wuro Matiye. Jaboobe ceede faada duubbe, e wadoobe hakke wari joodii e nyaamida e Yeesu e aahii6e mum. <sup>11</sup> No Farisaabe yi'i dum, 6e bi'i aahii6e makko: «Gam ume moodibbo moodon nyaamidinta e jaboobe ceede faada, e wadoobe hakke?»

<sup>12</sup> Yeesu nani ka, wi'i 6e: «Yandube haajaaka nyawtoowo, sey nyaw6e.

<sup>13</sup> Jahee ekkitee ko haala kaa do yidi wi'ugo: "Yurmeene nun jidumi, sadakaaji bane."» Gam mi waray noddugo foonnitiibe, amma hakkeebe.

### *Yande dow suumaye (Marku 2.18-22; Luka 5.33-39)*

<sup>14</sup> Den, aahii6e Yuhaana gadoowo batisi battii Yeesu, yami mo, wi'i: «Ume wadi minon e Farisaabe emen cuumoo, go aahii6e maa suumataako?»

<sup>15</sup> O toontii 6e, o wi'i: «Noddinaabe bangal waawan ko woni der biisere berne to jommanjo gorko e wondi e mabbe na? Nyalaane waraan de jommanjo gorko on ettetee caka mabbe. Den 6e cuumoyto.

<sup>16</sup> Walaa takkoowo lefol kesol dow wudere hiinne, gam lefol kesol foodan wudere hiinne, den cerkol mayre yaajan puy. <sup>17</sup> Kade bo innabojam kesam loowataake der jollooji guri kiiddi. To hinaa non, jollooji din pusan, innabojam reyyitoo, jollooji din bo halka. Amma innabojam kesam, sey loowee der jollooji guri kesi, gam dum fu dum dada.»

### *Suka debbo gom e debbo meemu6o toggoore Yeesu*

#### *(Marku 5.21-43; Luka 8.40-56)*

<sup>18</sup> Wakkati Yeesu woni e bata 6e ka, don hooreejo suudu waajorde gom yottii, jicci yeeso makko, wi'i: «Biyam debbo maayii, dum wadii tifere. Amma war yowu junjo maa dow makko, heba o wuura.»

<sup>19</sup> Yeesu ummii e aahii6e mum, tokki mo.

<sup>20</sup> Den debbo gom, mo lefol mum salii ko haggii diga duubi sappo e didi, yiwi bawbawre Yeesu, meemi kommulol toggoore makko. <sup>21</sup> Gam o milii der berne makko, o wi'i: «To mi he6ii meemumi baa kommulol toggoore makko, mi yoofoto.» <sup>22</sup> Yeesu yeeyitii, yi'i mo, wi'i: «Suka am, tiidin berne maa! Goondinki maa nyawtii ma.» Wakkatiire nen, debbo on yoofii.

<sup>23</sup> Yeesu yottii wuro hooreejo waa-jorde on. O yi'i fuuroobe puuraadī maayde e himbe wulloobe. <sup>24</sup> O wi'be: «Burtee diga do. Suka on maayay, o daani nun.» Be darii bee jala mo. <sup>25</sup> No himbe wurtinaa yaasi, o naati der suudu, o nannjì junno suka debbo, go o ummii. <sup>26</sup> Habaru majjum sank-tii toy fu der leydi nin.

#### *Yeesu wuntinii wumube dido*

<sup>27</sup> No Yeesu yawtata, wumube dido tokki mo, e bata e daane towne, e wi'a: «Bii Dawda, yurma men!»

<sup>28</sup> No o naati suudu, wumube ben battii mo, o wi'i be: «Oon goondini mi waawan ko wadi dum na?» Be toontii mo, be bi'i: «Oo, Joomiraawo, emen goondini.» <sup>29</sup> Den, o meemi gite mabbe, o wi'i: «Dum laatanoo on hande no goondinirdon.» <sup>30</sup> Den be bumti. O waggini be, o wi'i: «To on batee ka baa goddo.» <sup>31</sup> Amma no be burtii, be jahi bee cankita habaru makko der leydi nin fu.

#### *Yeesu nyawtii muumo*

<sup>32</sup> No wuntinaabe ben wurtotoo, Yeesu waddanaa gorko mo ginnool muumidini. <sup>33</sup> O riiwi ginnool ηολ, muumo on yanti e bata. Jama'aare fu haaydinii, e wi'a: «Iri dum do meeday ko yi'aa der Isira'iila!» <sup>34</sup> Amma Farisaabe wi'i: «E baawde hooreejo ginnaaji nun o riiwirta ginnaaji!»

#### *Yeesu yurmake jama'aare*

<sup>35</sup> Yeesu e woositoo der genneele mawde, e ci'on petton fu. Oo janjinia der cuudi baajordi, oo fina linjiila Laamaare Alla, oo nyawta nyawbe nyawneeji feere feere fu. <sup>36</sup> No o yi'i jama'aare, be jurminii mo, gam be comii, be tampi, bee laatii hande baali di galaa duroowo. <sup>37</sup> Den, o wi'i aahiibe makko: «Ko ruggetee e duudi, amma ruggoobe duudaa. <sup>38</sup> Eelee Joomiraawo dugge lildaa ruggoobe der to ruggantee.»

## 10

#### *Aahiibe Yeesu sappo e dido* (Marku 3.13-19; Luka 6.12-16)

<sup>1</sup> Yeesu noddi aahiibe mum sappo e dido. O hokki be baawde riiwugo ginnaaji e nyawtogo nyawbe nyawuuji feere feere fu. <sup>2</sup> Inde lilaabe sappo e dido ben woni: Simon noddeteedo Piyer, e minyum Andere. Yaakuuba bii Jebede, e minyum Yuhaana. <sup>3</sup> Filippu e Bartolome, Toma e Matiye jaboowo ceede faada. Yaakuuba bii Alfee, e Taddee. <sup>4</sup> Simon tinniido gam Alla, e Yahuuda Iskariyot, jammoy-toodo Yeesu.

#### *Yeesu lili aahiibe mum sappo e dido* (Marku 6.7-13; Luka 9.1-6)

<sup>5</sup> Yeesu lili aahiibe mum sappo e dido, batii be haalaaji dii do, wi'i: «To on jahee to heeferbe, to on naatee bo der siire Samariyaabe. <sup>6</sup> Amma jahee, caka Isira'iilaabe, laattiibe hande baali majjudi. <sup>7</sup> To jahudon fu, pi-ninee, bi'on: "Laamaare Alla battike!" <sup>8</sup> Nyawtee nyawbe, pintinee maaybe, joofinee sessebbe, diiwee ginnaaji. On kebii on jobay, onon bo kokkee to on jabee godsum. <sup>9</sup> To on jaaree kanjeeri, dum bo cardi, maa bo ceede der jiibaaji moodon. <sup>10</sup> To on jogee bogooru, dum bo toggoaje didi. To on ettee pade, dum bo sawru. Gam gollotoodo e haani nyaama.

<sup>11</sup> To on garii der genni, dum bo siire gom, daartee beero geeto. Joodee to makko faa de jawtudon. <sup>12</sup> To oon naata der wuro, cannee tawaabe don. <sup>13</sup> To wuro ηον e haanani dum, jam moodon naata der maggo. Amma to ηο haananaa dum, jam moodon wittana on. <sup>14</sup> To on jaabaaka, on kettinanaaka bo, burtee don, piddon sollaare koyde moodon. <sup>15</sup> E goonja batanmi on: "Nyalaane darnjal, kiita Sodoma e Gomora suran hoyugo dow kiita siire nen."»

#### *Tooraaji garooji*

#### *(Marku 13.9-13; Luka 21.12-17)*

<sup>16</sup> «Kettineel! Mii lila on hande baali caka bu'i. To non, laatee yoyube hande bolle, laatodon be walaa gacce hande tantabaraaji. <sup>17</sup> Kakkilanee ko'e moodon e himbe, gam be jaaran on yeeso kiitorde, be piya on looci der cuudi mabbe baajordi. <sup>18</sup> Be jaaran on

yeeso mawþe leydi, e laamiiþe genni, sabbu am. On laatanto am seedeeþe yeeso mabþe, e yeeso heeferþe. <sup>19</sup> To on jaaraama yeeso hiitotoobe, to on miilee no batiroyton e ka batoyton. Gam on kakkete ka batoyton wakkati mum. <sup>20</sup> Onon bane batata, Ruuhu Baaba moodon nun batata diga e moodon.

<sup>21</sup> Mawniraawo ummanto miiraawo, acca o waree. Baaba bo wadanan dum biþþe mum. Biþþe bo ummanto saareeji mum, wada dabare gam þe baree. <sup>22</sup> Himþe fu wanyan on gam am. Amma munyudo faa heennyitirde, joomum hisinte. <sup>23</sup> To on tooraama e genni nii ðo, doggiree nii to. E goona batanmi on, on keenyataa woositaago genneele Isira'iila, go Bii neddo wara.

<sup>24</sup> Aahijo burataa moodibbo mum, maccudo burataa joomiraawo mum.

<sup>25</sup> E woodi aahijo laatoo hande moodibbo mum, maccudo bo, hande joomiraawo mum. To hooreejo wuro noddamaa "Beljebul" hakko himþe wuro makko!»

### *Hoolaago Alla (Luka 12.2-9)*

<sup>26</sup> «To on kulee himþe. Ko suudii fu wurtitinto, asiiri bo suppítinto.

<sup>27</sup> Ka batumi on der niwre, battee ka caka nyalooma. Ka batadon e noppi der asiiri, piinee ka dow doomode cuudi. <sup>28</sup> To on kulee warroþe bannu, þe baawataa ko wari yonki. Amma, kulee baawoowo ko halki bannu e yonki fu der yiite jahannama. <sup>29</sup> Colon didon sippataake faranwel gootel na? Amma baa gootel makkon yanataa e leydi, to e sago Baaba moodon bane. <sup>30</sup> Onon, baa gaasaaji ko'e moodon fu e limaa.

<sup>31</sup> Gam majjum, to on kulee, gam oon buri colon duukkon tedduñal.

<sup>32</sup> Ceedaniido am yeeso himþe, min bo, mi seedanto joomum yeeso Baaba am gonudo dow kammu.

<sup>33</sup> Amma caliido am yeeso himþe fu, min bo, mi saloto joomum yeeso Baaba am gonudo dow kammu.»

### *Yeesu woni daliila ceennirgu (Luka 12.49-53; 14.26-27)*

<sup>34</sup> «To on miilee jam nun gaddumi e duuniyaaru. Mi waray gam mi wadda jam, amma kaafahi gaddumi. <sup>35</sup> Ko waddimmi woni, seennugo biððo gorko e baaba mum, biððo debbo bo e inna mum, debbo baþaado e esum debbo. <sup>36</sup> Neddo fu, himþe wuro mum nun laatotoo wayþe mum.» <sup>37</sup> «Jidudo baaba mum, ðum bo inna mum faa burinimmi, joomum fotay laataago mo am. Jidudo biððo mum gorko naa bo debbo, faa burinimmi, joomum fotay laataago mo am. <sup>38</sup> Mo etta leggal mum palaanjal tokkimmi, joomum fotay laataago mo am. <sup>39</sup> Jidudo hisina yonki mum, dullan ki, amma majjindo yonki mum gam am, hebitinto ki.»

### *Haala riiba (Marku 9.41; Luka 10.16)*

<sup>40</sup> «Jaþbiido on fu, jaþbikë am, jaþbiido am bo jaþbikë liloþdo am.

<sup>41</sup> Jaþbiido annabijjo gam oo annabijjo, joomum heban riiba ka annabiiþe hebata. Jaþbiido neddo poonniido gam oo poonniido, joomum heban riiba ka foonniitiþe hebata. <sup>42</sup> E goona batanmi on, kokkudo burðo faandugo caka aahiiþe am, diyam peewdam, baa der jarigel gootel, gam oo aahijo am, o dullataa riiba makko.»

## 11

### *Yuhaana lili aahiiþe mum to Yeesu (Luka 7.18-35)*

<sup>1</sup> No Yeesu heennyi waajaago aahiiþe mum sappo e dido waajuji ðii, o yawti diga don. Den o yahi janninoygo e waajaago caka ci'e mawde, der weccoore nen.

<sup>2</sup> Yuhaana gadoowo batisi e wonnoo der kasu, go o nani golle de Almasiihu wadata e batanee. Den o lili aahiiþe makko, <sup>3</sup> yaha yamaa Yeesu, wi'a: «An woni kaanudo wara na, naa men kedoo goddo?»

<sup>4</sup> Yeesu toontii þe, wi'i: «Jahee, battee Yuhaana ko nanudon e ko ji'udon

fu: <sup>5</sup> wumuþe e wonta, moofidinþe e yaha, sesseþþe e nyawtee, pahidinþe e nana, maayþe e finta, talakaabé bo e waajee habaru Laamaare Alla. <sup>6</sup> Barke laatanto mo mi laatanaaki daliila fergere dow goondinki mum.»

<sup>7</sup> No lilaabé ðen yawti, Yeesu fuddi batugo jama'aare haala Yuhaana, o wi'i: «Ume jahudon daaroygo der haro? Kudool ñol hennu dimmata na? <sup>8</sup> Naa ume daaroydon? Gorko borniido gineeji boodudi na? Borniibé gineeji boodudi, der wuro laamiibé nun tawetee. <sup>9</sup> Den, ume jahudon daaroygo? Annabijjo na? Oo! Mii bata on, oo ðuri annabijjo. <sup>10</sup> Kanko nun Dewte batani wi'i: "Mi lilan lilaado am yeeso maada, o moyyinanee laawol."» <sup>11</sup> «E goonja batanmi on, der ðe rewþe rimi fu, walaa burdo Yuhaana gadoowo batisi manju. Amma, burdo pettisingo der Laamaare Alla, e ðuri Yuhaana manju.» <sup>12</sup> Diga Yuhaana gadoowo batisi fuddi waajaago faa jooni, himþe e teetontira Laamaare Alla e catte. Sattuþe bo teetata ne. <sup>13</sup> Annabiibé, e dewte tawreeta fu, wadii annabaaku dow Laamaare nen faa yottii wakkati Yuhaana gadoowo batisi. <sup>14</sup> To oon jidi koolee, Yuhaana woni annabi Eliya, kaanudo wara. <sup>15</sup> Goodudo noppi fu, nana.

<sup>16</sup> Ume nun nanditiranmi himþe jaamanuru nuu ðo? Bee nandi e sukaabé joodiibé caka jayri to himþe fijata, e huuba igoobé mum, e wi'a: <sup>17</sup> "Men puuranii on puuraadi, on pijay, men jimanii on jimi bojji maayde, on cimaaki." <sup>18</sup> Gam no Yuhaana wari, o nyaamataa o yarataa, on bi'ii: "O ginnaajijjo nun." <sup>19</sup> Bii neddo warii, e nyaama, e yara. Den, himþe wi'i: "O laati nun deereeruujo, e jaroowo bagi. Oo laatii bo beldijjo jaþooþe ceede faada, e wadoobé hakke hande maþþe." Amma, hakkillo Alla e hollitoo der golle muudum.»

### *Yeesu felii genneele caliide ko tuubi (Luka 10.13-16)*

<sup>20</sup> Baawo majjum, Yeesu feli genneele de o wadi haaynaareejii duuddi

der mum ko himþe majje tuubay. O wi'i: <sup>21</sup> «Bone laatante, an Korajin! Bone laatante, an Baytisayda! Gam haaynaareejii gadaadi to moodon, to ði gadaanomaa der Tirus e Sidon, maa ðe mootikeno dooni, ðe bornii saakiho, ðe kollitira no ðe tuubii. <sup>22</sup> Gam majjum, mii wi'a on: Nyalaane darnjal, kiita Tirus e Sidon hoyan e ka moodon. <sup>23</sup> An bo Kafarnahum, aa miili a towinte faa dow kammu na? Aawo! A leesinte faa der joonne maaybe. Gam haaynaareejii gadaadi der maa, to ði gadaanomaa der Sodoma, maa siire nen na'onno faa hanne. <sup>24</sup> Gam majjum, mii wi'a on: Nyalaane darnjal, kiita Sodoma hoyan e ka moodon.»

### *Yeesu e nodda himþe gam siwtaare Luka 10.21-22*

<sup>25</sup> Wakkati mum, Yeesu etti haala wi'i: «Mii yettee Baaba, Joomiraawo mo dow, e mo leydi. A suudii woodube annal e hakkillo kujje dee, ko kollitindaa de sukahon petton. <sup>26</sup> E goonja, mi yetti maa Baaba, gam non dum fottiran maa. <sup>27</sup> Baaba am hokkii am huune fu der junjo am. Walaa annudo Biddo to hinaa Baaba. Walaa annudo Baaba bo, to hinaa Biddo, e mo Biddo yidi hollitingo dum.»

<sup>28</sup> «Garee to am on fu, onon somuþe, e rooniibé doolle teddude, mi hokkan on siwtaare. <sup>29</sup> Dowtanee am, accee mi jannjina on. Gam mii yeeddi, mii diggi, den yonkiiji mon heban siwtaare. <sup>30</sup> Gam doongal am e huyfi, ko dooninanmi on bo teddaa.»

## 12

### *Yande dow nyalaane siwteteene (Marku 2.23-28, 3.1-6; Luka 6.1-5)*

<sup>1</sup> Wakkati mum, Yeesu e aahiibé mum e falta caka gese alkamaari nyalaane siwteteene, go aahiibé makko rafo wadi dum, yanti e wooca cammeeje e yakka. <sup>2</sup> No Farisaabé yi'i dum, wi'i mo: «Daaru, aahiibé maa e wada ko haanay Wadeego nyalaane siwteteene!» <sup>3</sup> O toontii ðe, o wi'i: «E goonja on jannjay ko Dawda wadi no rafo wadi dum, e himþe mum na? <sup>4</sup> O

naati der suudu Alla, e himbe makko, 6e yakki peen cakkanaako Alla. Baa no kanko e himbe makko be goodaa laawol yakkugo ko. Limaamiibe tan nun woodi laawol yakkugo ko. <sup>5</sup> Naa, on janjay der tawreeta Muusa, no limaamiibe gollotoobe der suudu Alla wadiri ko haanaa der nyalaane siwteteene? Amma e nun fu be gaccaaka. <sup>6</sup> Mii wi'a on e goonja, burdo suudu Alla mawnugo nun woni do. <sup>7</sup> To on paamiino ko haala Alla kaa do fillitii: "Yurmeeene jidumi, hinaa sadakaaji kiisetedi", on kuitataakono himbe 6e walaa gacce.» <sup>8</sup> Gam Bii neddo nun laatii Joomiraawo nyalaane siwteteene.»

*Yeesu nyawtii gorko mo junjo waatujo*

(Marku 3.1-6; Luka 6.6-11)

<sup>9</sup> Yeesu yawti diga don, yahi der suudu waajorde maabbe. <sup>10</sup> Gorko mo junjo waatujo gom e tawaa don, go tawaabe don yami mo yande dee do, gam heba no gaccorii mo, wi'i: «Laawol hokkii nyawtiigu wadee nyalaane siwteteene na?» <sup>11</sup> O toontii 6e, o wi'i: «To goddo moodon e woodi baalel mum, go nyalaane siwteteene nel yanti der bunnu, joomum suttoytaa nel na? <sup>12</sup> Neddo e buri baala faa to wodd! To non, laawol hokki ko woodi wadee der nyalaane siwteteene.» <sup>13</sup> Den, o wi'i gorko on: «Foortu junjo maa!»

O foorti no, no yoofii hande no njoo to. <sup>14</sup> Farisaabe wurtii, yahi dawraa dow no 6e kalkirta Yeesu.

*Annabaaku Esaaya hebbii*

<sup>15</sup> No Yeesu nani ka, yawti diga nokkuure nen, himbe duubbe e tokki mo. O nyawti nyawbe fu. <sup>16</sup> Den o wagginii 6e, to 6e batu goddo moy nun o laatii. <sup>17</sup> Dum laatike non gam haala annabi Esaaya hebbi, ka o wi'i:

<sup>18</sup> «Nani gollotoodo am mo cubumi. Kanko woni jidaado am, mo ceyorimi.

Mi jippinan Ruuhu am dow makko, o finan habaru foonnitaare dow lenyi fu.

<sup>19</sup> O yeddontirtaa e goddo, o falmataa goddo,

daane makko nanataake e laabi.

<sup>20</sup> O heltataa yommal turiijal, o nyifataa fitilleel cuurtoowel, faa nyalaane o hokki foonnitaare jaalorgal.

<sup>21</sup> Lenyi fu yowan hoolaare mum dow makko.»

*Yeesu e toontoo ka be gaccorii dum (Marku 3.19-30; Luka 11.14-23)*

<sup>22</sup> Den, Yeesu waddanaa gorko bumdo muumidindo, mo ginnool woni e mum. O nyawti mo faa muumo on e bata, e yi'a bo. <sup>23</sup> Haynaare nannji himbe fu, ko bee bi'a: «Hinaa kanko woni Bii Dawda na?»

<sup>24</sup> Amma no Farisaabe nani ka, yanti e wi'a: «E baawde "Beljebul" hooreejo ginnaaji nun o riiwirta di.»

<sup>25</sup> No Yeesu e anni miilooji maabbe, o wi'i 6e: «Laamaare fu to seennirake e haba hoore mum, ne halkan. Dum bo to siire gom, maa bo wuro gom seennirii e haba hoore mum, no wonataako. <sup>26</sup> To Seydan seennirake e riiwa Seydan, den noy laamaare makko wonortoo? <sup>27</sup> To laatike e baawde "Beljebul" nun diiwiranmi ginnaaji, bibbe moodon bo na, e baawde moy 6e diiwirta di? Gam majjum, kambe e ko'e maabbe nun laatoyttoo hiitotoobe on! <sup>28</sup> Amma to e Ruuhu Alla nun diiwiranmi ginnaaji, edum holla no Laamaare Alla warii faa to moodon.

<sup>29</sup> Naa moy waawata ko naati wuro gorko semmenteejo, teeta jawdi makko, to o habbay joomum taw. Amma to o habbi mo, o waawan ko wuuwi ko woni der wuro non fu.

<sup>30</sup> Mo wonday e am fu, ganyo am nun. Mo wallay am hawritingo, sankitan nun. <sup>31</sup> Gam majjum, mii wi'a on: himbe heban yaafuye hakkeejii mum, e kalluka ka 6e bati. Amma batudo kalluka dow Ruuhu Ceniido, yaafataake pay. <sup>32</sup> Batudo kalluka dow Bii neddo fu, heban yaafeego. Amma batudo kalluka dow Ruuhu Ceniido, yaafataake der jaamanuuru nuu do, e der jaamanuuru warannu.»

*Leggal annitirte nun diga e bïbþe  
mum  
(Luka 6.43-45)*

<sup>33</sup> «To leggal e woodi, bïbþe maggall bo woodan. To leggal woodaa, bïbþe maggall bo woodataa, gam leggal fu, diga e bïbþe mum nun annitirtee. <sup>34</sup> Bïbþe bolle pure! Noy baawirton batugo booduka, onon laatiibë hallubë? Gam ko hebbi der berne, kan nun hunnuko wurtinta. <sup>35</sup> Neddo geeto, wurtinan ko woodi diga booddum ko suudii der berne mum. Neddo kalludo bo, wurtinan ko halli diga kalludum cuudiidum der berne mum. <sup>36</sup> E goonja bi'anmi on: nyalaane darmal himbe toontoyto haalaaji baanji baanji di be bati fu. <sup>37</sup> Gam moy fu, haala mum nun wurtinta dum, dum bo ka doyya dum kiita.»

*Farisaabe e daarta Yeesu wadana  
dum kaayeefi  
(Luka 11.29-32)*

<sup>38</sup> Baawo majjum, wobbe der moodibë tawreeta e Farisaabe, wi'i Yeesu: «Moodibbo, emen jidi gadanaa men kaayeefi.»

<sup>39</sup> O toontii be, o wi'i: «Himbe jaamanuuru hallunu, sobube, e daarta kaayeefi. Be ji'ataa kaayeefi gom, to hinaa kaayeefi annabi Yonas.

<sup>40</sup> Yonas wadii nyaloomaaje tati e jemmaaje tati der reedu linjol manjol. Hande non bo Bii neddo wadirta nyaloomaaje tati e jemmaaje tati der leydi. <sup>41</sup> Nyalaane darmal, himbe Niniwe ummodoto e himbe jaamanuuru nuu do, gaccoo be. Gam be tuubii no be nani waaji Yonas. Nani bo, burudo Yonas nun woni do!

<sup>42</sup> Nyalaane darmal, laamiido debbo mo leydi hoore fudo ummodoto e himbe jaamanuuru nuu do, gaccoo be. Gam o yiwoy diga kaddin leydi, o war iettinaago haalaaji Suleymaanu kebbudi hakkillo. Nani bo, burudo Suleymaanu nun woni do!»

*Wittoygo ginnool der wuro mum  
hiinjo  
(Luka 11.24-26)*

<sup>43</sup> «To ginnool wurtike e neddo, nol yahan nol yiilitoo nokkuuje joorde, enol daarta to nol siwtoto, amma nol hebataa. <sup>44</sup> Den nol wi'an: "Mi wittinto wuro am njo eggunoomi e mum." To nol yottike, nol tawan goddo walaa der wuro njon, eno wuuwaa, eno moyyinaa faa woodi. <sup>45</sup> Den, nol wittan, nol waddaa ginnaaji jeedidi goddi burudi nol hallugo. Di naata e wuro njon, di joodoo der maggo. Heennyitirde neddo on suran arandere mum hallugo. Hande non dum laatantoo himbe jaamanuuru hallunu nu.»

*Miiraabe Yeesu e inniiko  
(Marku 3.31-35; Luka 8.19-21)*

<sup>46</sup> Wakkati Yeesu baddata e jama'aare, inniiko e miiraabe makko yottii. Be darii yaasi, bee jidi baddugo mo. <sup>47</sup> Den, goddo bati Yeesu, wi'i: «Inna maa e miiraabe maa e darii yaasi, e yidi baddugo maa.» <sup>48</sup> O toontii mo, o wi'i: «Moy woni inna am? Bey woni miiraabe am?» <sup>49</sup> O sappii aahiibë makko, o wi'i: «Inna am e miiraabe am nun do. <sup>50</sup> Miiraabe am worbe e rewbe, e inna am woni, wadoobe ko Baaba am gonudo dow kammu yidi.»

## 13

*Ballool aawoowo  
(Marku 4.1-9; Luka 8.4-8)*

<sup>1</sup> Nyaanne mum, Yeesu wurtii wuro, yahi joodoy takkol maayo.

<sup>2</sup> Jama'aare duunne e howii mo, o ummii o naati laana diyam, o joodii. Himbe fu e darii takkol maayo. <sup>3</sup> O bati be kujje duudde e ballaaji. O wi'i be: «Aawoowo nun wurtii aawoygo.

<sup>4</sup> No o aawata, awdiiri gonn yani sera laawol, pooli wari soppi ni.

<sup>5</sup> Gonn bo yani e kaaye to leydi duudaa, ni fudi don maa don, gam ni hebay to leydi luggi. <sup>6</sup> Amma no naanje nyawli, ne wuli ni. Ni yoori, gam ni walaa dad. <sup>7</sup> Gonn bo yani caka gi'e. Gi'e mawni, biddi ni.

<sup>8</sup> Gonn bo yani e leydi geeri, ni fudi, ni rimi 6ikkol: Gonn rimi gite hewre, gonn lasoy tati, gonn bo laso e sappo. <sup>9</sup> Goodudo nopp fu nana!»

*Ko acci Yeesu e badda himbe e ballaaji*

(Marku 4.10-12; Luka 8.9-10)

<sup>10</sup> Aahiiþe Yeesu battii, yami mo, wi'i: «Ume wadi ko aa baddiraa himbe e ballaaji?» <sup>11</sup> O toontii 6e, o wi'i: «Onon, on kokkaamaa faamugo asiiri Laamaare Alla, amma kambe, 6e keþay dum. <sup>12</sup> Gam goodudo nun 6eydantee faa duuda. Anni mo woodaa, baa sedda ko woodi, teetete. <sup>13</sup> Gam majcum, baddiranmi 6e e ballaaji: "Gam bee daara, amma 6e ji'ataa, Bee kettinoo, amma 6e nanataa, 6e paamataa bo." <sup>14</sup> Hande non ka Alla batunoo e hunnuko annabi Esaaya hebbiri dow maþþe: "On nanan faa wooda, amma on paa-mataa fuy, on daaran faa wooda, amma on ji'ataa fuy.

<sup>15</sup> Gam himbe lenyol ñol berde mum laatike joorde. Be cukkii noppi maþþe, 6e muunnii gite maþþe, gam to 6e ji'u to 6e nanu e noppi maþþe, hakkillo maþþe bo to faamu, hakko 6e tuuba, mi nyawta 6e."

<sup>16</sup> Amma onon, barke laatanike on, gam gite moodon e yi'a, noppi moodon bo e nana! <sup>17</sup> E goona batanmi on, annabiîe duuþþe, e foonnitiîe duuþþe yidiino yi'a ko ji'oton, amma 6e ji'ay. Be jidiino 6e nana ko nanoton, amma 6e nanay.»

*Yeesu e faamina ballool aawoowo*

(Marku 4.13-20; Luka 8.11-15)

<sup>18</sup> «Onon, kettinee ko ballool aawoowo ñol fillitii. <sup>19</sup> To neddo e het-tinoo haala Laamaare Alla, go o faamataa ka, Kalludo nun suttata ka der berne makko. Kanko nandi e awdiiri caamuni sera laawol. <sup>20</sup> Goddo e nandi e awdiiri caamuni to kaaye. Kanko to o nanii haala Alla, don maa don o jaþa ka e seyo. <sup>21</sup> Amma ka wadataa dadi der makko, wakkati sedda tan o wonoto. To billaaje, dum bo tooraaji yottake gam haala kan, o woppa ka law. <sup>22</sup> Goddo e nandi e awdiiri caamuni to gi'e woni. To o nanii haala Alla, billaaje duuniyaaru

e yidde jawdi 6idda ka, ka rimataa bikkol. <sup>23</sup> Amma goddo e nandi e awdiiri caamuni to leydi geeri. To o nanii haala Alla, o faama ka. Kanko o riman 6ikkon. Gokkon hewre, gokkon lasoy tati, gokkon bo laso e sappo.»

*Fudo kalluko der gesa alkamaari*

<sup>24</sup> Yeesu wadani 6e kade ballool gonjol, wi'i: «Laamaare Alla e nandi e gorko aawudo awdiiri geeri e gesa mum. <sup>25</sup> No himbe fu daani, don ganyo makko wari, aawi fudo kalluko caka alkamaari nin, yawti. <sup>26</sup> No alkamaari fudi e sawtina, den fudo kalluko bo suppitii. <sup>27</sup> Gollotoobe jom gesa wari, wi'i mo: "Joomiraawo, awdiiri geeri bane aawudaa der gesa maa na? Diga toy fudo kalluko koo do yiwi?" <sup>28</sup> O toontii 6e, o wi'i: "Ganyo nun wadi dum." Den, gollo-toobe 6en yami mo, wi'i: "Men jaha men doofaa fudo kalluko kon na?" <sup>29</sup> O toontii 6e, o wi'i: "Aawo, gam to oon doofaa fudo kalluko, on kawran e alkamaari. <sup>30</sup> Accee dum mawnida faa wakkati dugge yottoo. To wakkati dugge yottake, mi wi'an ruggooþe am doofaa fudo kalluko kon taw, habba ko, watta der yiite. Amma alkamaari, 6e kawrita dum der beemal am."»

*Ballool binjel mutaadihi*

(Marku 4.30-32; Luka 13.18-21)

<sup>31</sup> Yeesu wadani 6e ballool gonjol, wi'i: «Laamaare Alla e nandi e binjel mutaadihi, ñel goddo etti aawi der gesa mum. <sup>32</sup> Binjel mutaadihi 6uri bikkol ledde kara li'o fu faandugo. Amma to ñel fudi, enjel 6ura ledde kara li'o mawnugo, ñel laatoo leggal manjal faa pooli wada dadda mum dow licce maggal.»

*Balloolyuufinirdum*

(Luka 13.20-21)

<sup>33</sup> O wadani 6e ballool gonjol, o wi'i: «Laamaare Alla e nandi e yuufinirdum, dum debbo etti hawrontiri e conni etorde tati, ko ni yuufini conni laawaani nin fu.»

*Ko acci Yeesu e bata e ballaaji*

(Marku 4.33-34)

<sup>34</sup> E ballaaji nun Yeesu baddiri himbe huune dum fu. O badday be to hinaa e ballaaji. <sup>35</sup> O wadii dum gam hebbinga haala ka annabiijo batunoo, wi'i:  
 «Mi maabitan hunnuko,  
 mi bata e ballaaji,  
 mi batan, mi wurtina kujje  
 cuudinoode  
 diga ko duuniyaaru tagaa.»

### *Yeesufaantinii balloolfudo kalluko*

<sup>36</sup> Baawo majjum, Yeesu acci himbe, hooti wuro. Aahiibe makko battii, yami mo, wi'i: «Faantin men ballool fudo kalluko der gesa.» <sup>37</sup> O toontii be, o wi'i: «Aawudo aawdi booduni woni Bii neddo. <sup>38</sup> Gesa jan woni duuniyaaru. Awdiiri geeri woni fotube naata der Laamaare Alla, fudo kalluko woni, tokkubee Kalludo. <sup>39</sup> Ganyo aawudo fudo kalluko woni Ibiliisa, dugge laati nun nyalaane darjal, ruggooobe bo laatii malaykaabe. <sup>40</sup> Hande no fudo kalluko doofirtee wattee e yiite, hande non dum laatotoo nyalaane darjal. <sup>41</sup> Bii neddo lilan malaykaabe mum, wurtina doyyoobe himbe der hakke, e wadoobe ko halli der laamaare mum. <sup>42</sup> O faddan be der yiite jahannama, ton be bullata, be yakkontira nyiiye. <sup>43</sup> Amma wakkati mum, foonnitiibe jalbitinto hande naanje der Laamaare Baaba mum. Goodudo noppo fu, nana!»

### *Ballooljawdi cuudiini*

<sup>44</sup> «Laamaare Alla e nandi e jawdi cuudiini der gesa. Goddo hocciri ni, witti suuditii ni. Berne makko weli puy, den o yahi o sippoy ko o woodi fu, gam o sooda gesa jan.»

<sup>45</sup> «Faa hanne Laamaare Alla e nandi e tenkotoodo daartoowo sokiyaaje dime. <sup>46</sup> No o yi'i sokiyaaje dime, o sippoy ko o woodi fu, o soodi de.»

### *Ballool taaruwol*

<sup>47</sup> «Laamaare Alla e nandi kade e taaruwol paddaanjo der maayo, nannoy liyyi feere feereeji. <sup>48</sup> No nol hebbi, suubotoobe foodi nol, wurtini far fonjo, be joodii be cubitii

di. Be gatti liyyi booddii der killaaje, be boppi di nafataa godsum. <sup>49</sup> Hande non dum laatotoo nyaanne duuniyaaru timmata. Malaykaabe waran suttontira hallube e woodube. <sup>50</sup> Be paddan hallube der yiite manje, be bulla, be yakkontira nyiiye.»

### *Ballool kuje kese e kiidde*

<sup>51</sup> Yeesu yami be, wi'i: «On paamii huune dum fu na?» Be toontii, be bi'i: «Oo, men paamii.» <sup>52</sup> Den, o wi'i be: «Moodibbo tawreeta paamudo haala Laamaare Alla, e nandi hande jom wuro, burtinoowo huune kesum e kiiddum diga e jawdi mum.»

*Be Nasaratu salike ko goondini  
Yeesu*  
(Marku 6.1-6; Luka 4.16-30)

<sup>53</sup> No Yeesu heennyi batugo e ballaaji, o yawti diga don. <sup>54</sup> O witti genni makko to o mawni, oo waajoo der cuudi mabbé baajordi. Ko haaynaare nannji himbe hettinaniibe mo, bee bi'a: «Toy o hebi annal iri njal do, e baawde wadugo kaayeefiji dii do? <sup>55</sup> E goonja, kanko bane woni bii ceboowo ledde on na? Inniiko bane wi'etee Mariyama na? Miiraabe makko bane Yaakuuba, e Yusufu, e Simon, e Yahuuda na? <sup>56</sup> Enen e sakikiraabe makko rewbe bane wondi do na? Den, toy o hebi dum don fu?»

<sup>57</sup> Dum hadi be goondingo mo. Gam majjum, o wi'i be: «Annabijjo teddintaake der genni mum, e der wuro mum.» <sup>58</sup> O waday don haaynaareejii duuddi gam be goondinay mo.

## 14

*Maayde Yuhaana gadoowo batisi*  
(Marku 6.14-29; Luka 3.19-20, 9.7-9)

<sup>1</sup> Wakkati majjum, Eroodu hooreejo leydi Galili nani Yeesu e batanee. <sup>2</sup> O wi'i jaggiibe makko: «Yuhaana gadoowo batisi nun! O fintii. Kanjum acci oo woodi baawde wadugo kaayeefiji.»

<sup>3</sup> Tawi Eroodu hokkiino laawol Yuhaana nanjee, habbee, wattee der kasu. O wadii dum sabbu Erodiya, debbo mawniiko, Filippu. <sup>4</sup> Gam

Yuhaana wi'iino Eroodu: «Laawol hokkay maa koowaa mo.» <sup>5</sup> Eroodu e yiduno warugo mo, amma oo hula himbe, gam himbe fu e goondini no Yuhaana laati nun annabijjo.

<sup>6</sup> No nyalaane juulde dingol Eroodu yottii, bii Erodiya debbo naati e fija yeeso noddinaabe. Dum weli Eroodu puy. <sup>7</sup> O hunanii suka on, o hokkan dum huune ko yami fu. <sup>8</sup> Suka debbo on gollori ka inna mum tintini dum, wi'i Eroodu: «Wattanam do hoore Yuhaana gadoowo batisi der heedo!»

<sup>9</sup> Berne Eroodu biisi, amma, gam sabbu o hunike yeeso noddinaabe makko, o hokki hunnuko ne hokkee suka debbo on. <sup>10</sup> O lili goddo yaha wuditaa hoore Yuhaana der kasu. <sup>11</sup> Hoore nen waddaa der heedo, suka debbo on hokkaa. Kanko bo, o hokkoy inniiko. <sup>12</sup> Aahiibe Yuhaana wari etti bannu makko, uwoy. Baawo majjum, be jahi be batoy Yeesu ko wadi.

*Yeesu nyaannii himbe ujune joyo  
(Marku 6.30-44; Luka 9.10-17;  
Yuhaana 6.1-14)*

<sup>13</sup> No Yeesu nani habaru on, o solti kanko tan, o naati laana, o yahi nokkuure deyyune. Himbe nani ka, wurtoy diga ci'e mum, tokki mo e koyde. <sup>14</sup> No o wurti e laana, o yi'i jama'aare duunne, yurmeene maabbe wadi mo, den o nyawti nyawbe tawaabe don.

<sup>15</sup> No kiikiide wadi, aahiibe makko battii mo, wi'i: «Kiikiide wadii, kade bo, e ladde nun gonuden do. Accu himbe ben yawta, yaha der ci'e, soodaa ko nyaamata.» <sup>16</sup> Yeesu toontii be, wi'i: «Doole bane be jawta. Onon e ko'e moodon, kokkee be ko be nyaamata!» <sup>17</sup> Be toontii mo, be bi'i: «Peen joyo, e liyyi didi tan gooduden do.» <sup>18</sup> O wi'i be: «Gaddanee am dum do.»

<sup>19</sup> O hokki hunnuko himbe joodinee dow fudo. Den o etti peen joyo kon, e liyyi didi din, o tiggitii, o yetti Alla. O nappiti peen kon, o hokki aahiibe makko seennana jama'aare. <sup>20</sup> Be fu be nyaami be kaari. Aahiibe hawriti ko horii, dum hebbi killaaje sappo e

didi. <sup>21</sup> Nyaamube dum wadii worbe ujune joyo, rewbe e sukaabe limaaka.

*Yeesu yahii dow diyam*

*(Marku 6.45-52)*

<sup>22</sup> Don maa don, Yeesu dooli aahiibe mum naata laana, ardo, jola fonjo maayo. Wakkati mum, oo waynoo jama'aare. <sup>23</sup> Baawo no o waynodii be, o yawtiri dow waanne gam o wadaa du'aare kanko tan. Foti kikiide wadii, kanko tan bo woni ton. <sup>24</sup> Tawi laana jan woddake diga e fonjo, ko galmaaji diyam e fiya ja, gam ja jaabitinto nun hennu. <sup>25</sup> No faanii weetugo, Yeesu yottii to maabbe, e yaha dow maayo e koyde. <sup>26</sup> No aahiibe makko yi'i mo oo yaha dow diyam e koyde, kulol manjol nanni be, be bi'i: «Beelu nun!» Be darii bee kalba sabbu kulol. <sup>27</sup> Don maa don Yeesu wi'i be: «Deyyitee! Min nun, to on kulee!»

<sup>28</sup> Piyer toontii mo, wi'i: «Joomiraawo, to an nun e goonja, accu mi yaha dow diyam, mi wara to maa.»

<sup>29</sup> O toontii mo, o wi'i: «War!» Piyer wurtii laana, e yaha dow diyam, e foonnii to Yeesu. <sup>30</sup> Amma no o yi'i hennu e satti, o huli, o fuddi muttugo, den o halbi, o wi'i: «Joomiraawo, faabam!» <sup>31</sup> Don maa don, Yeesu foorti junjo mum, jogii mo, wi'i: «An mo goondinki paanduki, gam ume ko gadudaa sek?» <sup>32</sup> Be fu dido, be naati laana, den, hennu darii. <sup>33</sup> Tawaabe der laana jan fu, sujidani Yeesu, wi'i: «E goonja, a laati nun Biddo Alla!»

*Yeesu nyawtii nyawbe der leydi Genesaret  
(Marku 6.53-56)*

<sup>34</sup> Baawo no be joli maayo, be jottii leydi Genesaret. <sup>35</sup> Himbe tawaabe nokkuure nen anniti mo. Be lildi habaru der leydi nin fu, no o wari, be gaddani mo nyawbe fu. <sup>36</sup> Bee eela mo o acca nyawbe ben meema baa kommulol toggoore makko tan. Hande non bo, meemube jan fu e yoofoo.

## 15

### *Tawaanjal kaakiraabe (Marku 7.1-13)*

<sup>1</sup> Farisaabe e moodiibbe tawreeta yiwoy Urusaliima, wari to Yeesu, yami mo, wi'i: <sup>2</sup> «Ume wadi ko aahiiibe maa e waylita tawaanjal kaakiraabe meeden? Gam be lootataa juude maabbe go be nyaama.»

<sup>3</sup> O toontii be, o wi'i: «Onon bo na, ume wadi go oon baylita sariyaaji Alla no fottiranta tawaanjal moodon?»

<sup>4</sup> Gam Alla wi'i: "Teddin baaba maa e inna maa." O wi'i kade: "Jennudo baaba mum, dum bo inna mum, joomum e haani waree." <sup>5</sup> Amma onon, oon bi'a, to neddo wi'ii baaba mum, dum bo inna mum: "Ko haani mi wallitiree laatike gedu Alla, den doole bane ballitaa baaba maa e inna maa."

<sup>6</sup> Nun nun baylitirdon haala Alla gam tawaanjal moodon. <sup>7</sup> Onon munaafitiibe! Esaaya wadii annabaaku dow moodon, wi'i:

<sup>8</sup> "Lenyol ijol do, e hunnuko tan nun teddinirtammi,

amma berde maabbe e woddodii am.

<sup>9</sup> Bee cujidanammi, amma dum nafataa gam ko be janninta laati nun miilooji himbe."»

### *Ko sobinta neddo (Marku 7.14-23)*

<sup>10</sup> Den, Yeesu noddi jama'aare, wi'i be: «Kettinee, paamee faa wooda:

<sup>11</sup> Ko naatata der hunnuko neddo bane sobinta mo. Amma ko wurtoto diga e hunnuko makko, kanjum sobinta mo.»

<sup>12</sup> Go aahiiibe makko battii, wi'i mo: «Aa anni haala maada kan mettinii berde Farisaabe na?» <sup>13</sup> O toontii be, o wi'i: «Aawre fu ne Baaba am gonudo dow kammu aaway, ne doofete. <sup>14</sup> Accee be, wumuube ardiibe wumuube nun! To bumdo e ardiibumdo bannum, be fu dido, be jantan der gayka.»

<sup>15</sup> Piyer toontii mo wi'i: «Faamin men haala kan.» <sup>16</sup> Yeesu wi'i mo: «Onon bo, faa jooni on galaa faamu na? <sup>17</sup> On paamay huune ko naati e hunnuko fu, der reedu dum pa'i, den dum wurtoo na? <sup>18</sup> Amma ko

wurtoto e hunnuko fu, der berne dum yiwata, kanjum nun sobinta neddo.

<sup>19</sup> Gam diga der berne neddo nun miilooji kalludi yiwata. Den di gatta mo barol himbe, jeenu, kaaruwaaku, guyka, seedaago fewre, e batugo kalluka. <sup>20</sup> Dum don nun woni ko sobinta neddo. Amma nyaamugo lootay juude mum hande no tawaanjal holliri sobintaa neddo.»

### *Debbo Kananinkeejo goondinii Yeesu Marku 7.24-30*

<sup>21</sup> Baawo majjam, Yeesu yawti diga don yahi der jeyde Tirus e Sidon.

<sup>22</sup> Debbo Kananinkeejo, jeyaado der leydi nin wari to makko, bati e daane towne, wi'i: «Joomiraawo, Bii Dawda, yurmam! Ginnool nun toorata biyam debbo sanne!» <sup>23</sup> Amma o toontaaki mo gokka. Ko aahiiibe makko wi'i mo: «Riiwu mo, gam o accay halbugo, oo tokkiri en.» <sup>24</sup> Yeesu toontii be, wi'i: «Mi lilaaka maa to baali Isira'iila majjudi tan.» <sup>25</sup> Amma debbo on wari jicci yeeso makko, wi'i: «Joomiraawo, war wallam!» <sup>26</sup> Yeesu toontii mo, wi'i: «Dum woodaa nyaamdu sukaabe ettee, faddanee dawaadi.»

<sup>27</sup> Debbo on wi'i: «Goonja nun Joomiraawo, amma dawaadi bo e subinoo nyaamdu caamoowol to joomiraabe mum nyaamata.» <sup>28</sup> Den, Yeesu toontii mo, wi'i: «Hey debbo, goondinki maa e mawni! Dum laatanee hande no jidirdaa.» E wakkati on, biiyiliko yoofii.

### *Yeesu nyawtii nyawbe duubbe (Marku 7.31-37)*

<sup>29</sup> Yeesu yawti diga don, witti takkol maayo Galili, eenci dow waanne, joodii ton. <sup>30</sup> Himbe duubbe wari to makko, be gaddani mo layoobe, e wumuube, e moofidinbe, e muumidinbe, e nyawbe nyawuuji feere feere. Be desi be ley koyde Yeesu. <sup>31</sup> Haynaare nannji himbe, no be ji'i muumidinbe e bata, moofidinbe e yoofoo, layoobe e yaha deydey, wumuube bo e yi'a. Be teddini Alla mo Isira'iila.

*Yeesu nyaannii kade worbe ujune nayo*

(Marku 8.1-10; Matiye 14.13-21)

<sup>32</sup> Yeesu noddi aahiibe mum, wi'i: «Himbe bee e yurminoo am. Gam wadii balde tati bee gondi e am, be goodaa ko be nyaamata. Mi yidaa bo riiwugo be be jawta e rafo, gam to rafo doyyu be e laawol.» <sup>33</sup> Aahiibe makko wi'i mo: «Toy kebeten nyaamdu ko nyaannata jama'aare nee do e ladde haro do?» <sup>34</sup> O yami be, o wi'i: «Peen noyo goodudon?» Be toontii mo, be bi'i: «Peen jeedido e likkol pettol sedda.»

<sup>35</sup> Baawo majjum, o hokki hunnuko jama'aare joodoo e leydi. <sup>36</sup> O etti peen jeedido, e likkon sedda kon. O yetti Alla, o ηappiti, o hokki aahiibe makko, be ceennani jama'aare. <sup>37</sup> Be fu be nyaami faa be kaari. Be kawriti ko horii, hebbi killaaje jeedidi. <sup>38</sup> Nyaamube dum wadii worbe ujune nayo, rewbe e sukaabe limaaka. <sup>39</sup> Baawo mum Yeesu waynii be. Den, o naati laana, o yahi leydi Magadan.

## 16

*Farisaabe yamii Yeesu wadana dum kayniidum*

(Marku 8.11-13; Luka 12.54-56)

<sup>1</sup> Farisaabe e Sadukiibe wara jarbaago Yeesu. Be yami mo o wadana be kayniidum yiwudum diga kammu. <sup>2</sup> O toontii be, o wi'i: «[To on ji'ii dow kammu e wojji kiikiide, oon bi'a: "Nokkuuje woodan." <sup>3</sup> Subaka bo, to on ji'ii kammu e wojji e niibbi, oon bi'a: "Diyam tobán." Oon anni suttontirgo ko wadotoo dow kammu, amma on baaway suttontirgo maane wakkatiire nee do!] <sup>4</sup> Himbe jaamanuur hallunu, cobube, e daarta kaayeeifi. Be ji'ataa kaayeeifi gom, to hinaa kaayeeifi Yonas.»

Baawo majjum, o acci be, o yawti.

*Hakkilango munaafitaare Farisaabe e Sadukiibe*

(Marku 8.14-21)

<sup>5</sup> No aahiibe jolata fonjo maayo far to, be jeggiti ko etti peen.

<sup>6</sup> Yeesu wi'i be: «Kakkilee, deenee ko'e mon e yuufinirdum Farisaabe e dum Sadukiibe.» <sup>7</sup> Aahiiibe darii e wi'ontira hakkune mum: «Gam en ettay peen acci oo batka.»

<sup>8</sup> Yeesu anniti ka be batata, wi'i be: «Ko wadi oon badda hakkune mon, oon batana dullere moodon jogaago peen? Onon be goondinki paanduki! <sup>9</sup> E goona faa jooni on paamay na? On ciwtoray peen joyo ko ceennanmi worbe ujune joyo, e killaaje de kebbindon ko horii na? <sup>10</sup> On ciwtoray bo peen jeedido ko ceennanmi worbe ujune nayo, e killaaje de kebbindon ko horii na? <sup>11</sup> Noy wadi go on paamay no haala peen bane batananmi, wakkati bi'umi on, kakkilanee yuufinirdum Farisaabe e dum Sadukiibe?»

<sup>12</sup> Den, be paami no yuufinirdum conni peen bane o batanta, amma, ekkitinol Farisaabe e ηol Sadukiibe.

*Piyer batii Yeesu nun woni Almasi-ihu*

(Marku 8.27-30; Luka 9.18-21)

<sup>13</sup> Yeesu yahii leydi Kaysariya Filippi. O yami aahiibe makko, o wi'i: «Moy himbe wi'ata Bii neddo e laatii?»

<sup>14</sup> Be toontii mo, be bi'i: «Wobbe e wi'a, a laati nun Yuhaana gadoowo batisi. Wobbe e wi'a, an woni annabi Eliya. Wobbe kade e wi'a, an woni annabi Yeremiya, to dum bo gooto der annabiibe.» <sup>15</sup> Yeesu yami be, onon bo na: «Moy bi'oton mii laatii?»

<sup>16</sup> Simon Piyer toontii mo, wi'i: «An woni Almasiihu, Biddo Alla yonkinneejo.» <sup>17</sup> Den Yeesu ettitii haala wi'i mo: «Barke laatanii maa, an Simon bii Yonas. Gam neddo bane hollitin maa dum, amma Baaba am gonudo dow kammu hollitin maa dum. <sup>18</sup> Min bo, mii wi'ee, an woni Piyer, waato hayre. Dow hayre nen mahanmi Eklesiya am, baa joonne maaybe waawataa ko jaalii ka. <sup>19</sup> Mi hokkete maabitirgel Laamaare Alla. Ko calidaa e leydi do, salaama dow kammu. Ko jaabudaa e leydi do bo, jaabama dow kammu.» <sup>20</sup> Den, Yeesu wagginia aahiibe mum, e semme, wi'i

to 6e batu goddo, no kanko nun woni Almasiihu.

*Yeesu batanii maayde e pintol mum  
(Marku 8.31-9.1; Luka 9.22-27)*

<sup>21</sup> Diga wakkati mum, Yeesu fuddi faamingo aahii6e mum wi'i e haani o yaha Urusaliima. Ton dottiib6e e limaamii6e, e moodib6e tawreeta tooroya mo puy, 6e bara mo. Amma nyalaane tatawre, o fintan. <sup>22</sup> Den, Piyer yaari mo sera, wooltani mo wi'i: «Joomiraawo, Alla hadu dum! Iri majjum tawataa maa!» <sup>23</sup> Yeesu yeeyitii, wi'i Piyer: «An Seydan, wittu baawo am! A laati nun ko doyyatammi. Milooji maa yiway to Alla, to him6e di yiwi!»

*Tokkugo Yeesu*

<sup>24</sup> Den Yeesu wi'i aahii6e mum: «Jidudo tokkugo am fu, acca mijaanaago hoore mum, etta leggal mum palaanjal, tokkammi. <sup>25</sup> Gam jiddo hisingo yonki mum, dullan ki. Amma, majjindo yonki mum gam am, hisinan ki. <sup>26</sup> To neddo hebii huune fu der duuniyaaru do, ko yonki mum halki, ume dum nafi mo? Naa ume neddo waawata ko hokki gam sooditaago yonki mum? <sup>27</sup> Gam Bii neddo waran e teddujal Baaba mum, e malaykaabe mum. Den o yoban moy fu ko wadi der golle mum. <sup>28</sup> E goonja batanmi on, tawaabe do, wobbe mum maayataa, ko 6e ji'a Bii neddo e warida e laamaare mum.»

## 17

*Tagudi Yeesu waylitake  
(Marku 9.2-13; Luka 9.28-36; 2 Piyer 1.16-18)*

<sup>1</sup> Baawo balde jeego'o, Yeesu yahidi e Piyer e Yaakuuba e minyum Yuhaana. O yaari 6e sera, faa dow waanne towune. <sup>2</sup> Tagudi makko waylitii yeeso mabbe. Yeeso makko e jalba hande naanje, gineeji makko rawni tar hande jaynjol. <sup>3</sup> Muusa e Eliya suppitanii 6e, e badda e makko. <sup>4</sup> Piyer etti haala wi'i Yeesu: «Joomiraawo, wonaago men do e woodi. To aa yidi, mi darnan do bukaaji tati: an wooru, Muusa wooru, Eliya wooru.»

<sup>5</sup> O heennyay batugo, ko duulel jalboowel gom wari ommi 6e. Don daane gom yiwi der duulel nel, wi'i: «Oo do laatii Biddo am jidaado, mo cubumi. Kettinanee mo!»

<sup>6</sup> No aahii6e nani daane nen, 6e jani, 6e kippii e leydi, 6e kuli sanne. <sup>7</sup> Yeesu battii, meemi 6e, wi'i: «Ummee, to on kulee.» <sup>8</sup> Den, 6e banti gite, 6e ji'ay goddo, sey Yeesu tan.

<sup>9</sup> No 6e jippotoo diga dow waanne nen, Yeesu waggini 6e, wi'i: «To on battee goddo ko ji'udon, faa to Bii neddo fintii diga e maay6e.» <sup>10</sup> Den, aahii6e makko yami mo, wi'i: «Gam ume ko moodib6e tawreeta e wi'a: "Eliya nun artata wara?"» <sup>11</sup> O toontii 6e, o wi'i: «Goonja nun, Eliya nun artata wara, moyyina huune fu. <sup>12</sup> Amma mii wi'a on, Eliya wari ko. Amma 6e annitay mo, 6e gadanii mo ko 6e jidi fu. Hande non 6e toorirta Bii neddo bo.»

<sup>13</sup> Aahii6e faami no haala Yuhaana gadoowo batisi nun o batanta 6e.

*Yeesu nyawtii suka mo ginnawol toorata  
(Marku 9.14-29; Luka 9.37-43)*

<sup>14</sup> No 6e bittoy to jama'aare woni, gorko gom wari jiccii yeeso Yeesu. <sup>15</sup> O wi'i: «Joomiraawo, yurma biyam gorko! Ginnool nun woni e makko, enol toora mo puy. To njol ummanake mo, enol doyya mo der yiite, nokkun bo der diyam. <sup>16</sup> Mi yaarii mo to aahii6e maa, amma 6e baaway ko nyawti mo.»

<sup>17</sup> Yeesu toontii, wi'i: «Hey, onon him6e jaamanuuru hallunu, 6e walaa goondinki! Faa dey gondanmi e moodon? Faa dey tokkanmi munyango on? Gaddanee am mo do!» <sup>18</sup> Yeesu falmi ginnool tawaanjol der suka on, njol wurtii, o yoofii don maa don.

<sup>19</sup> Baawo majjum, aahii6e makko yami mo kambe tan, wi'i: «Ume acci men baaway ko riiwi ginnool njol?» <sup>20</sup> Yeesu toontii 6e, wi'i: «Gam goondinki moodon e faandi. E goonja batanmi on: To goondinki moodon e foti baa hande binjel mutaadihi, on baawan ko wi'i waanne nee

do: "Eggu do, jahaa to," ne eggan bo. Walaa ko tampoton wadugo.

**21** [Amma, ginnool hande ɳol do wurtataako to hinaa e du'aare, e suumaye.]»

*Yeesu batanii maayde e pintol mum de didawre*  
(Marku 9.30-32; Luka 9.43-45)

**22** No 6e boositintoo der leydi Galili, den Yeesu wi'i be: «Bii neddo wattete der juude himbe. **23** Be baran mo, amma nyalaane tatawre o fintan.»

Berde aahiibee makko biisii puy, no 6e nani ka.

*Yeesu yobii ceede faada*

**24** No Yeesu e aahiibee mum yottii Kafarnahum, jaaboobe ceede faada suudu Alla 6attii Piyer, wi'i mo: «Moodibbo moodon yobataa woni ceede faada suudu Alla?» **25** Piyer toontii, wi'i: «Oo yoba.» No Piyer naati der wuro, Yeesu arti etti haala, wi'i: «Simon, ume miiludaa? Bey nun haani yoba ceede faada? Biibbe genni nun naa hobbe?» **26** Piyer toontii, wi'i: «Hobbe nun haani yoba.» Yeesu wi'i mo: «Den, biibbe genni haanay yoba. **27** Amma, gam to en laatana himbe fergere, yahu maayo. Tuunnu malimali maa, pitodaa linjol ɳol artudaa nanjufaa. Den ɳaabaa hunnuko maggol, a tawan ceede cardi der don. Ikkinaa de, jobanaa en, min e maa.»

## 18

*Burdo manju der Laamaare Alla*  
(Marku 9.33-37; Luka 9.46-48)

**1** Wakkati majjum, aahiibee Yeesu 6attii, yami mo, wi'i: «Moy buri manju der Laamaare Alla?» **2** Yeesu noddi sukayel, darsi ɳel yeeso maabbe, **3** wi'i: «E goonja batanmi on: to on baylitaaki laatidon hande sukahon petton, on naatoyttaa der Laamaare Alla. **4** Gam majjum, leesindo hoore mum, hande sukayel ɳel do, kanko nun burata manju der Laamaare Alla. **5** Jaabbiido sukayel pettel hande ɳel do, e inne am, min nun joomum jaabbi.»

*Manju hakke*

(Marku 9.42-48; Luka 17.1-2)

**6** «Amma to goddo doyyii sukahon petton, goondinkon am, gooten mum der hakke, dum buranno hoyango mo, o habbanee namarde e daane, o faddsee caka maayo. **7** Bone laatanii duuniyaaru nuu, gam woodi ko doyyata himbe der hakke. Wadataako ko doyyata himbe waray, amma bone laatanto laatiido daliila majjum!

**8** To junjo maa, dum bo koyjal maa nun wadinte hakke, wudditin de boppaa to woddi. Dum burante woodugo, naataa aljanna e koyjal gootal, dum bo e junjo wooto, e no paddirtedaa e koyde maa didi, dum bo e juude maa didi der yiite tabitiije. **9** To bo itere maa nun wadintee hakke, doofu ne boppaa to woddi. Dum burante hoyugo naataa aljanna e itere woore, e no paddirtedaa e gite maa didi der yiite jahannama.»

*Ballool dow baalel majjunel*  
(Luka 15.3-7)

**10** «Kakkilee, to on jawee baa gooten der sukahon petton kon. Gam mii wi'a on, malaykaabe makkon, e darii wakkati fu, dow kammu e daara yeeso Baaba am gonudo dow kammu. [ **11** Gam Bii neddo warii hisingo majjube.]

**12** Kaye miiludon? To neddo e woodi baali hewre, go baala goota majji, o accataa lasooji naay e sappo e jeenay koriidi dow waanne, o daartaa majjunja ɳan na? **13** E goonja batanmi on: to o yiitii ɳa, o seyorto ɳa bura lasooji naay e sappo e jeenay koriidi, di majjay. **14** Hande non Baaba moodon gonudo dow kammu yidaa baa gooto, der sukahon kon, majja.»

*Yaafanaago banniraawo*

**15** «To banniraawo maa woofanii maa, yahu to makko an tan, kollaa mo onon dido. To o nootike, a hebitake mo. **16** Amma to o hettinaaki ka kollataa mo, den wittu, jahidaa e neddo gooto, dum bo dido, gam haala kan moyyinee yeeso seedebee dido,

dum bo tato. <sup>17</sup> To o salike hettinanaago ɓe, den batu ka Eklesiya. To o salike hettinanaago Eklesiya bo, den fu daaree mo hande keefeero, dum bo jaɓoowo ceede faada.

<sup>18</sup> E goonja batanmi on: Huune fu ko calidon e leydi do, salaama dow kammu. Ko jabudon e leydi do, jaɓete bo dow kammu.» <sup>19</sup> Mii bata on kade e goonja: «To himbe dido e duuniyaaru do nannantirii dow huune ko ɓe ee-lata, Baaba am gonudo dow kammu hokkan ɓe dum. <sup>20</sup> Gam to himbe dido dum bo tato e hawritii e inne am, mi na'on caka maɓbe.»

### Ballool gollotoodo caliido yaafaago

<sup>21</sup> Den Piyer ɓattii Yeesu, yami mo, wi'i: «Joomiraawo, de noy nun haani mi yaafano banniraawo am to o woofanii am? De jeedidi na?»

<sup>22</sup> Yeesu toontii mo, wi'i: «De jeedidi tan bane bi'umaa mi, amma de lasoy tati e sappo faa de jeedidi.

<sup>23</sup> Hande non Laamaare Alla e nandi e laamiido gom jidudo gollotoobe mum liisanoo dum jawdi muudum.

<sup>24</sup> No o fuddi liisaade, ɓe gaddani mo joganiido mo ceede cardi miliyooji ɗuuɗdi.

<sup>25</sup> Gorko on woodaa ko yobirta mo. Den, laamiido on hokki laawol o sippee, kanko e deekiiko, e sukaabe makko, e ko o woodi fu, gam o yoba nyamaane nen.

<sup>26</sup> Gollotoodo on jicci yeeso makko, eeli mo, wi'i: "Joomiraawo Munyanam, mi yobete fu!"

<sup>27</sup> Joomiraawo on yurmii mo, yaafanii mo nyamaane nen, acci mo, o yawti.

<sup>28</sup> No o wurtii, o fotti e banniraawo makko joganiido mo ceede cardi hewre. O gattii mo, o deddi daane makko, o wi'i: "Yobam ceede am!"

<sup>29</sup> Banniiko jicci, eeli mo, wi'i: "Munyanam, mi yobete!"

<sup>30</sup> Amma o jaɓay. O yaari mo o maɓboy der kasu, faa de o yobidi nyamaane nen fu.

<sup>31</sup> No banniraabe makko gollotoobe horiibe yi'i ko wadi, mone maɓbe ummii puy, ɓe jahi ɓe batoy joomiraawo maɓbe ko wadi.

<sup>32</sup> Den, joomiraawo on nodditii gollotoodo on, wi'i mo: "An gollotoodo kalludo!

Mi yaafanakeno maa nyamaane joganinodaa am fu, gam a sawrinii am.

<sup>33</sup> An bo, haanayno jurmodaa banniraawo maa hande no jurmoriimaa mi na?" <sup>34</sup> Mone wadi joomiiko, watti mo e juude hiitotoobe. O maɓbaa der kasu, faa de o yobidi nyamaane nen fu. Den Yeesu ɓeydi wi'i:

<sup>35</sup> "Hande non Baaba am gonudo dow kammu wadanta on to moy moodon fu yaafanaaki banniraawo mum e berne woore."»

## 19

### Ekkitinol dow ceergal

(Marku 10.1-12; Tokkitaaki. Tawreeta 24.1-4; Matiye 5.31-32; Luka 16.18)

<sup>1</sup> No Yeesu heennyi fillaaji din, o yawti diga Galili, o yahi Yahudiya, far fonjo maayo Urdun. <sup>2</sup> Jama'aare duunne e tokki mo, den o nyawti ton nyawbe.

<sup>3</sup> Wobbe der Farisaabe wari to makko, yami mo gam jarboo mo, wi'i: «Gorko e woodi laawol seera debbo mum, baa to gam daliila kaye nun na?» <sup>4</sup> O toontii ɓe, o wi'i: «On janjay ko winnaa e dewtere na? Diga fuddoode Alla tagii gorko e debbo.»

<sup>5</sup> O wi'i: "Gam majjum gorko accan baaba mum e inna mum, takkontira e debbo mum, ɓe fu dido, ɓe laatoo bannu gootol."» <sup>6</sup> Hande non ɓe laatataako kade dido, amma bannu gootol. Den kan, to neddo seennu ko Alla hawti.

<sup>7</sup> Farisaabe ben yami mo, wi'i: "Gam ume ko Muusa wi'i gorko hokka debbo derewol ceergal to oo seera mo?" <sup>8</sup> Yeesu toontii ɓe, wi'i: "Gam sabbu yoorugo berde moodon nun acci ko Muusa hokki on laawol ceeron rewbe moodon. Amma diga fuddoode, dum laataakino non." <sup>9</sup> E goonja bi'anmi on, ceerudo debbo mum to hinaa gam daliila jeenu, to o hoowi goddo, o wadii jeenu."

<sup>10</sup> Aahiiibe makko wi'i mo: "To non non nun haala gorko e debbo laatii, gomma to neddo banju." <sup>11</sup> Yeesu toontii ɓe, wi'i: "Himbe fu bane waawata ko jaɓi haala kan, sey ɓe Alla hokki

dum tan. <sup>12</sup> E woodi rimaabe e laati waatoraaabe. Wobbe bo himbe nun watti be dum. Wobbe kan banjataa gam daliila Laamaare Alla. Baawudo ko jaabi haala kan fu, jaaba!»

*Yeesu du'anake sukahon petton  
(Marku 10.13-16; Luka 18.15-17)*

<sup>13</sup> Baawo majjum, himbe waddani Yeesu sukahon petton, gam o yowa juude makko dow makkon o du'anoo kon, amma aahiibe makko nyaasiti be. <sup>14</sup> Den Yeesu wi'i be: «Accee sukahon petton wara to am, to on kadee kon, gam Laamaare Alla laatani nun wa'ube hande makkon.» <sup>15</sup> O yowi juude makko dow makkon, den o yawti diga don.

*Yeesu e gojankeejo jom jawdijjo  
(Marku 10.17-31; Luka 18.18-30)*

<sup>16</sup> Gojankeejo gom battii Yeesu, yami mo, wi'i: «Moodibbo, boodsum ume haani mi wada, go mi heba yonki tabitiiki?» <sup>17</sup> Yeesu wi'i mo: «Ko wadi aa yamammi dow ko woodi? Alla tan woni booddo! To aa yidi hebugo yonki tabitiiki, sey tokkaa sariyaaji.» <sup>18</sup> Gorko on yami Yeesu, wi'i: «Diye nun sariyaaji din?» Yeesu toontii mo, wi'i: «Taa waru neddo, taa jeenu, taa wujju, taa seeda fewre. <sup>19</sup> Teddin baaba maa e inna maa, den jidaa banniraawo maa hande no jidiraa hoore maa.» <sup>20</sup> Gojankeejo on wi'i mo: «Mii jogii sariyaaji dii don fu. Ume nun horii kade?» <sup>21</sup> Yeesu wi'i mo: «To aa yidi latodaa kebbudo, yahu cippaa ko goodudaa, kokkaa talakaabe ceede majjum. Den a heban jawdi dow kammu. Baawo majjum, garaa tokkaa am.»

<sup>22</sup> No gojankeejo on nani haala kan, yawti e berne biisiine, gam o laati nun jom jawdijjo. <sup>23</sup> Den, Yeesu wi'i aahiibe mum: «E goona batanmi on, edum sadii jom jawdijjo naata der Laamaare Alla! <sup>24</sup> Mii battoo on ka kade, edum buri hoyugo, jelooba wurtoroo e hinere baatal, e no jom jawdijjo naatirta der Laamaare Alla.» <sup>25</sup> No aahiibe makko nani ka, haaynaare nanni dum, wi'i: «Den, moy waawata ko hisi?» <sup>26</sup> Yeesu

daari be, wi'i: «E himbe, dum don wadataako, amma to Alla, huune fu wadoto.»

<sup>27</sup> Den, Piyer etti haala wi'i mo: «Minon, men accii huune fu men tokki maa. Ume nun laatantoo men?»

<sup>28</sup> Yeesu wi'i be: «E goona batanmi on, to huune fu latinaama kesum, Bii neddo joodoto e kittaal laamaare teddujal makko. Den, onon sappo e dido tokkubé am, on joodoto dow kitteaje sappo e didi, kiitodon lenyi Isira'ililaabe sappo e didi. <sup>29</sup> Neddo fu accudo wuro mum, e sakikiraabe mum worbe e rewbe, e baaba mum, dum bo inna mum, e sukaabe mum, e gese mum, gam am, o heban ko buri dum, kade bo, o heban yonki tabitiiki. <sup>30</sup> Amma duubbe ardiibe jooni, laatoto sakitiibe, duubbe der sakitiibe jooni bo, laatoto ardiibe.»

## 20

*Ballool gollotoobe der gesa innabooje*

<sup>1</sup> «Laamaare Alla e nandi e jom gesa innabooje. O wurtii subaka kecco, gam o daarta gollotoobe, o yaara to gesa innabooje makko. <sup>2</sup> O nannantiri e gollotoobe, o yoba be nyalaane fu ceede cardi goote. Den o yaari be gesa makko. <sup>3</sup> O wurtii jaka yande jeenay, o tawi wobbe e joodii der lummo, woodaa gadeteenjal. <sup>4</sup> O wi'i be: «Jahee gollodon, onon bo der gesa innabooje am, mi yoban on ko haani,» <sup>5</sup> kambe bo be jahi. Jom gesa on witti kade caka nyalooma e yanne tati, o wadi hande non. <sup>6</sup> Baawo majjum, wakkati yanne joy, o wurtii kade. O tawi wobbe e darii, woodaa gadeteenjal. O wi'i be: «Ume wadi ko oon nyalli daraago do, on goodaa gadeteenjal?» <sup>7</sup> Be toontii mo, be bi'i: «Men kebay ettudo men golle.» O wi'i be: «Jahee onon bo gollodon der gesa innabooje am.»

<sup>8</sup> No kiikiide wadi, jom gesa on wi'i deenudo jawdi mum: «Noddu gollotoobe ben, jobaa moy fu ceede mum. Puddiraa sakitiibe, keen-nyitiraa ardiibe.» <sup>9</sup> Ettanoobe

golle deydey alaasara wari, moy maabbe fu hokkaa ceede cardi goote. <sup>10</sup> Ardinoobe etteego golle bo wari. Bee miiluno joddi maabbe buran ni bee to. Amma moy maabbe fu yobaa ceede cardi goote. <sup>11</sup> No be jobaa, bee dumbitoo dow jom gesa on, <sup>12</sup> bee bi'a: "Sakitiibe wari, yanne woore tan gollii, ko potindaa be e minon golliibe nyalaane ne fu, der naanje e guli!" <sup>13</sup> Jom gesa on toontii gooto maabbe, wi'i: "Banniraawo am, mi farkanay maa. En nannantir bane dow ceede cardi goote nyalaane fu na?" <sup>14</sup> Ettu joddi maa, dillu. Mii yidi yobugo cakitiido hande no maa. <sup>15</sup> Laawol hokkay am mi wadira ceede am no jidirmi na? A daairii am e gite kallude gam mi wadii ko woodi na?"» <sup>16</sup> Yeesu wi'i: «Hande non sakitiibe laatortoo ardiibe, ardiibe bo laatoo sakitiibe.»

*Yeesu batanii maayde e pintolmum de tatawre*  
(Marku 10.32-34; Luka 18.31-34)

<sup>17</sup> No Yeesu yahata Urusaliima e aahiiibe mum, o noddi sappo e dido ben, feere mum, o wi'i be: <sup>18</sup> «Nani een jaha Urusaliima. Ton Bii neddo wat-toyte der juude hooreebe limaamiibe, e moodibbe tawreeta. Be kiitoto mo kiita maayde. <sup>19</sup> Be gattan mo der juude heeferbe, gam be jaanca mo, be piya mo looci, be bila mo dow leggal palaanjal. Amma nyalaane tatawre, o fintan.»

*Elgal inna Yaakuuba e Yuhaana*  
(Marku 10.35-45; Luka 22.24-27)

<sup>20</sup> Den, inna bibbe Jebede e sukaabe mum 6attii Yeesu. O jicci yeeso Yeesu gam o eela dum ballal. <sup>21</sup> Yeesu wi'i mo: «Ume jidudaa?» O toontii mo, o wi'i: «Mii yidi, to a laamike, nootodaa bibbe am dido bee do, gooto joodoo nyaamo maada, gooto bo nano maada.» <sup>22</sup> Yeesu toontii, wi'i: «On annaa ko eeloton am. On baawan ko yariri jarirgel nel jarirammi na?» Be toontii mo, be bi'i: «Men baawan.» <sup>23</sup> O wi'i be: «Goonja nun, on baawan. Amma joodaago nyaamo am e nano am, min bane hokkata dum. Bee do

Baaba am siryanii joonde den nun hebata de.»

<sup>24</sup> No aahiiibe sappo horiibe nani ka, mone maabbe ummii dow banni-raabe maabbe dido ben. <sup>25</sup> Den, Yeesu noddi be, be fu, wi'i be: «Oon anni hooreebe duuniyaaru, no boni nun jogorii himbe mum. Mawbe bo e Holla himbe mum baawde. <sup>26</sup> Amma, dum wadataako hande non hakkune moodon. Jidudo laataago mawdo caka moodon fu, joomum laatoo jag-gotoodo mon. <sup>27</sup> Kade bo, jidudo ar-daago e moodon fu, joomum laatoo maccudo moodon. <sup>28</sup> Hande non, Bii neddo waray gam jagganeego, amma, jagganaago himbe waddi mo, o hokkitira yonki makko gam soodi-taago duubbe.»

*No Yeesu wuntiniri wumube dido*  
(Marku 10.46-52; Luka 18.35-43)

<sup>29</sup> Yeesu e aahiiibe mum e wurtoo Yeriko, go jama'aare duunne e tokki mo. <sup>30</sup> Wumube dido gom e joodinoo sera laawol. Be nani e wi'ee, Yeesu nun yawtata don, den be janti bee kuuba, bee bi'a: «Joomiraawo Bii Dawda, yurma men!» <sup>31</sup> Jama'aare e falma be gam be jeedoo, amma be beydi huusbogo e semme, bee bi'a: «Joomiraawo Bii Dawda, yurma men!» <sup>32</sup> Yeesu darii, noddi be, wi'i: «Ume jidudon mi wadana on?» <sup>33</sup> Be toontii mo, be bi'i: «Joomiraawo, wuntin men.» <sup>34</sup> Yeesu yurmii be, meemi gite maabbe. Don maa don be bumti, be tokki mo.

## 21

*Yeesu naatii Urusaliima*  
(Marku 11.1-10; Luka 19.28-40;  
Yuhaana 12.12-19)

<sup>1</sup> No Yeesu e aahiiibe mum faanii Urusaliima, be jottii Baytifaaji, takkol waanne wi'eteene waanne Jaytuuje. Yeesu lili aahiiibe dido. <sup>2</sup> O wi'i be: «Jahee siire wonune yeeso moodon, to oon naata ne, on tawan babba e binjel mum e habbii. Pittee di gad-danon am. <sup>3</sup> To goddo yamii on gokka fu, toontee mo: "Joomiraawo nun bukaa di." Don maa don, o accan on gaddon di.»

<sup>4</sup> Dum wadii, gam hebbinga haala ka annabijjo batuno, wi'i:

<sup>5</sup> «Batee 6isbe Siyoona, bi'on:

“Daaree, laamiido mon e wara e mon, oo diggi, oo wadsiibabba, e binjel mum.”»

<sup>6</sup> Aahiiibe ben yahi, wadi ko Yeesu bati 6e. <sup>7</sup> Be gaddi babba e binjel mum, 6e daddi toggoje mabbe dow majji, den Yeesu waddii. <sup>8</sup> Duubbe der jama'aare nen weyyiti gineiji mum dow laawol. Wobbe bo salti licce ledde, e weyyita dow laawol. <sup>9</sup> Ardiibe Yeesu, e tokkinbe mo baawo fu, e hulgina e wi'a: «Hosana, Bii Dawda! Barke laatanoo garoowo e inne Joomiraawo! Hosana Joomiraawo mo dow kammu!»

<sup>10</sup> No Yeesu naati Ursaliima, genni fu laawontirii. Himbe e yamontira, e wi'a: «Moy nun gorko oo do?»

<sup>11</sup> Jama'aare toontii, wi'i: «Yeesu annabijjo, mo Nasaratu, der leydi Galili nun.»

### *Yeesu riiwii sippoobe e soodoobe der suudu Alla*

(Marku 11.15-19; Luka 19.45-48; Yuhaana 2.13-22)

<sup>12</sup> Yeesu naatii der suudu Alla. O riiwi sippoobe, e soodoobe, o hippi taaburuuji cengotoobe ceede, e kit-taa je sippoobe tantabaraaji. <sup>13</sup> Den, o wi'i 6e: «Alla batii der Dewtere, wi'i: “Suudu am noddete suudu to du'aare wadetee.” Amma onon, on gartirii njol suudorde wuybe!»

<sup>14</sup> Wumube e layoobe wari to makko der suudu Alla, go o nyawti 6e.

<sup>15</sup> Hooreebe limaamiibe, e moodibbe tawreeta, mone mum ummi no yi'i kujje kayniide de Yeesu wadata, e no sukaabe hulginirta der suudu Alla, e wi'a: «Hosana Bii Dawda!» <sup>16</sup> Den 6e bi'i: «Aa nana ko sukaabe ben batata na?» Yeesu toontii 6e, wi'i: «Mii nana. On meeday ko jannji haala kaa do na? “A hebii maanteego diga e kunnude sukaabe, e musinoobe.”»

<sup>17</sup> Den, o acci 6e, o wurtii siire nen, o yahi Baytaniya, o waaloy ton.

### *Yeesu yaa'ike ibbi*

(Marku 11.12-14, 20-26)

<sup>18</sup> Fini mum subaka, Yeesu dawi e witta der siire, go rafo wadi mo.

<sup>19</sup> O hollirii ibbi sera laawol. O yaali to makki, amma o taway godsum, sey baafe tan. Den o bati ibbi kin, o wi'i: «A rimataa 6isbe kade faa abada!» Don maa don, ibbi kin yoori.

<sup>20</sup> No aahiiibe makko yi'i dum, haay-naare nannji dum, den 6e yami mo, 6e bi'i: «Noy ibbi kin yooriri don maa don?» <sup>21</sup> O toontii 6e, o wi'i: «E goona batanmi on: To oon goondini, on gaday seko, on gadan ko buri ko ibbi kin wadanaa. On baawan ko wi'i, waanne nee do: “Doofa diga do, yantoy der maayo,” dum laatoto bo. <sup>22</sup> To oon goondini, ko eeluson e du'aare fu, on keban dum.»

### *Yahduu6e e yama diga toy baawde Yeesu yiwi*

(Marku 11.27-33; Luka 20.1-8)

<sup>23</sup> Yeesu naati der suudu Alla. No o waajotoo, hooreebe limaamiibe, e dottiibe Yahduu6e battii, yami mo, wi'i: «E baawde dey gadirtaa kujje dee? Moy hokku maa baawde majcum?» <sup>24</sup> Yeesu toontii 6e, wi'i: «Min bo, mi yaman on yande goote. To on toontike am, mi batan on e baawde dey nun gadiranmi huune dum. <sup>25</sup> Moy lili Yuhaana wada himbe batisi? Alla nun, naa himbe?» Be baddi hakkune mabbe, 6e bi'i: «To en bi'i “Alla nun”, o wi'an: “Den, ume wadi go en goondinay Yuhaana?”

<sup>26</sup> Amma to en toontike bi'uden “himbe nun”, een kula himbe bo, gam himbe fu e daari Yuhaana hande annabijjo.»

<sup>27</sup> Be toontii Yeesu, 6e bi'i: «Men annaa.» Kanko bo, o wi'i 6e: «To non min bo, mi batataa on to e baawde dey nun gadiranmi kujje dee.»

### *Ballool rindaabe dido*

<sup>28</sup> Yeesu 6eydi wi'i: «Kaye miiluson e ballool njol do: Gorko gom nun woodunoo sukaabe worbe dido. O bati arano, o wi'i dum: “Suka am, yahu gollodaa to gesa innabooje.”

<sup>29</sup> Suka on toontii, wi'i: “Mi yahataa.” Amma baawo nii, o miijitii, o yahi.

<sup>30</sup> Baaba on noddi suka didabo, wi'i mo ka o wi'unoo arano on. Oo

don toontii, wi'i: "Woodi Baaba, mi yahan" Amma o yahay. <sup>31</sup> Der kambe cido ben, moy nun e maabbe wadi ko baaba mum yidi?» Be toontii, be bi'i: «Arano on nun.» Den, Yeesu wi'i be: «E goona batanmi on, jaaboobe ceede faada, e kaaruwaabe artan on naatoygo Laamaare Alla. <sup>32</sup> Gam Yuhaana warii caka moodon, hollii on laawol foonnitaare, on jabay haala makko. Amma jaaboobe ceede faada e kaaruwaabe goondinii mo, go onon yi'ube dum, on tuubay goondindon mo.»

### *Ballool gesa innabooje (Marku 12.1-12; Luka 20.9-19)*

<sup>33</sup> «Kettinee ballool gonnjol kade. Neddo gom nun tiggi gesa innabooje mum. O wadi kowaagol kara, o filtini ka. O wasi gayka to bissbe innabooje bidetee, o mahi suudu towukoldeenirkol der gesa ka. Baawo mum, o accani ka gollotoobe makko be gadfi haya, den o wadi jahaanjal. <sup>34</sup> No wakkati borugo innabooje yottii, o lili gollotoobe makko to reeninaabe gesa, be gaddanaa mo gedu makko der bissbe innabooje den. <sup>35</sup> Amma reeninaabe gesa jan nannji lilaabe ben, fiyi gooto, gooto bo, be bari dum, tatabo be paddi dum kaaye, be bari. <sup>36</sup> Jom gesa on liliti gollotoobe mum, burube arandeebe duudugo. Reeninaabe gesaa, wadani be no wadannoo arandeebe. <sup>37</sup> Faa sakitiine, o lili biyyiko gorko to maabbe, o wi'i: "No wadi fu, be teddinan biyam." <sup>38</sup> Amma no reeninaabe gesa yi'i mo, be bi'ontiri hakkune maabbe: "Kanko woni donoowo gesa jan. Garee baren mo, donen ja!"» <sup>39</sup> Den, be nannji mo, be paddi mo baawo gesa, be bari mo. <sup>40</sup> Jooni noo, to jom gesa innabooje on wari, noy o wadata be?»

<sup>41</sup> Be toontii mo, be bi'i: «O halkan reenube hallube ben halkere naawune. Den o hokkan wobbe gesa jan, wada haya, baawoobe ko hokki mo gedu makko, to wakkati borol bissbe fotii.»

<sup>42</sup> Baawo majjum, Yeesu wi'i be: «On meeday janjugo ko winnaa der dewtere na? "Hayre ne mahoobe woppi, kayre latii hayre jogiine maadi." Kanjum woni golle Joomiraawo, edum haaynii e gite meeden!»

<sup>43</sup> Gam majjum, mii wi'a on: «Laamaare Alla sottinte caka moodon, ne hokkee himbe lenyi janani, wadoobe ko Alla yidi. <sup>44</sup> [Neddo janudo dow hayre nen, heltoto. Mo ne yanti dow mum fu bo, muunyitinto.]»

<sup>45</sup> No hooreebe limaamiibe e Farisaabe nani ka, be paami kambe nun Yeesu wadani ballaaji dii. <sup>46</sup> Bee daarta laabi no be nannjirta mo, amma bee kula himbe, gam himbe fu e daari mo annabijjo.

## 22

### *Ballool dow bangal (Luka 14.15-24)*

<sup>1</sup> Yeesu baddi be kade e ballaaji, wi'i: <sup>2</sup> «Laamaare Alla e nandi hande laamiido gom gadudo julde bangal biyum. <sup>3</sup> O lili gollotoobe makko noddanaa mo noddinaabe julde bangal. Amma noddinaabe ben yiday warugo. <sup>4</sup> O lili kade gollotoobe makko wobbe, o wi'i be: "Bi'ee noddinaabe ben, huune fu siriyaama, ga'i e baali payudi hiisaama, huune fu gasii, be gara nyaamde." <sup>5</sup> Amma noddinaabe yeebii noddoore nen, hiinnii haajuuji mum. Oo do yawtiri gesa mum, oo to bo yawtiri daartiiru mum. <sup>6</sup> Horiibe nannji gollotoobe, toori be, wari be. <sup>7</sup> Mone laamiido ummii puy. O lili soogeeji makko yaha halkaa himbe ben, wuuda ci'e maabbe. <sup>8</sup> Baawo majjum, o wi'i gollotoobe makko: "Nafa bangal benni, amma noddinanoobe fotay nyaamugo ka. <sup>9</sup> Gam majjum, jahee to fottirde laabi, noddon be tawudon don fu wara." <sup>10</sup> Gollotoobe ben yahi to fottirde laabi, noddii be tawi don fu, hallube e woodube fu, faa suudu hebbi himbe.

<sup>11</sup> Laamiido naati gam daara noddinaabe mum. O hollirii goddo gom,

mo bornaaki gineeji ɓangal. <sup>12</sup> O battii mo, o wi'i: "Banniraawo am, noy naatirdaa do go a bornaaki gineeji ɓangal?" Amma, oo jeedii. <sup>13</sup> Den, laamiido wi'i gollotooɓe mum: "Kabbee mo, koyde e juude, boppon yaasi, der niwre. O wulla ton, o yakkontira nyiye."» <sup>14</sup> Yeesu tokki wi'ugo: «Noddaabe e ɗuuɗi, amma subaabé ɗuuɗaa.»

*Yobugo laamiido Roma ceede faada  
(Marku 12.13-17; Luka 20.20-26)*

<sup>15</sup> Farisaabe yahi baddoy dow no ɓe nannjirta Yeesu der haala mum. <sup>16</sup> Be lili aahiiɓe maabbe wobbe, e ɓe Eroodu, ɓe bi'i mo: «Moodibbo, emen anni a laati nun goonjaajo. E goonja nun janjinirtaa laawol Alla, a hulataa bo himbe, gam a ɓurontirtaa himbe. <sup>17</sup> Den, batu men ko miiludaa dow haala kaa do: Ehaani men joba laamiido Roma ceede faada naa haanay?»

<sup>18</sup> Amma Yeesu e anni miilooji berde maabbe kalludi. O toontii ɓe, o wi'i: «Onon munaafitiibe! Ume wadi ko oon daarta jammaago am? <sup>19</sup> Kollee am ceede jobirteede den.»

Be gaddani mo ceede cardi goote. <sup>20</sup> O yami ɓe, o wi'i: «Foto moy e inne moy woni do?» <sup>21</sup> Be toontii, ɓe bi'i: «Laamiido Roma nun.» Den o wi'i ɓe: «To non, kokkee laamiido Roma ko laatanii dhum, kokkon Alla bo ko laatanii dhum.»

<sup>22</sup> No ɓe nani ka o toontii, haaynaare nannji ɓe. Den ɓe acci mo, ɓe jawti.

*Pintol maaybe  
(Marku 12.18-27; Luka 20.27-40)*

<sup>23</sup> Der nyalaane woore nen, wobbe yiwoy diga e waalde Sadukiibe. Kambe nun yeddata, e wi'a maaybe fintataa. Be gari to Yeesu, ɓe yami mo, <sup>24</sup> ɓe bi'i: «Moodibbo, Muusa wi'i: "To goddo maayii rimay biibbe, minnyiiko naatta debbo on, gam o darina lenyol mawniko maayudo."

<sup>25</sup> Dum wadiino caka amen dow wobbe rindaabe jeedido. Arano banji debbo, maayi, rinday e makko. Minnyiiko naatti debbo on. <sup>26</sup> Kanko

bo o maayi, o rinday mo ɓiddo. Tatabo bo non non, faa ɓe fu jeedido ben. <sup>27</sup> Baawo maabbe ɓe fu, debbo on bo maayi. <sup>28</sup> Den, nyalaane darjal, to maaybe fintoy, moy nun e maabbe, o laatoytoo debbo mum, dow kambe jeedido ben? Gam ɓe fu ɓe koowiino mo.»

<sup>29</sup> Yeesu toontii ɓe, wi'i: «On majjii, gam on paamay Dewte, on annaa baawde Alla bo. <sup>30</sup> To maaybe fintii, worbe ɓanjataa, rewbe bo ɓanjataake, ɓe laatoto nun hande malaykaabe tawaabe dow kammu. <sup>31</sup> Dow haala pintol maaybe, on janjay ko Alla wi'i on na? O wi'i: <sup>32</sup> "Min woni Alla Iburahiiima, Alla Isiyaaku, e Alla Yaaku-ubu." Alla laataaki Alla maayube, amma Alla wuuruɓe.»

<sup>33</sup> Jama'aare hettinaniine mo, haaynaare nannji dhum e ekkitinol makko.

*Sariya buruka mawnugo  
(Marku 12.28-34; Luka 10.25-28)*

<sup>34</sup> No Farisaabe nani Yeesu muబii kunnude Sadukiibe e haala, ɓe gadhi hawriine. <sup>35</sup> Gooto maabbe, laatiido janjinoowo Sariya, yidi jarbaago Yeesu, yami mo, wi'i: <sup>36</sup> «Moodibbo, sariya kaye buri mawnugo der dewtere tawreeta?» <sup>37</sup> Yeesu toontii mo, wi'i: «Yidu Alla Joomiraawo maa e berne maa fu, e yonki maa fu, e hakkillo maa fu.» <sup>38</sup> Kanka woni sariya arana, buruka manju. <sup>39</sup> Sariya didaba nanduka e makka nani: "Yidu banniraawo maa, hande no jidirdaa hoore maa." <sup>40</sup> Ko tawreeta Muusa e dewte annabiibe batifu, e darii dow sariyaaji didi dli.»

*Almasiihu e Dawda  
(Marku 12.35-37; Luka 20.41-44)*

<sup>41</sup> No Farisaabe hawritii, Yeesu yami ɓe, wi'i: <sup>42</sup> «Ume miiloton dow Almasiihu? Bii moy nun?» Be toontii mo, ɓe bi'i: «Bii Dawda nun.» <sup>43</sup> Den Yeesu wi'i ɓe: «Noy Dawda noddiri mo "Joomiraawo?" Ruuhu Alla holli mo dhum, gam majjum o wi'i: <sup>44</sup> "Joomiraawo wi'i Joomam: Jooda nyaamo am, faa mi wada jaabaa waybe maa."»

**45** To Dawda noddii mo "Joomi-raawo", den, noy o laatortoo biyiliko?»

**46** Be fu 6e baaway ko toontii mo gokka. Diga nyaanne mum, goddo suusay ko yami mo yande godde.

## 23

*Yeesu felii moodibbe tawreeta e*

*Farisaabe*

(Marku 12.38-40; Luka 11.37-54; 20.45-47)

**1** Den, Yeesu baddi jama'aare e aahii6e mum, wi'i: **2** «Moodibbe tawreeta e Farisaabe, yowanaama janjingi tawreeta Muusa. **3** Gam majjum, nananee 6e, gadee huune fu ko 6e bi'i on. Amma to on gadee ko 6e gadata, gam bee bata, amma 6e gadataa ko 6e bat. **4** Bee kabba doolle teddude, bee doonina himbe dow balbe mum. Amma kambe, 6e jidaa meemugo de baa e kollel. **5** Ko 6e gadata fu, bee gada dum gam himbe yi'ana 6e. Kanjum acci bee binna aayaaje dow laayaaji, 6e kabba e tiide, e dow came maabbe. Bee juutina sariiji toggoanje maabbe. **6** Bee jidi joonde arandeeje to 6e noddinaama nyaamde. Bee jidi joonde burde teddugo, der cuudi baajordi. **7** Bee jidi sanneego caka jaayri to jama'aare hawritii, e noddeego "Moodibbo". **8** Amma onon, to on nootee noddedor "Moodibbo", gam moodibbo gooto tan goodudon, onon kan, on fu oon banniraabe. **9** To on noddee goddo "Baaba" e duuniyaaru do, gam Baaba gooto tan goodudon, kanko woni gonudo dow kammu. **10** To on jabee noddeego "Hooreejo", gam hooreejo gooto tan goodudon, kanko woni Almasiihu. **11** Burudo mawnugo caka moodon laatoo gollantoodo horiibe. **12** Mawnindo hoore mum fu, leesinte. Leesindo hoore mum bo, mawninte.»

*Yeesu e gacco munaafitaare*

(Marku 12.40; Luka 11.39-52; 20.45-47)

**13** «Bone laatanto on, onon moodibbe tawreeta e Farisaabe, munaafitiibe! gam oon maabana

himbe dammugal Laamaare Alla. Onon e ko'e mon on naatataa, on accay yidube naatugo bo, naata. [

**14** Bone laatanto on onon moodibbe e Farisaabe munaafitiibe! Oon teeta cuudi gowniibe, oon juutina du'aaje gam himbe mana on. Gam majjum, on kiitete kiita buruka naawugo.]

**15** Bone laatanto on, onon moodibbe tawreeta e Farisaabe, munaafitiibe! Gam oon boositoo leyde, e maayo fu, gam kebon baa gooto tokka on. To on kebii mo, laatinon mo 6ii yiiteejo, de didi, bura no moodon.

**16** Bone laatanto on, onon wumu6e ardiibe! Oon bi'a: "To neddo hunorake suudu Alla, dum laataaki godsum. Amma to o hunorake kannjeeri suudu Alla, doole o hebbina hunayeere makko." **17** Onon majju6e, e wumu6e! Ume buri mawnugo, kannjeeri na, naa suudu Alla laabinoorjol kannjeeri? **18** Oon bi'a kade: "To neddo hunorake hiisirde dum laataaki godsum. Amma to o hunorake sadaka cakkaaka dow hiisirde, doole o hebbina hunayeere makko." **19** Onon wumu6e! Ume nun buri mawnugo: sadaka kiisaaka na, naa hiisirde laabinoore sadaka kan? **20** To non kunoriido hiisirde, hunorake hiisirde e ko woni dow maggol fu. **21** Kunoriido suudu Alla, hunorake njol e Alla tawaado der mayru. **22** Kunoriido kammu bo, hunorake gurol Laamaare Alla, e Alla joodiido dow maggol.

**23** Bone laatanto on, onon moodibbe tawreeta e Farisaabe, munaafitiibe! Gam oon cutta jakka haakooji bi'eteedi maantu, e anisa, e kume, amma oon jeeboo ko buri teddugo der tawreeta, kan woni foonnaare, e endam, e goondinki. Amma to on jeebee ko horii. **24** Onon wumu6e ardiibe! To buubol yanii der jaram moodon, oon cekoo, ikkinon njol, amma oon moda jeelooba!

**25** Bone laatanto on, onon moodibbe tawreeta e Farisaabe, munaafitiibe! Gam oon layba baawo jarirkon, e baawo keede. Amma der majje e heewi huune ko wujja, e ko

teetaa. <sup>26</sup> An Farisaajo bumfo! Laybu taw der jarirkon e der keede, den baawo majje bo laaban.

<sup>27</sup> Bone laatanto on, onon moodibbe tawreeta e Farisaabe, munaafitiibe! Gam oon nandi hande caabeeje dawninaade. Yaasi majje e woodi, amma der e hebbi yiye maayube, e huune ko sobi fu. <sup>28</sup> Onon bo, hande non latidon. Dow gite himbe, oon nandi hande foonnitiibe, amma der moodon e hebbi munaafiaare, e luudaare.

<sup>29</sup> Bone laatanto on, onon moodibbe tawreeta e Farisaabe, munaafitiibe! Gam oon maha jenaale annabiibe, oon boodina caabeeje foonnitiibe. <sup>30</sup> Den oon bi'a: "To men na'onno wakkati kaakiraabe amen, men kawtataano e mabbe dow barki annabiibe sen." <sup>31</sup> Hande non, nootoridon onon nun laatii bibe warunoobe annabiibe. <sup>32</sup> To non, kebbinee golle de kaakiraabe moodon fudduno! <sup>33</sup> Onon bibe bolle pure! Noy baawirton ko dad'i yiite jahannama? <sup>34</sup> Gam majjum, mii lildana on annabiibe, e hakkilbe, e moodibbe tawreeta. On baran wobbe, tiggon wobbe, wobbe, piyon dum looci, der cuudi moodon baajordi, tooron be, der ci'e e ci'e. <sup>35</sup> Alla hiitoto on sabbu yiyam himbe foonnitiibe, baraaabe. Dum fuddan diga yiyam Habiila, poonniido, faa yiyam Jekariya, bii Barakiya, mo barudon hakkune suudu Alla e hiisirde. <sup>36</sup> E goonja batanmi on: Huune dum fu, tawan himbe jaamanuuru nuu do!

### *Yeesu yurmike himbe Urusaliima (Luka 13.34-35)*

<sup>37</sup> «Urusaliima, Urusaliima! an baroowo annabiibe, e paddooowo be Alla lildanoy maa kaaye! De duuuddum jidumi hawritingo bibe maada hande no gertogal hawritirta coppi mum ley biyeede mum. Amma on jabay. <sup>38</sup> Gam majjum, on accante genni moodon laatoo bille. <sup>39</sup> E goonja batanmi on, on ji'ataa am kade faa nyalaane bi'oyton: "Barke woodani garoowo e inne Joomiraawo!"»

## 24

*Pusol suudu Alla e keennyol duuniyaaru*

*(Marku 13.1-37; Luka 21.5-24; 17.22-37)*

<sup>1</sup> Yeesu wurtii suudu Alla, e yawta, ko aahiiibe makko battii, e holla mono suudu Alla ijol mahiraa. <sup>2</sup> Den, o wi'i be: «On ji'i huune dum fu na?» E goonja batanmi on: «Baa hayre yowataako dow wonne, dum fu, dum pusete.»

<sup>3</sup> Yeesu yahi joodoy dow waanne wi'eteene waanne Jaytuuje, den aahiiibe makko wari kambe tan, yami mo, wi'i: «Batu men dey nun dum wadata. Maane ney nun hollitinta garki maa e keennyol duuniyaaru?»

<sup>4</sup> Yeesu toontii be, wi'i: «Kakkilee, to on accee goddo majjina on. <sup>5</sup> Gam duubbe waran e inne am, be bi'a, kambe nun woni Almasiihu. Be majjinan himbe duubbe. <sup>6</sup> On nanan habaruji konuuji e rimmo konuuji e batanee, amma to on kulee! Doole nun dum wada, amma timmoode bane don taw. <sup>7</sup> Lenyol ummanto lenyol hawre. Laamaare ummanto laamaare bannun hawre. Rafo e dimmaade leydi wadan der nokkuuje godde. <sup>8</sup> Dum don fu laati nun hande fuddoode ijataware.

<sup>9</sup> Den himbe wattan on e juude wobbe gam tooredon, baredon. Lenyi fu wanyan on gam inne am.

<sup>10</sup> Wakkati mum, himbe duubbe accan goondinki, be jammontiran, be banyontira hakkune mabbe. <sup>11</sup> Annabiibe fewoobe duubbe waran, be majjinan himbe duubbe. <sup>12</sup> Hallande yahan e duuda faa yidde himbe duubbe feewta. <sup>13</sup> Amma munyudo faa timmoode, hisan. <sup>14</sup> Linjiila dow Laamaare Alla waajete der duuniyaaru fu, gam dum laatanoo lenyi fu seedaaku. Den, timmoode duuniyaaru waran.»

### *Tooraaji mawdi e wara*

*(Marku 13.14-23; Luka 21.20-24)*

<sup>15</sup> «Gam majjum, to on ji'ii "karmudum, nyiddudum", dum annabi Daniyel batannoo e darii dow

nokkuure ceniine, den sey janjoobe ka waſa hakkillo. <sup>16</sup> Den, tawaabe Yahudiya fu dogga eenca baalle. <sup>17</sup> Tawaado dow suudu bo, to wi'a jippoto etta ko woni der suudu. <sup>18</sup> Tawaado gese bo, to wittu wuro ettoyo go toggoore mum. <sup>19</sup> Bone laatanto rewbe gaambe, e musinteebe der nyalaade den! <sup>20</sup> Du'ee, gam to doggudu moodon laatoo wakkati dabbune, dum bo nyalaane siwteene. <sup>21</sup> Gam, toora mawka laatoto, hande makka meeday ko wadii diga duuniyaaru fuddi faa jooni, hande makka bo wadataa kade faa abada. <sup>22</sup> To nyalaade den guytaakano juutugo, goddo hisataano. Amma Alla guytii de sabbu subaabé mum.

<sup>23</sup> Wakkati mum, to goddo wi'ii on: "Almasiihu nani do," naa bo "o nani to," to on goondinee. <sup>24</sup> Gam almasiihuube e annabiibe fewrekuube waraan. Be gadan kaayeefiji mawdi, e haaynaareeji duuddi, gam be majjina baa e subaabé, to wadoto. <sup>25</sup> Paamee wooda, mi seedinii on dum diga dum waray.

<sup>26</sup> To goddo wi'ii on: "O na'on der haro," to on jahee ton. Naa bo to be bi'ii on: "O na'on der cuudi," to on goondinee. <sup>27</sup> Hande no maayyere maayyirta dow kammu diga lettugal faa gorgal, hande non Bii neddo bo warirta. <sup>28</sup> To baatudum woni fu, ton nun digaareeje hawritintoo."

### *Wittoyo Almasiihu*

(Marku 13.24-31; Luka 21.25-33)

<sup>29</sup> «Don maa don, baawo nyalaade billaaje den, naanje nibban, lewru accan yaynugo, koode yanan diga dow kammu, baawde gonude dow kammu fu dimmoto. <sup>30</sup> Den, maane Bii neddo hollitinto dow kammu. Lenyi himbe duuniyaaru fu simoto. Be ji'an Bii neddo e wara diga kammu, der duule, e baawde mawde, e teddujal. <sup>31</sup> Walaldu mawnu fuurete. O lilan malaykaabe makko der gooraaje leydi naay, lettugal e gorgal, soobiire e hoore fudo, gam hawritingo subaabé makko wonube der duuniyaaru fu.

### *Ballool ibbi*

(Marku 13.28-31; Luka 21.29-33)

<sup>32</sup> Paamee ko ibbi ekkitinta. To licce makki e wilita, e wada haako, oon anni dunju faanike. <sup>33</sup> Hande non, onon bo, to on ji'ii huune ko batanmi do fuddi wadugo, annitee wakkati Bii neddo faanike, oo darii dammugal wuro. <sup>34</sup> E goonja batanmi on: Himbe jaamanuuru nu do maayidintaa go huune dum fulaatoo. <sup>35</sup> Kammu e leydi heennyyan, amma haala am heennyataa faa abada.»

### *Alla tan anni nyalaane darmjal*

(Marku 13.32-37; Luka 17.26-30, 34-36)

<sup>36</sup> «Amma nyalaane e wakkati majjum, walaa annudo dum. Baa malaykaabe wonube dow kammu annaa, baa Biddo bo. Walaa annudo dum sey Baaba tan. <sup>37</sup> Hande no dum laatino der jaamanu Nuuhu, hande non garki Bii neddo bo laatoto. <sup>38</sup> Go ilam tufaana wara, himbe e nyaamanno, e yaranno, e baqanno, e baqana bibe mum, faa nyalaane Nuuhu naati laana diyam. <sup>39</sup> Be muijanaaki dum, faa ilam tufaana wari halki be be fu. Hande non garki Bii neddo bo laatorto. <sup>40</sup> Wakkati mum, worbe dido wonoto der gesa, gooto ettee, gooto accee. <sup>41</sup> Rewbe dido namidan dow namarde woore, gooto ettee, gooto accee. <sup>42</sup> To non, deenee, gam on annaa wakkati de Joomiraawo moodon warata. <sup>43</sup> Paamee kaa do: To jom wuro e anni wakkatiire ne gujjo warata jemma, o daanataako. O accataa gujjo yula suudu makko. <sup>44</sup> Gam majjum, kakkilee onon bo, gam Bii neddo waran der wakkatiire ne on miilay.»

### *Gollotoodo geeto e gollotoodo kalludo*

(Luka 12.41-48)

<sup>45</sup> «Moy woni gollotoodo kooliniido, kakkildo? Kanko woni mo joomiraawo mum yowani dum himbe wuro mum gam o hokka be nyaamdu der wakkati kaanuki. <sup>46</sup> Barke laatanto gollotoodo mo joomiraawo

mum warti tawi e hiinnii golle mum. <sup>47</sup> E goonja batanmi on: Joomiiko yowanan mo jawdi mum fu. <sup>48</sup> Amma to gollotoodo on e laatii kalludo, o wi'an der berne makko: Joomiraawo am booyan, wartay, <sup>49</sup> den o yanta oo fiya banniraabe makko gollotoobe, oo nyaamida, oo yarida e yaroobe. <sup>50</sup> Kanko, joomiiko wartan nyalaane ne o miilanay, e wakkatiire ne o annaa. <sup>51</sup> Joomiiko hiiotto mo kiita naawuka, o heba riiba e munaafitiibe. Den o wullan, o yakkontira nyiye.»

## 25

### *Ballool dow gati sappo di annaa worbe*

<sup>1</sup> «Nyalaane mum, Laamaare Alla nandan e gati sappo di annaa worbe ettudi fitillaaji mum, wurtii gam fottoyo e jommanjo gorko. <sup>2</sup> Joyo maabbe e laatii ḥaabibie, joyo bo yoyube. <sup>3</sup> ḥaabibie ben etti fitillaaji mum, amma be ettay nebbam goddam. <sup>4</sup> Yoyube kan etti fitillaaji mum, hawri e paali nebbam goddam. <sup>5</sup> No jommanjo jenji waray, be fu be ḥonji, be daani.

<sup>6</sup> Faa caka jemma, huubaajo nanaa, wi'i: "Jommanjo gorko nani, burtee, pottee e makko!" <sup>7</sup> Den be fu be pini, bee moyyina fitillaaji maabbe. <sup>8</sup> Gati joy ḥaabidi wi'i banniraabe mum yoyube: "Kokkoree men nebbam moodon sedda, gam fitillaaji amen na'on nyifa." <sup>9</sup> Yoyube toontii be, wi'i: "Aawo nebbam dam men goodi heyataa en, en fu. Jahee to sippoobe, coodee dam moodon!" <sup>10</sup> No be jawti soodoygo nebbam, jommanjo gorko yottii. Wadunoobe siri mum naatidi e makko der wuro to bangal wadata, den dammugal maabbaa. <sup>11</sup> No booyi sedda, joyo horiibe wittoy, e huuba, e wi'a: "Joomiraawo, Joomiraawo, maabitinan men!" <sup>12</sup> Amma o toontii be, o wi'i: "E goonja batanmi on, mi annaa on."

<sup>13</sup> Gam majjum Yeesu wi'i: «Deenee, gam on annaa nyalaane, dum bo wakkatiire de Bii neddo warata.»

### *Ballool gollotoobe tato (Luka 19.12-27)*

<sup>14</sup> «Dum nandan hande gorko gom ciriyido wada jahaanjal. Den o noddi gollotoobe makko, o yowani be jawdi makko. <sup>15</sup> O hokki arano maabbe ceede cardi keme joy, didabo, ceede cardi keme didi, tatabo bo, ceede cardi hewre, moy fu jaka baawde mum. Den o yawti genni makko. <sup>16</sup> Don maa don, gollotoodo kokkaado ceede cardi keme joy, yahi tenkorii de, de diibi ceede cardi keme joy godde. <sup>17</sup> Kokkaado ceede cardi keme didi bo, wadi hande non, kanko bo o riibii ceede cardi keme didi godde. <sup>18</sup> Amma kokkaado ceede cardi hewre, yahi wasi gayka, uwi don ceede joomiraawo mum hokki dum.

<sup>19</sup> No booyi, joomiraawo maabbe warti, noddi be, be liiso, be kolla no moy maabbe fu wadiri golle mum. <sup>20</sup> Kokkaado ceede cardi keme joy wari, waddi ceede cardi keme joy godde, wi'i: "Joomiraawo, ceede cardi keme joy de kokkudaa am riibake keme joy godde." <sup>21</sup> Joomiiko wi'i mo: "Golle maa woodii sanne, an gollotoodo geeto, koolaado. No a laatike koolaado e huune ko faandi, mi hokkete ko buri dum mawnugo. War naatu ceyododaa e am!" <sup>22</sup> Gollotoodo kokkanoodo ceede cardi keme didi wari kanun bo, wi'i: "Joomiraawo, ceede cardi keme didi de kokkudaa am riibake ceede cardi keme didi godde." <sup>23</sup> Joomiiko wi'i mo: "Golle maa woodii sanne, an gollotoodo geeto, koolaado. No a laatike koolaado e huune ko faandi, mi hokkete ko buri dum mawnugo. War naatu ceyododaa e am!" <sup>24</sup> Kokkaado ceede cardi hewre wari kanun bo, wi'i: "Joomiraawo, mii anni a laati nun neddo cadudo: Aa rugga ko a aaway, aa botta ko a hawritay. <sup>25</sup> Gam majjum kulumi, jahum cuudoymi ceede maa der leydi. Jabu ceede maa!" <sup>26</sup> Joomiiko toontii mo, wi'i: "An gollotoodo kalludo, ciiwaakuujo! Aa annunoo mii rugga ko mi aaway, mii botta ko mi hawritay, <sup>27</sup> den, ume wadi

ko a wattay ceede am der banki, to mi wartiino mi jaħanno de e riiba majje. <sup>28</sup> Teetee ceede makko den, kokkon goodudo ceede cardi keme joy. <sup>29</sup> Gam goodudo nun beydantee faa duuda. Amma mo woodaa, baa sedda ko woodi teetete. <sup>30</sup> Gollotoodo mo nafataa on, paddee mo yaasi der niwre, o wulla ton, o yakkontira nyiye.”

*Bii neddo hiitoto himbe nyaanne daryl*

<sup>31</sup> «To Bii neddo warii e teddujal mum e malaykaabe fu, o joodoto dow kittaal laamaare makko ɣal teddujal. <sup>32</sup> Himbe lenyi duuniyaaru fu, hawritinto yeeso makko. O seenniran himbe hande no duroovo seen-nirta baali e be'i. <sup>33</sup> O resan baali, junjo makko nyaamo, o resa be'i bo, junjo makko nano. <sup>34</sup> Den, laamiido wi'an wonube junjo mum nyaamo: “Garee, onon 6e Baaba am barkidini, jabee donju laamaare ne ciryanadon diga fuddoode duuniyaaru. <sup>35</sup> Gam rafo wadii am, on nyaannii am, mi dondaama, on jarnii am, mi laatino kodo, on bernii am. <sup>36</sup> Mi wonake funtu, on koltinii am, mi nyawii, on nyawtii am, mi maħħaamaa der kasu, on daaroyii am.” <sup>37</sup> Den, foonnitiibe toontoto mo, wi'a: “Joomiraawo, dey men ji'u maa aa rafi, men nyaannu maa, naa dey men ji'u maa aa dondii, ko men jarnu maa? <sup>38</sup> Dey men ji'u maa aa laatii kodo, men beernu maa, naa dey men ji'u maa aa woni funtu go men koltin maa? <sup>39</sup> Dey men ji'u maa aa nyawi naa bo aa maħħaa der kasu, men daaroy ma?” <sup>40</sup> Laamiido on toontoto 6e, wi'a: “E goonja batanmi on: ko gadandon gooto der burudo faandugo caka sakikiraabe am 6ee, min nun gadandon dum.”

<sup>41</sup> Baawo majjum, o wi'an wonube junjo makko nano: “Dillee woddi am, onon ya'aabe! Naatee der yiite tabitiine, desanaanej Iibiliisa e malaykaabe mum! <sup>42</sup> Gam rafo wadii am, on nyaannay am, donka wadii am, on jarnay am, <sup>43</sup> mii laatino

kodo, on beerinay am, mi wonino funtu, on koltinay am, mi nyawii, maħħaami der kasu, on daaray am.”

<sup>44</sup> Den, 6e toontoto mo kambe bo, 6e bi'a: “Joomiraawo, dey men ji'i rafo e wadée, dum bo donka e wadée, maa bo aa laatii kodo, naa bo aa woni funtu, maa bo aa nyawi, naa aa maħħaa der kasu, ko men ballay maa?” <sup>45</sup> O toontoto 6e o wi'a: “E goonja batanmi on: ko on gadanay gooto der burubé faandugo, min woni on gadanay dum.” <sup>46</sup> Den kambe, 6e jahan der billaare tabitiine, amma foonnitiibe heban yonki tabitiiki.”

## 26

*Mawbe Yahuduubē e dawra no nanjirta Yeesu*

(Marku 14.1-2; Luka 22.1-2; Yuhaana 11.45-53)

<sup>1</sup> No Yeesu heenneyi wađugo fillaaji din fu, o wi'i aahiebe makko: <sup>2</sup> «Oon anni balde didi nun horii go juulde Paska wada, Bii neddo bo wattete e juude himbe, 6e tigga mo dow leggal palaajal.»

<sup>3</sup> Wakkati mum, hooreebé limaamiibe e dottiibe wadi hawriine der wuro hooreejō limaamiibe, bi'eteedo Kayafas. <sup>4</sup> Be nannantiri 6e nanja Yeesu e yoyre, 6e bara mo. <sup>5</sup> Amma 6e bi'i: «To en gadee dum wakkati juulde, gam to himbe ummin fitina caka jama'aare.»

*Debbo gom moomii wardi dow hoore Yeesu*

(Marku 14.3-9; Yuhaana 12.1-8; Luka 7.36-50)

<sup>6</sup> Yeesu e wonuno Baytaniya der wuro Simon ceccefo. <sup>7</sup> No 6e nyaamata, don debbo gom 6attii Yeesu, e jogii faanu gadiraanjol hayre albaatiri kebbuŋol wardi, dam ceede duudde. O waanji dam dow hoore Yeesu. <sup>8</sup> No aahiebe makko yi'i dum, berde maħbe welay, 6e bi'i: «Gam ume wardi dam biisaa baanji? <sup>9</sup> Dam waawetenoo sиппeego ceede duudde, de ceennanee talakaabe.»

<sup>10</sup> Yeesu faanti ko 6e batannoo, wi'i 6e: «Gam ume ko oon toora debbo on? O wadanii am golle boodde.

**11** Gam talakaabe e wondi e moodon wakkati fu. Amma min, mi wondataa e moodon wakkati fu. **12** O moomii bannu am wardi, gam sirtyaago uwol am. **13** E goonja batanmi on: To linjila waajetee e duuniyaaru do fu, ko debbo on wadi batante, siwtorte bo.»

*Yahuuda jammake Yeesu  
(Marku 14.10-11; Luka 22.3-6)*

**14** Den Yahuuda Iskariyot, gooto der aahiiße sappo e dido, yahi to hooreebe limaamiibe. **15** O wi'i 6e: «Ume kokkoton am to mi wattanii on Yeesu der juude mon?» Be limi ceede cardilaso e sappo, 6e kokki mo.

**16** Diga wakkati majjum, oo daarta laabi no o jammortoo Yeesu.

*Yeesu nyaamii hiraane Paska e aahiiße mum  
(Marku 14.12-31; Luka 22.7-34;  
Yuhaana 13.1-38)*

**17** Nyalaane arandeere, der juulde peen ko yuufinaaka, aahiiße Yeesu wari, yami mo, wi'i: «Toy jidudaa men ciryanee hiraane Paska?» **18** O toontii 6e, o wi'i: «Jahee siire, naaton wuro waane, bi'on mo: "Moodibbo wi'i, wakkati mum faanike, der wuro maada nun o nyaamata juulde Paska e aahiiße makko."» **19** Aahiiße wadi ko Yeesu bati dum, 6e ciryii hiraane Paska.

**20** No kiikiide wadi, o joododii e aahiiße makko sappo e dido, bee nyaama. **21** Wakkati 6e nyaamata, Yeesu wi'i 6e: «E goonja batanmi on: gooto moodon jammoto am.» **22** Berde maabbe biisii puy, go bee yama mo gooto gooto, moy fu e wi'a: «Joomiraawo, min bane hinaa?» **23** O toontii 6e, o wi'i: «Tummidindo junjo mum e am der heedo, joomum nun jammoto am.» **24** E goonja Bii neddo dilan hande no Dewte bati dow makko. Amma bone woodani jammido mo! To o rimaakano, dum burananno mo woodugo.»

**25** Yahuuda, jammotoodo mo, yami mo, wi'i: «Moodibbo, min nun naa?» O toontii mo, o wi'i: «A batii ka.»

*Kirtaari ceniini  
(Marku 14.22-26; Luka 22.14-20;  
Korintu 11.23-25)*

**26** No 6e nyaamata, Yeesu etti peen, yetti Alla, nappiti, hokki aahiiße mum, wi'i: «Jabee, nyaamee, kanjum woni bannu am.» **27** Baawo majjum, o etti jarirgel innabojam, o yetti Alla, o hokki 6e, o wi'i: «Jaree on fu.

**28** Kanjam latii yiyyam am, yiyyam alkawal, deyyitiidam gam yaafuye hakkeeji himbe duubbe. **29** Mii wi'a on: Mi yarataa innabojam dam kade faa abada, sey nyalaane jaridanmi kesam e moodon, der Laamaare Baaba am.»

**30** Baawo 6e jimi jimol, 6e burtii, 6e jahi waanne Jaytuuje.

*Yeesu wi'i Piyer yeddan dum  
(Marku 14.27-31; Luka 22.31-34;  
Yuhaana 13.36-38)*

**31** Den Yeesu wi'i aahiiße mum: «Jemmaare nee do, on fu, on accan am, gam e winnaa der dewtere: "Mi fiyan duroowo, den hoggo baali sankito."»

Yeesu 6eydi, wi'i: **32** «Amma baawo to mi fintii, mi artan on Galili.» **33** Den Piyer, wi'i mo: «Baa to 6e fu 6e accii maa, min kan mi accataa maa pay.»

**34** Yeesu toontii mo, wi'i: «E goonja batan maa mi: Jemmaare nee do, ko jakaraari jogga, a wi'an de tati a annaa am.» **35** Piyer wi'i mo: «Baa to doole mi maayida e maa, mi wi'ataa pay mi annaa maa.» Aahiiße fu wi'i, hande non.

*Yeesu e du'oo der Gesemane  
(Marku 14.32-42; Luka 22.39-46)*

**36** Baawo majjum, Yeesu e aahiiße mum yottii nokkuure wi'eteene Gesemane. O wi'i 6e: «Joodee do, faa mi wadaa du'aare.» **37** O yaadi e Piyer, e bibbe Jebede dido, ko berne makko fuddi biisaago, oo maata toora berne puy. **38** Den o wi'i 6e: «Biisere berne sattanii am faa e yidi warugo am. Gonree do, deenidee e am.»

**39** O woddii sedda, o yani o hippii e leydi, oo du'oo, oo wi'a: «Baaba, to wadoto, woddinanam jarirgel toora kaa. Amma ko jidudaa laatoo, hinaa ko jidumi.»

**40** O wittoy, o tawi 6ee daani. O wi'i Piyer: «On baaway ko reenidi e am baa yanne woore na? **41** To on

daane, du'ee, gam to on janee der jarbeeji. Gam berne e yidi, amma bannu tampii.»

<sup>42</sup> O witti du'aago kade de didawre, o woddi sedda, o wi'i: «Baaba, to wadataako jarigel toora nel yawta, mi yariray nel, den, accu yidde maa laatoo!»

<sup>43</sup> Yeesu wittoy kade, o tawi be bee daani, gam doyjol e jogii be puy.

<sup>44</sup> O acci be kade, o witti du'aago de tatawre e boliide goote den. <sup>45</sup> Baawo majjum, o wittoy to aahiiibe makko, o wi'i be: «Faa jooni on na'on daani, oon ciwtii na? Wakkati wadii! Bii neddo wattete der juude hakkeebe. <sup>46</sup> Ummee jawten! Jammotoodo am nani wara!»

*Nanjoore Yeesu*  
(Marku 14.43-50; Luka 22.47-53;  
Yuhaana 18.3-11)

<sup>47</sup> Yeesu heennyay batugo, go Yahuuda, gooto der aahiiibe makko sappo e dido yottii, e himbe duubbe, jogiibe kaafaaaje, e cabbi. Hooreebe limaamiibe, e dottiibe nun liloy be.

<sup>48</sup> Jammotoodo mo on tintiniinoo be maane, wi'i: «Neddo mo cannumi e mammilaade fu, kanko nun don. Nanjee mo.» <sup>49</sup> Don maa don, Yahuuda battii Yeesu, wi'i mo: «Jam kirden Moodibbo!» Den o mammilii mo. <sup>50</sup> Yeesu toontii mo, wi'i: «Igo am, wadu ko waddu maa.» Himbe ben battii, watti Yeesu junjo, nanji mo.

<sup>51</sup> Den gooto der wondunoobe e Yeesu solti kaafahi mum, jabbi maccudo hooreejo limaamiibe, setti nowru, <sup>52</sup> go Yeesu wi'i mo: «Wittin kaafahi maa der kuunjal mum, gam kabiroowo e kaafahi, e kaafahi nun joomum halkirta. <sup>53</sup> Aa miili mi waawataa ko noddi Baaba am lildanaanmi ko buri malaykaabe konunkeebe ukke sappo e didi don maa don na? <sup>54</sup> Amma to dum laataaki non, noy ko winnaa der Dewtere hebbirta? Gam dewtere wi'i, non dum laatotoo.»

<sup>55</sup> Den, Yeesu wi'i jama'aare: «Daa on garii nanjugo am e kaafaaaje, e cabbi hande pasotoodo ni. Der suudu Alla bane gonunoomi de weeti

fu, emi jannina, go on nanjay am?

<sup>56</sup> Amma huune dum fu wadii gam ko winnaa der dewte annabiibe hebba.» Den, aahiiibe makko fu doggi, acci mo.

*Hooreebe diina Yahuduube hiitake Yeesu*

(Marku 14.53-65; Luka 22.54, 63-65; Yuhaana 18.12-13, 19-24)

<sup>57</sup> Nanjube Yeesu ben yaari mo to Kayafas hooreejo limaamiibe, go moodibbe tawreeta, e dottiibe genni, hawritii. <sup>58</sup> Piyer e tokki mo bawbawre, diga woddi, faa der fageere wuro hooreejo limaamiibe. O naati, o joododii e reenube gam o yi'a no dum heennyitirta.

<sup>59</sup> Hooreebe limaamiibe, e dawroobe fu, e daarta fewre ne be gaccorto Yeesu gam o waree.

<sup>60</sup> Himbe duubbe wari seedii fewre dow makko, amma be kebay gacce potude warugo mo. Den, worbe dido gom wari, seedii <sup>61</sup> wi'i: «Kanko nun wi'unoo pusan suudu Alla, mahitoo jol der balde tati.» <sup>62</sup> Hooreejo limaamiibe ummii, wi'i Yeesu: «A toontataako gokka na? A nanay ka be batata dow maa na?» <sup>63</sup> Amma Yeesu toontaaki gokka. Hooreejo limaamiibe on wi'i mo: «Mii eele e inne Alla yonkinteejo, batu men to an nun woni Almasiihu, Biddo Alla.» <sup>64</sup> Yeesu toontii mo, wi'i: «A battii ka. Ka batanmi woni: Diga jooni, on ji'an Bii neddo e joodii nyaamo Jom Baawde, o waran diga dow kammu.»

<sup>65</sup> Den, mone wadi hooreejo limaamiibe faa serkiti toggoore mum, wi'i: «O batii kalluka dow Alla! En kaajaaka seedeebe gom kade! On nanii e noppi moodon kalluka ka o bati. <sup>66</sup> Ume ji'udon?» Be toontii, be bi'i: «Emo haani wareego.» <sup>67</sup> Den, be tuuti mo joode e yeeso, bee piya mo guyye. Wobbe mabbe e fiya mo meeye, <sup>68</sup> e wi'a: «Almasiihu! Tinta, moy nun fiyu maa.»

*Piyer yeddi wi'i annaa Yeesu*  
(Marku 14.66-72; Luka 22.55-62;  
Yuhaana 18.15-18, 25)

<sup>69</sup> Piyer e joodii yaasi fageere wuro. Horbe tawaabe don, gooto mum, battii mo, wi'i: «An bo, aa wondunoo

e Yeesu Galilinkeejo.» <sup>70</sup> Amma Piyer yeddi ka yeeso himbe fu, wi'i: «Mi faamay ko jidudaa wi'ugo.»

<sup>71</sup> Baawo majjum, o ummii oo foon-nii far dammugal wuro. Kordo goddo yi'i mo, wi'i wonbe don: «Gorko oo do e wondunoo e Yeesu Nasaratuujoo.»

<sup>72</sup> Piyer yeddi kade, wi'i: «Mi hunike, mi annaa gorko on.»

<sup>73</sup> No wadi tifere, wonube don 6attii Piyer, wi'i mo: «Seko walaa, a laati nun gooto der aahiiibe makko, gam batu maa e hollita to yiwudaa.»

<sup>74</sup> Den, Piyer hunii wi'i: «Alla hiitoo am to mi fewii, e goonja mi annaa gorko on!» Wakkati mum, jakaraari joggi. <sup>75</sup> Den Piyer siwtorii ka Yeesu batunoo dum, wi'i: «Go jakaraari jogga, a wi'an de tati a annaa am.» O wurtii yaasi, o wulli bojji kaadudi.

## 27

### *Yeesu yaaraama to Pilaatu (Marku 15.1; Luka 22.66-71, 23.1)*

<sup>1</sup> Subaka kecco, hooreebe limaamiibe, e dottiibe fu, hawritii e dawra dow no be baritta Yeesu. <sup>2</sup> Be kabbi mo, be jaari to Pilaatu, hooreejo jeyde leydi Yahudiya.

### *Maayde Yahuuda Iskariyot (Golle Lilaabe 1.18-19)*

<sup>3</sup> No Yahuuda jammido Yeesu yi'i o hiitaama o waree, o miijitii, o wittini ceede cardi laso e sappo de o jaabunoo to hooreebe limaamiibe, e dottiibe, <sup>4</sup> o wi'i be: «Mi wadii hakke, mi jammike mo walaa gacce!» Be toontii mo, be bi'i: «Ko faalii men? Haala maa nun!»

<sup>5</sup> Yahuuda woppi ceede den der suudu Alla, yahi habbitoyii boggol, maayi. <sup>6</sup> Hooreebe limaamiibe etti ceede den, wi'i: «Sariya meeden hokkay laawol ceede hande dee do hawritee e ceede cakkanaade Alla der suudu Alla, gam ceede yiayam nun.»

<sup>7</sup> Baawo dawriine maabbe, be nannantiri, be etti ceede den, be coodiri gesa mahoowo payande gom, gam hobbe e uwhee ton. <sup>8</sup> Kanjum acci faa hanne, gesa jan e noddee «Gesa Yiayam.» <sup>9</sup> Hande non annabaaku

Yeremiya hebbiri, nu o wadunoo, o wi'i: «Be etti ceede cardi laso e sappo, kanje nun himbe Isira'ilila tawi o foti yobaneego. <sup>10</sup> Be coodirii de gesa mahoowo payande, hande no Joomiraawo batunoo am.»

### *Yeesu yeeso Pilaatu (Marku 15.2-20; Luka 23.1-4, 13-25; Yuhaana 18.28-19.16)*

<sup>11</sup> Be jaari Yeesu yeeso Pilaatu hooreejo leydi, o yami mo, o wi'i: «An woni laamiido Yahuduube na?» Yeesu toontii mo wi'i: «A batii ka.» <sup>12</sup> Den hooreebe limaamiibe, e dottiibe gacci mo, amma o toontaaki gokka. <sup>13</sup> Ko Pilaatu wi'i mo: «A nanataa gacce de be batata dow maada fu na?» <sup>14</sup> Amma Yeesu toontaaki gokka mum. Dum haaynii hooreejo leydi on sanne.

### *Yeesu hiitaama waree (Marku 15.6-15; Luka 23.13-25; Yuhaana 18.39-19.16)*

<sup>15</sup> Der Juulde Paska fu, hooreejo leydi e woowi yoofango be maabbaado gooto, mo himbe yidi. <sup>16</sup> Wakkati mum, e woodunoo maabbaado annanaado, bi'eteedo Yeesu Barabbas. <sup>17</sup> No jama'aare hawritii, Pilaatu yami be, wi'i: «Moy jidudon mi yoofana on: Yeesu Barabbas na, naa Yeesu bi'eteedo Almasiihu?» <sup>18</sup> Pilaatu e anni sabbu nawniraagu nun wadi ko be nanni Yeesu be gaddi to mum. <sup>19</sup> Wakkati Pilaatu joodii e hiitoo, deekiiko lili goddo, wi'a mo: «Taa naannu hoore maa der haala gorko mo walaa gacce oo, gam hanki mi toorake der koydool dow haala makko.»

<sup>20</sup> Hooreebe limaamiibe, e dottiibe yeeyi jama'aare, be yama Pilaatu yoofana be Barabbas, acca Yeesu waree. <sup>21</sup> Hooreejo leydi on yamitii be, wi'i: «Mi yoofanan on maabbaado gooto, moy nun der dido ben jidudon mi yoofana on?» Be toontii, be bi'i: «Barabbas!» <sup>22</sup> Pilaatu yami be, wi'i: «Den, noy gadanmi Yeesu bi'eteedo Almasiihu?» Be fu be toontii, be bi'i: «Tiggu mo dow leggal palaajal!» <sup>23</sup> O yami be, o wi'i: «Ko boni ume o wadi?» Be beydi woolo e semme, be

bi'a: «Tiggū mo dow leggal palaanjal!» <sup>24</sup> Pilaatu tawi waawataa ko deyyitini 6e, woolo bo e beydoo. Den o etti diyam, o looti juude makko yeeso jama'aare, o wi'i 6e: «Mi walaa gacce dow reyyitingo yiyyam gorko oo. Haala moodon nun.» <sup>25</sup> Be fu 6e toontii, 6e bi'i: «Men jabii gacce yiyyam makko yowoo dow ko'e amen, e dow biibbe amen!» <sup>26</sup> Den, Pilaatu yoofitani 6e Barabbas, o hokkilaawol Yeesu fiyee looci, baawo mum, o tiggee dow leggal palaanjal.

*Soogeeji jaancii Yeesu  
(Marku 15.16-20; Yuhaana 19.2-3)*

<sup>27</sup> Soogeeji hooreejo leydi yaari Yeesu der fageere laamorde mum, ukkere soogeeji din fu hawritii e tummi mo. <sup>28</sup> Be sorti gineeqi makko, 6e borni mo gulunfaare wodeere. <sup>29</sup> Baawo majjum, 6e canyi huuneere gi'e, 6e kuunini mo. Be kokki mo helliiru e junjo makko nyaamo, 6ee jiccoo yeeso makko, 6ee jaanca mo, 6ee bi'a: «Foo foo maa, laamiido Yahuduubee!»

<sup>30</sup> Be tuuti mo joode, 6e teeti helliiru 6jol, 6ee piya mo dow hoore. <sup>31</sup> No 6e keennyi jaancugo mo, 6e sorti gulunfaare, 6e borni mo gineeqi makko. Den, 6e jaari mo 6e tiggaab dow leggal palaanjal.

*Yeesu tiggaama dow leggal palaanjal  
(Marku 15.21-41; Luka 23.26-49;  
Yuhaana 19.16-30)*

<sup>32</sup> No 6e burtoto siire, 6e potti e gorko bi'eteedo Simon mo Sirene. Soogeeji dooli mo o roono leggal Yeesu palaanjal. <sup>33</sup> Be jottii nokkuure wi'eteene Golgota. Maana Golgota woni (nokkuure le'al hoore). <sup>34</sup> Be kokki Yeesu innabojam jillon-tiraadom e kaadudum, o yara. No o metti dam, o salii yarugo.

<sup>35</sup> No 6e keennyi tiggugo mo, 6e pidani gineeqi makko tete, 6e ceen-niri. <sup>36</sup> Baawo majjum, 6e joodii don, 6ee deeni mo. <sup>37</sup> Be binni dow alluwal daliila ko acci o tiggaab, 6e takki dow hoore makko. Ko 6e binni woni: «Oo do woni Yeesu, laamiido Yahuduubee.»

<sup>38</sup> Fasotoobe dido gom bo e tiggaab takkol makko, gooto nyaamo makko, gooto bo nano makko.

<sup>39</sup> Himbe falotoobe don e yenna mo, e dimma ko'e mum, <sup>40</sup> e wi'a: «An pusoowo suudu Alla, mahitoo 6jol der balde tati, faaba hoore maa. To a laati nun Biddo Alla, jippa diga e leggal palaanjal 6jal!»

<sup>41</sup> Hande non, hooreebe li-maamiibe, e moodibbe tawreeta, e dottiibe fu jaanciri mo, e wi'a: <sup>42</sup> «O faabike wobbe, amma o waaway ko faabii hoore makko, kanko laamiido Isira'iila. Jooni, o jippoo diga leggal palaanjal 6jal, gam goondinen mo. <sup>43</sup> O yowii hoolaare makko fu dow Alla. To non Alla faaboo mo jooni, to e yidi mo. Gam o wi'i, o laati nun Biddo Alla.»

<sup>44</sup> Fasotoobe, tiggaabe takkol makko bo e yenna mo hande non.

*Yeesu maayii  
(Marku 15.33-41; Luka 23.44-49;  
Yuhaana 19.28-30)*

<sup>45</sup> Diga caka nyalooma, niwre wadi e leydi nin fu, faa yottii yanne tati kiikiide. <sup>46</sup> Jaka yanne tati kiikiide, Yeesu halbi e semme, wi'i: «Eloyi, Eloyi, lama sabaktani?» Kan woni «Alla am, Alla am! Gam ume accusaa am?» <sup>47</sup> Wobbe der darinoobe don no nani dum, wi'i: «Emo nodda Eliya!» <sup>48</sup> Don maa don, gooto maabbe doggi waddoy soosuji, suuwi di der jaran lammudam, habbi e sawru, battini to hunnuko Yeesu gam o biccino. <sup>49</sup> Den horiibe wi'i: «Munyen, daaren naa Eliya waran faaboo mo.» <sup>50</sup> Baawo majjum, Yeesu halbi e semme, o maayi.

<sup>51</sup> Wakkati mum, wudere wirni-raane der suudu Alla serkitii caka caka, diga dow faa ley. Leydi dimmii, tepaaje feccii, <sup>52</sup> jenaale maabitii, seniibe duubbe maayunoobe finti. <sup>53</sup> Be burtii e jenaale. Baawo mum, Yeesu finti, 6e naatidi e genni seniini, himbe duubbe yi'i 6e.

<sup>54</sup> Hooreejo soogeeji deenundo Yeesu, e soogeeji mum, yi'i dimmaade leydi e ko wadi fu. Be kuli puy, 6e

bi'i: «E goonja, o laati nun Biddo Alla!»  
**55** Rewbe duubbe e tawaa don e daara diga woddi, kambe nun tokkoynoo mo diga Galili, bee jagganoo mo.  
**56** Der maabbe: E woodi Mariyama mo Magadala, e Mariyama inna Yaakuuba e Yusufu, e inna biibbe Jebede.

*Yeesu uwaama*  
*(Marku 15.42-47; Luka 23.50-56;*  
*Yuhaana 19.38-42)*

**57** No kiikiide wadi, gorko jom jawdijjo gom, mo siire Arimatiya, wari. Emo wi'ee Yusufu, kanko bo o laati nun aahijo Yeesu. **58** O yahi to Pilaatu, o eeli dum bannu Yeesu. Den, Pilaatu wi'i o hokkee nol. **59** Yusufu etti bannu nol, suddi nol wudere heyre, **60** o wattu bannu nol der saabeere heyre ne o wasani hoore makko der hayre. Baawo mum, o talli hayre teddune, o maabiri dammugal saabeere nen, o yawti. **61** Mariyama Magadalajo, e Mariyama oo to, e tawaa don, e joodi e daari far to saabeere nen.

*Soogeeji e reeni saabeere*

**62** Fini mum laatii nyalaane ardiine nyalaane siwteteene. Den hooreebe Limaamiibe e Farisaabe hawritii yahi to Pilaatu. **63** Be bi'i mo: «Joomiraawo, men ciwtorii pewoowo on batiino diga e wuuri, wi'i, fintan nyalaane tatawre. **64** Gam majcum, batu soogeeji reena saabeere nen faa balde tati den yawta. Gam to aahiiibe makko wujju bannu makko, wi'a, o fintii diga maaybe. Den fewre sakitiineere nen buran arandeere hallugo.» **65** Pilaatu wi'i be: «Soogeeji nani, jahee, deenee saabeere nen no baawirdon!»

**66** Be jahi, be deenoy saabeere nen. Be talli hayre, be maabbi faa woodi, be darini soogeeji gam reena ne.

## 28

*Yeesu fintii*  
*(Marku 16.1-10; Luka 24.1-12;*  
*Yuhaana 20.1-10)*

**1** No nyalaane siwteteene yawti, alal subaka, Mariyama Magadalajo

e Mariyama oo to dawi, yahi daarogyo saabeere nen. **2** Don de woore, leydi dimmii e semme. Malaykaajo Joomiraawo jippii diga dow kammu, talli hayre nen, joodii dow mayre. **3** Oo jalbitoo hande maayyere, gineeji makko e rawni hande malamalluuje. **4** Reenube ben huli faa e diwna, be laatii hande maaybe. **5** Malaykaajo wi'i rewbe ben: «To on kulee onon! Mii anni Yeesu tigganoodo nun daartoton. **6** O walaa do, o fintii hande no o wi'unoo on. Garee, daaree to o fukkinoo. **7** Tinnee, batee aahiiibe makko o fintii diga e maayde. O na'on hedii on far Galili, on ji'an mo ton. Ka goodumi mi bata on nun don.»

**8** Rewbe ben yawti law diga to saabeere nen, go kulol e seyo wadi be puy. Be doggi be batoy aahiiibe makko habaru on. **9** Don maa don, Yeesu fotti e maabbe, wi'i be: «Mii sanna on!» Be battii mo, be nannji koyde makko, be cujidani mo. **10** Den Yeesu wi'i be: «To on kulee! Jahee, batee banniraabe am, be jaha Galili. Ton nun be ji'atammi.»

*Ka reenube saabeere seedii*

**11** Wakkati rewbe ben yanti laawol, den wobbe der soogeeji deenudi saabeere nen naati e genni, e bata hooreebe limaamiibe ko wadi fu. **12** Hooreebe limaamiibe, e dottiiibe wadi hawriine, be baddi, be kokki soogeeji din ceede duudde, **13** be bi'i be: «Bi'ee aahiiibe makko nun wari jemma, tawi oon daani, wujji bannu makko. **14** To hooreejo leydi nanii ka, minon nun anni ka batata mo, men burtina on e toora fu.»

**15** Soogeeji jaabi ceede mum, wadi no wi'aa. Hande non haala kan sankitorii caka Yahuduube faa warugo hanne.

*Yeesu holitanake aahiiibe mum*  
*(Marku 16.14-18; Luka 24.36-49;*  
*Yuhaana 20.19-23)*

**16** Aahiiibe sappo e go'o yahi Galili, dow waanne ne Yeesu tintinnoo be be jaha. **17** No be ji'i mo, be cujidani mo, amma wobbe maabbe wadi seko. **18** O battii, o wi'i be: «Mi

hokkaama baawde dow kammu e leydi fu. <sup>19</sup> Gam majjum jahee, gadee himbe lenyi fu aahiiibe am, gadee be batisi e inne Baaba e Biddo e Ruuhu Ceniido. <sup>20</sup> Janjinee be be tokkoo ko batumi on fu. Annee, mii wondi e moodon nyalaane fu, faa timmoode duuniyaaru.»

## Linjiila Yeesu hande no Yuhaana winniri

### *Haala pūddirka*

Yuhaana e yidī der derewol mum jol, himbe annita no Yeesu laati nun Biddo Alla, den goondindo mo fu tawee e woodi yonki tabitiiki.

Wecco arano e holla kaayefiji feere feere, kollitooji no Yeesu nun paabotoodo, mo dum batani der dewte. Yuhaana etti haalaaji goddi nanditinirdi, hande jon: diyam, nyaamdu buurinoowol, innabohi goonjahi, o hollitira ko Yeesu laatii.

Yuhaana tan batani bangal der siire Kana, e haala Nikodem, e debbo samariyaajo, e moofo mo Baytisayda, e gorko dindaado e bundan.

O batanii kaayefiji jeego'o di Yeesu wadi ko Matiye, e Marku, e Luka winnay. Amma Yuhaana winnay haala golle Yeesu godde. O batanay dingol Yeesu e golle mum der Galili, e jarbeeki mum, e haala kirtaari cakitiineeri gam himbe wakkati makko e annunoo dum.

### **Tokkontirki haalaaji**

1. Haala pūddirka, 1.1-18
2. Yuhaana gadoowo batisi, 1.19-51
3. Golle Yeesu e waaji mum, 2.1-12.50
4. Balde Yeesu sakitiineeje faa Urusaliima, 13.1-19.42
5. Pintol Yeesu Joomiraawo e kolittaaki mum, 20.1-31
6. Heennyitirde 21.1-25.

### *Haala latike jayŋol e yonki*

<sup>1</sup> Diga fuddoode, bi'eteedo Haala e wonunoo. Oo wondi e Alla, o laati nun Alla. <sup>2</sup> Diga fuddoode, oo wondi e Alla. <sup>3</sup> E makko Alla tagiri huune fu. Baa godsum ko woni tagaaka to hinaa e makko. <sup>4</sup> Yonki yiwi e makko, yonki kin laatanii himbe jayŋol. <sup>5</sup> Jaayŋol e yayna der niwre, niwre bo waaway ko nyifi ŋol.

<sup>6</sup> Wakkati gom, Alla lili goddo bi'eteedo Yuhaana. <sup>7</sup> O warii gam o laato seedeejo, o wadana jayŋol seedaaku, gam himbe fu goondina sabbu haala makko. <sup>8</sup> Kanko bane woni jayŋol, amma o waru nun gam o seedanoo jayŋol. <sup>9</sup> Kannol woni jayŋol goonjawol, garuŋol e duuniyaaru gam yaynana himbe fu.

<sup>10</sup> Bi'eteedo Haala na'onno der duuniyaaru, e makko duuniyaaru tagiraa, amma himbe duuniyaaru annitay mo. <sup>11</sup> O warii to himbe makko, himbe makko bo jaabbaaki mo. <sup>12</sup> Amma jaabbiibe mo fu, ko goondinii inne makko, o hokkii dum laawol laataago 6iibbe Alla. <sup>13</sup> Be laataaki 6iibbe Alla diga e dingol, e yidde tagaado bo bane, amma gam Alla hokkii 6e yonki kesi.

<sup>14</sup> Haala latike neddo. Neddo on joosodii e meeden, oo hebbi moyyere e goonja. Men ji'ii tedduŋal makko, tedduŋal ŋal Biddo bajjo hebata e baaba mum. <sup>15</sup> Yuhaana seedanii mo, bati e daane towne, wi'i: «Oo do woni mo batannomi on, bi'umi: Baawo am, burdo am waran, gam o na'on diga mi walaano.»

<sup>16</sup> E gonnan makko, en fu en kebii moyyere dow moyyere. <sup>17</sup> Diga e Muusa nun tawreeta hokkira, amma moyyere, e goonja warii diga e Yeesu Almasiihu. <sup>18</sup> Goddo yi'ay Alla abada, amma Biddo bajjo, laatiido Alla, gonduso e Baaba nun annini en Alla.

### *Seedaaku Yuhaana gadoowo batisi (Matiye 3.1-12, Marku 1.18, Luka 3.15-18, Yuhaana 5.33-36)*

<sup>19</sup> Yahuduubē Urusaliima lili moodiibbe yiwbē e lenyol Lewinkeebē e Limaamiibē 6e yama mo, kanko woni moy. <sup>20</sup> O toontii 6e ko laabi. Nani ko o seedii: «Min, mi Cubaado bane.» <sup>21</sup> Be yamitii mo, 6e bi'i: «Den kan, moy nun laatidaa an? An nun Eliya na?» O wi'i: «Min, mi Eliya bane.» Be bi'i: «An nun Annabiijo batanaado na?» O toontii: «Aawo, kanko bane laatiimi!» <sup>22</sup> Be bi'i mo: «Den fu moy nun laatidaa? Batu

men ko men batoyata liloyle men. Ko bi'udaa hoore maa?» <sup>23</sup> O toontii, o wi'i:

«Min woni batoowo der haro e wi'a: "Moyyinee laawol Joomiraawo," non annabi Esaaya wi'i.»

<sup>24</sup> Lilaabe 6en laati nun Farisaabe. <sup>25</sup> Be yami mo: «Ko woni sabbu ko aa wada batisi nani bo a Cubaado bane, a Eliya bane, a Annabijjo batanaado bane?» <sup>26</sup> Yuhaana toontii 6e, wi'i: «Min, mii wadira batisi e diyam, amma e woodi goddo hakkune moodon mo on annaa, <sup>27</sup> kanko woni garoovo baawo am, mi fotay baa fittugo boggi pade makko.» <sup>28</sup> Dum don fu wadu nun Baytaniya, takkol maayo Urdun, to Yuhaana wadannoo batisi.

### *Yeesu nun woni Jawgiyel Alla*

<sup>29</sup> Fini mum, Yuhaana yi'i Yeesu e wara to mum, wi'i: «Nani Jawgiyel Alla ikkinoowel hakkeeji duuniyaaru. <sup>30</sup> Kanko nun batannoomi, bi'umi: "Goddo waran baawo am, oo burimmi, gam o na'on diga mi walaano." <sup>31</sup> Min, mi annaano mo. Amma mi warii, mii wada batisi e diyam gam mi holla mo himbe Isira'iila.»

<sup>32</sup> Yuhaana seedii, wi'i: «Mi yi'ii Ruuhu hande foonu e jippoo diga dow, hodii dow makko. <sup>33</sup> Min, mi annaano mo. Amma lildi am mi wada batisi der diyam, kanko nun wi'immi: "Mo ji'oytaa Ruuhu e jippoo dow mum, kanko woni gadiroovo batisi e Ruuhu Ceniido." <sup>34</sup> Yuhaana wi'i: «Min, mi yi'ii, mi seedike, kanko woni Biddo Alla.»

### *Aahiiße Yeesu arandeeße (Matiye 4.18-22)*

<sup>35</sup> Fini mum, Yuhaana e darodii kade e aahiiße mum dido. <sup>36</sup> O yi'i Yeesu e faloo, o wi'i: «Nani Jawgiyel Alla!»

<sup>37</sup> Aahiiße dido 6en nani ka o bati, tokki Yeesu. <sup>38</sup> Yeesu yeeyitii, yi'i 6ee tokki dum, wi'i 6e: «Ume daartoton?» Be toontii, 6e bi'i: «Rabbi (dum wi'ay maa Moodibbo), toy tawadaa?» <sup>39</sup> O wi'i 6e: «Garee, daaree!» den 6e gari, 6e ji'i to o tawaa. Be joododii e makko

nyalaane nen. Wakkati on, kiikiide nun.

<sup>40</sup> Andere, miiraawo Simon Piyer, woni gooto der dido nanube haala Yuhaana, ko tokkini Yeesu. <sup>41</sup> Mawniraawo makko, Simon, o arti o fotti, o wi'i dum: «Men ji'ii Almasiihu.» (Dum wi'ay maa Cubaado.) <sup>42</sup> O yaari mo to Yeesu. Yeesu daari Simon Piyer, wi'i mo: «An, a Simon 6ii Yuhaana, a innitirte Kefas.» (Dum wi'ay maa Hayre.)

### *Yeesu noddii Filippu e Natanayel*

<sup>43</sup> Fini mum Yeesu yidi yahugo Galili. O fotti e Filippu, o wi'i dum: «Tokkam!» <sup>44</sup> Filippu, mo Baytisayda nun, genni Andere e Piyer. <sup>45</sup> O fotti e Natanayel, o wi'i dum: «Men ji'ii mo haala mum batano der tawreeta Muusa e der dewte annabiise. Yeesu 6ii Yusufu mo Nasaratu.» <sup>46</sup> Natanayel wi'i mo: «Ko woodi waawan ko yiwi Nasaratu na?» Filippu toontii mo: «War, daaru!»

<sup>47</sup> Yeesu yi'i Natanayel e fonnay dum, wi'i: «Oo do laati nun Isira'iilaajo lalley, jamma fu walaa e makko.» <sup>48</sup> Natanayel wi'i mo: «Toy annudaa am?» Yeesu toontii mo, wi'i: «Mi yi'ii maa ley ibbi diga Filippu noddai maa.» <sup>49</sup> Natanayel toontii, wi'i: «Moodibbo, a laati nun Bidde Alla, a Laamiido Isira'iila nun.» <sup>50</sup> Yeesu toontii mo, wi'i: «Gam mi wi'ii mi yi'ii maa ley ibbi, kan acci ko goondindaa na? A yi'an ko buri dum don manju.»

<sup>51</sup> Den o wi'i Natanayel: «E goonja batan mi on: On ji'an duule e maabitii, malaykaabe Alla e eenca e jippoo dow Bii neddo.»

## 2

### *Bangal der siire Kana*

<sup>1</sup> Balde didi 6aawo mum, 6angal wadii e siire Kana, der leydi Galili. Inna Yeesu e tawanoon ton. <sup>2</sup> Yeesu e aahiiße mum bo noddinaama e jaamaanu nu. <sup>3</sup> No innabojam mabbe jacci, inna Yeesu wi'i mo: «Be galaa innabojam.» <sup>4</sup> Yeesu toontii mo, wi'i: «Inna day, taa accu ka 6illee. Wakkati

am yottaaki taw.» <sup>5</sup> Den inniiko wi'i golloobee: «Ko o wi'i on fu, gadee.»

<sup>6</sup> Loode jeego'o gadiraade kaaye e tawaa don. Diyam majje Yahuduube wadiranno najardam gam laabingo ko'e mum, hande no diina maabbe bati. Loode den, baaney mum fu e jaba yoogirde diyam sappo.

<sup>7</sup> Yeesu wi'i 6e: «Kebbinee payande den diyam.» Be kebbini de faa gabbude. <sup>8</sup> O wi'i 6e: «Jooni kan, nyedee, jaaranee mawdo bangal.» Be nyedi. <sup>9</sup> No mawdo bangal metti diyam baylitaadam innabojam dam, o annaa toy dam yiwi. Amma golloobee nokkoybe dam, e anni. O noddi jommanjo gorko, <sup>10</sup> o wi'i dum: «Himbe fu innabojam beldam woowi artigo. To himbe buusii, ko dam hewtay welugo sakitoree. Amma an, a resii beldam dam faa jooni.»

<sup>11</sup> Non Yeesu wadiri kaayeefi mum arandehi der siire Kana, der leydi Galili. Non o hollitiri baawde makko, go aahiibee makko goondini mo.

<sup>12</sup> Baawo majjum o yahi Kafarnahum, kanko e inniiko, e miiraabe makko, e aahiibee makko. Be joodii ton balde sedda.

### *Yeesu riiwii tenkuubee der suudu Alla (Matiye 12.38-40, Marku 11.15-18, Luka 19.45-46)*

<sup>13</sup> No juulde Yahuduube bi'eteede Paska 6adii, Yeesu yahi Urusaliima.

<sup>14</sup> Der suudu Alla, o tawi sippoobe ga'i, e baali, e tantabaraaji, e cengotoobe ceede, e joodii. <sup>15</sup> O etti boggi o wadi boccol, o riiwi 6e 6e burtoo suudu Alla, kambe e baali, e ga'i. O sankiti ceede cengotoobe, o hippi taaburuuji maabbe. <sup>16</sup> O wi'i sippoobe tantabaraaji: «Burtinee dum, to on gadee suudu baaba am suudu tenkuru.»

<sup>17</sup> Aahiibee makko siwtori ko winnaa e Dewte: «Yidde suudu maa e jaabina berne am.» <sup>18</sup> Den hooreebé Yahuduube wi'i mo: «Kaayeefi kiye gadataa ko kollaa men aa woodi laawol wadugo nun nun.» <sup>19</sup> Yeesu toontii 6e, wi'i: «Pusee suudu Alla 6ol do,

mi mahitinto 6ol der balde tati.» <sup>20</sup> Be toontii mo: «Suudu 6ol mahiraama duubi lasooji didi e jeego'o, go an, bi'aa a mahitinto 6ol der balde tati na?»

<sup>21</sup> Amma 6annu makko nun o nandiniri suudu Alla. <sup>22</sup> No Yeesu finti, aahiibee mum siwtorii o batiiino dum ka, go 6e goondini Dewte e haala ka o batunoo.

### *Yeesu e anni ko woni e neddo fu*

<sup>23</sup> No Yeesu wonunoo Urusaliima gam juulde Paska, duubbe goondini inne makko gam 6e ji'ii kaayeefi di o wadi. <sup>24</sup> Amma Yeesu hoolaaki 6e, gam oo anni 6e 6e fu. <sup>25</sup> O bukaaka goddo seedanoo mo ko woni e himbe, gam oo anni ko woni der berne neddo.

## 3

### *Yeesu e badda e Nikodemu*

<sup>1</sup> E woodunoo goddo, Farisaajo, bi'eteedo Nikodemu, o laati nun gooto der hooreebé Yahuduube.

<sup>2</sup> Jemmaare gom o yahi to Yeesu, o wi'i dum: «Moodibbo, emen anni a laati nun baajotoodo yiwudo to Alla, gam goddo waawataa ko wadi kaayeefiji di gadataa, to Alla wondaa e makko.» <sup>3</sup> Yeesu toontii mo, wi'i: «Mii batee e goonja: Goddo waawataa ko yi'i Laamaare Alla to rimitaaka.» <sup>4</sup> Nikodemu wi'i mo: «Noy neddo waawirta ko rimitora to naywii? O waawan ko witti e reedu inniiko, o rimitee na?»

<sup>5</sup> Yeesu toontii mo wi'i: «Mii batee e goonja: To neddo rimitoraaka e diyam, e Ruuhu, o waawataa ko naati laamu Alla. <sup>6</sup> Ko neddo rimata, laati nun neddo. Ko Ruuhu bo rimata, laati nun ruuhu. <sup>7</sup> To dum haayneee gam mi wi'ii maa: "E haani dimitedaa." <sup>8</sup> Hennu e wifa to yidi fu. Aa nana sonnyo maggol, amma a annaa to 6ol yiwi, a annaa to 6ol yahata. Hande nun dimiraado Ruuhu laati.»

<sup>9</sup> Nikodemu wi'i mo: «Noy dum wadortoo?» <sup>10</sup> Yeesu toontii mo: «An, moodibbo Isira'iila mawdo, a annaa dum? <sup>11</sup> Mii batee e goonja, menen, ko men anni, men batata, ko men ji'i, men ceedotoo. Amma on jaabataa

seedaaku amen. <sup>12</sup> On goondinay no batanmi on kujje de leydi. Noy goondinirton to mi batanii on kujje de dow kammu? <sup>13</sup> Goddo meeday een-cugo dow kammu, to hinaa jippiido diga kammu, kanko woni Bii neddo. <sup>14</sup> Hande no Muusa biliri boddii janni dow leggal der ladde haro, hande non Bii neddo bo bilirtee, <sup>15</sup> gam goondindo mo fu heba yonki tabitiiki. <sup>16</sup> Gam Alla yidii duuniyaaru sanne faa hokki Biddo mum bajjo, gam goondindo mo fu to halku, amma heba yonki tabitiiki. <sup>17</sup> Alla lilay Biddo mum e duuniyaaru gam o hiitoo nu, amma gam nu hisira diga e makko. <sup>18</sup> Goondindo mo hiitataake, amma mo goondinay, hiitaamaa ko, gam o goondinay inne Biddo Alla bajjo. <sup>19</sup> Kiita maabbe nani: Jaaynjol warii e duuniyaaru, amma himbe, niwre nun buri yidsugo dow jaynjol, gam gadu maabbe woodaa. <sup>20</sup> Mo golle mum woodaa e wanyi jaynjol, warataa e maggol, gam e hula golle mum wurtoo. <sup>21</sup> Amma tokkudo goonja, waran to jaynjol gam gadu nu wadi gam Alla, wurtoo.»

#### *Ko Yuhaana seedii dow Yeesu (Yuhaana 1.19-24)*

<sup>22</sup> Baawo mum Yeesu yaadi e aahiiibe mum leydi Yahudiya. O joododii e maabbe ton, oo wada batisi. <sup>23</sup> Yuhaana bo e wada batisi e siire Aynon, takkol Salim, gam ton diyam e duudi. Himbe e yaha ton e wadanee batisi. <sup>24</sup> (Tawi Yuhaana maabbaakano taw.)

<sup>25</sup> Nyaanne gom aahiiibe Yuhaana yeddontirii e Yahudujo gom dow haala laabal. <sup>26</sup> Be jahi to Yuhaana, be bi'i dum: «Moodibbo, gorko gondunoodo e maa takkol maayo Urdun, mo ceedanidaa men, kanko bo oo wada batisi. Himbe fu e yaha to makko.»

<sup>27</sup> Yuhaana toontii be, wi'i: «Neddo waawataa ko hebi godsum to hinaa ko Alla hokki dum. <sup>28</sup> Onon e hoore moodon, on seedeabe am, mi wi'ii: "Mi Almasiihu bane, amma mi lilaama mi ardoor mo".» <sup>29</sup> Yuhaana wi'i kade: «Gaddanaado jommanjo

debbo, kanko woni jommanjo gorko. Dottoowo gorko e darii, e hettinii. To o nanii daane jommanjo gorko, berne makko welan sanne. Nii beldum berne am hebbiri. <sup>30</sup> Haani teddujal makko e beydoo, ηal am e buytoo.»

#### *Yiwudo dow kammu*

<sup>31</sup> «Yiwudo dow kammu nun 6uri fu. Yiwudo e leydi, laati nun leydinkeejo. Haala mum bo laati nun ka leydinkeebe. Yiwudo dow kammu, kan nun jinti moy fu. <sup>32</sup> Ko o yi'i e ko o nani, o seedotoo, amma goddo jabataa seedaaku makko. <sup>33</sup> Jabudo seedaaku makko, tabbitinii Alla laati nun goonaajo. <sup>34</sup> Mo Alla lili, ko Alla bati nun o batata, gam Alla hebbinii mo Ruuhu mum. <sup>35</sup> Baaba e yidi Biddo, faa watti huune fu e junjo makko. <sup>36</sup> Goondindo Biddo, hebii yonki tabitiiki. Mo goondinay Biddo, hebataa ki, amma mone Alla e wonani dum.»

## 4

#### *Yeesu e samariyaajo debbo (Yuhaana 7.37-39)*

<sup>1</sup> Farisaabe nanii Yeesu e wada batisi, e heba aahiiibe duubbe faa buri Yuhaana. <sup>2</sup> To goonja nun, Yeesu e hoore mum waday batisi, amma aahiiibe makko nun wadannoo dum. <sup>3</sup> No Yeesu nani ka Farisaabe bati, ummii leydi Yahudiya, witti leydi Galili. <sup>4</sup> E haani bo o falta leydi Samariya.

<sup>5</sup> O wari e siire Samariya bi'eteene Sikar, takkol gesa ηa Yaakuubu hokki biyum Yusufu. <sup>6</sup> Don bunnu Yaakuubu woni. No Yeesu somi yaadu, joodii gabbuude bunnu ηol. Caka nyaalooma nun.

<sup>7</sup> Samariyaajo debbo wari yoogugo. Yeesu wi'i mo: «Hokkoram diyam, mi yara!» <sup>8</sup> (Tawi aahiiibe makko yahii siire soodoygo ko nyaametee.)

<sup>9</sup> Debbo on wi'i Yeesu: «Ee, noy an Yahudujo, eelirtaa am diyam jaraa, min samariyaajo debbo?» Nani bo potal walaa hakkune Yahuduube e Samariyaabe. <sup>10</sup> Yeesu toontii mo, wi'i: «To aa annunoo no dokkal Alla foti, e moy wi'i maa: "Hokkoram

diyam, mi yara!” an nun eelatano mo, o hokkee diyam yonki.»

<sup>11</sup> Debbo on wi'i mo: «Moodibbo, a walaa cawgal. Bunnu nun bo e luggi. Toy kebataa diyam yonki dam? <sup>12</sup> A 6uru nun maama amen Yaakuubu, kokkudo men bunnu ɿol manju na? Kanko e 6ibbe makko, e bisaaji makko fu, 6e jarii e maggol.» <sup>13</sup> Yeesu toontii mo, wi'i: «Neddo fu jardo diyam dam, dondete kade, <sup>14</sup> amma jardo diyam dam kokkanmi dum, dondataake faa abada. Gam diyam kokkanmi dum, laatanto dum 6uldude diyam kokkoojam yonki tabitiiki.» <sup>15</sup> Debbo on wi'i: «Moodibbo, hokkoram diyam dam, to mi dondee kade, to mi wittaa bo yoogugo.»

<sup>16</sup> Yeesu wi'i mo: «Yahu noddoy gorko maa, garidon!» <sup>17</sup> Debbo on toontii mo: «Mi walaa gorko.» Yeesu wi'i mo: «Aa woodi goonja no bi'udaa a walaa gorko. <sup>18</sup> A ettayno maa worbe joyo. Gorko gondudaa jooni on bo, gorko maa bane. A batii goonja.»

<sup>19</sup> Debbo on wi'i mo: «Moodibbo, laabani am, a laati nun Annabijjo.

<sup>20</sup> Maamiraabe amen saafiino Alla dow waanne nee, amma onon, oon bi'a: “Urusaliima nun Alla haani saafeego”.»

<sup>21</sup> Yeesu wi'i mo: «Banniraawo debbo, hoola ko batan maa mi. Wakkati e wara, dow waanne nee do bane, Urusaliima bo bane caafoton Baaba. <sup>22</sup> Onon Samariyaabe, oon caafa ko on annaa, menen Yahuduube, ko men anni men caafata, gam kisidam to Yahuduube nun yiwata. <sup>23</sup> Amma wakkati e wara, ki yottike du, de saafoobe goonjakuube saafirta Baaba e ruuhu e goonja. Iri saafoobe bee don nun Baaba daartata. <sup>24</sup> Alla laati nun Ruuhu. Gam majjum, e haani saafoobe, saafira mo e ruuhu e goonja.»

<sup>25</sup> Debbo on wi'i: «Mii anni Almasihu, bi'eteedo Cu6aadö, waran. To o warii, o humpitagan men kujje fu.»

<sup>26</sup> Yeesu wi'i mo: «Min, baddowo e maa, woni kanko.»

<sup>27</sup> Dow kaa don, aahii6e makko yottii to ma6be. No Yeesu baddata e debbo on, dum haaynii 6e, amma baa

gooto ma6be wi'ay: «Ko daartataa?» Naa: «Gam ume baddataa e makko?»

<sup>28</sup> Den debbo on resi yoogirgal mum, witti siire, bati himbe, wi'i: <sup>29</sup> «Garee, daaree gorko batudo am ko gadunoomi fu. Kanko bane woni Almasiihu on?» <sup>30</sup> Be burti siire nen, 6e jahi to makko.

<sup>31</sup> Wakkati den aahii6e e sawrina mo, e wi'a: «Moodibbo, nyaamu!»

<sup>32</sup> O toontii 6e: «Mii woodi ko nyaamaanmi, ko on annaa.» <sup>33</sup> Aahii6e 6en e yamontira: «Moy waddani mo ko nyaametee?»

<sup>34</sup> Yeesu wi'i 6e: «Nyaamdu am laati nun wadugo sago lido am, e heennyitingo golle de o hokkimm.»

<sup>35</sup> Onon, oon bi'a: “Faa hanne lebbi naay horii go dugge yottoo?” Amma min, mii wi'a on: bantee gite mon, daaree, gese 6ennii, de potii ruggeego. <sup>36</sup> Duggudo heban joddi, hawritan 6ibbe gam yonki tabitiiki, gam aawudo e duggudo seyodoo.

<sup>37</sup> Dum don e tabbitina ballool ɿol do: “Gooto e aawa, gooto e rugga.”

<sup>38</sup> Mi lilii on duggoon to on gollay. Wo6be gollii, onon, on nafitoroo golle ma6be.»

<sup>39</sup> Der siire nen, Samariyaabe duubbe goondinii Yeesu gam haala debbo ceediido, wi'i: «O batii am ko gadunoomi fu.» <sup>40</sup> Gam majjum no Samariyaabe yottii to Yeesu, 6e eeli mo o joodoo to ma6be. O wadi don balde didi. <sup>41</sup> Himbe duubbe, faa 6uri no arande, goondini mo, no nani haala makko. <sup>42</sup> Be bi'i debbo on: «Jooni, hinaa gam ka batudaa men tan acci men goondini. Amma menen e ko'e amen, men nanii haala makko, emen anni kanko woni Kisinoowo duuniyaaru lalley.»

### *Yeesu nyawtii 6ii semmeneejo gom (Luka 7:1-10)*

<sup>43</sup> No Yeesu wadi ton balde didi, o witti Galili. <sup>44</sup> Kanko e hoore makko o seedike, o wi'i: «Annabijjo teddintaake der leydi mum.» <sup>45</sup> No o yottii Galili, Galilinkee6e ja6borii mo juude didi, gam kambe bo 6e jahiino juulde Urusaliima, 6e ji'iino ko o wadi ton fu.

<sup>46</sup> Den Yeesu warti Kana, der leydi Galili to o waylitinnoo diyam laatii jaram. Tawi bii gorko semmenteejo gom, yandaa, e fukkii Kafarnahum.

<sup>47</sup> Semmenteejo on nani Yeesu yiwi Yahudiya, warii Galili. O yahi to makko, o eeli mo o yaha o nyawtaa biiyiko badiido maayugo. <sup>48</sup> Yeesu wi'i mo: «Abada on goondintaa, to on ji'ay kaayeefiji e haaynaareeji.» <sup>49</sup> Semmenteejo on wi'i mo: «Moodibbo, en jahu diga biiyam maayay.» <sup>50</sup> Yeesu wi'i mo: «Hootu, biiya e wuri.»

Gorko on goondini ko Yeesu bati dum, witti. <sup>51</sup> E laawol, golloo-be makko fotti e makko, wi'i mo biiyiko yoofike. <sup>52</sup> O yami 6e: «Wakkati dey o yoofii?» Be toontii mo, 6e bi'i: «Keenya juura jonte den yoofi mo.» <sup>53</sup> Baabiiko anniti wakkati oo don nun lalley Yeesu wi'i mo: «Biya yoofike!» Kanko e getti makko fu, 6e goondini Yeesu.

<sup>54</sup> Dum don woni kaayeefi didabi ki Yeesu wadi Galili, no yiwunoo Yahudiya.

## 5

### *Yeesu nyawtii moofo (Marku 2.28, Yuhana 7.19-26 e 9.1-17)*

<sup>1</sup> Baawo majjum, juulde Yahuduube e wada. Yeesu yahi Urusaliima.

<sup>2</sup> Urusaliima ton, takkol Dammagal baali, weldere diyam e woni don, nee wi'ee e Iburaninkeere Baytisayda. Dammude joy mawde e filtiti ne.

<sup>3</sup> Nyawbe duubbe e fukkii ley dammude den: wumuube, layoobe, e [moofidinbe]. Bee kedii diyam irtee,

<sup>4</sup> gam malaykaajo Joomiraawo e jippoo e weldere nen tife e tife, e irta diyam dam. Nyawdo artudo naati e diyam dam de dam irtaa, e yoofoo no nyaw mum wa'i fu.] <sup>5</sup> Gorko nyawdo diga duubi laso e sappo e jeetati e wonunoo don. <sup>6</sup> Yeesu yi'i oo fukkii, anniti o booyidii e nyaw, yami mo, wi'i «Aa yidi yoofaago?» <sup>7</sup> Nyawdo on toontii mo, wi'i: «Moodibbo, mi walaa goddo ballando am naatugo

e weldere nen to diyam irtike, go mi yottoo fu, den goddo artii am naatugo.»

<sup>8</sup> Yeesu wi'i mo: «Umma, ettu daago maa, yahu!»

<sup>9</sup> Don maa don gorko on yoofii, etti daago mum e yaha. Dum fakkii e nyalaane siwteteene, <sup>10</sup> gam majjum hooreebe Yahuduube wi'i nyawtaado on: «Hanne nyalaane siwteteene nun, laawol hokkay maa doonodaa daago maa.» <sup>11</sup> O toontii 6e, o wi'i: «Nyawtudo am, kan nun wi'immi: Ettu daago maa, yahu!» <sup>12</sup> Be yami mo: «Moy nun bi'udo maa: Ettu daago maa, yahu?» <sup>13</sup> Amma nyawtaado on annaano mo, gam Yeesu mutii caka himbe sabbu no 6e duudiri e nokkure nen.

<sup>14</sup> Baawo mum Yeesu fottitii e makko der suudu Alla, wi'i mo: «Daaru, jooni kan, a yoofike. Taa wadu hakke kade, wara ko buri dum bonugo hebee.» <sup>15</sup> Gorko on yahi batoy hooreebe Yahuduube wi'i Yeesu nun nyawti dum.

<sup>16</sup> Go Yahuduube fuddi gaccaago Yeesu gam o wadii dum e nyalaane siwteteene. <sup>17</sup> Yeesu wi'i 6e: «Baaba am, e golloo faa hanne, min bo, mii golla.»

<sup>18</sup> Gam majjum hooreebe Yahuduube hoccii niiya warugo mo, hinaa gam o biisii nyalaane siwteteene tan, amma gam o wi'i bo, Alla woni Baabiiko. O fotinii hoore makko e Alla.

### *Baawde Biddo Alla*

<sup>19</sup> Yeesu wi'i 6e: «Mii bata on e goonja: Biddo waawataa ko wadi godsum kan tan, sey ko yi'i Baaba e wada. Gam ko Baaba wadata fu, kanjum Biddo bo wadata. <sup>20</sup> Gam

Baaba e yidi Biddo, kan wadi e holla mo huune fu ko o wadata. O hollan mo golle furde dee do fu manju, faa haaynaare wada on. <sup>21</sup> Gam hande no Baaba fintinirta maaybe wuurina 6e, nun Biddo bo wuurinirta mo yidi. <sup>22</sup> Baaba kan, hiiataako goddo, amma o hokkii Biddo baawde hiitaago kiita fu, <sup>23</sup> gam himbe fu ted-dina Biddo hande no teddiniri Baaba.

Neddo fu mo teddinay Biddo, teddinay Baaba liloydo mo.

<sup>24</sup> Mii bata on e goonja. Nanudo haala am ko goondini liludo am, hebii yonki tabitiiki, o hiitataake. O yiwi e maayde, o warii to yonki. <sup>25</sup> Mii bata on e goonja: Wakkati e wara, ki yottike du, wakkati de maaybe nanata daane Biddo Alla. Nanube ne bo wuuran. <sup>26</sup> Hande no Baaba laatorii bulirde yonki, hande nun o hokkii Biddo bo laatoo bulirde yonki. <sup>27</sup> O hokkii mo baawde hiitaago, gam o laati nun Bii neddo. <sup>28</sup> To dum haaynoo on. Wakkati waran, de maaybe wonube der caabeeje nanata daane makko, <sup>29</sup> be burtoo. Wadube ko woodi, finta, heba yonki, wadube ko halli finta, hittee.»

### *Haala Yeesu laati nun goonja*

<sup>30</sup> «Min e hoore am, walaa fu ko baawumi wadugo. Ko nanumi, kiitortoomi. Kiita am e foonnitii, gam mi tokkataa sago am, sago lido am nun tokkumi. <sup>31</sup> To mi seedanike hoore am, seedaaku am nootataake. <sup>32</sup> E woodi goddo ceedantoodo am. Mii anni seedaaku makko, ko o seedantoo am laati nun goonja. <sup>33</sup> Onon, on lilii himbe to Yuhaana, o seedike goonja. <sup>34</sup> Min, mi bukaaka seedaaku neddo, amma mi batii ka gam kison. <sup>35</sup> Yuhaana laatike fitilla kuuboowa, jaaynoowa. On jaabii welweltugo wakkati sedda e jaynjol makko. <sup>36</sup> Min, mii woodi seedaaku burju nju Yuhaana manju. Golle de Baaba yowanimmi mi wada, golle de gadanmi den nun seedantoo am no Baaba nun lilimmi. <sup>37</sup> Baaba liludo am, kanko e hoore makko seidanii am. Abada on nanay daane makko, abada on ji'ay mo. <sup>38</sup> Batu makko wonday e moodon, gam on goondinay mo o lili. <sup>39</sup> Oon biditoo Dewte gam oon miji de kokkan on yonki tabitiiki. Kanje seedantoo am. <sup>40</sup> Amma, on jabay warugo to am gam kebon yonki.

<sup>41</sup> Diga e himbe bane kebammi teddunjal am, <sup>42</sup> amma mii anni on, mii anni yidde Alla walaa e moodon.

<sup>43</sup> Min, mi warii e inne Baaba am, on jaabbaaki am. Amma to goddo wardii inne mum, on jaabboto dum.

<sup>44</sup> Noy baawirton ko goondini, onon tedinontiroobe hakkune moodon, go accudon daartugo teddunjal Alla?

<sup>45</sup> To on miilee min gaccotoo on yeeso Baaba. Muusa, mo jowudon hoolaare moodon dow mum, kanko nun gaccocytoo on. <sup>46</sup> To on goondiniino Muusa e goonja, on goondinanno am min bo, gam min o batani der dewte makko. <sup>47</sup> Amma no on goondinay ko o winni, noy goondinirton haala am?»

## 6

*Yeesu nyaannii himbe ujune joyo  
(Matiye 14.13-21; Marku 6.30-44;  
Luka 9.10-17)*

<sup>1</sup> Baawo majjum Yeesu joli maayo Galili, bi'eteenjo Tiberiya. <sup>2</sup> Jama'aare duunne e tokki mo gam be ji'ii haaynaareeji di o wadi dow nyawbe.

<sup>3</sup> Yeesu eenci dow waanne, joododii ton e aahiibe mum. <sup>4</sup> Tawi juulde Yahuduubee bi'eteede Paska badike.

<sup>5</sup> Yeesu banti hoore, hollirii jama'aare duunne e fonnoy dum. O yami Filippu: «Toy kebeten cooden nyaamdu ko nyaannata bee do fu?» <sup>6</sup> O batu nun makko gam o nana ko Filippu toontotoo, gam oo anni ko o mili wadugo.

<sup>7</sup> Filippu toontii mo, wi'i: «Baa gollotoodo golle juude balde keme didi, joddi mum heyataa sooda peen, tawee moy fu heba nappel.» <sup>8</sup> Gooto e aahiibe makko, bi'eteedo Andere, miiraawo Simon Piyer, wi'i mo: <sup>9</sup> «E woodi do suka gorko gom gooduso peen joy e liyyi didi, amma ume dum don wadanta bee do fu?»

<sup>10</sup> Yeesu wi'i: «Bi'ee be, be joodoo.» Nokkuure nen e hebbi fudo, be joodii. Be gadan himbe ujune joyo. <sup>11</sup> Yeesu etti peen kon, yetti Alla, yedi wonube don. O wadi liyyi dii bo hande nun. O hokki be faa be kaari. <sup>12</sup> No be kaari, Yeesu wi'i aahiibe mum: «Kawritee ko horii, baa godsum to halku.»

**13** Be kawriti ɳappe peen joyo ko himbe 6en horii, ko kebbi killaaje sappo e didi.

**14** No himbe yi'i kaayeefi dum Yeesu wadi, 6e bi'i: «Lalley, kanko woni Annabijo bi'aado e wara der duuniyaaru.»

**15** Amma no Yeesu e anni 6e garan nanjugo dum e semme, 6e laamina, o dilli diga don, o eenci dow waanne, kanko tan.

### *Yeesu e yaha dow diyam maayo.*

(Matiye 14.22-34; Marku 6.45-53)

**16** Kiikiide mum, aahiibe Yeesu yahii fonjo maayo. **17** Be naati laana diyam gam 6e jola, 6e jaha Kafarnahum. Niwre fuddii wadugo, tawi Yeesu hewtaaki 6e taw. **18** Hennu mawkol e wifa, galmaji diyam e ummoo. **19** Be jawdini laana kan faa 6e kebi hande kilo joy naa jeego'o. Den 6e kolliri Yeesu e yaha e koyde dow maayo, faa 6attii 6e. Be kuli. **20** Yeesu wi'i 6e: «Min nun, to on kulee!» **21** Be eeli mo o naata e laana kan. Don maa don 6e jottii fonjo to 6e poonnii.

### *Himbe e daarta Yeesu*

**22** Fini mum, jama'aare wonunoone fonjo maayo, yi'i laana goota tan woni ton. Yeesu naatiday e aahiibe mum laana kan. Kambe tan yawti e makka. **23** Laanaaje yiwude Tiberiya warii takkol to 6e nyaami peen don, baawo no Joomiraawo yetti Alla. **24** No jama'aare yi'i Yeesu e aahiibe mum walaa don, 6e naati laanaaje, 6e batti Kafarnahum daartogyo mo.

### *Yeesu woni nyaamdu kokkoowol yonki*

**25** No 6e tawi Yeesu fonjo maayo, 6e bi'i dum: «Moodibbo, dey garudaa do?» **26** Yeesu toontii 6e, wi'i: «To goonaun, hinaa gam on ji'ii kaayeefi acci oon daartammi. Ko daartirton am woni gam on nyaamii faa on kaarii. **27** To on gollee gam nyaamdu keennyoowol, amma gollee gam nyaamdu tabitintonjol, kokkoowol yonki tabitiiki. Nyaamdu 6ol don

nun, Bii neddo hokkata on, gam kanko Alla Baaba, waðani maane baawde mum.»

**28** Den 6e yami mo, 6e bi'i: «Ume men gadata ko men gada golle de Alla yidi?» **29** Yeesu toontii 6e, wi'i: «Golle de Alla yidi woni goondinon mo olili.»

**30** Be toontii mo, 6e bi'i: «Kaayeefi kiye gadataa men ji'a, faa men goondine? Ume gadataa? **31** Maamiraabe amen nyaamii nyaamdu maannu der haro, hande no dewte wi'i: «O hokkii 6e nyaamdu yiwunu dow kammu».» **32** Yeesu toontii 6e, wi'i: «Mii bata on e goona: hinaa annabi Muusa hokki on nyaamdu yiwujol dow kammu. Baaba am hokki on nyaamdu geetol, yiwujol dow kammu. **33** Nyaamdu 6ol Alla hokkata woni, yiwujol dow kammu, kokkoowol duuniyaaru yonki.» **34** Be bi'i mo: «Moodibbo, hokku men nyaamdu 6ol baadey.»

**35** Yeesu wi'i 6e: «Min woni nyaamdu kokkoowol yonki, garudo to am, rafataake abada, goondindo am bo dondataake abada. **36** Amma mi batii on: on ji'ii am, ko on goondinay. **37** Be Baaba hokkimmi fu, waran to am. Garudo to am fu, mi salataako dum. **38** Gam wadugo ko jidumi bane acci yiwmi dow kammu, amma gam mi wada ko liludo am yidi. **39** Nani ko lildo am yidi: to baa gooto der himbe o hokki am majju, amma gam mi ummitina 6e nyalaane darnjal. **40** Nani ko Baaba am yidi: ji'udo Biddo fu, to goondinii mo, hebij yonki tabitiiki. Mi ummitinan mo nyalaane darnjal.»

**41** Yahuduuse e dumbitoo hakkune mum dow haala Yeesu, gam o wi'i: «Min woni nyaamdu yiwujol dow kammu» **42** Be bi'i: «Oo do, hinaa Yeesu 6ii Yusufu, mo annuden inna mum e baaba mum on na? Noy o wi'irta: «Dow kammu yiwmi?»

**43** Yeesu wi'i 6e: «To on dumbitee hakkune moodon! **44** Goddo waawataa ko wari to am, to Baaba lildo am fooday mo. Min, mi ummitinan mo nyalaane darnjal. **45** E winnii der dewte annabiise: «Be fu

Alla janninan 6e.” Neddo fu nanudo ko Baaba bati, go jaibi janninol makko, waran to am. <sup>46</sup> Baa gooto yi'ay Baaba, to hinaa yiwudo to Alla, kanko tan yi'i Baaba. <sup>47</sup> Mii bata on e goonja: Goondindo am, hebii yonki tabitiiki. <sup>48</sup> Min woni nyaamdu kokkoowol yonki. <sup>49</sup> Maamiraabe moodon nyaamii maannu der haro, 6e maayii bo. <sup>50</sup> Nol do nun nyaamdu yiwujol dow kammu, nyaamudo ηol fu maayataa. <sup>51</sup> Min woni nyaamdu yonkintewol, yiwujol dow kammu. To neddo nyaami nyaamdu ηol, wuuran faa abada. Nyaamdu ηol kokkanmi gam duuniyaaru wuura, laati nun bannu am.»

<sup>52</sup> Dow kaa don Yahuduuse e yeddontira no waawi fu, e wi'a: «Noy neddo oo waawirta ko hokki en bannu mum nyaamen?» <sup>53</sup> Yeesu toontii 6e, wi'i: «Mii bata on e goonja: To on nyaamaay bannu Bii neddo, on jaray yiiyam makko, yonki walaa der moodon. <sup>54</sup> Neddo fu nyaamudo bannu am, to yari yiiyam am, hebii yonki tabitiiki. Mi fintinan mo nyalaane darjal. <sup>55</sup> Gam bannu am laati nun nyaamdu lalley, yiiyam am bo laati nun jaram lalley. <sup>56</sup> Neddo fu nyaamudo bannu am, to yari yiiyam am, oo wondi e am, min bo mii wondi e makko. <sup>57</sup> Baaba liloydo am laati nun buurudo. Gam makko buurumi. Hande nun nyaamudo am fu, wuuriita gam am. <sup>58</sup> Nol do nun woni nyaamdu yiwujol dow kammu. Ηol nandaa e ηol kaakiraabe moodon nyaamuno, 6e maayii bo. Nyaamudo nyaamdu ηol do wuuran faa abada.»

<sup>59</sup> Haalaaji dii do nun Yeesu jannini der suudu waajorde Kafarnahum.

### *Yonki tabitiiki*

<sup>60</sup> No 6e nani haalaaji din, duuggal e aahiibe makko wi'i: «Haala ka e tiidi. Moy waawata ko jaibi ka?»

<sup>61</sup> Yeesu faami der berne mum, aahiibe mum e dumbitoo dow majjum, go o wi'i 6e: «Haala kan jiibi on nun? <sup>62</sup> Jon kan to on ji'ii Bii neddo eenci to wonunoo, den mum noy gadoton? <sup>63</sup> Ruuhu woni

buurinoowo, bannu nafataa godsum. Haalaaji haalanmi on dii, laati nun Ruuhu e yonki. <sup>64</sup> Nani e woodi hakkune moodon 6e goondinay.» Gam Yeesu e anni diga fuddoode, 6e goondinay dum, e jammotoodo dum. <sup>65</sup> O 6eydi o wi'i: «Gam majjum bi'umi on: “Walaa baawoovo ko wari to am, to Baaba hokkay dum no warirta”.»

<sup>66</sup> Diga den, duuggal e aahiibe makko dilli, acci tokkugo mo. <sup>67</sup> Den Yeesu yami aahiibe sappo e dido ben: «Onon bo, oon jidi dillugo na?» <sup>68</sup> Simon Piyer toontii mo, wi'i: «Joomiraawo, to moy men jahata? An woodi haala kokkoowa yonki tabitiiki. <sup>69</sup> Men goondinii, emen anni an woni Ceniido yiwudo e Alla.» <sup>70</sup> Yeesu toontii 6e, wi'i: «Hinaa min subi on, onon sappo e dido? Gooto moodon laati nun seydaanujo.»

<sup>71</sup> Haala Yahuuda, bii Simon Iskariyot nun o batata, gooto der sappo e dido ben. Oo don woni jammotoodo mo.

## 7

### *Miiraabe Yeesu goondinay dum*

<sup>1</sup> Baawo majjum Yeesu e woosoo der Galili. O yidaa woosaago der Yahudiya gam hooreebe Yahuduuse e daarta no warirta mo. <sup>2</sup> Tawi juulde Yahuduuse bi'eteede juulde bukaaji badike. <sup>3</sup> Miiraabe Yeesu wi'i dum: «Eggu, jahaa Yahudiya gam aahiibe maa yi'a golle de gadataa. <sup>4</sup> Goddo suudataa ko wadata, to e yidi an-neego. No aa wada golle dee, hollitin hoore maa himbe.»

<sup>5</sup> Baa miiraabe makko goondinay mo. <sup>6</sup> Yeesu wi'i 6e: «Wakkati am waray taw, amma onon, wakkati fu laati nun wakkati moodon. <sup>7</sup> Himbe duuniyaaru waawataa ko wanyi on, amma min, bee banyimmi gam mii seedoo golle maabbe woodaa. <sup>8</sup> Onon, jahee juulde den. Min, mi yahataa, gam wakkati am waray taw.» <sup>9</sup> No o batii 6e kaa don, o joofii leydi Galili.

### *Yeesu yahi juulde bukaaji*

<sup>10</sup> No miiraabe Yeesu yahi juulde den, Yeesu bo yahi ton, amma o

hollitay hoore makko, o suudii.  
**11** Hooreebe Yahuduube e daarta mo der juulde, e wi'a: «Toy o woni?»

**12** Himbe duubbe e dumbitoo dow haala makko. Wobbe e wi'a: «Neddo geeto nun!» Wobbe bo e wi'a: «Nun nun bane, majjinoowo himbe nun.» **13** Goddo suusay batango mo e daane towne, gam bee kula hooreebe Yahuduube.

**14** Tawi juulde den fecciri, go Yeesu fuddi janningo der suudu Alla. **15** Haaynaare wadi Yahuduube sanne, 6e bi'i: «Noy o waawiri dewte, kanko mo janjay?»

**16** Yeesu toontii 6e, wi'i: «Jande janjinammi on, yiway e am. Diga to lilooyo am, dum yiwi. **17** To neddo e yidi wadugo sago Alla, o annitan janjinol am to Alla yiwi, naa bo to haalaaji am, e baawde am nun yiwi. **18** Batanoowo hoore mum, hoore mum nun daartanta teddujal. Amma daartoowo teddujal lilooyo dum, oo don goonja nun batata, fewre walaa e makko. **19** Hinaa Muusa hokki on tawreeta na? Amma baa gooto moodon golliray tawreeta. Ko woni sabbu go oon daarta warugo am?» **20** Himbe ben toontii mo, wi'i: «An, aa woodi ginnool. Moy daartata warugo maa?»

**21** Yeesu toontii 6e: «Golle goote tan gadumi, on fu, haaynaare wadi on. **22** Muusa hokkii laawol gadon julnol. Diga to Muusa du bane nol yiwi, diga to kaakiraabe mon nun, go oon julna suka nyalaane siwteteene. **23** To suka e julnee nyalaane siwteteene, gam to tawreeta Muusa yartee, gam ume monnotodon gam mi nyawtii tagaado bumbum nyalaane siwteteene? **24** Accee hiitoraago no ji'inton, amma gadee kiita poonnitiika.»

### *Yeesu woni Almasiihu na?*

**25** Go himbe Urusaliima wobbe wi'i: «Hinaa oo do be daartata warugo na? **26** Oo woni caka maabbe, oo bata, 6e bi'ay mo gokka. Den mawbe amen annitin nun kanko woni Cubaado na? **27** Oo do kan, een anni to yiwi, amma

to Cubaado e wara, goddo annataa to o yiwata.»

**28** Tawi Yeesu e jannina der suudu Alla, obatie daane towne, o wi'i: «Oon annimmi, oon anni to yiwumi! Min bane waddi hoore am. Liloydo am laati nun goonjaajo. Kanko woni mo on annaa. **29** Min, mii anni mo gam to makko yiwmii. Kanko liloymmi.»

**30** Den 6e daarti no 6e nannjirta mo, amma goddo junjo mum meemaay mo, gam wakkati makko waray taw. **31** Duuggal der jama'aare goondinii mo, wi'i: «To Cubaado warii, o wadan kaayeefi burudi dí gorko oo wadi na?»

### *Reenube suudu Alla lilaama nanya Yeesu*

**32** Farisaabe nani ko himbe ben dumbintoo dow haala Yeesu. Hooreebe Limaamiibe e Farisaabe lili reenoobe, nanja mo. **33** Yeesu wi'i: «Min, mii wondi e moodon sedda taw. Baawo mum, mi wittan to lilooyo am. **34** On daartan am, amma on jiitataa am, gam on baawataa ko yahi to gonumi.»

**35** Yahuduube yamontiri, wi'i: «Toy o yahata ko en baawataa ko yiiti mo? O yahan to himbe meeden feroybe to Yunaninkeebe, o janjina Yunaninkeebe na? **36** O wi'i en daartan mo, en jiitataa mo, gam en baawataa ko yahi to o tawetee. Kaye nun kaa don bo?»

### *Diyam yonki*

**37** Nyalaane sakitiineere der juulde den buri teddugo. Nyaanne mum, Yeesu darii, bati e daane towne, wi'i: «Neddo fu dondaado wara to am, yara. **38** Goondindo am fu, “ilaadi diyam yonki mawdi ilan e berne mum” hande no Dewte bati.»

**39** O batu nun kaa don dow Ruuhu mo goondindo fu hebata. Den Ruuhu hokkaaka taw, gam Yeesu teddi-naaka taw.

### *Himbe luudontirii sabbu Yeesu*

**40** No wobbe der jama'aare nen nani haala ka, wi'i: «Lalley kanko woni Annabijjo.» **41** Wobbe wi'i: «Kanko woni Cubaado.» Wobbe bo wi'i: «Cubaado yiwan diga Galili na?» **42** Dewte wi'ay ba, e lenyol annabi

Dawda nun Cubaado yiwata, der siire Baytilaama, to Dawda yiwi? **43** Jama'aare nen luudontiri gam makko. **44** E woodi yidubé nanjugo mo der mabbe, amma goddo junjo mum meemaay mo.

### *Mawbe Yahuduube goondinay Yeesu*

**45** Reenoobe warti to hooreebe Li-maamiibe e Farisaabe, be yami be, be bi'i: «Ko woni sabbu ko on gad-day mo?» **46** Reenoobe ben toontii, wi'i: «Abada goddo batiray no gorko on batiri.» **47** Farisaabe yami be: «Onon bo on majjinaama hinaa? **48** E woodi baa gooto der hooreebe, maa bo der Farisaabe goondindo mo na? **49** Amma jama'aare ne annaa tawreeta, ne yaa'aane»

**50** Gooto der mabbe, bi'eteedo Nikodem, jahunoodo to Yeesu wi'i be: **51** «Tawreeta meeden e hiitoo neddo tawee nanaaka ko o bati, annaaka ko o wadi na?» **52** Be bi'i mo: «An bo a Galilinkeejo na? Widita Dewte, a yi'an walaa annabijjo yiwudo Galili.» [ **53** Baawo mum, moy fu hooti wuro mum.

## 8

### *Debbo jeenoowo*

**1** Yeesu yawti far waanne Jaytuge. **2** Subaka kecco o witti der suudu Alla. Jama'aare fu wari. O joodii, oo jannina be. **3** Moodibbe tawreeta, e Farisaabe waddi debbo nanjaado e wada jeenu. Be darni mo caka jama'aare. **4** Be bi'i Yeesu: «Moodibbo, debbo oo do nanja nun e wada jeenu. **5** Muusa batii der tawreeta men, iri debbo oo don kaaye nun warirtee. An bo, kaye bi'udaa?»

**6** Be baddu nun be yoyra mo, gam be keba no be gaccorii mo. Amma Yeesu jimminii, e winna e honnu mum dow leydi. **7** No be tokki bee yamitoo mo, Yeesu banti hoore, wi'i be: «Goddo moodon mo waday hakke daeey arta fadda mo hayre.»

**8** O jimminii kade, oo winna e leydi. **9** No be nani ka, be dilli gooto gooto. Nayeebe arti dilli. Yeesu e debbo on

tan horii. **10** Yeesu banti hoore, wi'i mo: «Debbo, toy be goni? Baa gooto hiitaaki maa?» **11** O toontii, o wi'i: «Moodibbo, baa gooto.» Yeesu wi'i mo: «Min bo, mi hiiataako ma. Yahu, taa mayta kade wadugo hakke.»]

### *Yeesu woni jaynjol duuniyaaru*

**12** Yeesu baddi e mabbe kade, wi'i: «Min woni jaynjol duuniyaaru. Tokkudo am, yahataa e niwre abada, amma o heban jaynjol yonki.» **13** Dow kaa don, Farisaabe wi'i mo: «To aa seedanoo hoore maa, seedaaku maa jaabataake.»

**14** Yeesu toontii be, wi'i: «Baa to mi seedanike hoore am, seedaaku am e laatii goonja, gam mii anni to yiwmi, mii anni to jahammi bo. Amma onon, on annaa to yiwmi, on annaa bo to jahammi. **15** Oon gada kiitaa hande no himbe hiitortoo, amma min, mi hiiataako goddo. **16** To mii wada kiita, kiita am e laatii goonja, gam mi hiiataako min tan, amma Baaba liroydo am, e wondi e am. **17** E Winnii e tawreeta moodon: "Seedaaku himbe dido e laatii goonja". **18** Mii seedanoo hoore am. Baaba liroydo am bo, e seedanoo am.» **19** Be bi'i mo: «Toy Baaba maa woni?» Yeesu toontii, wi'i be: «On annaa am min, hakko Baaba am. To oon annunoo am, maa on anniino Baaba am bo.»

**20** Yeesu batii haalaaji dii no o janjinta der suudu Alla, to nokkuure ceede Alla wattetee. Goddo nannjay mo, gam wakkati makko yottaaki taw.

### *On baawataa yahugo to jahanmi*

**21** Yeesu wi'i be kade: «Mi nani yaha, on daartan am, on maaydan e hakkeeji moodon. On baawataa ko yahi to jahanmi.» **22** Yahuduube wi'i: «O waritinto nun naa? Gam o wi'i en baawataa ko yahi to o yahata.» **23** Yeesu wi'i be: «E leyjeyadon, amma min, dow jeyaami. E duuniyaaru nuu jeyadon, amma min, mi jeyaaka e maayru. **24** Gam majjum bi'umi on: on maaydan e hakkeeji moodon. Gam to on goondinay min woni mo gonmi, on maaydan e hakkeeji moodon.» **25** Be yami mo: «An

moy nun laatidaa?» Yeesu toontii: «Mo bi'unoo mi on diga arande, laati-im. <sup>26</sup> Mii woodi huune duuddsum ko batanmi, e ko kiitotoomi dow mon. Amma liloydo am laati nun goonjaajo. Ko nanumi e makko, batanmi duuniyaaru.»

<sup>27</sup> Be paamay naa Baaba nun o batanta 6e. <sup>28</sup> Den Yeesu wi'i 6e: «To Bii neddo bilaama fu, den paamoton "min woni mo gonmi," mi wadataa bo godsum e hoore am, amma mi batan nun ko Baaba ekkitinimmitan. <sup>29</sup> Liloydo am e wondi e am, o accay am min tan, gam ko welata mo gadanmi wakkati fu.» <sup>30</sup> No o batihande nun, duubbe goondinii mo.

### Rimbe e maccube

<sup>31</sup> Yeesu wi'i Yahuduube, goondinbe sum: «To oon jogii haala am, on laati nun aahiibe am lalley. <sup>32</sup> On annan goonja. Goonja bo rindinan on.»

<sup>33</sup> Be toontii mo, 6e bi'i: «Menen, men yiwi e lenyol Iburahiima, abada men laataaki maccube goddo. Noy bi'irtaa men dimdan?» <sup>34</sup> Yeesu toontii 6e, wi'i: «Mii bata on e goonja: gadoowo hakke fu laati nun maccudo hakke. <sup>35</sup> Maccudo wonataako der saare baadey, amma biddo nun wonotoo der saare e baadey <sup>36</sup> To Biddo rindinii on, on laatoto rimbe e goonja. <sup>37</sup> Mii anni on yiwi e lenyol Iburahiima, amma oon daarta warugo am gam haala am naatay der moodon. <sup>38</sup> Ko ji'umi e Baaba kan nun batanmi, onon bo oon gada ko Baaba moodon wi'i on.»

<sup>39</sup> Be toontii mo, 6e bi'i: «Baaba amen woni Iburahiima.» Yeesu wi'i 6e: «To on latino biibbe Iburahiima e goonja, maa on gadiino golle Iburahiima. <sup>40</sup> Amma jooni oon daarta warugo am, min batudo on goonja ka nanumi to Alla. Dum don Iburahiima waday dum. <sup>41</sup> Onon, golle Baaba moodon gadoton.» Be bi'i mo: «Menen, men jaaluube bane, Baaba gooto men goodi, kanko woni Alla.»

<sup>42</sup> Yeesu wi'i 6e: «To Alla nun laatino Baaba moodon, maa on jidiino am, gam to Alla yiymi, ko garumi. Mi wadday hoore am, amma kanko

lilimmi. <sup>43</sup> Gam ume ko on nanataa haala am? Gam on baawataa ko hettini haala am. <sup>44</sup> Seydan woni baaba moodon. Jidaadi baaba moodon gadoton. Baroowo nun o laatii diga fuddode. O walaa der goonja, gam goonja walaa der makko. To oo bata fewre, jikku makko nun, gam oo pewoowo, oo baaba fewre. <sup>45</sup> Amma min, gam mii bata goonja, wadi ko on goondinay am. <sup>46</sup> Moy moodon waawata seedaago mi wadii hakke? To mi batii goonja, gam ume ko on goondintaa am? <sup>47</sup> Neddo Alla nun hettintoo haala Alla. Onon, on kettintaako gam on laataaki himbe Alla.»

### Yeesu e buri Iburahiima

<sup>48</sup> Yahuduube wi'i mo: «Men batay goonja no men bi'i a laati nun samariyaajo, aa woodi bo ginnool na?» <sup>49</sup> Yeesu toontii 6e, wi'i: «Mi woodaa ginnool, amma mii teddina Baaba am. Onon, oon jawoo am. <sup>50</sup> Teddujal hoore am bane daartanmi. E woodi daartanoowo am teddujal, kiitotoodo. <sup>51</sup> Goonja batanmi on: Jabudo haala am fu, maayataa abada.»

<sup>52</sup> Yahuduube wi'i mo: «Jooni men tabbitini aa woodi ginnool. Iburahiima e annabiibe fu maayi, amma an, a wi'ii: "Jabudo haala am fu, maayataa abada". <sup>53</sup> Aa buri Iburahiima baaba amen manju na? O maayii, annabiibe bo maayii. Ume miiludaa a laatii?»

<sup>54</sup> Yeesu toontii 6e, wi'i: «To hoore am teddinammi, teddujal am laati nun baanji. Baaba am, mo bi'oton Alla moodon on nun teddintammi. <sup>55</sup> On annaa mo. Amma min, mii anni mo. To mi wi'ii mi annaa mo, mi laatoto pewoowo hande moodon. Amma mii anni mo, mi tokkii haala makko. <sup>56</sup> Baaba moodon Iburahiima e seyorino yi'ugo nyalaane wittoyo am. O yi'ii ne, go berne makko weli.»

<sup>57</sup> Yahuduube wi'i mo: «A waday taw baa duubi lasoy didi e sappo, go aa wi'a a yi'ii Iburahiima?» <sup>58</sup> Yeesu toontii 6e, wi'i: «Mii bata on e goonja: Diga Iburahiima tagaaka, min, mi

na'on.» <sup>59</sup> Dow kaa don 6e etti kaaye 6e padda mo. Amma Yeesu soltii, wurtii e suudu Alla.

## 9

### *Yeesu wuntinii dimdaado e bundan*

<sup>1</sup> No Yeesu yawtata, o yi'i gorko dimdaado e bundan. <sup>2</sup> Aahiiõe makko yami mo, wi'i: «Moodibbo, moy wadi hakke, kanko na, naa baaba e inna makko nun, ko o rindaa e bundan?» <sup>3</sup> Yeesu toontii 6e wi'i: «Kanko bane wadi hakke, baaba e inna makko bo bane. Amma gam baawde Alla yi'ee e makko nun. <sup>4</sup> No jaynjol na'on taw, haani gaden golle lilyodo am. Gam jemma waran de goddo waawataa ko golii. <sup>5</sup> No mii tawaa e duuniyaaru, min woni jaynjol mayru.»

<sup>6</sup> Den, no o batii kaa don, o tuuti joode e leydi, o laawi loope e joode den, o moomi e gite bumdo on. <sup>7</sup> O wi'i mo: «Yahu sulmaa weeldere Silowe.» (Dum wi'ay maa Lilaado). O yahi, o sulmii. O warti oo yi'a.

<sup>8</sup> Wondunoõe e makko, e yi'annoõe mo oo fiya bara, wi'i: «Hinaa oo do joodotono e fiya bara na?» <sup>9</sup> Wõõõe wi'i: «Kanko nun!» Wõõõe bo wi'i: «Kanko bane! Nandi makko nun!» Gorko on e hoore mum wi'i: «Min nun lalley!» <sup>10</sup> Be yami mo: «Noy bumtirdaa?» <sup>11</sup> O toontii: «Gorko bi'eteedo Yeesu laawi loope, moomi e gite am, wi'immi: "Yahu weldere Silowe, culmodaa". Jahumi, culmiimi, ko bumtumi.» <sup>12</sup> Be yami mo: «Toy gorko on woni?» O toonti: «Mi annaa!»

### *Farisaabe e yantinoo bumtinaado*

<sup>13</sup> Den 6e jaari bumtinaado on to Farisaabe. <sup>14</sup> Nyalaane Yeesu laawi loope wumtini mo, laati nun nyalaane siwteteene. <sup>15</sup> Farisaabe bo yami mo, wi'i: «Noy bumtirdaa?» O toontii 6e: «O moomu nun loope e gite am, ko culmiimi, ko bumtumi.» <sup>16</sup> Wõõõe der Farisaabe wi'i: «Gorko on waawataa ko yiwi to Alla, gam o jogaaki nyalaane siwteteene.» Wõõõe bo wi'i: «Noy gadoowo hakke waawirta ko wadi iri kaayefiji dii do?» Go 6e ceenniri hakkune maõõe.

<sup>17</sup> Farisaabe yami bumtinaado on kade, wi'i: «An kaye batataa dow bumtindo maa on?» O toontii 6e, o wi'i: «Annabijjo nun.»

<sup>18</sup> Hooreeõe Yahuduubõe jabay naa oo laatino bumdo, sey no 6e noddi baaba e inna makko. <sup>19</sup> Be yami 6e: «Oo do 6iddo moodon mo bi'udon rindaa e bumdan on nun don na? Jon kan noy o wuntiri?» <sup>20</sup> Baabiiko e inniiko toontii: «Emen anni 6iddo amen nun, e bumdan nun bo o rindaa. <sup>21</sup> Amma no o wuntiri jooni, men annaa. Men annaa bo moy wuntini mo. Kanko bo o mawdo nun. O waawan ko toontanii hoore makko. Yamee mo!»

<sup>22</sup> Baabiiko e inniiko toontorike nun nun gam 6ee kula hooreeõe Yahuduubõe. Gam 6e desu nun: Neddo fu jaõi Yeesu laati nun Cubaado, 6e diiwa dum, 6e burtina waajorde. <sup>23</sup> Gam majjum saareeji makko wi'i: «O mawnii, yamee mo!»

<sup>24</sup> Farisaabe nodditii bumtinaado on, 6e bi'i mo: «Teddin Alla, emen anni, menen kan, gorko on hakkeejo nun.» <sup>25</sup> O wi'i 6e: «To o hakkeejo nun, min kan, mi annaa. Goota tan annumi: Mi bumunoodo, jooni mii yi'a.» <sup>26</sup> Be yami mo: «Ume o wadi e maa? Noy o wuntiniri maa?» <sup>27</sup> O toontii 6e, o wi'i: «Mi batii on dum, amma on kettinaaki. Gam ume go oon jidi nanitaago ka kade? Naa onon bo, on jidu nun laataago aahiiõe makko?»

<sup>28</sup> Be jenni mo, 6e bi'i: «An woni aahiiõe makko! Menen, men aahiiõe Muusa nun. <sup>29</sup> Menen, emen anni Alla baddii e Muusa, amma kanko, men annaa to o yiwi.»

<sup>30</sup> Gorko on toontii 6e, wi'i: «E dum haaynii no on annaa to o yiwi, ko o wuntinimmi! <sup>31</sup> Een anni Alla hettinantaako waõõõe hakke, amma oo hettinanoo teddindo mo, gadoowo sago makko. <sup>32</sup> Dadey nanaaka bumtindo dimdaado e bumdan. <sup>33</sup> To hinaa to Alla gorko on yiwi, o waawataano ko wadi godsum.»

<sup>34</sup> Be toontii mo: «An, bumbum, der hakkeeji dimadaa, an janjinta men!» Be nyeebi mo yaasi.

*Bundan der berne*

<sup>35</sup> Yeesu nani 6e nyeebii bumti-naado on, yi'itii mo, yami mo: «An kan, aa goondini Bii neddo na?» <sup>36</sup> O toontii: «Moodibbo, moy woni kanko faa mi goondina mo?» <sup>37</sup> Yeesu wi'i mo: «A yi'ii mo, baddoowo e maa woni kanko.» <sup>38</sup> O toontii: «Moodibbo, mii goondini.» O sujidani Yeesu.

<sup>39</sup> Den Yeesu wi'i mo: «Mi waru nun der duuniyaaru mi wada kiita, gam wumube yi'a, yi'oobe wuma.»

<sup>40</sup> Farisaabe tawanoobe don, nani ka, yami mo, wi'i: «Menen bo, men wumube na?» <sup>41</sup> Yeesu toontii 6e: «To oon bumuno, on goodataano boofi. No bi'oton jooni oon ji'a, gam majjum boofi moodon tabitii.»

## 10

### *Balloon duroowo e baali*

<sup>1</sup> Yeesu wi'i: «Mii bata on e goonja, neddo fu naatoowo der hoggo baali go naatiray dammugal, go yartorii to feere, kanko woni gujo, kanko woni pasotoodo. <sup>2</sup> Amma duroowo baali, dammugal nun naatirta. <sup>3</sup> Cakkiido dammugal maabitanan mo, baali din bo nanan daane makko. O noddiran di, nyaye fu e inne mum, o yaara di yaasi. <sup>4</sup> To o wurtinii di di fu, o ardo di, di tokka mo gam dii anni daane makko. <sup>5</sup> Abada di tokkataa kodo, amma di doggan mo nun faa woddi gam di annaa daane hobbe.»

<sup>6</sup> Yeesu wađani 6e balloon njol, amma 6e paamay ko njol fillitii.

### *Yeesu latii duroowo geeto*

<sup>7</sup> Yeesu wi'i 6e kade: «Mii bata on e goonja, min woni dammugal baali. <sup>8</sup> Artube am warugo fu, laati nun wuybe e pasotoobe, amma baali dii nananay 6e. <sup>9</sup> Min woni dammugal. Neddo fu naatirdo e am, hisan, heban durdugol, ooran, jaannyan. <sup>10</sup> Gujo warataa maa gam wujja, o wara, o biisa, amma min, mi waru nun gam himbe heba yonki, heba ki kii heewi.

<sup>11</sup> Min woni duroowo geeto. Duroowo geeto woni kokkitiroowo yonki mum gam baali mum. <sup>12</sup> Amma biiro, mo laataaki duroowo geeto, mo jeyaa baali, to yi'ii buuru,

sey dogga, acca baali. Buuru nanna baali din, sankita koriidi. <sup>13</sup> Biiro on doggan gam faalaaka e majji. <sup>14</sup> Min woni duroowo geeto. Mii anni baali am, baali am bo e annimmi. <sup>15</sup> Hande no Baaba annirimmi, non annirmi Baaba. Mii hokka yonki am gam baali am. <sup>16</sup> Mii woodi kade baali goddi di galaa der hoggo ño. Dii don bo haani mi dura dum. Di nanan daane am, di laatoo darne woore, di gooda duroowo gooto.

<sup>17</sup> Baaba e yidimmi gam mii hokkitira yonki am gam mi hebitoo ki kade.

<sup>18</sup> Goddo ittantaa am ki, min hokkata ki e hoore am. Mii woodi baawde hokkitirgo ki, mii woodi bo baawde hebitaago ki. Ooda kaa don kebumi e Baaba am.»

<sup>19</sup> Batuuji dii seenni kade Yahuduubé. <sup>20</sup> Duubé mabbe e wi'a: «O ginnaajijo nun, o haanja nun. Gam ume go oon kettinanoo mo?» <sup>21</sup> Amma wobbe wi'i: «Batu kaa, haala ginnaajijo bane. Ginnool waawan ko wuntini bundo na?»

### *Yahuduubé salike Yeesu*

<sup>22</sup> Juulde senuki suudu Alla e wadeno Urusaliima. Dum fottii e dabbune. <sup>23</sup> Ley suudu Alla don, Yeesu e yaha e warta ley danki Suleymaanu. <sup>24</sup> Yahuduubé filititii mo, wi'i mo: «Faa dey accataa men der seko? To an woni Cubaado laabinan men.»

<sup>25</sup> Yeesu toontii 6e: «Mi batii on, on goondinay. Golleeji di gadirmi inne Baaba am, e seedanoo am. <sup>26</sup> Amma on goondinay gam on laataaki baali am. <sup>27</sup> Baali am e nana daane am. Mii anni di, dii tokkimmi. <sup>28</sup> Mii hokka di yonki tabitiiki, di baatataa abada. Goddo teetataa di e junjo am. <sup>29</sup> Baaba am kokkudo am di, guri huune fu. Goddo waawataa ko teeti di e junjo Baaba. <sup>30</sup> Min e Baaba fu, men gooto.»

<sup>31</sup> Den Yahuduubé etti kade kaaye gam 6e padda mo. <sup>32</sup> Yeesu wi'i 6e: «Mi wadii yeeso moodon golleeji booddii duuddi e baawde Baaba. Der golleeji din, diye e majji jidsandon warirgo am kaaye?» <sup>33</sup> Yahuduubé toontii mo: «Gam golle boodde bane men

jidi warirgo maa kaaye, ko men jidi warirgo maa nun, gam a yennii Alla. An a tagaado nun, a wadii hoore maa Alla.»

<sup>34</sup> Yeesu toontii 6e: «Dum winnaaka der tawreeta moodon: "Alla wi'ii on, on allaabe na"?» <sup>35</sup> To tawreeta nod-dii allaabe, 6e o baddi, een anni ko dewtere bati ikkintaake. <sup>36</sup> Onon mo Alla seni, ko lili mo e duuniyaaru, oo don nun bi'oton: "A yennii Alla!" Gam o wi'ii oo laatii Biddo Alla. <sup>37</sup> To mi waday golle Baaba am, to on goondinee am. <sup>38</sup> Amma to mii wada de, baa to on goondintaa am, min e hoore am, goondinee golle am, gam annon, paamon Baaba na'on e am, min bo mi na'on e Baaba.»

<sup>39</sup> Be daarti nanjugo mo kade. O sottii 6e. <sup>40</sup> Yeesu wittii fonjo maayo Urdun, nokkuure to Yuhaana wadannoo batisi arande, o joodii ton. <sup>41</sup> Himbe duubbe wari e makko, wi'i: «Yuhaana waday alaama kaayniika baa goota. Amma, ko o bati e gorko on fu laati nun goona.» <sup>42</sup> Ton duubbe goondini Yeesu.

## 11

*Maayde Lasar*  
(Luka 10.38, 40, 7.11-16; Marku 5.35-43)

<sup>1</sup> Gorko gom, bi'eteedo Lasar e tawano Baytaniya, o nyawi. Oo woodi sakikiraabe dido, Mariyama e Marta. <sup>2</sup> Mariyama on nun woni moomunoodo wardi e Joomiraawo, go o moytiri gaasa makko koyde Yeesu. Sakiike makko, Lasar nyawunoo. <sup>3</sup> Sakikiraabe makko lili e Yeesu wi'a mo: «Moodibbo, beldiijo maa yandaa.»

<sup>4</sup> No Yeesu nanunoo ka, wi'i: «Nyaw dum don nyaw maayde bane. Dum waru nun gam teddujal Alla, gam Biddo Alla teddiniree e majjum.»

<sup>5</sup> Yeesu e yidi Marta, e miiraawo mum, e Lasar. <sup>6</sup> Baa no o nani Lasar yandaa, haday mo joodaago balde didi to o wonunoo. <sup>7</sup> Baawo majjum o wi'i aahiiibe makko: «En bittee leydi Yahudiya!» <sup>8</sup> Aahiiibe wi'i: «Moodibbo, baa booyay Yahuduuse e

daartano warirgo maa kaaye, go ton nun bittataa?» <sup>9</sup> Yeesu toontii: «Hinnaa wakkatiji sappo e didi woni der nyaalooma? Jahoowo nyaalooma fergataako gam oo yi'a jayjol duuniyaaru nu. <sup>10</sup> Amma jahoowo jemma fergoto gam jayjol walaa e makko.»

<sup>11</sup> Baawo o bati haalaaji dii, o wi'i: «Gido meeden Lasar daanike, mi yahan, mi finnina mo.» <sup>12</sup> Aahiiibe wi'i: «Moodibbo, to o daani nun, o yoofoto.» <sup>13</sup> Maayde Lasar nun o batannoo. Kambe 6e miili haala doyjol nun o batani. <sup>14</sup> Yeesu laabinani 6e: «Lasar maayii! <sup>15</sup> Berne am welii gam moodon ko mi tawaaka ton. Dum laatanto on daliila goondinon. To non en jahu, to makko.» <sup>16</sup> Den Toma bi'eteedo Ciwto wi'i aahiiibe horiibe: «En jahu enen bo gam maayden e makko.»

### *Yeesu nun woni ummital e gurnam*

<sup>17</sup> No Yeesu yottinoo, tawi wadii balde naay Lasar e tawaa der saabeere. <sup>18</sup> Hakkune Baytaniya e Urusaliima buraa kilooji tati, <sup>19</sup> Yahuduuse duubbe wari to Marta e Mariyama gam eytugo 6e e maayde sakiike mabbe.

<sup>20</sup> No Marta nani Yeesu warii, yahi taabitoyii mo, tawi Mariyama e joodii der suudu. <sup>21</sup> Marta wi'i Yeesu: «Moodibbo, to aa wonunoo do, sakiike am maayataano. <sup>22</sup> Amma baa jooni mii anni huune fu ko yamudaa Alla, o wadante.» <sup>23</sup> Yeesu wi'i mo: «Sakiike maa fintan.» <sup>24</sup> Marta wi'i: «Mii anni o fintan nyalaane ummital.»

<sup>25</sup> Yeesu wi'i mo: «Min woni pintinoowo, min woni kokkoowo yonki. Neddo fu goondindo am, baa to maayii, o wuuran. <sup>26</sup> Buurdo fu, goondindo am, maayataa abada. Aa goondini dum na?» <sup>27</sup> O toontii: «Ee, moodibbo! Mii goondini an woni Cubaado, Biddo Alla, garoowo e duuniyaaru.»

### *Yeesu wullii*

<sup>28</sup> E dow dum Marta yahi noddoygo miiraawo mum Mariyama, o sownii dum: «Moodibbo warii, oo noddee.»

**29** No Mariyama nanuno kaa don, ummii don maa don, yahi to makko. **30** Yeesu naatayno siire nen taw. Oo tawaa to Marta fottunoo e makko. **31** Yahuduube e wondunoo e Mariyama der suudu. Bee eyta mo. Be ji'i o fadditii, o wurtii. Be tokki mo, be miili o yahan nun e saabeere o wulla.

**32** No Mariyama yotti to Yeesu, no o yi'i mo, o dicci yeeso makko, o wi'i: «Moodibbo, to aa wonunoo do, sakiike am maayataano.»

**33** No Yeesu yi'i Mariyama e Yahuduube wondunoobe e mum e wulla, hakkillo makko ummii, o wemmaa. **34** O yami: «Toy gattudon mo?» be toontii: «Moodibbo, war, daaru!» **35** Yeesu wulli. **36** Yahuduube wi'i: «Daaree no o yidiri mo.» **37** Wobbe e mabbe wi'i: «Bumtindo bundo waawataano ko hadi gorko on maayugo na?»

### *Lasar fintinaama*

**38** Hakkillo Yeesu ummii kade, o yahi to saabeere woni. Saabeere nen laati nun gayka maa6iraaka hayre. **39** Yeesu wi'i: «Ikkinee hayre nen!» Marta, sakiike maaydo, wi'i mo: «Moodibbo, o luubii ko, gam hanne wadi balde naay oo woni der saabeere.» **40** Yeesu wi'i mo: «Mi wi'ay maa baa, to a goondinii, a yi'an baawde Alla?»

**41** Be ikkini hayre nen. Yeesu tiggiti, wi'i: «Baaba, mii yettee gam aa nananammi. **42** Min kan, mii anni baadey fu aa nananammi. Amma mi baddu maa nun gam himbe dariibe bee do, gam be goondina an nun lilimmi.» **43** Baawo haalaaji dii, o bati e semme: «Lasar wurta!» **44** Maayunoodo on wurtii, juude mum e koyde mum e filaa leppi, yeeso mum e soomii. Yeesu wi'i be: «Piilitaa mo, accon mo o yaha.»

**45** Duuggal e Yahuduube warunoobe to Mariyama, yi'ube ko Yeesu wadi, goondini mo. **46** Amma wobbe mabbe yahi to Farisaabe, bati be ko Yeesu wadi. **47** Farisaabe ben e hooreebe Limaamiibe wadi dawriiine, wi'i: «Gorko oo e wada kaayefiji duuddi. Noy

gadeten? **48** To en accirii mo nunnun, be fu, be goondinan mo. Romankeebe waran, halka en enen e nokkuure meeden ceniine e leydi meeden.»

**49** Gooto mabbe, bi'eteedo Kayafas, laatinoodo hooreejo Limaamiibe duubol mum, wi'i be: «Onon, on annaa godsum. **50** On annaa gomma neddo gooto maayana leydi men e buri leydi nin fu halka.» **51** Nani e hoore makko bane o bati haalaaji dii, amma gam o laatinoo hooreejo Limaamiibe duubol mum, o waday maa annabaaku e haani Yeesu maayana leydi nin. **52** Leydi nin tan bane haani o maayana, amma gam o hawrita gibbe Alla sankitiibe fu laatoo jama'aare woore.

**53** Diga nyaanne den, hooreebe Yahuduube dawri warugo mo. **54** Jon kan Yeesu acci yahugo e warta hakkune Yahuduube. O yawti diga don, o yahi siire wi'eteene Efrayim gonune ley haro. O joodsodii ton e aahiibe makko.

**55** Juulde Yahuduube bi'eteede Paska badike. Duuggal e himbe leydi nii yahi Urusaliima gam laabina ko'e mum diga juulde den yottaaki. **56** Bee gonii e fageere suudu Alla, bee daarta Yeesu, bee yamontira: «O warataa e juulde den? Naa no miiludon?»

**57** Tawi hooreebe Limaamiibe e Farisaabe batiino annudo to o woni fu, bata, heba o nanjee.

## 12

### *Mariyama waanjii wardi e koyde Yeesu*

**1** Balde jeego'o horii go juulde Paska yottoo, Yeesu yahi Baytaniya to Lasar mo o fintinnoo. **2** Be jonjani mo hiraane. Marta e yeda be, Lasar e wondunoo e nyaamdoobe e Yeesu.

**3** Mariyama etti feccere liitiri nardi, caadiidum, waanjii e koyde Yeesu, moytiri de gaasa mum. Suudu ηol fu luutti. **4** Yahuuda Iskariyot, gooto der aahiibe makko, garoowo jammoo mo, yami: **5** «Gam ume wardi dum sippaaka hande jaka ceede joddi golliido duubol, ceede mum hokkee talaakaabe?»

**6** Ko acci o wi'i nun, hinaa gam yurmeene talakaabe, amma oo gujjo nun. Kanko woni jogiido ceede, oo wujja de. **7** Yeesu wi'i: «Accu debbo on seese. O waafu dum nun gam nyalaane uweteemi. **8** Talakaabe e tawdaa e moodon nyalaane fu. Min kan, mi tawdataake e moodon nyalaane fu.»

### *Hooreebe Limaamiibe dawrii warugo Lasar*

**9** Jama'aare Yahuduube duunne nanani Yeesu Baytaniya. Gam Yeesu tan bane be gari, amma gam be ji'a Lasar pintinaado bo. **10** Hooreebe Limaamiibe dawri warugo Lasar bo. **11** Gam Lasar nun, Yahuduube duusbbe wurtii e maabbe, goondini Yeesu.

### *Yeesu naati Urusaliima e teddujal (Matiye 21.1-11; Marku 11.1-11; Luka 19.28-40)*

**12** Fini mum jama'aare duunne, warune juulde, nani Yeesu e wara Urusaliima. **13** Be calti bali, be taabitoyii mo. Bee kulgina, bee bi'a: «Hosana! Alla barkidin gardudo e inne Joomiraawo, Laamido Isira'iila!» **14** Yeesu hebi binjel babba, joodii dow maggel hande no winniraa e Dewte: **15** «Siire Siyoona, taa hulu!  
Daaru, Laamido maa e wara,  
e waddii binjel babba.»

**16** Arande aahiibe makko faamayno dum. Baawo ko Yeesu teddinaa, be ciwtorii dum winnaanoma. Kanjum bo wadi e makko.

**17** Jama'aare tawdanoone e makko no o nodduno Lasar wurtoo e saabeere, o fintini dum, seedanike mo. **18** Himbe nani o wadiino alaama kaayniika. Kanjum acci be taabitoyii mo. **19** Farisaabe baddontiri, wi'i: «On ji'ii, walaa fu ko baawandon mo, duuniyaaru fu nani e tokkii baawo makko.»

### *Yunaninkeebe e daarta Yeesu*

**20** Der himbe warbe Urusaliima juulde gam sujidana Alla, Yunaninkeebe e woni der maabbe. **21** Be gattii Filippu mo Baytisayda, mo leydi Galili. Be bi'i dum: «Moodibbo, emen jidi yi'ugo Yeesu.»

**22** Filippu batoy Andere. Be batoy Yeesu. **23** Yeesu toontii 6e: «Wakkati teddinol Bii neddo warii. **24** Mii bata on e goonja: binjel gawri aawaanjal, to nel nyolay, nel wonan nun binjel gootiel. Amma to nel nyoli, nel rimaan faa duuda. **25** Neddo fu jisfudo yonki mum, dullan yonki tabitiiki, banyudo ki e duuniyaaru nu, heban yonki tabitiiki. **26** To goddo e yidi jagganaago am, sey tokkammi. To gonmi fu, don jagganiido am bo wonata. Baaba tedinan neddo jaggantoodo am.»

### *Yeesu batanii maayde mum*

**27** «Jooni kan, mi wemmaama. Kaye bi'anmi? Mi waawataa ko wi'i: "Baaba hisinam e wakkati oo", amma gam wakkati on nun garumi. **28** Baaba, tedin inne maa.» Den daane nanaa e yiwoy dow kammu, wi'i: «Mi tedinii ne, mi tedinan ne kade.» **29** Himbe dariibe ton, nani daane nen, wi'i: «Dum laati nun riggaanjo duule.» Woobbe wi'i: «Malaykaajo nun baddi e makko!»

**30** Yeesu wi'i 6e: «Gam am bane daane nee nanaa, ne nana nun gam moodon. **31** Jooni woni kiita duuniyaaru. Jooni laamido duuniyaaru nuu, tippetee yaasi. **32** Min, to mi bantaama dow fu, mi foodan himbe fu e am.» **33** Batuuji o batata dii, hollan nun maayde ne o maayata. **34** Himbe ben toontii mo: «tawreeta batii: "Cubaado maayataa abada. Noy baawirtaa ko wi'i Bii neddo ette?" Moy woni Bii neddo on?» **35** Yeesu toontii 6e: «Jaayjol na'on caka mon, amma dum fooyataa. Jähhee diga oon goodi jayjol, gam to niwre juhu on. Gam jahoowo der niwre annaa to yahata. **36** Goondinee jayjol diga oon goodi jol gam laatodon bibbe jayjol.» Baawo Yeesu bati kaa don, yawti suudoyii 6e to woddi.»

### *Yahuduube goondinay Yeesu*

**37** Baa no o wadi kaayefiji duuddi yeeso maabbe, be goondinay mo, **38** nunnun haala annabi Esaaya goondiri:  
«Joomiraawo, moy goondini lilal meeden?»

Moy Joomiraawo holli baawde  
mum?»

<sup>39</sup> Esaaya wi'ii kade bo gam ume  
himbe ben waawataa ko goondini:

<sup>40</sup> «Alla wuminii 6e, yoorinii 6erne  
maabbe,

gam to gite maabbe yi'u, to 6erde  
maabbe faamu,

to 6e tuubu, to mi nyawtu 6e bo.»

<sup>41</sup> Esaaya wi'u dum nun gam o yi'ii  
teddujal Yeesu, go o bati haala  
makko.

<sup>42</sup> Amma baa hooreebe Yahuduube  
duubbe goondinii Yeesu. Amma  
gam Farisaabe, 6e kulii wurtingo

dum, gam to 6e burtinee e waajorde.

<sup>43</sup> Gam 6ee jidi manoore himbe 6uri  
manoore Alla.

### *Haala Yeesu nun hiitoto*

<sup>44</sup> Yeesu towni daane, wi'i:  
«Goondindo am fu, min bane o  
goondini, amma lildo am nun o  
goondini. <sup>45</sup> Ji'udo am bo yi'ii liloydo  
am. <sup>46</sup> Mi warii e duuniyaaru, mii  
jaynjol, gam goondindo am fu to  
joodoo der niwre. <sup>47</sup> Nanudo haalaaji  
am go tokkay, min bane hiitotoo dum.  
Gam mi waray hiitaago duuniyaaru,  
gam mi hisina nu nun garumi.

<sup>48</sup> Caliido am, to jaabay haalaaji am,  
e woodi ko hiitooto dum. Ko  
janjimmi, kan hiitotoo dum nyalaane  
darjal. <sup>49</sup> Gam mi batanay hoore am,  
amma Baaba lildo am hokkimmiko  
bi'anmi e ko janjinammi. <sup>50</sup> Mii anni  
ooda makko hokkata yonki tabitiiki.  
Ko batanmi, mi batan dum nun no  
Baaba batirimmi.»

## 13

### *Yeesu e loota koyde aahii6e mum*

<sup>1</sup> Nyaanne finata juulde Paska,  
Yeesu e anni wakkati o accata duu-  
niyaaru o hoota to Baaba yottike. O  
yidii himbe makko e duuniyaaru, oo  
yidii 6e faa keerol yidde.

<sup>2</sup> Wakkati hiraane, Seydan watti e  
6erne Yahuuda Iskariyot 6ii Simon o  
jammoo Yeesu. <sup>3</sup> Yeesu e anni e hoore  
mum, to Alla nun yiwi, to Alla nun  
hootata. Baaba wattii huune fu der  
junjo makko. <sup>4</sup> O ummii o acci hi-  
raane nen, o boorti toggoore makko,

o etti lefol, o taadi. <sup>5</sup> O wayli diyam  
e lootorgal, o yanti lootugo koyde  
aahii6e makko, oo moytira de lefol 6ol  
taadinoo. <sup>6</sup> No o yotti to Simon Piyer,  
Piyer wi'i mo: «Moodibbo, an lootata  
koyde am?» <sup>7</sup> Yeesu toontii mo:  
«A faamay jooni ko gadanmi, amma  
baawo nii a faamaan.» <sup>8</sup> Piyer wi'i  
mo: «A lootataa koyde am abada!»  
Yeesu toontii mo: «To mi lootay maa,  
a walaa gedu e am.» <sup>9</sup> Simon Piyer  
wi'i mo: «Moodibbo! To nunnun,  
taa haadu e koyde tan, lootu juude  
e hoore am bo.» <sup>10</sup> Yeesu wi'i mo:  
«Lootiido walaa haaju looteego, sey  
loota koyde, gam o fu oo laabi. Onon  
on laabube, amma on fu bane.» <sup>11</sup> Oo  
anni jammotoodo mo. Kan wadi o  
wi'i: «On fu bane woni laabube.»

<sup>12</sup> No Yeesu lootunoo koyde maabbe,  
ettitii toggoore muudum, jooditii,  
yami: «On paamii ko gadanmi on?

<sup>13</sup> Oon noddammi moodibbo e  
maalan. On peway, kan nun laatiimi,

<sup>14</sup> jon kan mi maalan nun, mi mood-  
ibbo bo, to mi lootii koyde moodon,  
onon bo oon kaani lootoontiron  
koyde. <sup>15</sup> Ko kollumi on laati nun  
tintinol. Onon bo gadee ko gadumi.

<sup>16</sup> Mii bata on e goonja, maccudo  
burataa joomum, lilaado burataa lildo  
dum. <sup>17</sup> To oon anni dum, to on  
gollirii, barke laatanto on.

<sup>18</sup> On fu bane batanmi. Mii anni  
6e cubumi, amma haani ko winnaa e  
dewte goonda: “Nyaamdoowo e am  
ummanike am.” <sup>19</sup> Diga jooni mii  
bata on dum hakko dum yottoto, gam  
to dum yottike on goondina min woni  
“mo gonmi!” <sup>20</sup> Mii bata on e goonja:  
Neddo fu ja6biido lilaado am, min nun  
o ja6bii. Neddo fu ja6biido am, ja6biske  
lildo am.»

*Yeesu holii Yahuuda nun jammo-  
too dum*

(Matiye 26.20-25; Marku 14.17-21;  
Luka 22.21-23)

<sup>21</sup> Baawo no o bati nunnun, o  
jifii sanne, o wi'i: «Mii bata on e  
goonja: Gooto moodon jammoto am.»

<sup>22</sup> Aahii6e ben e daaronira. Bee  
yamontira moy o batanta. <sup>23</sup> Gooto e  
aahii6e makko, mo Yeesu 6uri yidugo,

e joodii takkol makko. <sup>24</sup> Simon Piyer 6aayi mo o yama Yeesu moy o wondanaa. <sup>25</sup> Aahijjo on wuuron far to gabaare Yeesu, wi'i: «Joomam moy nun?» <sup>26</sup> Yeesu toontii mo: «Mi suyyan lonjere, mo kokkan mi ne, kanko nun.» Yeesu etti lonjere, suyyi ne, hokki Yahuuda, 6ii Simon Iskariyot. <sup>27</sup> Baawo o jaibi lonjere nen, Seydan naati e makko. Yeesu wi'i mo: «Wadu ko gadataa, law!»

<sup>28</sup> (Baa gooto e joodiibe don faamay ko o batani kaa don. <sup>29</sup> Gam Yahuuda nun jogotono ceede maabbe, wobbe e miijii Yeesu wi'u nun o soodaa goddum gam juulde, maa o heba ko o hokki talakaabe.) <sup>30</sup> Yahuuda no jaibi lonjere nen fu, don maa don o wurti. Tawii jemma wadi.

### Ooda kesa

<sup>31</sup> No Yahuuda wurtinoo, Yeesu wi'i: «Bii neddo teddinaama, Alla bo teddinaama sabbu makko. <sup>32</sup> [To Alla teddinaama sabbu makko,] Alla e hoore mum bo tedinan mo, baa booyataa. <sup>33</sup> Sukaabe am, mii wondi e moodon sedda taw. On daartan am. Mi wi'an on jooni ko bi'unoo mi Yahuduube wobbe: "On baawataa ko yahi to jahammi." <sup>34</sup> Mii hokka on ooda kesa: Jidontiree! Hande no jidirmi on, onon bo jidontiree! <sup>35</sup> To yidde e woni hakkune moodon, hande nun, himbe fu annirta on aahiibe am.»

### Yeesu batii Piyer wi'aan annaa dum

<sup>36</sup> Simon Piyer wi'i mo: «Joomam, toy jahataa?» Yeesu toontii mo: «To jahanmi, a waawataa ko tokki am jooni. Amma 6aawo do a tokkan am!»

<sup>37</sup> Piyer wi'i mo: «Joomam, gam ume mi waawataa ko tokki maa jooni? Mi hokkitiran yonki am gam maa.»

<sup>38</sup> Yeesu toontii: «Goonja a hokkitiran yonki maa gam am? E goonja batan maa mi: Hakko jakaraari joggata, a wi'an de tati a annaa am.»

## 14

### Yeesu woni laawol jaaroowol to Baaba

<sup>1</sup> Yeesu wi'i aahiibe mum: «Pukkinnee berde moodon, goondinee Alla, goondinon am min bo. <sup>2</sup> Cuudi duuddi na'on der wuro Baaba am. To dum laataakino goonja, mi batataano on mi yahan, mi moyyinanaa on joonne. <sup>3</sup> To mi moyyinanii on to gonoyton, mi wittaan mi hocco on to am gam gonon to gonmi. <sup>4</sup> Oon anni laawol jahoowol to jahanmi.»

<sup>5</sup> Toma wi'i mo: «Moodibbo, men annaa to jahataa, noy men annirta laawol mum?» <sup>6</sup> Yeesu toontii mo: «Min woni laawol, min woni goonja, min woni yonki. Goddo yahataa to Baaba to yiwigay to am. <sup>7</sup> To oon annunoo am, on annanno Baaba am bo. Diga jooni oon anni mo, on ji'ii mo.»

<sup>8</sup> Filippu wi'i mo: «Moodibbo, hollu men Baaba, dum don heyen men.»

<sup>9</sup> Yeesu wi'i mo: «No booydirmi e moodon nii fu, Filippu a annaa am? A annaa ji'udo am fu, yi'ii Baaba? Noy bi'irtaa: "Hollu men Baaba"? <sup>10</sup> A goondinay mii hawti e Baaba, Baaba bo e hawti e am na? Batuji di batumi on dii fu, di yiway e hoore am. Baaba mo kawtumi e mum wadata golle mum. <sup>11</sup> Goondinee ko batumi on: "Mii hawti e Baaba, Baaba bo e hawti e am." Baa to on goondinay am, goondinee gam golle am. <sup>12</sup> Mii bata on e goonja, neddo fu goondindo am, wadan kanun bo golle gadanmi. O wadan du ko 6uri de, gam mii dilla to Baaba. <sup>13</sup> Mi wadanan on huune fu ko yamirton e inne am. Mi wadan dum gam Baaba teddinee diga e Biddo. <sup>14</sup> Ko eelirson e inne am, mi wadan dum.»

### Yeesu wi'i lildaan Ruuhu Ceniido

<sup>15</sup> «To oon jidi am, on tokkan ooda am. <sup>16</sup> Mi eelan Baaba hokka on balloovo goddo. O wondan e moodon faa abada. <sup>17</sup> Oo don woni Ruuhu goonja. Duuniyaaru nuu waawataa ko jaibi mo, gam nu yi'ataa mo, nu annaa mo. Amma onon, oon anni mo gam oo wondi e moodon, oo tawaa bo der moodon.

<sup>18</sup> Mi accataa on hande gondaabe, mi wittaan to moodon. <sup>19</sup> To booyii sedda, duuniyaaru nuu yi'ataa am

kade. Amma onon, on ji'an am, gam mi buurdo, onon bo on buuran. <sup>20</sup> Nyaanne muudum on paa-maan mii hawti e Baaba, oon kawti e am, mii woni e moodon.

<sup>21</sup> Jogiido oodaaji am ko tokki di, kanko nun woni jiddo am. Jidudo am, Baaba am yidan dum. Min bo, mi yidan mo, mi wirnitanto dum min e hoore am.»

<sup>22</sup> Yahuuda, banda Yahuuda Iskariyot, wi'i Yeesu: «Joomam, noy dum laatortoo birnitanodaa men, tawee a wirtanaaki duuniyaaru?»

<sup>23</sup> Yeesu toontii mo: «To goddo e yidi am, o golliran haala am, Baaba am yidan mo. Min e Baaba men garda to makko, men joododo e makko.

<sup>24</sup> Neddo fu mo yidaa am, gollirtaa haala am. Haala ka nanoton ka, ka am bane, haala Baaba lildo am nun.

<sup>25</sup> Mi batii on dum diga mii wondi e moodon. <sup>26</sup> Ruuhu Ceniido, bal-loowo on, mo Baaba liloyta e inne am, kanko anninta on kujje fu. O suwtoran on ko batunoomi on fu.

<sup>27</sup> Mii accana on jam, mii hokka on jam am. No duuniyaaru hokkirta bane kokkirani on. To berde moodon biisoo, to on kulee. <sup>28</sup> On nanii ko bi'umi on: "Mi yahan, mi wartan to mon." To oon jidunoo am, berde mon welanno ko jahanmi to Baaba, gam kanko burimmi manju.

<sup>29</sup> Mii bata on jooni, diga dum waray taw, gam to dum warii, goondinon.

<sup>30</sup> Mi baddataa kade e moodon ko duudi, gam laamiido duuniyaaru nuu e wara. Baa godsum o waawataa e am, <sup>31</sup> amma sey duuniyaaru anna mii yidi Baaba, nu annan mi wadan bo ko Baaba wannunoo am. Ummee, jawten diga do.»

## 15

### *Yeesu nun woni innabohi goonjahi*

<sup>1</sup> «Min woni innabohi goonjahi, Baaba am woni jom gesa innabooje.

<sup>2</sup> Liccal takkiinal e am fu, to rimataa, o saltoto dum, liccal dimoowal fu, o saabanoo dum gam njal beyda rimugo.

<sup>3</sup> Onon, jooni on laabube gam waaju mo baajiimi on. <sup>4</sup> Tabbitee e am, min

bo mi tabbitoo e moodon! No liccal caltaanjal waawataa ko rimi e hoore mum, haani e njal tiggii e innabohi, hande nun onon bo on baawataa ko rimi to on tiggaaki e am.

<sup>5</sup> Min woni innabohi, onon woni licce. Tiggido e am ko mii tiggii e mum, o rimaan faa duuda. Gam on baawataa ko wadi godsum to dum yiway e am. <sup>6</sup> To goddo tiggaaki e am, o woppete nun yaasi hande liccal caltaanjal, o yoora. Licce joorde den hawritinte, faddee der yiite, de jaba.

<sup>7</sup> To on piibontirii e am, waaju am bo e fibontirii e mon, ko yamoton fu, on keban. <sup>8</sup> To on dimii faa duudi, den kan on laatike aahiibe am. Nun-nun teddunjal Baaba am wurtortoo.

<sup>9</sup> Hande no Baaba yidirimmi, nun jidirmi on. Tabbitee der yidde am.

<sup>10</sup> To on tokkii ooda am, on tabbitinto der yidde am, hande no tokkirmi oodaaji Baaba am go mii tabbii der yidde makko.»

<sup>11</sup> «Mi batu on nun kaa don gam belsum berne am wona der moodon. Den belsum berne moodon bo hebbu.

<sup>12</sup> Ooda am nani: jidontiree hande no jidirmi on. <sup>13</sup> Yidde buroore yidde nee do manju walaa, kokkitiroore yonki mum gam weldiibe mum. <sup>14</sup> To on gadii ko resanmi on on laati nun weldiibe am. <sup>15</sup> Mi noddattaa on kade maccube gam maccudo annaa ko joomum gollata. Mi noddan on weldiibe gam ko nanumi diga Baaba am fu, mi anninii on dum. <sup>16</sup> Onon bane subimmi, min subi on go desumi on jahon, dimoon biisse, biisse moodon taboo, den Baaba hokkan on huune fu ko eelirton e inne am. <sup>17</sup> Ko resanmi on woni, jidontiree.»

### *Duuniyaaru wanyii Yeesu e himbe mum*

<sup>18</sup> «To duuniyaaru nuu wanyii on, annee, min nu arti nu wanyi.

<sup>19</sup> To oon laatinoo be duuniyaaru, duuniyaaru yidanno ko mum. Amma onon be duuniyaaru bane. Min seenni on e duuniyaaru, no cubumi on. Gam majcum nu wanyi on.

<sup>20</sup> Ciwtoree ko bi'unoo mi on: "Maccudo burataa joomum." To be

toorii am, 6e tooran on onon bo. To 6e gollirii haala am, 6e golliran haala moodon. <sup>21</sup> Amma 6e gadanan on dum dum fu gam am, gam 6e annaa liludo am. <sup>22</sup> To mi warayno, to mi baddayno e ma6be, 6e goodataano hakke, amma jooni, 6e galaa accitaneego hakkeeji ma6be. <sup>23</sup> Banyudo am fu, wanyii Baaba am bo. <sup>24</sup> To mi wadayno golleeji dii hakkune ma6be, di goddo meeday wadugo, 6e goodataano hakke. Amma jooni 6e ji'ii di, 6e banyii am, e min, e Baaba. <sup>25</sup> Dum wadu nun gam dum goondina ko winnaa der Dewtere tawreeta ma6be: "Be banyirii am baanji".

<sup>26</sup> To balloovo mo lildan mi on warii, kanko woni Ruuhu goonja yiwoowo to Baaba, kanko e hoore makko seedantoo am. <sup>27</sup> Onon bo, on ceedanto am gam oon goondi e am diga fuddoode.»

## 16

<sup>1</sup> «Mi batii on dum gam to on majjee. <sup>2</sup> Be burtinan on diga baajorde. Wakkati waran, bardo on fu miijan Alla saafata. <sup>3</sup> Be gadan dum nun gam 6e annaa Baaba, 6e annaa am, min bo. <sup>4</sup> Mi batii on dum, gam to wakkati on waroy, ciwton, mi batii on dum.

### Gollal Ruuhu Ceniido

Mi batay on dum diga arande gam mii wondunoo e moodon. <sup>5</sup> Jooni mi na'on hoota to lildö am, amma baa gooto moodon yamay am: "Toy jahataa?" <sup>6</sup> Berde moodon biisike gam mi batii on ka. <sup>7</sup> Mii bata on e goonja, yaadu am suran nafugo on. To mi yahay, balloovo on warataa to moodon. Amma, to mi yahii, mi lildan on mo. <sup>8</sup> To o warii, o anninan him6e duuniyaaru boofi mum dow hakke, dow foonnitaare, e dow kiita. <sup>9</sup> Dow hakke, bee boofa gam 6e goondinay am. <sup>10</sup> Dow foonnitaare, bee boofa gam mii hoota to Baaba am, on ji'ataa am kade. <sup>11</sup> Dow kiita, bee boofa gam laamiido duuniyaaru hiitaama ko.

<sup>12</sup> Mii woodi kade kujje duudde de batanmi on, amma on baawataa ko faami de jooni. <sup>13</sup> To Ruuhu goonja warii, o anninan on goonja lalley, gam o batantaa hoore makko, amma o batan on ko o nani, o batan on bo ko warata. <sup>14</sup> O teddinan am gam o jaaban ko woni e am, o yottina on dum. <sup>15</sup> Ko Baaba am jey fu, min jey, gam majjum bi'umi o yottinanan on ko o he6i e am.»

### Biisere 6erne laatoyto seyo

<sup>16</sup> «To booyii sedda, on ji'ataa am, to booyii sedda kade, ji'on am.» <sup>17</sup> Wobbe e aahii6e makko yamontiri, wi'i: «Ume woni maana haala makko ka o wi'i: "To booyi sedda, on ji'ataa am e to booyi sedda, ji'on am kade", gam mii yaha to Baaba?» <sup>18</sup> Be bi'i: «To booyii sedda, ume dum hollata? Men paamay ko o wi'i.»

<sup>19</sup> No Yeesu annunoo 6e jidi yamugo dum, wi'i 6e: «Oon yamontira maana haala am ka: "To booyii sedda on ji'ataa am, to booyii sedda kade, ji'on am."» <sup>20</sup> Mii bata on e goonja: on bullan bullitodon, amma duuniyaaru nuu welweltan. Berde mon biisoto, amma biisere 6erne mon waylitinto welwelo. <sup>21</sup> To debbo 6adike rimugo, o tooroto gam njatavre billan mo. Amma to o rimii, o yeggitan naawella, 6erne makko e weli gam o rimii neddo e duuniyaaru. <sup>22</sup> Onon bo hande nun berde mon e biisii jooni, amma en jiidaan kade. Berde mon welan, goddo waawataa ko ikkini beldum berde moodon.

<sup>23</sup> Nyalaane nee don, on yamataa am gokka dow godsum. Mii bata on e goonja, huune fu ko eeludon Baaba, e inne am o hokkan on dum. <sup>24</sup> Faa jooni, walaa fu ko eeludon e inne am. Eele, on keban gam beldum 6erne mon hebba.»

### Yeesu wonijaaliido duuniyaaru

<sup>25</sup> «Ko batumi on jooni laati nun ballaaji. Wakkati waran de mi batirtaa on e ballaaji, amma mi batan on haala batanoowa Baaba faa laa6a. <sup>26</sup> Nyalaane nee don on eelan Baaba e inne am. Mi wi'ay mi eelanan

on Baaba, <sup>27</sup> gam Baaba e hoore muudum e yidi on. Oo yidi on gam oon jidimmi, on goondinii bo to Alla yiwmii. <sup>28</sup> Mi yiwi to Baaba, mi warii e duuniyaaru, jooni mi accan duuniyaaru, mi hoota to Baaba.»

<sup>29</sup> Aahiiþe makko wi'i mo: «Jooni kan, a batii faa laabii, a accii haalango men e ballaaji. <sup>30</sup> Jooni kan, emen anni aa anni huune fu, a walaa bo haaju godðo yamee gokka, gam maþjum men goondini a yiwudo to Alla.»

<sup>31</sup> Yeesu toontii 6e: «Jooni kan, on goondinii na? <sup>32</sup> Wakkati e wara, wakkati on yottike du, on fu on cankitinto, moy fu yaha feere mum, accon am mi tan. Amma min tan bane, gam Baaba e wondi e am. <sup>33</sup> Mi batii on dum, gam kebon jam der kawtal moodon e am. Oon gonii e billaare der duuniyaaru. Amma tinne, gam mi jaalike duuniyaaru.»

## 17

### *Yeesu e du'ano aahiiþe muudum*

<sup>1</sup> Baawo haalaaji dñ, Yeesu tiggitiidow, wi'i: «Baaba, wakkati warii, teddin Biya, gam Biya bo teddinee.

<sup>2</sup> A hokkii mo baawde dow himþe fu, gam o hokka 6e kalfindaa mo fu yonki tabitiiki. <sup>3</sup> Annugo an woni Alla gooto, goonjaajo, e lilaado makko Yeesu Almasiihu, kan woni yonki tabitiiki. <sup>4</sup> Mi teddinii maa e duuniyaaru, mi hebbinii golle de kokkudaa am mi golla. <sup>5</sup> Jooni kan, Baaba, teddinam teddunjal 6jal goodunoo mi to maa diga duuniyaaru tagaaka.

<sup>6</sup> Mi anninii inne maa himþe duuniyaaru 6e kalfindaa am. An 6e gonannoo, a halfinii am 6e. Be jaþi haala maa. <sup>7</sup> Jooni kan, bee annii ko kokkudaa am fu, to maada dum yiwi. <sup>8</sup> Gam mi yottinii 6e haala ka kaalandaa am. Be jaþii ka. Bee anni lalley to maada yiwmii, 6e goondinii an lilimmi.

<sup>9</sup> Gam sabbu mabþe nun du'otoomi. Mi du'ataako gam duuniyaaru. Amma mii du'oo gam 6e kalfindaa am, gam an jey 6e. <sup>10</sup> Huune fu ko jeyumi, an jey, huune fu ko jeydaa,

min jey. Mi teddinaama e mabþe.

<sup>11</sup> Mi wonataa der duuniyaaru kade, mii wara to maada. Amma kamþe 6e na'on der duuniyaaru. An Baaba Ceniido, reenir 6e inne maada ne kokkudaa am, gam 6e laato gootum hande no laatoriden gootum.

<sup>12</sup> No gondunoo mi e mabþe der duuniyaaru, mi reenirii 6e inne maa ne kokkudaa am. Mi hakkilanii 6e, baa gooto e mabþe majjay to hanaa 6ii halkere, gam ko batanaa e Dewte goondinee. <sup>13</sup> Jooni kan mii foonnit to maa. Mi batii haalaaji dñ diga mi na'on e duuniyaaru gam beldum 6erne am hebba 6e.

<sup>14</sup> Mi jannjinii 6e haala maa, go duuniyaaru wanyi 6e, gam 6e duuniyaaru bane, hande no mi laatoraaki mo duuniyaaru. <sup>15</sup> Mi eelat burtinaa 6e e duuniyaaru, amma deenaa 6e e Kalludo. <sup>16</sup> Be duuniyaaru bane, hande no mi laatoraaki mo duuniyaaru. <sup>17</sup> Senu 6e e goonja maa. Haala maa woni goonja. <sup>18</sup> Hande no lilirdaa am e duuniyaaru, nunnun, liliranmi 6e min bo e duuniyaaru. <sup>19</sup> Mii sena hoore am gam mabþe gam kamþe bo 6e laatoo senaabe der goonja.

<sup>20</sup> Hinaa gam mabþe tan du'otoomi. Amma mii du'oo bo gam goondinanþe am e haala mabþe. <sup>21</sup> Mii eela gam 6e laatoo gootum. Baaba, 6e kawta e meeden hande no kawtirdaa e am, no min bo kawtirmi e maa. Be fu 6e laatoo gootum, heþa duuniyaaru hooloo an nun lilimmi. <sup>22</sup> Min, mi hokkii 6e teddunjal 6jal kokkudaa am, gam 6e laatoo gootum, hande no laatoriden gootum. <sup>23</sup> Mi na'on hawti e mabþe, a na'on hawti e am, nunnun 6e laatortoo gootum mam mam, heþa duuniyaaru anna an lilimmi. Aa yidi 6e bo hande no jidirdaa am.

<sup>24</sup> Baaba, mii yidi 6e kalfindaa am bee, tawdee e am nokkuure to tawaami, gam 6e ji'a teddunjal 6jal kokkudaa am, gam a yidi am diga duuniyaaru diidaaka. <sup>25</sup> Baaba poonniido, duuniyaaru nuu annay maa, min kan mii annu maa, bee do bo annii an nun lilimmi. <sup>26</sup> Mi anninii 6e inne maa. Mi anninan 6e ne kade

gam yidde ne jidusaa am tawee e maabbe, min bo mi hawta e maabbe.»

## 18

### *Nanjoore Yeesu*

<sup>1</sup> Baawo haalaaji dī, Yeesu yawtidi e aahiiibe mum fonjo maayel bi'eteenje Kedoron. Ledde e duufunoo ton, o naatidi ton e aahiiibe makko. <sup>2</sup> Yahuuda jammotoodo mo e anni nokkuure nen, gam Yeesu e aahiiibe mum e hawritannoo ton de duuddum. <sup>3</sup> Yahuuda ardii ililingal soogeeji, e reenoobe be Limaamiibe e Farisaabe lili. Be jottii don, bee jogii jolli, e fitillaaji e konirdum. <sup>4</sup> Tawii Yeesu e anni ko fonnoy hebugo dum, tabbitii 6e, wi'i: «Moy daartoton?» <sup>5</sup> Be toontii mo: «Yeesu mo Nasaratu.» O wi'i 6e: «Mi nani!»

Yahuuda jammotoodo mo e darodii e maabbe. <sup>6</sup> No Yeesu wi'unoo «Mi nani!» Be tartartiri bawbawre 6e jani. <sup>7</sup> Yeesu yami 6e kade: «Moy daartoton?» Be toontii: «Yeesu mo Nasaratu!» <sup>8</sup> Yeesu toontii 6e: «Mi wi'i on, min nun. To min nun daartoton, joofee aahiiibe am ben 6e dilla.»

<sup>9</sup> O batu nun kaa don gam ka o batuno goonda: «Mi majjinay baa gooto e 6e kalfindaa am.» <sup>10</sup> Den Simon Piyer e woodunoo tabugaahi, saabii ki, feyyii maccudo hooreejo Limaamiibe, setti nowru mum nyaamooru. Maccudo on e wi'ee Malkus. <sup>11</sup> Yeesu wi'i Piyer: «Wattita tabugaahi maa kii e kuunjal mum. Aa miji mi yarirtaa jardugel bone nel Baaba hokkimmna?»

### *Yeesu yaaraama yeeso Annas*

<sup>12</sup> Ililingal soogeeji e mawdo maabbe, e maccube hooreebe Yahuduube nanji Yeesu, habbi mo. <sup>13</sup> Be artii yaarugo mo to Annas. Annas esiraawo Kayafas nun. Der duubol nel don, kanko nun woni hooreejo Limaamiibe. <sup>14</sup> Kayafas batunoo hooreebe Yahuduube ko buri woodugo, kan woni neddo gooto maayana leydi fu.

*Piyer yeddi, wi'i laataaki aahijjo Yeesu*  
(*Matiye 26.69-70; Marku 14.66-68; Luka 22.55-57*)

<sup>15</sup> Simon Piyer e aahijjo goddo tokki Yeesu. Aahijjo oo don e annirnoo e hooreejo yottinoobe sadaka, o naatidi e Yeesu fageere hooreejo Limaamiibe on. <sup>16</sup> Go Piyer e darii yaasi ley dammugal. Aahijjo annirso e hooreejo Limaamiibe on, wurti baddi e debbo deenoowo dammugal, naanni Piyer. <sup>17</sup> Debbo deenoowo dammugal on wi'i mo: «An bo a laataaki gooto e aahiiibe gorko oo na?» Piyer toontii mo: «Aawo, mi laataaki aahijjo makko.»

<sup>18</sup> Maccube e reenoobe hubbiino yite e aytinoo, gam jaajol na'on. Piyer bo e darodii e maabbe e aytinii.

*Hooreejo Limaamiibe e yama Yeesu yande*

(*Matiye 26.59-66; Marku 14.55-64; Luka 22:66-71*)

<sup>19</sup> Hooreejo Limaamiibe on yami Yeesu haala aahiiibe mum, yami ko o janninta. <sup>20</sup> Yeesu toontii mo: «Mi laabinanii duuniyaaru haala am. Nyalaane fu mi janninii der baajorde, der suudu Alla to Yahuduube hawrinta nyalaane fu. Walaa fu ko batumi e cuucukka. <sup>21</sup> Gam ume yamantaa am? Ko batumi, yamu hettinaniiibe am. Bee anni no ko woodi batumi.»

<sup>22</sup> Der haala ka, gooto e reenoobe fiyi Yeesu meenyo, wi'i: «Nun nun toontortodaa hooreejo Limaamiibe na?» <sup>23</sup> Yeesu toontii mo: «To ko boni nun batumi, haala kay nun boni e makka. To tawii ko woodi nun batumi, gam ume piyandaa am?»

<sup>24</sup> Annas lildi mo to Kayafas hooreejo Limaamiibe, oo haabbaa.

*Piyer yedditake wi'i laataaki aahijjo Yeesu*

(*Matiye 26.71-75; Marku 14.69-72; Luka 22.58-62*)

<sup>25</sup> Simon Piyer e aytinino don. Be bi'i mo: «An bo, a laataaki gooto e aahiiibe makko na?» Piyer yeddi, wi'i: «Mi laataaki!»

**26** Gooto e maccube hooreejo Limaamiiße, gettol mo Piyer set-tunoo nowru muudum, wi'i mo: «Mi yi'idayno maa e makko der gesa to na?»

**27** Piyer yeddi kade, wakkati den nun, jakaraari joggi.

### *Yeesu yeeso Pilaatu*

**28** Be burtini Yeesu diga to Kayafas, diga subaka kecco, be jaari mo laamorde Roma. Yaarube mo bee naatay baade, gam to be cobu, faa be keba nyaamugo nyaamdu juulde Paska. **29** Pilaatu yahi tawoy be yaasi ton, wi'i: «Ume beeforidon gorko oo?»

**30** Be toonti mo: «To o wadataano ko boni, men gadataano mo to maa.» **31** Den Pilaatu wi'i be: «Ettee mo, kiitodon mo e ooda moodon.» Yahuduube wi'i mo: «Men goodaa laawol warugo goddo.»

**32** Nunnun haala ka laatorii gam goondingo ka Yeesu batuno dow no o maayirta. **33** Pilaatu naati der laamorde mum, noddi Yeesu, wi'i dum: «A laamiido Yahuduube nun na?» **34** Yeesu toontii mo: «An wi'i dum e hoore maa, naa to wobbe nanudaa ka?» **35** Pilaatu toontii mo: «Mi Yahudujo, min? Himbe lenyol maa e hooreebe Limaamiiße waddu maa to am. Ko gadudaa?» **36** Yeesu toontii: «Laamaare am, laamaare duuniyaaru bane. To ne laamaare duuniyaaru nun, maccube am habanno gam to mi naatu juude Yahuduube. Amma jooni Laamaare am ne do bane.» **37** Den Pilaatu wi'i mo: «To nunnun a laamiido nun?» Yeesu wi'i mo: «Hande no bi'udaa, mi laamiido nun. Mi rimaama, mi warii bo e duuniyaaru gam mi seedanoo goonja. Jiddo goonja fu, nanan haala am.» **38** Pilaatu yami mo: «Goonja, ume nun don?»

### *Yeesu hiitaamaa waree*

(Matiye 27.15-31; Marku 15.15.6-20; Luka 23.13-25)

Baawo o bati ka, o wurti kade, o tawoy Yahuduube yaasi, o wi'i be: «Mi hebay gacce baa goote de nanniranmi gorko oo. **39** Oon boowi juulde Paska fu mi yoofana on neddo

gooto. Oon jidi mi yoofitana on laamiido Yahuduube na?» **40** Be toonti dow dow: «Kanko bane, sey Barabbas.» Nani Barabbas laati nun pasotoodo.

## 19

**1** Den Pilaatu wi'i be nanna Yeesu be piya mo looci. **2** Soogeeji dñ sanyi gi'e, be kuunini mo, go be bornini mo toggowa bodeya. **3** Be battii mo, bee bi'a: «Fofo, laamiido Yahuduube!» Bee piya mo meeye.

**4** Pilaatu wurtii kade, wi'i Yahuduube: «Mi wurtinanen on mo, heba annon mi hebay fu gacce nanniran moo mi.» **5** Yeesu wurti e huunii huuneere gi'e, e bornii toggowa bodeya. Pilaatu wi'i be: «Nani neddo on.» **6** No hooreebe Limaamiiße e reenoobe yi'i mo, be bati dow be bi'i: «Tiggu mo! Tiggu mo!» Pilaatu wi'i be: «Nanjee mo onon bo, tiggon mo, gam min kan, mi hebay gacce e makko.» **7** Yahuduube toontii mo: «Emen goodi ooda, ooda kan nun hokki laawol o waree gam o wadii hoore makko o Bii Alla.»

**8** No Pilaatu nanunoo haala kan, kulol makko beydii. **9** O naati der laamorde, o wi'i Yeesu: «An, toy yiwudaa?» Amma Yeesu toontaaki baa goota. **10** Den Pilaatu wi'i mo: «A toontataako na? A annaa mii woodi baawde yoofugo maa, mii woodi bo baawde tiggugo maa na?» **11** Yeesu toontii mo: «Walaa fu ko baawdaa e am, to hinaa Alla hokku maa baawde mum. Gam majjum gattudo am e junjo maa, e buru maa hakke.»

**12** Diga wakkati on Pilaatu e daarta yoofitingo mo. Amma Yahuduube e bata dow, e wi'a: «To ni a yoofitii mo, a laataaki beldijo laamiido Roma. Gam neddo gadudo hoore mum laamiido, laati nun ganyo laamiido Roma mawdo.»

**13** No Pilaatu nani haalaaji dii, o wurtini Yeesu o joonni mo dow kittaal kiita, nokkuure bi'eteene to kaaye yowyowntiri e ne wi'ee e Iburaninkeere: «Gabbata.» **14** Nyalaane ciryaade Paska nun, caka nyaalooma.

Pilaatu wi'i Yahuduubē: «Nani laamiido moodon!» <sup>15</sup> Bee boola: «Waru mo! Waru mo! Tiggū mo!» Pilaatu toontii: «Mi tigga laamiido moodon na?» Hooreebe Limaamiibē wi'i: «Min galaa laamiido to hinaa laamiido Roma.» <sup>16</sup> Den o hokki 6e Yeesu, 6e tiggaa.

### *Yeesu tiggaama e palaanjāl*

Be kocci Yeesu. <sup>17</sup> O wurtii oo roonii palaanjāl makko faa o yottii nokkuure noddeteene «Le'al hoore» e ne wi'e e Iburaninkeere: «Golgota.» <sup>18</sup> Don 6e tiggidi mo e wobbe dido: oo do nano, oo do nyaamo, Yeesu e tummii caka.

<sup>19</sup> Pilaatu wadi alluwal winnaa hande ni: «YEESU MO NASARATU, LAAMIIDO YAHUDUUBĒ», wi'i 6jal takkee e palaanjāl 6jal. <sup>20</sup> Duuggal e Yahuduubē janjii binni nin gam to Yeesu tiggaā woddidaa e siire. Alluwal 6jal winniraama e Iburaninkeere e Romankoore e Yunaninkeere. <sup>21</sup> Hooreebe Li-maamiibē bati Pilaatu: «Taa winnu "Laamiido Yahuduubē", amma winnu: "Kanko wi'i o laamiido Yahuduubē".» <sup>22</sup> Pilaatu toontii: «Ko binnumi, winnike.»

<sup>23</sup> No soogeeji din tiggidinno Yeesu, 6e kocci gineeji makko 6e ceenni ukke naay. Moy fu etti to mum. Horii gulunfaare ne lefol gootol, can-nyaane diga dow faa ley, ne walaa nyoogol. <sup>24</sup> Soogeeji din baddi: «To en cerkitee ne, en pidanee ne tete, daaren kebando ne,» gam ko bataa e dewte goonda: «Be ceennii gineeji am hakkune maabbe, 6e pidani gulunfaare am tete.» Nun bo soogeeji din wadi.

<sup>25</sup> Inna Yeesu, e miiraawo mum, e Mariyama debbo Kolopas, e Mariyama mo Magadala e darii takkol leggal 6jal Yeesu tiggaā e mum.

<sup>26</sup> Yeesu yi'i inna muudum e aahijio mum mo 6uri yidugo e darodii, wi'i inna muudum: «Inna, biya nani!»

<sup>27</sup> Baawo mum, o wi'i aahijio on: «Inna maa nani.» Diga nyalaane nee don, aahijio on hoori Mariyama wuro muudum.

### *Maayde Yeesu*

<sup>28</sup> Baawo Yeesu anni walaa fu ko horii, gam ko winnaa e Dewte goonda, o wi'i: «Donka e woodimmi.» <sup>29</sup> Yoogirgal kebbuŋal innabojam lammudam e wonunoo don. Be cuuwi soosuji e innabojam dam, 6e kaabbi e loocol, 6e battini e hunnuko makko. <sup>30</sup> No Yeesu 6iccininoo innabojam dam, o wi'i: «Dum fu dūm hebbii!» O jimminii, o maayi.

### *Soogeeruyuwii wuttudu Yeesu*

<sup>31</sup> Nyalaane ciryaaki juulde nun. Hooreebe Yahuduubē yami Pilaatu gam koyde tiggaabe heltee, 6e biltee. Be jidaa balli tiggaabe tawee e ledde nyalaane siwteteene, gam nyalaane siwteteene nen laati nun nyalaane mawne. <sup>32</sup> Soogeeji din wari, helti koyde arandeejo e didabo, tiggidaabe e Yeesu ben. <sup>33</sup> Amma no 6e jottino to Yeesu, be tawi o maayii. Gam majjum, 6e keltay koyde makko. <sup>34</sup> Amma gooto e soogeeji din yuwi wuttudu Yeesu e labbo. Don yiyam e diyam facci. <sup>35</sup> Ji'udo e seedoo, seedaaku makko bo goonja nun. Oo anni o batii goonja gam onon bo, goondinon. <sup>36</sup> Dum fu dum wadii gam ko bataa e Dewte goonda: «Baa yiyal makko gootal heltataake.» <sup>37</sup> Aayaare wonne der Dewtere bo wi'i: «Be daaran mo 6e juwi.»

### *Yeesu uwaama*

<sup>38</sup> Baawo mum, Yusufu mo Arimatiya, eeli Pilaatu hokka dūm bannu Yeesu. Yusufu on e laatino aahijio Yeesu e cuuccukka gam oo hulannoo Yahuduubē. Pilaatu nootii, Yusufu wari etti bannu kol.

<sup>39</sup> Nikodemus, jahunoodo to Yeesu der jemmaare gom, kanun bo warii, waddi urdiiji bi'eteedi, miir e alo'es jillontiraadi, ko wadata kilooji laso e sappo. <sup>40</sup> Be etti bannu Yeesu kol, 6e piili 6ol leppi baanjaadi wardi hande no Yahuduubē woowi wadugo to bee uwa maaydo. <sup>41</sup> To Yeesu tiggano, gesa e wonunoo don. Der gesa 6an e woodunoo saabeere heyre ne baa goddo uwaakano e muudum. <sup>42</sup> Don 6e gatti Yeesu gam sabbu ciryaaki

juulde Yahuduubē, saabeere nen bo e badii don.

## 20

### *Saabeere baanji tawaa*

<sup>1</sup> Nyaanne alal, Mariyama mo Magadala hujji, yahi e saabeere Yeesu. O tawi hayre maabiranoone saabeere nen tallitaama. <sup>2</sup> O doggi, o yahi to Simon Piyer e aahiijo mo Yeesu buruno yidugo. O wi'i 6e: «Moodibbo ikkinaama e saabeere, mi annaa to o wattaa.»

<sup>3</sup> Piyer e aahiijo oo ton wurtii, 6e jahi e saabeere ton. <sup>4</sup> Be fu dido bee dogga. Aahiijo oo ton dadi Piyer, arti mo yottaago saabeere. <sup>5</sup> O yuurnii, o yi'i leppi e joowi, amma o naatay. <sup>6</sup> Simon Piyer yottii, naati, tawi leppi e joowi. <sup>7</sup> Lefol piilanoonjol e hoore makko njol hawritayno e leppi dii ton, njol tawa nun e njol resii feere maggol. <sup>8</sup> Den aahiijo artudo yottaago on, kanun bo naati, yi'i dum, goondini. <sup>9</sup> Be paamayno taw Dewte batiino Yeesu fintan. <sup>10</sup> Baawo mum aahiibe ben hooti.

### *Yeesu wirnitanike Mariyama mo Magadala* (*Matiye 28.9-10; Marku 16.9-11*)

<sup>11</sup> Mariyama darii yaasi ley to saabeere, e wulla: O jimminii, oo yuurnoo der saabeere nen. <sup>12</sup> O yi'i malaykaabe dido borniibe gineiji daneeji e joodi to Yeesu fukkinanoo: Gooto e joodii to hoore wonnoo, gooto far to koyde. <sup>13</sup> Malaykaabe ben yami mo: «Debbo, ume bullantaa?» O toontii 6e: «Moodibbo am ikkinaama, mi annaa to o wattaa.»

<sup>14</sup> No o batunoo haala ka, o yeeyitii, o yi'i Yeesu e darii, amma o annitay dum. <sup>15</sup> Yeesu wi'i mo: «Debbo, ume bullantaa? Moy daartataa?» Amma kanko, oo miji jom gesa nun baddata e makko, o wi'i dum: «To an etti mo, batan to gattudaa mo, faa mi ettitoo mo.» <sup>16</sup> Yeesu wi'i mo: «Mariyama.» Mariyama wonyitii, wi'i mo e Iburaniskeere: «Rabbuni,» waato moodibbo.

<sup>17</sup> Yeesu wi'i mo: «Taa meemam, gam mi eencay to Baaba am taw, amma yahu to banniraabe am, bi'aa 6e: «Mi wonu nun mii eenca to Baaba am, laatiido bo Baaba moodon, to Alla am, laatiido bo Alla moodon».»

<sup>18</sup> Mariyama mo Magadala batoy aahiibe: «Mi yi'ii Joomiraawo.» O holli 6e ko Yeesu batii mo.

### *Yeesu wirnitanike aahiibe muudum*

<sup>19</sup> Alal kiikiide, aahiibe Yeesu fu hawriti der suudu, kullii dammugal gam kulol hooreebē Yahuduubē, Yeesu suppiti hakkune maabē. O wi'i 6e: «Jam wonana on!»

<sup>20</sup> Baawo haala ka, o holli 6e newe juude makko e wuttudu makko. Berde aahiibe ben weli no 6e ji'i Joomiraawo. <sup>21</sup> Den Yeesu wi'i 6e kade: «Jam wonana on. Hande no Baaba lilirimmi nunnun, liliranmi on.»

<sup>22</sup> No o batunoo haalaaji dii, o fu-ufi dow maabē, o wi'i: «Jabee Ruuhu Ceniido. <sup>23</sup> Mo jaafanidon hakkeejimum, yaafaama, mo on jaafanaaki, yaafataake.»

### *Yeesu wirnitanike Toma*

<sup>24</sup> Toma bi'eteedo Ciwto, gooto e aahiibe sappo e dido, walaano don no Yeesu warunoo. <sup>25</sup> Aahiibe ben wi'i mo: «Men ji'ii Joomiraawo!» O toontii 6e: «To mi yi'ay battarde newe makko, to mi wattay honnu am e julande majje, mi watta junjo am e wuttudu makko, mi goondintaa.»

<sup>26</sup> No balde jeetati wadi, aahiibe hawritii der suudu kade, Toma e wondi e maabē. Dammude fu e kullii, Yeesu suppiti hakkune maabē, wi'i 6e: «Jam wonana on!» <sup>27</sup> O wi'i Toma: «Waddu honnu maa, daaru newe am; waddu junjo maa bo, wattu e wuttudu am. Taa laata mo hoolaaki, goondin tan.» <sup>28</sup> Toma toontii mo: «Joomam, Alla am.» <sup>29</sup> Yeesu wi'i mo: «Gam a yi'ii am, a goondinii: Barke wonana 6e ji'ay go goondini.»

### *Daliila Dewtere nee do*

<sup>30</sup> Yeesu wadii kaayeffiji kaayniidi duuddi goddi yeeso aahiibe mum di winnaaka e dewtere nee. <sup>31</sup> Dii do winnaama gam goondinon Yeesu

laati nun Cubaado, Bii Alla, gam to on goondinii mo, kebon yonki sabbu makko.

## 21

<sup>1</sup> Baawo majjum, Yeesu wirnitanike aahiiþe mum kade fonjo maayo Tiberiya. Nani no o wirnitorii e maþþe: <sup>2</sup> Simon Piyer, e Toma bi'eteedo Ciwto, e Natanayel mo Kana, leydi Galili, e biþþe Jebede worþe, e aahiiþe makko dido wobþe, bee tawdaa don. <sup>3</sup> Simon Piyer wi'i þe: «Mi yahan cuubaaki liyyi.» Be bi'i: «Menen bo, men jahidan e maa.»

Be jahi, þe naatoy laana, der jem-maare nee don, þe kebay baa godðum. <sup>4</sup> No beeggol ummoy, Yeesu wari e fonjo þjon, amma aahiiþe annitay naa kanko nun. <sup>5</sup> Yeesu wi'i þe: «Sukaabe, on kebii liyyi na?» Be toontii mo: «Men kebay!» <sup>6</sup> O wi'i þe: «Paddee taaruwal þjol wecco laana nyaamo, on keban.» Be paddi þjol. Be kebi liyyi faa þe tampi wattugo þjol der laana sabbu no liyyi duudiri. <sup>7</sup> Aahijo Yeesu mo o buri yidugo wi'i Simon Piyer: «Joomiraawo nun!»

No Simon Piyer nanunoo: «Joomiraawo nun», o etti ginewol makko, o bornii gam funtu o wonunoo, o yanti e diyam. <sup>8</sup> Aahiiþe wobþe wardi e laana kan, e daasa taaruwal kebbunþol liyyi. Be boddoraaki fonjo ko surata kuule keme didi. <sup>9</sup> No þe þabbunoo, þe ji'i yulþe yiite, liyyi e peen e yowii dow mum. <sup>10</sup> Yeesu wi'i þe: «Gaddee liyyi di nanjudon din.»

<sup>11</sup> Simon Piyer naati laana, foodi taaruwal kebbunþol liyyi mawði, hewre e lasoy didi e sappo e tati. Baa no di duudiri nunnun fu taaruwal þjol serkitaaki. <sup>12</sup> Yeesu wi'i þe: «Garee nyaamee!» Baa gooto e aahiiþe þen suusay yamugo «An moy nun?

Gam þee anni Joomiraawo nun. <sup>13</sup> Den Yeesu wari, etti peen e liyyi, hokki þe.

<sup>14</sup> Tatawre nun don ko Yeesu wirnitii aahiiþe mum baawo no o finti.

*Yeesu e yama Piyer haala*

<sup>15</sup> No þe nyaamdi, Yeesu yami Simon Piyer: «Simon bii Yuhaana, aa buri þee do yidugo am?» O toontii: «Ee! Joomam, aa anni mii yidu maa.» Den Yeesu wi'i mo: «Duru baali am!» <sup>16</sup> Yeesu wi'i mo kade: «Simon, bii Yuhaana, aa yidimmi?» O toontii: «Ee! Joomam aa anni mii yidu maa!» Den Yeesu wi'i mo: «Duru baali am!» <sup>17</sup> O wi'i mo kade: «Simon, bii Yuhaana, aa yidimmi na?» Piyer berne mum biisii, gam o wi'i dum de tatawre: «Aa yidimmi na?» Piyer wi'i mo: «Joomiraawo aa anni huune fu, aa anni bo mii yidu maa.» Yeesu wi'i mo: «Duru baali am dii. <sup>18</sup> Mii batee e goonja, e sukaanaaku maa, aa habbonoo belbelol, jahaano to jidudaa, to a naywii, a bantan juude maa, kabbanedaa belbelol, jaaredaa to a yidaa.» <sup>19</sup> Batuuji din hollan nun no Piyer maayirta, e no o ted-dinirta Alla. Baawo majjum, o wi'i mo: «Tokkam».

### *Yeesu e aahijo mum mo o buri yidugo*

<sup>20</sup> Piyer yeeyitii, yi'i aahijo Yeesu mo o buri yidugo e tokki þe. Kanko woni bahinoodo ley gabaare makko, wakkati þe kirtotoo, bi'unoodo: «Moodibbo, moy woni jammotoodo maa?» <sup>21</sup> No Piyer yi'unoo mo, yami Yeesu: «Joomam, noy oo do heennyitirta?» <sup>22</sup> Yeesu toontii mo: «To mii yidi o wuura faa mi warta, ko faali maa? An ni tokkam.»

<sup>23</sup> Haala kan sankitii caka goondinþe Yeesu ike aahijo on maayataa. Amma Yeesu wi'ay: «O maayataa». O wi'u nun: «To mii yidi o wuura faa mi warta, ko faali maa?»

<sup>24</sup> Aahijo oo don nun seedii kujje den, winni ðe, emen anni bo seedaaku makko laati nun goonja.

### *Heennyitoode*

<sup>25</sup> Yeesu wadii kujje godde duuddse kade: To ðe binnaanoma gootel, gootel, mii miila duuniyaaru nuu waawataano jaþdingo dewte bin-noytenoode.

## Derewol nol Pol winnani 6e Roma

### *Fuddoode haala*

Derewol Pol nol do e jogii ekkitinoanje feere feere. Gam majjum enol woodi jayri mawni der waa-jaago linjiila e der habaru eklesiya. Jooni Pol heennyii hawritingo ceede de 6e lenyi janani hawriti gam wal-lugo goondinbe Urusaliima. Pol win-nii derewol nol der jahaanjum tatabal. O wadii lebbi tati der Kointu, diga ton bo o winni derewol nol, hakkune duubi 57-58.

Debbo bi'eteedo Fiibi, gollotoodo der eklesiya Kenkereya nun yaari derewol nol Roma. Kenkereya bo woddidaa e Roma.

Pol meeday go yahi Roma, de o yidiyahugo fu laawol maabitantaako mo. Amma e non fu, oo anni goondinbe duubbe der Roma 6e o fottunoo nokkun, kambe o sanni der hoore 16, go o yaha Roma, o winnani 6e derewol. Der maggol o jannjinii 6e haala kisidam e tokkontirki. O wadii dum gam eklesiya kan daroo der goondinki semmidinki, gam to ekkitinoje Yahuduube 6e goondinay dimma ka, heba ka mawna der potal hunnuko. Baawo mum no Pol heennyi faamingo ko wi'etee linjiila der hoore 1, waato baawde Alla kisinoje goondindo fu, o laabinii dum der haalaaji makko di yeeso.

O fuddii faamingo no hakke woodiri baawde dow himbe fu. Himbe 6e lenyi janani woodaa accitanego yeeso Alla. Non, Yahuduube bo woodaa accitanego hakku yeeso Alla. Himbe fu wadii hakke, 6e fu bo, 6e baawan daareego foonnitiibe gam sabbu goondinki.

Hande non dum laatii e Iburahima. Be kiita doyyi gam hakke Aadam, der Almasiihu tan 6e kebata latineego foonnitiibe.

Der hoore 6 e 7, Pol e toontoo yande wanyube linjiila. Amma Ruuhu e laatina en biibbe Alla, oo walla en bo.

Hoore 9 faa 11 e batana Isira'iila e laawol no Alla subirta himbe. Diga hoore 12 faa 15, Pol e bata haalaaji feere feere dow gondal hakkune goondinbe der eklesiya e 6e walaa der eklesiya. Hoore 16 Pol heennyitiri e cannooje.

### **Tokkontirki haalaaji**

1. Haala puudinirka, 1.1-17
2. Himbe fu e haajaa hisineego, 1.18-3.20
3. No Alla hisinirta himbe, 3.21-4.25
4. Goonki kesi e Yeesu Almasiihu, 5.1-8.39
5. Ko Alla miilani Isira'iilaabe, 9.1-11.36
6. No haani goondindo yahira, 12.1-15.13
7. Haala kennytirka e cannooje, 15.14-16.27.

### *Sannoore*

<sup>1</sup> Derewol nol yiwi e am min Pol maccudo Yeesu Almasiihu. Mi noddaama gam mi laatoo lilaado, mi subaama gam mi waajoo linjiila Alla.

<sup>2</sup> Linjiila kan, Alla habbiino alkawal mum diga dum booyi diga e annabiise mum, der Dewte ceniide.

<sup>3</sup> Eka batana Bidso makko, Joomiraawo meeden, yiwudo e lenyol Dawda diga e bannu. <sup>4</sup> O hollitaama e baawde, diga e Ruuhu Cenndo, o laati nun Bidso Alla de o fintini mo e maaybe. Kanko woni Almasiihu, Joomiraawo men. <sup>5</sup> Diga e makko kebumi moyyere laataago lilaado, gam mi wada himbe caka lenyi fu goondina mo, dowlanoo mo, 6e teddina inne makko. <sup>6</sup> Onon bo, on na'on caka mabbe, onon 6e Yeesu Almasiihu noddi.

<sup>7</sup> Mii sanna on on fu, onon wonbe Roma, yidaabe Alla, seniibe 6e o noddi. Alla Baaba meeden, e Joomiraawo meeden Yeesu Almasiihu, hokka on moyyere e jam.

### *Pol e yidiyi'a 6e Roma*

<sup>8</sup> Taw, mii yetta Alla am diga e Yeesu Almasiihu gam moodon on fu. Gam goondinki moodon e batanee der duuniyaaru fu. <sup>9</sup> Alla mo jaggantoomi e berne woore, emi waajoroo

linjiila Biido mum, e anni goonja nun batanmi. De du'otoomi fu, mii si-wtora moy moodon fu. <sup>10</sup> Mii eela Alla hokkammi laawol mi wara to moodon to oo yidi. <sup>11</sup> Mii yidi yi'ugo on sanne, heba mi seennira e moodon dokkal Ruuhu gam dum semmidina on. <sup>12</sup> Naa bo mi wi'a, to mi warii to moodon, deyyitinontiren en fu sabbu goondinki kawtuki en, min e mon.

<sup>13</sup> Banniraabe, mii yidi annon, no de duuddum mi daartii mi wara to moodon, amma faa jooni mi heboray taw. Mii yidi golle am rima bikkol caka mon, hande no dum laatorii to be lenyi janani. <sup>14</sup> Doole nun mi yaha to himbe fu, fettube gite e be fettay, janjube e be jannay. <sup>15</sup> Kanjum acci mii suunaa waajaago on linjiila, onon wonube Roma.

### Baawde linjiila

<sup>16</sup> Mi sentirtaa linjiila, gam der makka baawde Alla kisinooge goondindo fu woni, aran Yahuduubee, baawo mum be lenyi janani. <sup>17</sup> Gam der linjiila nun foonnaare Alla hollitii. Foonnaare nen, e goondinki tan ne hefortoo, diga fuusdoode faa heennyitirde. E winnii der dewtere: «Poonnitiido wuuran e goondinki.»

### Himbe fu laati nun hakkeebe

<sup>18</sup> Alla e hollita mone mum diga kammu dow himbe be hulataa mo fu, e dow wadoobe ko halli e suudira goonja der hallande mum. <sup>19</sup> Ko haani neddo anna dow Alla e laabani be, gam Alla e hoore mum holittii be dum. <sup>20</sup> Diga Alla tagi duuniyaaru, ko yi'ataake e makko, hande jon baawde makko tabitiide, e Allaaku makko, e faamee diga ko o tagi. Gam majcum, yeddube woodaa laawol dadirde. <sup>21</sup> Bee anni Alla, amma be teddinay mo hande no haani Alla teddiniree, be jettay mo bo. Miilooji maabbe majjinii be. Berde maabbe de galaa faamu niibii. <sup>22</sup> Bee gada hande woodube faamu, amma be laatake haanjaabe. <sup>23</sup> Be battontiri teddujal Alla mo maayataa e tooruuje nandinaade e himbe maayoobe, e pooli,

e bisaaji di koyde naayi, e daaso-toodum.

<sup>24</sup> Gam majcum, Alla yoofi be be gada cobudum, hande no suuno berde maabbe yidi. Nonnon be cobinirta galli maabbe, kambe e ko'e maabbe. <sup>25</sup> Be battontirii goonja Alla e fewre. Be teddinii ko tagaa, be caafi dum, be acci Tagudo, mo yettoore wonani faa abada. Aami!

<sup>26</sup> Gam majcum, Alla yoofi be be tokkoo suunooji maabbe centiniidi. Rewbe maabbe wattontiri baaldal hande no tawiraa, bee gada ko luudontirii e ko tawaa. <sup>27</sup> Hande non worbe bo acci waaldugo e rewbe, witti e waalontira hakkune mum. Bee gadontira ko sentinii hakkune maabbe. Hande non, be keban riiba majjere maabbe.

<sup>28</sup> No be calii annitingo Alla, kan wadi ko o yoofi be der majjere maabbe, be gadii ko haanay Wadeego. <sup>29</sup> Be kebbi hallande iri ney fu, e deedii bondii, e suunooji, e ganyaani. Bee kebbi kaajal e warugo himbe e kabe e nyaamugo himbe amaana. Bee yoyi dow dabareeji bondii e munaafitaaje. Bee nyo'a himbe. <sup>30</sup> Bee jaanca himbe, bee banyi Alla, bee jara hennu. Bee goodi manju hoore, bee juro, bee goodi yoyre dow dabareeji bondii. Be dowtantaako saareejii maabbe. <sup>31</sup> Be galaa hakkillo, be kebbintaa ka be batii. Be galaa endam, be galaa yurmeene. <sup>32</sup> Bee anni, sariya ka Alla resi dow wadoobe iri majcum, maayde nun, be daroraaki wadugo dum tan, amma bee tedinna wadanbe dum bo.

## 2

### Kiita Alla poortiika

<sup>1</sup> To non, an kiitotoodo wobbe, baa to moy latidaa, a woodaa laawol accitanego hakku. To aa hiitoo wobbe, hoore maa nun kiitotodaa, gam ko kiitantodaa be, kanjum gadataa. <sup>2</sup> Een anni Alla hiitoto wadoobe huune dum e goonjaaku. <sup>3</sup> An kiitotoodo wobbe ko aa wada hande ko be gadata, aa miili a dadan kiita Alla na? <sup>4</sup> Naa a wonu nun aa yawoo manju neddaaku Alla

e sawraare mum e munyal mum? A annitay no Alla hollii maa neddaaku mum gam tuubaa na? <sup>5</sup> A yoorinii berne maa, a yidaa tuubugo. Gam majjum, a foodanan hoore maa mone Alla mawne, nyaanne o hollitinta mone makko. Nyaanne mum, o hiitoto e tawreeta makko poonniitika. <sup>6</sup> O yoban moy fu jaka gadu muudsum. <sup>7</sup> Tinniibe e wada ko woodi e daartira teddujal e manju e ko tabotoo, Alla hokkan 6e yonki tabitiiki. <sup>8</sup> Amma yidube jeddi, e saliibe goonja, e tokki ko halli, mone e tikkere Alla yanan dow mabbe. <sup>9</sup> Billaare e jibayeere duudanan gadoowo ko halli fu, aran, Yahuduube, den 6e lenyi janani. <sup>10</sup> Manju e teddujal e jam laatanto wadoobe ko woodi fu, aran, Yahuduube, den 6e lenyi janani.

<sup>11</sup> Gam Alla suttontirtaa himbe. <sup>12</sup> Wadube hakke dow dullere annal tawreeta fu, halkan hinaa e tawreeta. Amma wadube hakke e anniri tawreeta, hiitote e tawreeta. <sup>13</sup> Hettintoobe tawreeta bane laatii foonniitibe yeeso Alla. Golliroobe ko tawreeta bati tan, laatintee foonniitibe. <sup>14</sup> Be lenyi janani, woodaa tawreeta, amma bee gada ko tawreeta wi'i e sago mabbe. Be goodaa tawreeta, amma bee laatanii ko'e mabbe tawreeta. <sup>15</sup> Be kollitiigolle de tawreeta yami e winnii e berde mabbe. Cuudiidum berde mabbe e seedanoo 6e dum. Tife miilooji berde mabbe e gaccoo 6e, tife bo, dii caloroo 6e. <sup>16</sup> Dum hollitinto nyaanne Alla hiitoto miilooji himbe cuudiidi. O wadan dum diga e Yeesu Almasiihu, hande no linjiila ka baajotoomi bati.

### *Yahuduube e tawreeta*

<sup>17</sup> Aa noddha hoore maa Yahudujo, aa darii dow tawreeta, aa juroro Alla. <sup>18</sup> Aa anni ko Alla yidi, aa anni suttontirgo ko woodi gam a janninaama tawreeta. <sup>19</sup> Aa mili a fotii ardanaago wumuube, kolala wonube der niwre jayjol. <sup>20</sup> Aa ekkitina 6e galaa annal, aa jannina sukaabe. Aa woodi annal e goonja diga e tawreeta. <sup>21</sup> An janninoowo

wobbe, a jannintaa hoore maa na? Aa waajoo wobbe to 6e buuju, go an aa wujja! <sup>22</sup> Aa wi'a: «to on jeenee», go an aa jeena? Aa wanyi tooruuje, go aa wujja ko woni der cuudi maje! <sup>23</sup> Aa mawnitoroo tawreeta, go aa yawna Alla e yaartaago ka. <sup>24</sup> Dewtere wi'ii: «Gam daliila moodon acci 6e lenyi janani e yenna inne Alla.»

<sup>25</sup> E goonja juulnol e nafa to a dowlanike tawreeta, amma to a yaartake tawreeta, a laatake hande a juulnaaki. <sup>26</sup> To mo juulnaaki wadii ko sariya yamata, mo juulnaaki on fotay daareego hande juulniido na? <sup>27</sup> Mo juulnaaki, go e dowlanii ko tawreeta bati, o hiitete an goodudo tawreeta e juulnol, go a dowlanaaki ka. <sup>28</sup> Hinaa ko yi'etee yaasi bannu laatinta neddo Yahudujo, hinaa bo ko wadetee dow bannu laatii juulnol. <sup>29</sup> Yahudujo e goonja, woni laatiido dum diga der. Juulnol goonjakuwal bo woni njol Ruuhu wadata der berne, hinaa njol tawreeta wadata. Iri Yahudujo on, Alla nun manata dum, himbe bane.

## 3

<sup>1</sup> Den to non, ume nun Yahudujo furdiri 6e lenyi janani? Ume woni nafuwe juulnol? <sup>2</sup> Nafuwe majjum e mawni dow laabi fu. Aran, Yahuduube nun Alla arti yowani haala mum. <sup>3</sup> To non, to wobbe mabbe laataaki hoolaabe, dum hadan Alla laataago koolaado na? <sup>4</sup> Wadataako! Dum annitinte no Alla laati nun goonjaajo, himbe fu bo e laatii fe-wooobe. Gam e winnii:

«A annitinte aa laatii poonniitido diga e haala maa,  
to a hiitaama, a jaaloto.»

<sup>5</sup> Amma to dullere goonjaaku meeden e hollita foonniitaare Alla, den ume bi'eten? Alla laataaki poonniitido to mone makko ummake dow meeden na? Mii bata do hande no himbe batirta. <sup>6</sup> Aawo nun nun bane, Gam to non non nun, noy Alla hiitortoo duuniyaaru?

<sup>7</sup> Gam to fewre am e 6eyda hollugo goonja Alla, e teddina mo, ume kiitan-teemi hande mi laati nun hakkeejo? <sup>8</sup> Wobbe e hallina men e wi'a, menen nun wi'ata: «En gadee ko halli gam ko woodi wurtoo diga e majjum.» Kambe, 6e kiitete no haaniri.

### *Poonnitiido walaa*

<sup>9</sup> To non, enen Yahuduube een 6uri horiibe na? Aawo, baa sedda! Gam mi hollii no Yahudujo e mo laataaki Yahudujo fu na'on e baawde hakke.

<sup>10</sup> Dewtere wi'ii:

«Poonnitiido walaa, baa gooto,

<sup>11</sup> mo faamu baa gooto walaa,  
daartoo wo Alla walaa, baa gooto.

<sup>12</sup> Himbe fu majji, 6e fu 6e biisake,  
gadoowo ko woodi walaa,  
baa gooto.

<sup>13</sup> Konoli mabbe e nandi e caabeeje  
mabbiide,

6ee jammoo himbe e delle mabbe.

Tondi kunnude mabbe e hebbi tooke,  
hande bolle pure.

<sup>14</sup> Kunnude mabbe e hebbi jaa'ooje e  
boliide naawude.

<sup>15</sup> Koyde mabbe e yawdanoo  
reyyitingo yiyyam himbe.

<sup>16</sup> Halkere e bone e woni to 6e jahi fu.

<sup>17</sup> Be annaa laawol jam.

<sup>18</sup> Kulol Alla walaa e 6erde mabbe baa  
sedda.»

<sup>19</sup> Een anni ko tawreeta wi'i fu, ka  
wi'anay dum maa wonbe e makka.  
Den kunnude fu muubboto, gacce  
himbe fu annitee yeeso Alla. <sup>20</sup> Gam  
majjum, walaa laatineedo poonni-  
tiido yeeso Alla e tokkugo tawreeta.  
Gam tawreeta hollan nun himbe  
hakkeeji mum.

### *No Alla laatinirta himbe foonni- tiibe*

<sup>21</sup> Jooni, Alla hollii laawol no o  
laatinirta himbe foonniibe, hinaa  
e tokkugo tawreeta. Nun dewte  
tawreeta, e annabiibe seedinoo  
der binni. <sup>22</sup> Alla laatinan himbe  
foonniibe gam 6e goondinii Yeesu  
Almasiihu. Dum laatanto goondindo  
fu, gam Alla burontirtaa himbe.

<sup>23</sup> Himbe fu wadii hakke, 6e tam  
yottaago teddujal 6al Alla hokkata.

<sup>24</sup> Amma Alla wadanii 6e moyyere,

laatini 6e foonniibe gam Yeesu  
Almasiihu, cooditiido 6e. <sup>25</sup> Kanko  
nun Alla laatini sadaka moytoojum  
hakkeeji goondinbe yiyyam makko.  
Hande non Alla hollitiri foonniitaare  
mum e munyal mum dow hakkeeji  
gadanoodi hiitaaka. <sup>26</sup> O wadii dum  
gam o hollita foonniitaare makko der  
wakkati ki gonden jooni. Dum hokki  
mo laawol laataago poonniido e  
laatingo goondindo Yeesu fu poonni-  
tiido.

<sup>27</sup> Ume nun horii ko jurortee kade?  
Godsum walaa! E sariya kaye? E  
dowtanaago tawreeta na? Gam  
Alla daarataa dowtanaago tawreeta,  
goondinki tan o daarata. <sup>28</sup> Gam  
emen miili e goondinki nun neddo  
laatinirtee poonniido, hinaa gam  
tokkugo tawreeta. <sup>29</sup> Naa Alla laati  
nun Alla mo Yahuduube tan na?  
O laataaki Alla 6e lenyi janani na?  
Seko walaa, o laati nun Alla 6e lenyi  
janani bo. <sup>30</sup> Alla gooto nun woni.  
Kanko laatinta juulniibe foonniibe  
sabbu goondinki mabbe. Kanko  
bo laatinta 6e juulnaaki foonniibe  
sabbu goondinki mabbe. <sup>31</sup> Den fu,  
en moytan nun tawreeta gam en  
goondinii na? Abada! En moytataa  
ka, amma een tabbitina ka!

## 4

### *Goondinki Iburahiima*

<sup>1</sup> Ume bi'eten dow Iburahiima  
maama lenyol meeden? Ume o  
hebi? <sup>2</sup> To Iburahiima laatinaama  
poonniido gam gadu mum, den o  
waawan ko mawnitii, amma yeeso  
Alla bane. <sup>3</sup> Gam Dewtere wi'i: «Ibu-  
rahiima goondinii Alla, go Alla daari  
mo poonniido sabbu goondinki  
makko.» <sup>4</sup> To goddo gollake, sey  
joomum yobee joddi mum, moyyere  
bane o wadanaa, ko haanani mo nun.  
<sup>5</sup> Hande jon bi'en goddo waday golle,  
amma o goondinii Alla laatinoowo  
hakkeebe foonniibe. Alla daaran  
mo poonniido gam goondinki  
makko. <sup>6</sup> Hande nun Dawda batirani  
barke de neddo hebata to Alla, baa to  
o waday gadu geetu. O wi'i:

<sup>7</sup> «Barke laatanii ɓe boofi mum yaafaa, e ɓe hakke mum moytaa.  
<sup>8</sup> Barke laatanii neddo mo Joomiraawo limay hakkeeji mum.»  
<sup>9</sup> Barke den juulniibe tan nun resanaa de na? de laatanaaki ɓe juulnaaki na? Gam en bi'ii: «Alla daarii Iburahiima poonniido gam goondinki mum.» <sup>10</sup> Wakkati dey nun dum laatanii Iburahiima? De o juulnii na? Naa, de o juulnaaki? De o juulnii bane, amma diga o juulnaakino nun. <sup>11</sup> Alla hokkii mo juulnol, ɣol laatii alaama foonnitaare ne o heb'i. E goondinki o heb'i dum diga o juulnaakino. Hande non, o laatorii maama goondinbe fu, ɓe juulnaaki, gam kambe bo ɓe daaree foonnitiibe. <sup>12</sup> O laatake bo baaba juulniibe. Be daroraaki juulnol tan nun batananmi, amma tokkuɓe laawol goondinki maama meeden Iburahiima, diga o juulnaaki.

### *Alkawal Alla*

<sup>13</sup> Iburahiima e lenyol mum habbanaama alkawal rona duuniyaaru nu. Hinaa gam oo tokkii tawreeta. O habbanaama alkawal ɣal gam foonnitaare makko ne o hebiri goondinki. <sup>14</sup> Gam majjum, to tokkugo tawreeta nun hokkata donju, den mum goondinki laatake baanji, alkawal bo moytaama. <sup>15</sup> Tawreeta waddan nun mone Alla. To tawreeta walaa, yaartaago ka bo walaa.

<sup>16</sup> Gam majjum, alkawal Alla dow goondinki nun darii, gam ɣal laatoo e moyyere dow lenyol Iburahiima fu. Hinaa tokkuɓe tawreeta tan ɣal laatanii, amma goondinbe hande no Iburahiima laatiido maama meeden en fu goondiniri. <sup>17</sup> Dewtere wi'ii: «Mi wadii maa baaba himbe lenyi ɗuuɗdi.» (Iburahiima woni maama meeden en fu,) yeeso Alla mo o goondini. Alla pintinoowo maaybe, laatinoowo ko walaano laatoo. <sup>18</sup> Iburahiima hoolake, wakkati daliila hoolaago walaa. O hoolake, o goondini, nun nun o laatorii baaba himbe lenyi ɗuuɗdi, hande no Alla wi'unoo mo: «Nii

lenyol maada laatooyo.» <sup>19</sup> Goondinki Iburahiima tampay, baa no duubi makko wadan hewre. O anni bannu makko faanake maayugo, Saratu debbo makko bo rimataa kade. <sup>20</sup> O waday seko dow alkawal Alla, o saloo goondingo. Amma goondinki makko semmidinii mo, o teddini Alla. <sup>21</sup> O tabbitini no Alla e woodi baawde hebbinga alkawal mum. <sup>22</sup> Gam majjum, Alla daari mo poonniido. <sup>23</sup> Amma hinaa gam makko tan dum winnaa: «O daaraama poonniido.» <sup>24</sup> Gam meeden nun, enen bo, Alla daaran goondinki men. En goondinii Alla pintido Joomiraawo meeden Yeesu diga maaybe. <sup>25</sup> Yeesu on maayi gam boofi meeden, o finti-naama gam laatineden foonnitiibe.

## 5

### *Almasiihu waddii jam hakkune men e Alla*

<sup>1</sup> En laatinaama foonnitiibe gam en goondinii. Jooni jam wadii hakkune meeden e Alla, sabbu Joomiraawo meeden Yeesu Almasiihu. <sup>2</sup> Kanko yottini en moyyere Alla ne gonuden e muudum jooni. Dum laatake gam goondinki meeden. Een juroro hoolaare hebugo gedu der teddunjal Alla. <sup>3</sup> Hinaa kanjum tan, een juroro bo tooraaji meeden, gam een anni tooraaji riman munyal. <sup>4</sup> Munyal e rima hoolaare semmidinne. Hoolaare semmidinne e wadda hedaga ko warata yeeso. <sup>5</sup> Hoolaago ko warata yeeso majjintaa en, gam Alla wattii yidde mum der berde meeden, diga e Ruuhu Ceniido mo o hokki en.

<sup>6</sup> Gam wakkati de en galaano semme, den nun Almasiihu maayani en, enen hakkeebe no wakkati ki o subi yottii. <sup>7</sup> E sadii neddo nootoo maaya gam poonniido. Wadoto neddo nooto maaya gam neddo geeto. <sup>8</sup> Amma Alla hollitii en yidde mum. Gam Almasiihu maayanii en wakkati laatinoden hakkeebe. <sup>9</sup> To en laatinaama foonnitiibe gam yiyyam Almasiihu, den kan, een anni en dadan mone Alla sabbu makko. <sup>10</sup> Wakkati

laatinoden waybe Alla, o weldinii en e hoore makko diga e maayde Biyiiko. Jooni en beldii e makko, to non non en keban hisineego gam yonki Biyiiko. <sup>11</sup> Kanjum tan bane, een juroro Alla sabbu Joomiraawo meeden Yeesu Almasiihu, beldindo en e makko jooni.

### *Aadamu e Almasiihu*

<sup>12</sup> Diga e neddo gooto nun hakke naatiri duuniyaaru. Diga hakke bo maayde wari, go ne sankitii dow himbe fu, gam be fu be gadii hakke. <sup>13</sup> Diga tawreeta waray, hakke na'onno der duuniyaaru, amma de limaakano, gam tawreeta walaano. <sup>14</sup> E non fu maayde nun laamii diga Aadamu faa yottii Muusa. Ne laamake baa dow bee do waday hakke hande de Aadamu waduno.

Aadamu on woni misaalu ga-roowo. <sup>15</sup> Dokkal Alla foonnataake e hakke Aadamu. E goonja, himbe duubbe maayii gam hakke neddo gooto. Amma endam Alla, e moyyere ne o wadani duubbe diga e neddo gooto, waato Yeesu Almasiihu, e buri nun mawnugo. <sup>16</sup> Kade bo dokkal Alla, e hakke neddo gooto, gootum bane. Gam kiita warii diga e hakke neddo gooto. Baawo boofol gooto, Alla doyyii himbe fu kiita. Amma baawo boofi duuddi, dokkal moyyere Alla wari, laatini duubbe foonnitiibe. <sup>17</sup> Diga e hakke neddo gooto, maayde laamii dow himbe fu gam neddo gooto on. Amma ko neddo gooto wadi, e buri mawnugo. O hokkorii be moyyereeji makko, o laatini be foonnitiibe. Be keban yonki, be laamodoo e makko.

<sup>18</sup> Boofol neddo gooto accii himbe fu doyyaa kiita. Hande non bo gadu geetu nu neddo gooto wadi acci himbe fu hebi foonnitaare, hokkaa yonki. <sup>19</sup> Dullere dowtaare neddo gooto accii himbe duubbe laatii hakkeebe. Hande non bo dowtaare neddo gooto accirta himbe duubbe laatoo foonnitiibe.

<sup>20</sup> Tawreeta Muusa warii gam hakke beydoo. Amma to hakke beydii, don nun moyyere Alla buri

beydaago. <sup>21</sup> Hakke acci maayde laamii. Hande non bo foonnitaare acciri moyyere Alla laamii gam keben yonki tabitiiki ki Joomiraawo meeden Yeesu Almasiihu hokkata.

## 6

### *Maayidingo e fintidingo e Almasiihu*

<sup>1</sup> Den mum, ume bi'eten? En tabitinto nun wadugo hakke gam moyyere Alla beydoo na? <sup>2</sup> Wadataako! Gam dow wecco hakke, en maayii. Noy kade buuriten der majje? <sup>3</sup> E goonja on annaa enen wadanaabe batisi e inne Yeesu Almasiihu, en kawtii e maayde makko na? <sup>4</sup> Diga e batisi, en maayii, uwidaden e makko. Almasiihu fintii e maaybe sabbu baawde Baaba teddude, hande non enen bo, buuriten gonki kesi.

<sup>5</sup> To en kawtii e makko dow maayde nandune e ne makko, en pintan bo hande no o fintiri. <sup>6</sup> Een anni jikku meeden kiinnju tiggidaama e makko dow leggal palaanjal. Dum wadaama, heba bannu meeden hakkewol halka, gam to en laatoo kade maccube hakke. <sup>7</sup> Gam to goddo maayii, hakke woodaa baawde dow makko. <sup>8</sup> To en maaydii e Almasiihu, een koolii no en buuridan e makko bo. <sup>9</sup> Een anni Almasiihu pintudo diga maaybe, maayataa kade. Maayde woodaa baawde dow makko. <sup>10</sup> Almasiihu maayii, de woore gam hakke, dum heyii faa abada. Jooni oo wuuri, gam Alla bo o wuuri. <sup>11</sup> Hande non, onon bo, daaree ko'e mon hande maayube dow wecco hakke, den buuranon Alla sabbu Yeesu Almasiihu.

<sup>12</sup> Gam majcum, to on accee hakke laamanoo balli moodon maayooji, to on downtanee suunooji majji. <sup>13</sup> To on kokkee hakke jokkule balli moodon de gadira ko foonnitaaki. Amma kokkee Alla ko'e moodon. On maayiino, jooni oon buuri. To non kokkee mo jokkule moodon, de laatoo gadirdum ko foonniti. <sup>14</sup> To on accee hakke laamanoo on, gam der tawreeta bane gonudon, amma der moyyere Alla.

*Gollantoo be foonnitaare*

<sup>15</sup> Ume kade? En tokkoto nun wadugo hakke gam der moyyere nun gonuden hinaa der tawreeta na? Dum wadataako! <sup>16</sup> On annaa na? Mo gadudon ko'e mon maccube mum, gam dowtanodon dum, kanko dowtantodon. Wadoto hakke nun, jaarooke der maayde, dum bo dowtaare jaaroore der foonnaare. <sup>17</sup> Yettoore laatanoo Alla! On latikeno maccube hakke, amma jooni on dowtanake e berde moodon fu janninol ηοl janjinadon. <sup>18</sup> On dindinaama diga e hakke, on laatake gollantooße foonnaare. <sup>19</sup> Mii bata do hande no himbe woowi batingo, gam tampere moodon. On kokkiino balli moodon, gadudon ko tuuni e ko wuuri, oon gada ko halli. Hande non jooni bo, kokkee balli moodon laatodon gollantooße ko foonnitii gam laatodon seniibe.

<sup>20</sup> Wakkati laatinodon maccube hakke, foonnaare woodaano baawde dow moodon. <sup>21</sup> Ume kebunodon no gadunodon ko centirton jooni? Heennyitirde majjum laati nun maayde. <sup>22</sup> Amma jooni, on dindinaama e hakke. On latike maccube Alla, riiba majjum laatii laabineego. Heennyitirde majjum laati yonki tabitiiki. <sup>23</sup> Riiba hakke, maayde nun. Amma kokkal Alla laati nun yonki tabitiiki der kawtal men e Yeesu Almasiihu Joomiraawo meeden.

## 7

### *Goonindo firtake e tawreeta*

<sup>1</sup> Banniraabe, mii badda on hande annube tawreeta. Oon anni tawreeta dawrantaa maa neddo to emo wuuri. <sup>2</sup> Hande non debbo baajaado, tawreeta habbii dum e gorum wakkati guurnam goriiko. Amma to goriiko maayii, o firtake e tawreeta kaabunooka mo e goriiko. <sup>3</sup> Amma to o latike debbo goddo diga goriiko e wuuri, o noddete jeenoowo. Amma to goriiko maayii, o firtake e tawreeta, o noddataake bo jeenoowo baa to gorko goddo hoowii mo. <sup>4</sup> Hande non dum laatii

e moodon onon bo, banniraabe am. Sabbu maayde Almasiihu on pirtaama e tawreeta. On laatake jeyde Almasiihu mo Alla fintini diga maaybe gam gaden ko fottanta Alla. <sup>5</sup> Wakkati gadetenno ko suunooji balli men yidi, en tokkiino gidaadi hakke yiwude e tawreeta. Tawreeta kan gollotonu der men e yaara en e maayde. <sup>6</sup> Amma jooni, en pirtaama e tawreeta, en maayii dow wecco makka. Gam majjum en caafirtaa Alla e laawol kiinnol ηοl tawreeta binnaaka. Amma een caafa mo e laawol kesol ηοl Ruuhu makko.

### *Tawreeta moytataa hakke*

<sup>7</sup> Den, ume bi'eten kade? Tawreeta laati nun hakke na? Abada! Amma, diga e tawreeta nun annirmi ko woni hakke. Gam mi annataano ko woni suuno to tawreeta wi'ayno: «Taa suuna.» <sup>8</sup> Hakke hebii laawol diga e umuroore, de gattimmi suunooji iri diye fu. Gam to tawreeta walaa, hakke bo waatii. <sup>9</sup> Naane, ko mi annaano tawreeta, emi wuurunoo. Amma no umuroore wari, hakke hebii baawde, <sup>10</sup> den min, maayumi. Umroore kaanunoone hokkammi yonki, waddanii am maayde. <sup>11</sup> Gam hakke hebii laawol diga e umuroore, yoirimmi, yaarimmi der maayde.

<sup>12</sup> Hande non, tawreeta e laatii ceniika. Umroore bo e laatii seniine, foonnitiine, woodune. <sup>13</sup> Jooni, ko woodi laatanike am maayde na? Abada! Amma gam hakke hollitoo no de laati nun hakke e goonja, de gollirii ko woodi, go de barimmi. Hande non, diga e umuroore, hakke hebii hollitiri hallande mum fu.

### *Habidingo e hakke*

<sup>14</sup> Een anni tawreeta yiwi diga Ruuhu. Amma min, mii laatii neddo tampudo, mii laatii maccudo hakke. <sup>15</sup> E goonja, mi faamataa ko gadanmi. Ko jidumi, mi wadataa dum, amma ko banyumi, gadanmi. <sup>16</sup> To mii wada ko mi yidaa, edum hollita no mi nootake tawreeta e woodi. <sup>17</sup> Jooni, min bane wadata ko gadanmi, hakke gonude der am wadata dum. <sup>18</sup> Gam mii anni,

ko woodi walaa der am, waato der bannu am. Mii yidi wadugo ko woodi, amma mi waawataa ko wadi dum. <sup>19</sup> Mii yidi wadugo ko woodi, amma mi wadataa dum. Kalludum ko mi yidaa gadanmi. <sup>20</sup> To mii wada ko mi yidaa, min bane wadata dum, amma hakke gonude der am wadata dum.

<sup>21</sup> Daa ko ji'umi e wadoo der am: mii yidi wadugo ko woodi, amma go kalludum e takkii am. <sup>22</sup> Der luggudum berne am, mii seyori tawreeta Alla. <sup>23</sup> Amma mii yi'a tawreeta gokka der am, kabidoowa e tawreeta ka hakkillo am jaabi. Ka laatinimmi maccudo tawreeta hakke gonude der am. <sup>24</sup> Kayto! Mii laatii neddo jurminiido! Moy rindintammi e bannu maayoowol ijol? <sup>25</sup> Yettoore laatanoo Alla, diga e Joomiraawo meeden Yeesu Almasiihu!

Min, der hakkillo am, mi laati nun maccudo tawreeta Alla, amma der am, mii maccudo tawreeta hakke.

## 8

### *Goonki mo Ruuhu Alla durata (Galaatiya 3.13-14, 5.16-25)*

<sup>1</sup> Gam majcum, jooni, hawtuþe e Yeesu Almasiihu doyyataake kiita. <sup>2</sup> Gam tawreeta Ruuhu e hokka yonki to goddo hawtii e Yeesu Almasiihu. Kanka rindinimmi diga tawreeta hakke, e maayde. <sup>3</sup> Tawreeta Muusa waawayno ko wadi dum gam tam-pere bannu. Amma Alla wadii dum. O liloy Biyiiko tii etti bannu nandujol e bannu hakkeeþe gam o firta be diga hakke. Hande non o hiitorii hakke gollotoode der balli meeden. <sup>4</sup> O wadii dum gam foonnitaare ne tawreeta yami, hebba dow meeden. Hande non, en jahataa kade no bannu yidiri, amma no Ruuhu yidiri. <sup>5</sup> Tokkiib e jidaadi bannu, ko bannu yidi be mijantoo. Amma tokkiib e Ruuhu, dum Ruuhu be mijantoo. <sup>6</sup> Tokkugo jidaadi bannu, maayde nun. Amma tokkugo ko Ruuhu yidi, yonki e jam nun. <sup>7</sup> Tokkudo jidaadi bannu laati nun ganyo Alla. O dowtantaako tawreeta Alla, o waawataa du ko

dowtanii ka. <sup>8</sup> Wadoobe ko balli mum yidi waawataa ko fottani Alla.

<sup>9</sup> Onon kan, on tokkaaki jidaadi moodon, amma Ruuhu Alla, to Ruuhu on e woni e moodon kan. Mo walaa Ruuhu Almasiihu, laataaki mo makko. <sup>10</sup> To Almasiihu na'on der moodon, e non fu balli moodon maayan gam hakke, amma ruuhu moodon wuuran gam on laatinaama foonnitiibe. <sup>11</sup> Alla fintinii Yeesu diga maaybe. To Ruuhu makko na'on der moodon, den kan pintindo Yeesu Almasiihu diga maaybe, hokkan balli moodon maayooji yonki, diga e Ruuhu makko gonudo der moodon.

<sup>12</sup> To non non, banniraabe, een jogii nyamaane. Amma hinaa nya-maane suunooji balli jogiden gam gonoden no di jidiri. <sup>13</sup> To oon tokki jidaaci bannu, on maayan. Amma to on barii di diga e Ruuhu Alla, on buuran. <sup>14</sup> Gam be Ruuhu Alla dowata fu, kambe nun laatii biibbe Alla. <sup>15</sup> Ruuhu mo Alla hokki on laatinay on maccube, hakko gonodon kade der kulol. Amma o laatinii on biibbe Alla. Ruuhu acci een nodda Alla «Abba» waato Baaba. <sup>16</sup> Ruuhu Ceniido e hoore mum, e seedanoo ruuhu meeden, en laati nun biibbe Alla. <sup>17</sup> To een laatii biibbe Alla, en donan ko Alla resani himbe mum. En donidan dum e Almasiihu. To en toorodike e makko, en donidan bo teddujal e makko.

### *Teddujal garoowal*

<sup>18</sup> Mii anni tooraaji meeden di jooni, foonnataako e teddujal garoowal, ijol Alla suppitanoyta en. <sup>19</sup> Ko tagaa fu e haabi yi'a wakkatiire ne o hollitinta teddujal biibbe makko. <sup>20</sup> Gam ko tagaa fu naatinaama der jeyaanaaku, dum laatinaa baanji, hinaa e yidde majcum, amma sabbu naatindo dum e maggu. Amma e non, hoolaare na'on. <sup>21</sup> Ko Alla tagi fu firtete e jeyaanaaku halkere. Den dum heba rindineego e teddujal ijol biibbe Alla hebata. <sup>22</sup> Gam een anni, faa jooni, tagaadum fu e uuma e tooro hande debbo dimoowo. <sup>23</sup> Tagaadum tan bane tooroto. Baa enen be Alla hokki Ruuhu mum

hande kokkal artunjal, een uuma. Enen bo, een kaa&iuml; Alla rindina galli meeden, laatina en b&uuml;bbe mum. <sup>24</sup> En kisinaama, amma een kedii taw. To een ji'a huune ko tammihiden he&ugt;ugo, dum laataaki kade tammuwe. Moy nun tammihintoo ko yi'i? <sup>25</sup> Amma to een tammihii ko en ji'ataa yottoto, en kettinto dum e munyal.

<sup>26</sup> Hande non bo Ruuhu e wara wal-lugo en der tampe meeden. En annaa du'aago hande no haani. Amma Ruuhu e hoore mum e du'anoo en e uumaali d&uuml; neddo waawataa ko bati.

<sup>27</sup> Alla annudo ko woni der berde himbe e anni ko Ruuhu yidi. No Alla yidiri bo, nun nun Ruuhu du'orantoo himbe makko.

<sup>28</sup> Een anni bo, ko Alla wadata fu, oo wada dum gam booddum yidube mo, kambe be o subi hande no o resiri. <sup>29</sup> Himbe be Alla anni diga aran, o subii be diga fuddoode be nanda e Biyiiko. Den Biyiiko laatoo afo caka banniraabe duubbe. <sup>30</sup> Be o subi diga fuddan, o noddi dum. Be o noddi bo, o laatinii dum foonnitiibe. Be o laatini foonnitiibe, o teddinii dum.

### *Walaa ko seennata en e yidde Alla*

<sup>31</sup> Ume bi'eten kade dow haala kan? To Alla e wondi e meeden, moy waawata ko habidi en? <sup>32</sup> Kanko, mo saloraaki Biyiiko, amma o hokkitirii mo gam meeden en fu. Noy woni o hokkirtaa en ko o woodi fu e moyyere, diga e Biyiiko? <sup>33</sup> Moy nun gaccoto be Alla subi? Walaa! Gam Alla nun laatinta be foonnitiibe!

<sup>34</sup> Moy waawata ko doyyi be kiita? Walaa! Yeesu Almasiihu maayii gam ma&ugt;be. Ko buri fu, o fintii, o na'on joodii nyaamo Alla, oo du'anoo en. <sup>35</sup> To non non, moy nun waawata ko seenni en e yidde Almasiihu? Billaare na, jibayeere na, tooreego na, rafo na, talakaaku na, kaliire na, naa kaafahi? <sup>36</sup> Hande no Dewtere wi'i:

«Gam maada acci emen gonii nyalaane fu der kaliije maayde,

emen daaraa hande baali kiise-teedi<sup>☆</sup>.»

<sup>37</sup> Amma der huune dum fu, en kebii jaalorgal sabbu jidudo en. <sup>38</sup> Gam mii anni, walaa ko seennata en e yidde makko. Baa maayde, baa guurnam, baa malaykaabe, baa baawdeeji, baa ko warata jooni, dum bo ko waroya yeeso, dum bo semme gom, <sup>39</sup> baa baawdeeji gonudi dow, dum bo baawdeeji gonudi ley, to dum bo tagaadum gom, walaa e majjum ko seennata en e yidde Alla nee do hawti en e Joomiraawo meeden Yeesu Almasiihu.

## 9

### *Pol e wullana himbe lenyol mum (Galaatiya 4.22-31)*

<sup>1</sup> Ka batanmi do goonja nun. E inne Almasiihu, mi fewataa. Cuudiidum berne am bo e seedanoo am diga e Ruuhu Ceniido no goonja nun batanmi. <sup>2</sup> Berne am e biisii puy, mii woodi toora ka heennyataa, der berne am. <sup>3</sup> Mi wanyay laataago jaa'aado, mi seenniree e Almasiihu to dum nafanno banniraabe e baabiraabe am, be lenyol am. <sup>4</sup> Kambe woni Isira'iilaabe, be Alla laatini b&uuml;bbe mum, holli be teddunjal mum. Be kebii alkawalji e tawreeta. O hollii be no be caafirta mo, o batii be o wadanan be huune duuddum. <sup>5</sup> Kambe laattiyiwube diga e kaakiraabe amen. Almasiihu bo yiwii e lenyol &ol. Kanko woni Alla jintudo huune fu, yettoore laatanoo mo faa abada. Aami!

<sup>6</sup> To non non haala Alla tampu nun na? Gam yiwube e lenyol Isira'iila fu bane woni Isira'iilaabe. <sup>7</sup> Yiwube e lenyol Iburahima fu bane woni b&uuml;bbe makko. Gam Alla wi'i Iburahima: «Diga e Isiyaaku kebataa lenyol innitirteenjol inne maa». <sup>8</sup> Ko dum yidi wi'ugo woni: rimaabe e bannu bane laatii b&uuml;bbe Alla, sey rimaabe dow alkawal Alla. Kambe nun limetee der lenyol makko. <sup>9</sup> Gam Alla habbanii mo alkawal wi'i: «Mi wittaan mawuri hande nii, mi tawan Saratu rimii biddo gorko.»

<sup>☆</sup> 8:36 Jabuura 44.23.

<sup>10</sup> Don tan bane. Rebeka bo hebii reedu siwtube. Baaba mabbe nun Isiyaaku, maama meeden. <sup>11</sup> Sukaabe ben rimaakano taw, be gaday ko woodi, dum bo ko halli. E nun fu, ko Alla resi nun wadata. Cubol makko daraaki dow gadu, amma dow no o resiri, kanko cuboowo. <sup>12</sup> Alla wi'i Rebeka: «Mawniraawo jagganto mi-iraawo.» <sup>13</sup> Hande ko winnaa: - «Yaakuubu jidumi, Isuwa banyumi<sup>26</sup>.»

<sup>14</sup> Den, ume bi'eten? Ko Alla wadata foortaaki na? Abada! <sup>15</sup> Nani ko o wi'i Muusa: «Mi endoto mo endotoomi, mi yurmoto mo jurmotoomi.» <sup>16</sup> Hande non, cubol Alla daraaki dow sago neddo, dum bo dow anniya mum, amma diga e Alla endotoodo dum yiwi. <sup>17</sup> Gam Dewtere batii dow Fiirawna, wi'i: «Mi subii maa e sago am gam mi hollita baawde am dow maa, kade bo gam inne am sankitoo e duuniyaaru fu<sup>27</sup>.» <sup>18</sup> Den, Alla endoto mo yidi, yoorinan berne mo yidi.

<sup>19</sup> A yaman am bi'aa: «Ume acci ko Alla e gaccoo himbe? Moy waawata ko salii sago makko?» <sup>20</sup> Amma an, moy laatidaa faa jeddontiraa e Alla? Fayande waawan ko yami mahudo dum: «Gam ume ko mahirdaa am ninni na?» <sup>21</sup> Mahoowo payande woodaa hoore mum wada ko yidi e loope goote den na? E loope goote den, o waawan ko mahi payande godde de teddujal, o maha godde bo de walaa teddujal.

<sup>22</sup> Alla yidii hollitingo mone mum e baawde mum. Amma o munyanii himbe puy, kambe haanan-noobe mone makko, resanoobe gam halkere. <sup>23</sup> O wadii dum gam hollitingo teddujal makko manjal dow be o endii. O siriylake dum gam be o yidi teddingo. <sup>24</sup> Himbe ben woni enen be o noddi, hinaa caka Yahuduube tan, amma e caka be laataaki Yahuduube bo. <sup>25</sup> Kanka nun Alla bati e dewtere annabi Hose'a o wi'i:

«Lenyol njol laataakino lenyol am, mi noddan njol lenyol am,

lenyol njol yidaakano, mi noddan njol lenyol am jidaanjol.

<sup>26</sup> Kade bo, to be bi'etenoo, be laataaki himbe am, ton be noddetee bibbe Alla mo yonki<sup>28</sup>.»

<sup>27</sup> Annabi Esaaya bo batii haala Isira'iilaabe, wi'i: «Baa to bibbe Isira'iila duudii hande jaaneeri maayo, wobbe mabbe tan hisintee.

<sup>28</sup> Gam Joomiraawo hebbinan law haala ka o batii fu, deydey, dow leydi do.» <sup>29</sup> Kade bo non Esaaya wi'unoo diga booydum:

«To Joomiraawo hooreejo konun-keebe accanayno en lenyol baa sedda, en laatotono hande Sodoma, en nandanno e Gomora.»

### *Isira'iilaabe dowlanaaki Alla*

<sup>30</sup> Den, ume bi'eten? Himbe be lenyi janani dartayno laatoo foonnitiibe yeeso Alla, amma be kebii dum diga e goondinki. <sup>31</sup> Amma Isira'iilaabe dartube foonnitaare diga e tokkugo tawreeta, waaway ko hebii dum. <sup>32</sup> Gam ume nun? Gam be dartiray dum e goondinki. E anniya mabbe nun be dartiri dum, go be pergi dow hayre doyyoore be. <sup>33</sup> Dewtere wi'i:

«Mi yowii dow Siyoona hayre ferge-teene, teapaare doyyoore himbe.

Amma goondindo ne fu sentintaake abada!»

## 10

<sup>1</sup> Banniraabe, mii yidi e berne am fu, Isira'iilaabe hisa. Kanjum eelanmi Alla. <sup>2</sup> Mii seedanoo be no bee goodi tinnaare gam Alla, amma be galaa annal. <sup>3</sup> Be annaa laawol njol Alla laatinirta himbe foonnitiibe. Den be dartani ko'e mabbe no be laatortoo foonnitiibe. Be jiday dowlanaago Alla e laawol njol o laatinirta himbe foonnitiibe. <sup>4</sup> Almasiihu yottinii tawreeta, gam goondindo mo fu laatinee poon-nitiido.

### *Goondindo Almasiihu fu hisan*

<sup>26</sup> 9:13 Malakiya 1.2-3    <sup>27</sup> 9:17 Wurtaago 9.16

<sup>28</sup> 9:26 Esaaya 1.9; Laatanooji 19.24-25

<sup>5</sup> Muusa winnii dow haala foonniataare yiwune e tawreeta, wi'i: «Neddo fu tokkudo tawreeta, wuuran diga e makka.» <sup>6</sup> Amma foonniataare yiwune e goondinki wi'i: Taa wi'u der berne maa «Moy eencata dow kammu?» Jippingo Almasiihu nun don. <sup>7</sup> Taa wi'u der berne maa bo: «Moy mutata der leydi?» Wurtingo Almasiihu diga hakkune maaybe nun don. <sup>8</sup> Den, ume haala kan bati? «Haala Alla e 6adii maa, ka na'on der hunnuko maa, e der berne maa.» Haala kan woni habaru goondinki ki men baajotoo. <sup>9</sup> To a batii e hunnuko maa Yeesu nun laatii Joomiraawo, go goondindaa der berne maa Alla fintinii mo diga maaybe, den a hisan. <sup>10</sup> Gam goondindo e berne mum fu, Alla laatinan dum poonniitido. Batudo e hunnuko mum bo, Alla hisinan dum. <sup>11</sup> Dewtere wi'ii: «Goondindo fu sentintaake.» <sup>12</sup> Walaa ko suttontiri Yahuduujjo e mo laataaki Yahuduujjo. Be fu Joomiraawo gooto be goodi. Kanko nun hokkata noddanbe mo fu jawdi makko. <sup>13</sup> Gam «noddudo inne Joomiraawo fu, hisan.»

<sup>14</sup> Amma noy be noddirta inne mo be goondinay? Noy be goondinirta mo be nanay habaru muudum? Noy be nanirta habaru makko to baajootodo walaa? <sup>15</sup> Noy himbe waa-jortoo to be lilaaka? Dewtere wi'ii: «Ume woodi hande koyde fiinoobe habaruuji beldi.» <sup>16</sup> Amma himbe fu bane dowtanii linjiila kan. Hande no Esaaya wi'i: «Joomiraawo, moy nun goondini waaji amen?» <sup>17</sup> Hande non, goondinki e yiwa diga e nanugo, ko nanetee bo e yiwa diga e haala Almasiihu.

<sup>18</sup> Amma mii yama kaa do: Isira'iilaabe nanay woni na? E goonja be nanii! Gam dewtere wi'ii:  
«Daade maabbe nanaama der duuninyaaru fu,

Haala maabbe yottike kaddi leydi.»

<sup>19</sup> Mii yama kade: Isira'iilaabe faamay woni na? Muusa artii wi'i:

«Mi wadan nawniraagu moodon ummoo dow lenyol ijol on gattiray,

Mi accan mone moodon ummoo dow lenyol ijol walaa annal.»

<sup>20</sup> Baawo mum Esaaya hulay wi'ugo: «Himbe be dartayno am yiitii am, mi hollitanike himbe be yamanay am.»

<sup>21</sup> Amma dow Isira'iilaabe, o wi'i: «Nyalaane fu mii weedi juude am gam jaabugo himbe nanaruube e yeddoobe.»

## 11

### Alla woppay Isira'iilaabe

<sup>1</sup> Mii wi'a: Alla woppu nun himbe muudum na? O woppay be! Gam min bo mi laati nun Isira'iilaajo, taaniraawo Iburahiima, mi yiwi e lenyol Benyamin. <sup>2</sup> Alla woppay himbe muudum be o subi diga fuddoode. Oon anni ko Dewtere bati wakkati annabi Eliya wullani Alla gam Isira'iilaabe, e wi'a: <sup>3</sup> «Joomiraawo, be barii annabiibe maa, be pusii kiisirde maa. Min tan horii, go bee darta min bo be barammi.» <sup>4</sup> Ume Alla toontii mo? O wi'i: «Mii horanii hoore am worse ujune jeedido be jiccanaaki tooruure wi'eteene Ba'al.» <sup>5</sup> Hande non bo dum laatii jooni. E woodi himbe horiibe be Alla subi e moyyere mum. <sup>6</sup> To e moyyere nun o subiri be, den fu gam gadu maabbe bane. To hinaa non, moyyere laatataako moyyere\*.

<sup>7</sup> Ume nun kade? Ko Isira'iilaabe dartannoo, be kebay dum. Be Alla subi caka maabbe hebi dum. Horiibe, berde muudum yoorinaama, <sup>8</sup> hande no winnaa:  
«Alla mabbii hakkilooji maabbe,

Bee goodi gite, amma be ji'ataa, bee goodi noppi amma be nanataa.

Non dum laatii faa hanne.»

<sup>9</sup> Dawda bo wi'i:  
«Nyaamduuji juulde maabbe laatanoo be pittol e to be pergootoo, dum laatanoo be doyyere, e riiba golle maabbe.

<sup>10</sup> Gite maabbe wuminee, nulla yi'ugo,

\* <sup>11:6</sup> Dewte godde seydi kaa do: To e gadu maabbe nun be cubiraa, den fu moyyere bane, to hinaa nun gadu laataaki gadu. <sup>11:10</sup> Jabuura 69.23-24

6e laatinee jeyaabe e baadey<sup>☆!</sup>»

<sup>11</sup> Den, mii yama: Yahuduube fergi nun gam 6e jana e baadey na? Aawo! Amma sabbu fergaago ma6be, 6e lenyi janani he6ii kisidam gam nawniraagu Yahuduube umminiree.

<sup>12</sup> Fergaago Yahuduube laatanike himbe duuniyaaru jawdi, seekaago ma6be bo waddanii 6e lenyi janani jawdi. Den noy dum laatotono to Yahuduube fu tuubiino?

### Kisdam lenyijanani

<sup>13</sup> Jooni, onon 6e lenyi janani nun baddanmi. Mii latii lilaado caka 6e lenyi janani, mii teddina golle am.

<sup>14</sup> Mii yidi to wadoto, mi ummina nawniraagu himbe lenyol am, mi hisina wo6be ma6be. <sup>15</sup> Takkeego ma6be sera weldini himbe duuniyaaru e Alla. Noy dum laatotono to 6e bittinaama? Dum nandan hande yiwugo diga maayde naata e yonki.

<sup>16</sup> To peen artuja sakkaama Alla, den koriiko fu e laatanii mo. To dadi leggal e laatanii Alla, licce maggall bo e laatanii mo. <sup>17</sup> Hande non dum laatii e himbe Isira'iila, 6ee laatii hande leggal jaytuhi. Licce jaytuhi wuro godde wudditaama, go an jaytuhi laddehi takkadaa dow jayri jaytuhi wuro, go aa heba nyaamdu maa diga e makki. <sup>18</sup> Gam majjum, taa yawa licce budditaade. A woodaa laawol mawnitaago. Amma to aa mawnito, annitin no an bane roonii dadi, dadi nun roonii maa.

<sup>19</sup> Wadoto bi'aa: «Licce wuddita nun gam mi takkee to de gonunoo.»

<sup>20</sup> Goona nun! De budditaama gam dullere goondinki majje, go an takkadaa gam goondinki maa. To non non, taa mawnita, amma hulu Alla. <sup>21</sup> Gam to Alla accay licce wuro, o accataa maa an bo.

<sup>22</sup> En daaree geetaaku Alla e sadella makko. Sadella makko dow yanube, den geetaaku makko bo dow maa, to aa tabitii der geetaaku makko. To hinaa non, an bo a wuditinte. <sup>23</sup> To Isira'iilaabe bo tabitaaki der dullere goondinki mum, Alla takkan6e kade. Gam Alla e woodi baawde takkugo 6e kade. <sup>24</sup> An jaytuhi laddehi, a

wudditaama takkadaa to jaytuhi ki wuro. Dum don haandanayno maa. To non, edum sadfi takkugo licce jaytuhi ki wuro to de gonunoo na?

### Alla e woodi yurmeene himbe fu

<sup>25</sup> Banniraabe, mii yidi faamingo on asiiri dum do, gam to on daaree ko'e moodon hande woodube hakkillo. Wo6be der Isira'iilaabe, berde mum yoorinaama. Amma dum daroto to limgal 6e lenyi janani hisinteebe hebbii. <sup>26</sup> Hande non, Isira'iilaabe fu hisan. Non Dewtere wi'i: «Kisinoowo waran diga Siyoona, o mooytan dullere kulol Alla caka himbe lenyol Yaakuubu.

<sup>27</sup> Kanjam woni alkawal am e ma6be to mi moytii hakkeeji ma6be.»

<sup>28</sup> Dow wecco linjiila Yahuduube laatake 6e Alla wanyi, gam moodon. Amma dow wecco cubol Alla, 6e laati nun yidaabe gam kaakiraabe ma6be.

<sup>29</sup> To Alla hokkii neddo o hokku nun, to o noddi neddo bo o noddu nun.

<sup>30</sup> Naane, on dowtanaakino Alla. Amma joonii on kebii endam Alla gam dullere dowtaare Yahuduube.

<sup>31</sup> Non bo jooni, 6e dowtanaaki Alla gam kebon endam makko. Jooni, kambe bo 6e keban endam makko, hande no onon bo kebirdon. <sup>32</sup> Gam Alla ma6ii himbe fu der dullere dowtaare, gam o endoo 6e, 6e fu.

<sup>33</sup> Hey! E goona Alla e mawni! Hakkillo makko e annal makko e luggi! Walaa baawoovo ko faami no o hiitortoo, laabi makko faamataako!

<sup>34</sup> Gam e winnaa:

«Moy anni milooji Joomiraawo?  
Moy woni kokkoowo mo saawari?

<sup>35</sup> Moy arti hokki mo, hakko o yoba dum?»

<sup>36</sup> Gam huune fu e makko yiwi, gam makko dum woni, kanko bo woodi dum. Teddujal laatanoo mo faa abada! Aami!

## 12

### No haani goondin6e Yeesu wuurira

<sup>1</sup> Banniraabe, mii eela on sabbu endam Alla. Kokkee mo ko'e moodon hande sadaka yonkinteha, ceniika,

pottananka Alla. Kanjum woni sujida goonjaha, kaanuka caafiron Alla. <sup>2</sup> To on nandee e himbe duuniyaaru nu. Amma accee Alla waylita on. Hakkilooji moodon laatoo kesi. Den on baawan suttontirgo ko Alla yidi, e ko woodi, e ko hebbi.

<sup>3</sup> Alla wadanii am moyyere mum. Gam majjum mii wi'a moy moodon fu to daaru hoore muudum gura ko laati. Amma moy fu daara hoore mum jaka no foti, e jaka goondinki ki Alla hokki dum. <sup>4</sup> Moy meeden fu e woodi jokkule duudse der bannu gootol. Jokkule den fu golle goote bane wadata. <sup>5</sup> Hande non, enen bo, no duudirsen fu, en laati nun bannu gootol, gam kawtal meeden e Almasiihu. En fu, een jeyontiri. <sup>6</sup> Alla hokkii en dokke feere feereeje e moyyere mum. Kokkaado gadol annabaaku, wada dum no fottiri e goondinki. <sup>7</sup> To wallugo woobbe nun, o wada dum e hakkillo makko fu. Janninoowo bo, hiinnoo janjinol mum. <sup>8</sup> Kokkaado dokkal semmidingo himbe, o semmidina be. Kokkaado dokkal wallugo woobbe, walla e berne woore. Ardiido, ardoe e tinnaare. Endotoodo himbe, wada dum e seyo.

<sup>9</sup> Yidde mon laatoo ne walaa mu-naafitaare. Banyee ko halli, takkee ko woodi e semme. <sup>10</sup> Jidontiree e yidde banniraagu. Moy moodon fu teddina banniraawo mum, burina hoore mum. <sup>11</sup> Laatee tinniibe, to on laatee ciiwankeebe. Accee hakkillo mon e fini. Gollanee Joomiraawo e berde mon fu. <sup>12</sup> Ceyoree ko koolidon on keban, munyanee tooraaji, tinnee e wadugo du'aaje. <sup>13</sup> Ballitee himbe Alla e haajeeji mum, laatee weerenoobe hobbe.

<sup>14</sup> Barkidinee tooranbe on, barkidinee, to on jaa'ee. <sup>15</sup> Ceyodee e seyotoobe, bullidee e wulloobe. <sup>16</sup> Goodee miilooji gooti hakkune mon. To on darteeko mawni, amma nootee bo wadugo ko leesi. To on daaree ko'e moodon hande woodube hakkillo.

<sup>17</sup> To goddo wadanii on ko halli, to on battee mo. Darteeko wadugo ko woodi yeeso himbe fu. <sup>18</sup> To wadoto, gadee no baawudon fu, gonidon e himbe fu e jam. <sup>19</sup> Banniraabe am yidaabe, to on battanee ko'e moodon, amma accee mone Alla wada dum. Gam Joomiraawo wi'i der Dewtere: «Min nun wattaago wonani, mi yoban moy fu ko wadi.» <sup>20</sup> E winnaa kade: «To ganyo maa e raffaa, hokku mo o nyaama, to emo dondaa, hokku mo o yara. To a wadii dum, yulbe yite nun jowandaa mo don dow hoore makko.» <sup>21</sup> Taa accu hallande jaalee, amma jaalora ne ko woodi.

## 13

### Downtanaago mawbe genni (1 Piyer 2.13-17)

<sup>1</sup> Sey moy fu dowtanoo laamiibe. Laamiido walaa to hinnaa mo Alla subi, gam laamiibe fu, Alla nun laaminta dum. <sup>2</sup> Gam majjum, caliido ko dowtanii laamiido, salike ka Alla bati. Caliido ka Alla bati fu, foodanan hoore mum kiita. <sup>3</sup> Gadoowo ko woodi hulaataa mawbe genni, sey gadoowo ko halli. A yidaa aa huli laamiibe na? wadu ko woodi, den be manete. <sup>4</sup> Golle Alla nun laamiibe wadata gam nafuwe maa. Amma to a wadii ko halli, sey kulaa, gam baanji bane acci bee bakkii kaafahi. Be laati nun gollantoobe Alla gam be battoo, be kollita mone makko dow wadoobe ko halli. <sup>5</sup> To non non, edum haani dowtanodon laamiibe, hinnaa gam oon kula hiiteego tan, amma gam miilooji berde moodon cuudiidi e holla on dum.

<sup>6</sup> Gam majjum acci oon joba ceede faada. Alla be gollantoo, der golle den. <sup>7</sup> Kokkee moy fu ko haanani dum. Jobee ceede faada to haanube jobon de. Jobee ko tannyanadon to haanube jobon. Kulee kaanudo huleego. Teddinee kaanudo teddineego.

### Yidugo banniraawo

<sup>8</sup> To on joganee goddo nyamaane, to hinnaa nyamaane yidontirgo hakkune

mon. Gam jidudo banniraawo mum, hebbinii ko tawreeta yami. <sup>9</sup> Gam tawreeta wi'i: «Taa jeenu, taa waru neddo, taa wujju, taa suuna.» Tawreeta ka, e tawreetaaji koriidi fu, hawtii dow haala goota kaa do: «Yidu banniraawo maa hande no jidirdaa hoore maa.» <sup>10</sup> Yidde wadantaa banniraawo ko halli. To non yidde laati nun hebbinga tawreeta.

### *Hedaago wittoyki Yeesu*

<sup>11</sup> Gadee dum, gam oon anni der iri wakkati kiye nun gonuden. Wakkati kaanuki pinen diga e doynol nun. Gam jooni kisidam men e 6adii 6uri de goondinnoden. <sup>12</sup> Jemma jenjii, nokkuje faanake weetugo. Gam majjum, en accee waafugo golle niwre, en bornee kabirdum dum jaynjol. <sup>13</sup> En gonee hande no haani wonube der nyalooma wonira. En accee deereraaku e jarde, accen bo jeenu e suunooji baanji baanji, accen kabé e nawniraagu. <sup>14</sup> Bornee jikku Joomiraawo meeden Yeesu Almasiihu hande no bornortodon kolte. To on kiinnitanee 6annu gam deyyitingo suunooji maggol.

## 14

### *Gondal semmidinbe e be goondinki mum semmidaa*

<sup>1</sup> Jabee mo goondinki mum semmidaa, to on jeddontiree dow miilooji makko. <sup>2</sup> Hande jon, goddo, goondinki mum hokkan dum semme nyaamugo huune fu. Mo goondinki tampuki bo nyaamataa godsum, sey baafe tan. <sup>3</sup> Nyaamoowo huune fu, to yawoo mo nyaamataa. Mo nyaamataa huune fu bo, to hiitoo nyaamoowo ko yidi fu, gam Alla jabii mo. <sup>4</sup> An, moy laatidaa faa kiitodaa gollantoodo goddo? To oo darii, dum bo to o yanii, ka joomiraawo makko nun. O daroto bo, gam Joomiraawo e woodi baawde darnugo mo.

<sup>5</sup> Goddo e daari hande nyalaane nee do e 6uri nee to teddugo, oo to bo e daari no nyalaade fu fotan nun. Sey moy fu anna to darii der hakkillo

mum. <sup>6</sup> Burontiroowo nyalaade e wada dum gam Joomiraawo. Nyaamoowo ko yidi fu, e wada dum gam Joomiraawo, oo yetta Alla. Mo nyaamataa huune fu bo e wada dum gam Joomiraawo, oo yetta Alla kanko bo. <sup>7</sup> Gam walaa e meeden buurudo gam hoore mum, nun nun bo walaa maayoovo gam hoore mum. <sup>8</sup> To een buuri, Joomiraawo nun buuranden, to en maayii bo, Joomiraawo on nun maayanden. To een buuri dum bo to en maayii, Joomiraawo laataniden. <sup>9</sup> Gam Almasiihu maayii, o fintii bo gam o laatoo Joomiraawo wuuru6e e maayube fu.

<sup>10</sup> Amma an, gam ume kiitodaa banniraawo maa goondindo? An bo, ume jawantodaa banniraawo maa goondindo? En fu, en daroyto yeeso hiitorde Alla, <sup>11</sup> gam e winnii: Joomiraawo wi'i:

«Min, mii wuuri  
moy fu jiccoto yeeso am,  
delle fu teddinan am.»

<sup>12</sup> Den moy meeden fu toontanto hoore mum yeeso Alla.

### *Taa fergin banniraawo maa*

<sup>13</sup> Gam majjum, en accee gaccontirgo. Ko haani gadan woni accen resango banniraabe ko ferginta 6e, 6e jana. <sup>14</sup> Mii anni, mii tabbitini bo der kawtal men e Joomiraawo Yeesu, no nyaamdu walaa kar munjol e hoore mum. Amma to goddo e miili e woodi huune ko harmi, dow makko dum harmi. <sup>15</sup> To gam sabbu nyaamdu, a accii berne banniraawo maa biisake, a tokkay laawol yidde. Taa accu gam nyaamdu maa, neddo mo Almasiihu maayi gam mum halka. <sup>16</sup> Gam majjum, to on accee himbe bata kalluka dow ko laatanii on boodudum. <sup>17</sup> Gam Laamaare Alla laataaki gam nyaamde e jarde, amma ne laati nun foonaataare, e jam, e seyo dum Ruuhu Ceniido hokkata. <sup>18</sup> Golliranoowo Almasiihu hande non, fottanan Alla, himbe bo yettan mo.

<sup>19</sup> Gam majjum, en dartee ko wadata jam hakkune meeden, e ko

mawninta goondinki moy meeden fu. <sup>20</sup> Gam sabbu nyaamdu, taa biisu golle Alla. E goonja, nyaamdu fu e laabi. Amma nyaamaa nyaamdu, den dum doyya goddo, dum woodaa. <sup>21</sup> E dum woodi, to neddo yakku tew, to o yaru bo innabojam, o acca wadugo huune ko ferginta banniraawo makko. <sup>22</sup> Ko koolidaa dow haala ka fu, joga dum gam maa yeeso Alla. Barke laatanto mo gacataako hoore mum dow ko o subi o wada! <sup>23</sup> Amma gadudo seko dow ko nyaamata, hiitaama, gam joomum nyaamiray dum e goondinki. Nani bo, huune fu ko wadaaka e goondinki, laati nun hakke.

## 15

<sup>1</sup> Enen be goondinki mum semmidī, e haani balliten be goondinki mum semmidaa. Haanay daarten ko fotanta en tan. <sup>2</sup> Sey moy meeden fu darta ko fottanta banniraawo mum gam nafuwe makko e gam mawningo goondinki makko. <sup>3</sup> Gam Almasiihu dartay ko welata dum. Amma hande no winnaa: «Jennoje yennanbe maa yanii dow am.» <sup>4</sup> Ko artaa winnaa e dewte fu, winnaama gam janningo en. Kanjum hokkata en munyal, e berde deyyude, een kedorii ko warata. <sup>5</sup> Munyal e deyyitinki berne, diga Alla nun yiwata. Alla on hokka on laatodon miilo wooto hakkune mon. Dum laatoo deydey no Yeesu Almasiihu ekkitiniri on. <sup>6</sup> Den on teddinan Alla, Baaba Yeesu Almasiihu, Joomiraawo meeden e berde goote, e daane woore.

### *Lenyi janani nanii linjiila*

<sup>7</sup> Jaabontiree hakkune mon hande no Almasiihu jaabborii on, gam teddunjal Alla. <sup>8</sup> Mii bata on no Almasiihu laatike jaggiido caka Yahuduubē. O wadii dum gam o hebbina alkawal jal Alla wadanno maamiraabe men gam o tabbitina Alla laati nun goonjaajo. <sup>9</sup> Den be lenyi janani bo teddina Alla gam endam makko, hande no Dewtere wi'i:  
«Mi maantete caka be lenyi janani, mi yiman, mi teddina inne maa.»

<sup>10</sup> Dewtere wi'i kade:  
«Lenyi janani, belbeltee e himbe Joomiraawo.»

<sup>11</sup> Kade:  
«Onon be lenyi janani fu, Jettee Joomiraawo, Himbe fu yetta mo.»

<sup>12</sup> Annabi Esaaya bo wi'i:  
«Yiwudo e lenyol Yesa waraan, O ummoto gam o laamanoo himbe lenyi janani, Be jowan hoolaare maabbe dow makko.»

<sup>13</sup> Alla mo tammuwe hebbina berde moodon seyo e jam gam goondinki mon. Tammuwe moodon beydoo der berde moodon diga e baawde Ruuhu Ceniido!

### *Pol e batana golle mum*

<sup>14</sup> Banniraabe am, min e hoore am, mii hoolii, oon goodi ko woodi, oon keewi annal, on baawan ko hokkontiri saawari hakkune moodon.

<sup>15</sup> Amma der nokkuje godde der derewol am jal, mi winnanii on e cuusal gam siwtorgo on ko annudon. Mi wadii dum sabbu moyyere ne Alla wadanimm. <sup>16</sup> O wadii am gollantoodo Yeesu Almasiihu caka be lenyi janani. Mii golloo hande Limaamijio. Mii waajoo be lenyi janani linjiila gam be laatoo sadaka belanka Alla, ka Ruuhu Ceniido laabini. <sup>17</sup> Gam majjum, sabbu kawtal am e Yeesu Almasiihu, mi waawan ko jurorii golle am yeeso Alla. <sup>18</sup> Gam mi suusataa batango godsum, to hinaa ko Almasiihu wadi diga e am, gam waddugo be lenyi janani dowtanoo Alla. O wadii dum diga haala am, e gadu am, <sup>19</sup> non bo diga e baawde kaayefiji e haaynaareeji, e baawde Ruuhu Alla. Hande non baajoriimi linjiila Almasiihu diga Urusaliima e nokkuje piltitiide dum, faa yottii leydi Illiriya. <sup>20</sup> Mi tinnake gam to mi waajoo linjiila to inne Almasiihu meedi noddeego. Mi wadii dum, gam mi yidaa mahugo dow dadda goddo.

<sup>21</sup> Hande no Dewtere wi'i:  
«Be bataakano haala makko, yi'aan, be nanayno oo batanee, faamaan.»

### *Miilooji Pol*

<sup>22</sup> Golle am den nun hadimmi de duuddum warugo to moodon. <sup>23</sup> Amma jooni mi woodaa to gollo-toomi, golle am heennyii der leyde dee, kade bo diga duubi duuddi nun jidumi warugo to moodon. <sup>24</sup> Mii yidi yaalugo on to mii yaha Espaniya. Mi joododoto e moodon sedda, ballon am der jahaajal am 6aawo de ji'umi on go hakkillo am fukkii. <sup>25</sup> Amma jooni mi yahan Urusaliima walloygo himbe Alla wonbe ton. <sup>26</sup> Goondinbe Maseduwaan e be Akaya hawritit ceede, gam be balla goondinbe talaakaabe wonbe Urusaliima. <sup>27</sup> Be gadii dum e sago maabbe, e haani bo be gadana be dum. Gam to be lenyi janani hebii kujje ruuhunkeeje diga e Yahuduube, den e haani bo be balla be e jawdi maabbe. <sup>28</sup> To mi yottinii golle den, kokkumi ko hawritaa to haanube dum yottoo, den mi yahan Espaniya, mi yaalan bo to moodon. <sup>29</sup> Mii anni to mii wara to moodon, mi waridan e barke Almasiihu fu.

<sup>30</sup> Banniraabe, mii eela on gam sabbu Joomiraawo meeden Yeesu Almasiihu, e gam yidde ne Ruuhu hokkata: Balle am hawre, oon eelanammi Alla. <sup>31</sup> Du'ee gam mi dada e juude himbe Yahudiya be goondinay. Du'ee bo gam himbe Alla wonbe Urusaliima jaaba ballal jal jaaranmi. <sup>32</sup> Hande non, to Alla e yidi, mi yottoto to moodon e welwelo, den mi siwtoo sedda hakkune moodon. <sup>33</sup> Alla kokkoowo jam wonda e moodon, on fu. Aami!

## 16

### *Cannoje*

<sup>1</sup> Mii yowana on sakiike meeden Fiibi junjo, o laati nun gollotoodo der Eklesia Kenkereya. <sup>2</sup> Jabee mo e inne Joomiraawo hande no haani himbe Alla wada. Balle mo dow huune ko o haajaa e mon fu, gam kanko bo, o wallii duubbe, min e hoore am bo o wallii am.

<sup>3</sup> Mi sannii Pirisilla e Akilas, gollioobe e am golle Yeesu Almasiihu. <sup>4</sup> Be kokkii ko'e maabbe gam be kisina

yonki am. Min tan bane seedan-toobe dum, eklesiyaaji be lenyi janani fu e seedanoo be dum. <sup>5</sup> Cannanee am goondinbe hawritintoobe wuro maabbe. Mii sanna Epaynetus, gido am. Kanko arti goondini Almasiihu der leydi Asiya. <sup>6</sup> Mii sanna Mariyama, kokkudo hoore muudum sanne gam moodon. <sup>7</sup> Mii sanna Andoronikus e Yuniyas, himbe lenyol am. Min e maabbe nun maabpidanoo der kasu. Bee laatii lilaabe teddi-naabe, be arti am bo goondingo Almasiihu.

<sup>8</sup> Mii sanna bo Ampiliyatus jidaado am sabbu kawtal amen e Joomiraawo. <sup>9</sup> Mi sannii Urbanus, golli-doovo e meeden der golle Almasiihu, kanko e Estakis, gido am. <sup>10</sup> Mii sanna Apelles goondindo Almasiihu e goonaaku. Mi sannii bo himbe wuro Aristobil. <sup>11</sup> Mii sanna Herodiyon, mo lenyol am. Mii sanna bo himbe wuro Narsisi hawtube e Joomiraawo. <sup>12</sup> Mii sanna Tirifen e Tirifos, rewbe gollantoobe Joomiraawo puy. Mii sanna bo Persis, debbo jidaado, kokkudo hoore mum sanne gam golle Joomiraawo. <sup>13</sup> Mi sannii Rufus mo Joomiraawo subi, e inna mum, laatiido inna am min bo. <sup>14</sup> Mii sanna Asinkiriti e Felegon e Hermes e Patorobas e Herma e goondinbe Yeesu wondube e maabbe fu. <sup>15</sup> Mii sanna Filologus e Yuliya. Mii sanna bo Nere e sakiike mum, mii sanna Olimpas e himbe Alla wondube e maabbe fu.

<sup>16</sup> Moy moodon fu sanna banniraawo mum e mammilontirgo, e yidde. Kawtal Eklesiaaji Almasiihu fu e sanna on.

### *Haalaaji keennyitirdi*

<sup>17</sup> Banniraabe, nani do ko eelanmi on: kakkilanee waddoobe ceen-nirgu caka mon. Kambe bee darta selingo on diga ekkitinol ɻol kebusdon. Boddodee be! <sup>18</sup> Gam himbe ben, Almasiihu Joomiraawo meeden bane be gollantoo, amma deedi maabbe. E haalaaji beldi, eytooji be jarbortoo himbe be walaa hakkillo. <sup>19</sup> Amma onon, himbe fu e anni habaru

dowtaare moodon. Gam majjum mii seyorii on. Amma mii yidi laatodon hakkilbe dow wadugo ko woodi, laatodon bo laabube dow wadugo ko halli. <sup>20</sup> Alla kokkoowo jam muunyitan Seydan yeeso sedda ley koyde moodon. Moyyere Joomiraawo meeden Yeesu wonda e moodon!

<sup>21</sup> Timote gollidoowo am sannii on. Lusiyus e Yason e Sosipater himbe lenyol am bo e sanna on.

<sup>22</sup> Min Tertiyus binnudo derewol njol mi sannii on der kawtal meeden e Joomiraawo.

<sup>23</sup> Gayus, beero am, e beero goondinbe sannii on. Erastus cuudoowo ceede siire sannii on, e Kartus banniraawo meeden.

[ <sup>24</sup> Moyyere Joomiraawo men Yeesu Almasiihu wonoo e mon on fu. Aami!]

### *Yettoore*

<sup>25</sup> Yettoore laatanoo Alla! Oo woodi baawde semmidingo on der goondinki, hande no linjiila ka baa-jotoomi batiri. Linjiila kan laati nun habaru Yeesu Almasiihu, eka hollita laabi Alla cuudiidi diga dum fooyi.

<sup>26</sup> Amma jooni dum hollitake. Dewte annabiibe e seedoo ka. Alla tabitiido batii ka anninee himbe lenyi janani fu, gam be goondina, be dowtoo.

<sup>27</sup> Alla tan woodi faamu. Teddujal laatanoo mo diga e Yeesu Almasiihu, faa abada. Aami!

## **Derevol aranol nol Pol winnani 6e Korintu**

### *Haala Puddirkä*

Pol lilaado nun winnani 6e Korintu derewol mum aranol nol do hakkune duubi 54 e 55, 6aawo de o wadi duubi tati der wanjarde Efesu, Golle Lilaabe. 20.31. Wakkati mum Korintu laati nun wanjarde mawne der leydi Akaya. Derewol Golle lilaabe 18.1-18 e batana en no Pol yahiri Korintu e no o tiggiri eklesiya der siiren.

Be Korintu winnaniino Pol, yami yande dow teegal, e dow yakkugo tew caafiranaadum tooruuje. Pol winnani 6e derewol nol do gam o toontoo yande maabbe. Berne makko biisakeno e habaruaji di o nani dow ceenniigu naatuju caka 6e Korintu, e jeddi tawaadi hakkune maabbe, e kade tooraaji goddi gonudi caka maabbe. O nanii bo haala jeenu kalluju tawaajju caka maabbe, go bee jeedi, 6e baaway ko moyyini ka.

Ko jogii Pol dow 6e Korintu woni moyyingo goonki maabbe dow ko yaadataa e ko Alla yidi. Haalaaji di o batani der derewol makko e duudi, amma di fu huune gootum nun di cappii. Kan woni, haala joonne goondindo fottune.

### **Tokkontirki haalaaji**

1. Toonti Pol dow ka o nani 1-6  
Haala puddirkä 1.1-9  
Ceenniigu der eklesiya 1.10-4.21  
Toora dow joonne goondinbe 5.1-6.20
2. Toonti dow tooraaji feere feere 7-16  
Banjugo e joodaago banjay 7  
Woodugo hoore mum e kirtaari ceniini 8.1-11.1  
Jikku kaanuju goondindo e woodi der eklesiya 11.2-34  
Dokke Ruuhu, e no de gollirte 12-14  
Haala pintol 15  
Haalaaji cakitiidä e cannooje 16

### *Sannoore*

<sup>1</sup> Min Pol e banniraawo men Sosteni winnani on derewol nol. Min Pol noddaado gam laatoo lilaado Yeesu Almasiihu e muunyo Alla.

<sup>2</sup> Emen canna eklesiya Alla gonuka Korintu. Alla laabinii on gam on kawtii e Yeesu Almasiihu, onon noddaabe gam laatodon seniibe, noddoobe inne Joomiraawo meeden Yeesu Almasiihu to gonudon fu. Yeesu on laatii Joomiraawo maabbe, e Joomiraawo meeden. <sup>3</sup> Alla Baaba e Joomiraawo meeden Yeesu Almasiihu wadana on moyyere, hokka on jam!

### *Pol e yetta Alla gam 6e Korintu*

<sup>4</sup> Wakkati fu mii yetta Alla gam moodon sabbu moyyere makko ne o holliti on. O hollitii on ne gam on kawtii e Yeesu Almasiihu. <sup>5</sup> Der kawtal e makko, on kebii huune fu, ko buri du, der haala, e der annual fu, <sup>6</sup> edum hollita no on jabii seedaago amen haala Almasiihu no woodi. <sup>7</sup> Kanjum acci on dullay dokkal Alla baa gootal, oon kedorii Joomiraawo meeden Yeesu Almasiihu wittaa. <sup>8</sup> Kanko semmidinta on faa heennyitirde, gam laatodon 6e walaa gacce der nyalaane wittoygo makko. <sup>9</sup> Gam Alla laati nun koolaado, kanko noddudo on kawton e Biyiko Yeesu Almasiihu, Joomiraawo meeden.

### *Hawre caka goondinbe*

<sup>10</sup> Banniraabe, mii eela on e inne Joomiraawo meeden Yeesu Almasiihu, batee haala goota, to on ceen-niree, gadee hakkillo wooto e millo wooto. <sup>11</sup> Banniraabe am, minanii diga e getti wuro Kolowe, kabetaawaade caka moodon. <sup>12</sup> Ko jidum wi'ugo woni mi nanii moy moodon e wi'a min, mo Pol nun, goddo bo e wi'a: «Min, mo Apollos nun,» goddo feere kade e wi'a: «Min, mo Piyer nun,» faa hanne goddo e wi'a: «Min, mo Almasiihu nun.» <sup>13</sup> Almasiihu seennu nun na? Pol nun maayi gam mon dow leggal palaanjal na, naa e inne Pol nun gadiradon batisi?

<sup>14</sup> Mi yetti Alla gam mi waday baa gooto moodon batisti, to hinaa Kirispus e Gayus. <sup>15</sup> Non non, goddo moodon waawataa ko wi'i wadaama batisti e inne am. <sup>16</sup> Ee, goona, mi wadii getti wuro Estefanas batisti. Baka don, mi annaa naa mi wadii goddo kade batisti. <sup>17</sup> Almasiihu du lilay am gam mi wada batisti. Ko o lilanimmi woni, mi waajoo linjiila. To emi waajoo ka bo, mi wadirtaa dum e baawal haala, gam to maayde Almasiihu dow leggal palaanjalaatoo baanji.

### Baawde Alla e annal mum

<sup>18</sup> Haala maayde Yeesu dow leggal palaanjalaati nun haanjaare dow gite halkoobe, amma dow meeden enen hisinaabe, ka laati nun baawde Alla. <sup>19</sup> Edum winnaa der dewtere: «Mi halkan faamu faamuube, mi jirgitan annal annube» <sup>20</sup> Den, toy woodube faamu woni? Toy moodibbe tawreeta woni? Toy waawube jeddi der jamaanuuru nuu do woni? Alla bane wayliti annal himbe duuniyaaru nuu wadi ɻjal haanjaare na?

<sup>21</sup> Himbe duuniyaaru nuu e faamu mum fu, annitay Alla no o holliti faamu makko. Dum laatake nun nun gam Alla e yidi hisingo goondinbe dum fu diga e waaji amen di wobbe daari haanjaare. <sup>22</sup> Goona nun, Yahuduubee e yama haaynaareeji, Yunaninkeebe bo e darta annal. <sup>23</sup> Amma enen, habaru tiggol Almasiihu dow leggal palaanjalaatotoden. Yahuduubee e daari dum ko ferginta 6e, Yunaninkeebe bo e daari dum haanjaare. <sup>24</sup> Amma 6e Alla noddi, baa bee Yahuduubee, dum bo bee Yunaninkeebe, bee anni no Almasiihu laati nun baawde e annal Alla. <sup>25</sup> Gam haanjaare Alla e buri annal neddo, kade bo, tampere Alla e buri semme neddo.

<sup>26</sup> Onon banniraabe, daaree no Alla noddiri on onon e ko'e moodon, caka moodon, woodube annal dow gite himbe, dum bo semmenteebe, maa bo 6e lenyi laamiibe, duudaa.

<sup>27</sup> Amma Alla subii kaanjalaatoo duuniyaaru gam o sentina woodube annal, o subii tampube gam o sentina woodube semme. <sup>28</sup> O subii ko walaa teddujal e jawniidum, e ko wattiraaka der duuniyaaru nuu, gam o yawna ko teddi, <sup>29</sup> gam to goddo hebu juraago yeeso Alla. <sup>30</sup> Kanko hawti en e Yeesu Almasiihu, go Yeesu laatanii en annal Alla, der makko kebusden goonjaaku e laabineego e rindineego diga hakke. <sup>31</sup> To non «jurotoodo fu, juro gam kawtal mum e Joomiraawo», hande no winniraa.

## 2

### No Pol waajorii 6e Korintu

<sup>1</sup> Banniraabe, no garunoomi waajaago on haala Alla cuudiika, mi waajoraaki on e annal, dum bo e baawal batu. <sup>2</sup> Mi yidayno waajaago on godsum feere to hinaa Yeesu Almasiihu e no o tiggiraa dow leggal palaanjalaatoo. <sup>3</sup> Mi wonakeno to moodon e tampere, e kulol, mii diwna puy. <sup>4</sup> Haala am e waaji am daraaki dow baawal haala e annal himbe. Edum darii dow ko Ruuhu Ceniido hollinta e baawde, <sup>5</sup> gam to goondinki moodon daroo dow annal himbe, amma dow baawde Alla.

<sup>6</sup> E nun fu, emen baajoo annal luggunjal yeeso 6e goondinki mum semmidii. Amma annal himbe duuniyaaru nuu do bane men baajootoo, dum bo annal himbe halkoobe woodube baawde. <sup>7</sup> Annal Alla kaayniijal, cuudaniijal himbe men baajootoo, ɻjal o siriyani en diga duuniyaaru tagaaka, gam teddujal men. <sup>8</sup> Baa gooto der semmenteebe duuniyaaru nuu annaano ɻjal, gam to 6ee annunoo ɻjal, 6e tiggataano Joomiraawo mo teddujal dow palaanjalaatoo. <sup>9</sup> Amma hande no winnaa: «Ko itere meeday ko yi'i, noppo bo meeday ko nani, ko hakkillo goddo yahay dow mum abada,

kanjum Alla siriyani yidube dum.» <sup>10</sup> Amma enen, Alla holliti en dum diga e Ruuhu mum. Ruuhu on e widitoo huune fu, faa e luggudum

Alla. <sup>11</sup> Moy waawata ko anni neddo to hinaa yonki gonuki der joomum? Hande nun Alla bo, walaa annudo mo to hinaa Ruuhu gondo der makko. <sup>12</sup> Enen kan, ruuhu duuniyaaru bane kebusden, Ruuhu Alla nun, gam annen ko Alla wadani en e moyyere nun. <sup>13</sup> Men batirtaa dum bo e boliiide de himbe duuniyaaru janjinta, amma e boliiide de Ruuhu janninta. Hande non men paaminirta hebusbe Ruuhu, kuppe ruuhunkeeje.

<sup>14</sup> Mo hebay Ruuhu Alla waawataa ko jaibi kuppe Ruuhu, gam de laatani mo nun haanjaare. O waawataa ko anni de, gam e ballal Ruuhu tan de annitirtee. <sup>15</sup> Goodudo Ruuhu Alla e suttontira huune fu, amma kanko e hoore makko, walaa cuttontiroowo haala makko. <sup>16</sup> Edum winnaa der Dewtere:

«Moy anni miilooji Joomiraawo?  
Moy tintinta mo gokka?»  
Amma enen, Ruuhu Almasiihu na'on der meeden.

### 3

#### *Gollantoobe Alla*

<sup>1</sup> Banniraabe, mi waaway ko baddi on hande hebusbe Ruuhu Ceniido, doole mi badda on hande himbe duuniyaaru, e hande sukahon petton der goondinki Almasiihu. <sup>2</sup> Gam majjum baajiimi on hande yaroobe kosam, hinaa nyaamdu tekkunjol kokkumi on, gam on potanay nol taw. Faa jooni bo, on potanay nol, <sup>3</sup> gam jikku duuniyaaru nun jogii on taw. To nawniraagu e kabé e woni hakkune moodon, dum hollitintaa no jikku duuniyaaru nun jogii on na? Dum hollitintaa no galli moodon nun jaalii on na? <sup>4</sup> To oon ceenniri hakkune moodon faa moy moodon fu e wi'a: «Min mo Pol nun,» oya bo e wi'a: «Min mo Apollos nun,» dum hollataa no onon e be duuniyaaru fu on gootum nun na?

<sup>5</sup> Moy nun Apollos laatii? Moy nun Pol laatii? Men laati nun gollantoobe Alla, be diga e muudum goondindon, jaka no Joomiraawo hokkiri moy

mabbe fu. <sup>6</sup> Min, mi aawi, go Apollos misi diyam, amma Alla mawnini. <sup>7</sup> Hande non, aawudo e misudo diyam fu laataaki godsum, Alla mawnindo tan laatii godsum. <sup>8</sup> Aawudo e misudo diyam fu laati nun gootum, moy mabbé fu heban riiba jaka golle mum. <sup>9</sup> Gam minon men gollidoobe e Alla, onon laatii deme makko, e suudu makko maheteenjol.

<sup>10</sup> Dow moyyere ne Alla wadanimm, daddumi dadda suudu, hande mahoovo annanaado. Jooni goddo feere e maha dow makka. Amma sey moy fu wada hakkillo dow no mahirta. <sup>11</sup> Gam goddo waawataa ko daddi dadda gokka to hinaa arana, kanka woni Yeesu Almasiihu. <sup>12</sup> Wobbe e maha dow dadda kan e kannjeeri, wobbe e cardi, wobbe bo e kaaye dime, wobbe bo e mahira ledde e fudo e yomme. <sup>13</sup> Nyalaane darjal, Almasiihu sumpitan golle moy fu, gam moy fu yiite foonnang golle mum, gam yiite hollan no golle moy fu wa'i. <sup>14</sup> Mo golle mum jabay yiite dow dadda, joomum heban riiba golle mum. <sup>15</sup> Amma mo golle mum yiite nyaami, dullan riiba mum, kanko o hisan, amma o nandan hande cuttaado e yiite.

<sup>16</sup> Faa jooni on annitay onon nun laatii suudu Alla na? On annaa Ruuhu Alla na'on der moodon na? <sup>17</sup> To goddo halkii suudu Alla, Alla halkan joomum. Gam suudu Alla laati nun seniinu, onon nun bo laatii suudu makko.

<sup>18</sup> To goddo jammoo hoore mum. Miiludo e moodon e woodi faamu der jaamanuuru nuu do, sey o laatto taw kaaajaado, gam o heba faamu goonjawu. <sup>19</sup> Gam annal duuniyaaru nuu laati nun haanjaare yeeso Alla. E winnii der dewtere: «Alla nanniran annube e dabareeji mabbé.» <sup>20</sup> E winnii kade: «Joomiraawo e anni miilooji annube, di laati nun baanji.» <sup>21</sup> Gam majjum, to goddo juroro himbe, gam huune fu onon woodi. <sup>22</sup> Pol e Apollos e Piyer, ko woni der duuniyaaru, yonki e maayde, hanne e jaajo fu,

onon woodi. <sup>23</sup> Onon, Almasiihu jey on, Almasiihu bo, Alla woodi dūm.

## 4

### *Lilaabe Almasiihu*

<sup>1</sup> Min Pol e Appolos, daaree men hande gollantooōe Almasiihu, yowanaabe haala Alla cuudiika. <sup>2</sup> Ko yidaa yi'ee dow yowaanaabe golle woni 6e gada golle de 6e jowanaa e hoolaare. <sup>3</sup> Mi faalaaka baa to on kiitake am, dūm bo to wobbe hiitake am. Min e hoore am bo, mi hiiataako hoore am. <sup>4</sup> Baa to berne am gaccaaki am, dūm yiday wi'ugo mii poonnitiido. Joomiraawo woni kiitotoodo am. <sup>5</sup> Gam majjum, to on kiitee goddo ko wakkati yottoo, kedee faa Joomiraawo wara. Kanko wurtinta ko suudii der niwre, o hollita ko woni der berde himbe. Nyalaane majjum, moy fu heban yettoore kaananne mo to Alla.

<sup>6</sup> Banniraabe, haalaaji di batumi dow am e Apollos fu, gam moodon batumi di. Men jidu nun tokkitodon koyde amen, golliron haala bi'uka to neddo yartoo ko winnaa. To on mawnitoree janjinoowo oo do, jawodon oo to. <sup>7</sup> Den moy burnu maa dow wobbe? Ume goodudaa ko a hokka dūm bane? To laatake a hokka dum nun, ume wadi go aa mawnitoroo dūm hande a hokka dum bane?

<sup>8</sup> On kaarii ko, on kebii ko jawdi, on puddii laamaago, men laamodaaki e mon! Kay, emen jidi laamodon, gam men laamodoo e moodon minon bo! <sup>9</sup> Gam edum nandi hande minon lilaabe, Alla laatinii men saktiibe. O nandinii men hande hiitaabe waree, ko duuniyaaru e malaykaabe e himbe e daara men. <sup>10</sup> Minon men kaaajaama gam Almasiihu, amma onon oon goodi annal gam kawtal mon e Almasiihu. Minon men galaa semme, amma onon oon cemmidī. On tedinababe, amma minon men jawaabe. <sup>11</sup> Faa e jooni, minon men dafaabe e dondaabe, funtu men goni, emen piyee, emen jiloo toy fu. <sup>12</sup> Emen goloo e ko'e amen hande maayoobe gam

nyaannugo ko'e amen. To men jennaama, men barkidina, emen tooree emen munyi, <sup>13</sup> to men batanaama kalluka, men toonto geeta. Men laatake buuri duuniyaaru, e tuuni ni himbe fu woppata.

<sup>14</sup> Mi winnanay on gam mi sentina on, amma gam mi waggina on, hande sukaabe am yidaabe. <sup>15</sup> E nun fu, baa to oon goodi ekkitinoobe ujune sappo der goondinki mon Almasiihu, on goodaa baabiraabe duubbe kan. Gam der kawtal moodon e Almasiihu, min on laatii baaba moodon diga e waaji linjiila. <sup>16</sup> Gam majjum mii eela on, yemminee am. <sup>17</sup> Kan wadi lilumi Timote biyam jidaado to moodon, koolaado der kawtal mum e Joomiraawo. O siwtoran on no tokkirmi Almasiihu, e ko baajotoomi nokku fu der eklesiyaaji.

<sup>18</sup> E woodi mawnitiibe caka moodon, bee miji mi warataa kade to moodon. <sup>19</sup> Amma booyataa ko mi wara to moodon, to Joomiraawo e yidi. To mi warii, mi yidaa nanugo haala mawnitiibe ben tan, amma baawde maabbe. <sup>20</sup> Gam Laamaare Alla, hollitintaako e haala tan, amma e baawde. <sup>21</sup> Ume surudon yidugo? Mi warida to moodon e sawru na? Naa e yidde e diggere?

## 5

### *Ko sentinii caka goondinbe Korintu*

<sup>1</sup> Men nanii huune centinii dūm wadii caka moodon. Iri majjum meeday ko wadii baa caka heeferbe. Men nanii gooto moodon e yidi debbo baaba mum! <sup>2</sup> Go oon juroro dūm! Ko haanuno berde moodon biisoo, burtinon gadudo iri baadi bonni nii caka moodon.

<sup>3</sup> Min, mii woddodii on e bannu, amma miilooji am e wondi e mon. Mi hiitake gadudo baadi ni hande mi na'on to moodon. <sup>4</sup> De kawritidon fu, hakkillo am e wondi e moodon, gadee dūm do e baawde Joomiraawo meeden Yeesu: <sup>5</sup> gattee neddo on der juude Seydan, gam suunooji bannu makko halka, amma yonki makko hisa der nyalaane garki Joomiraawo.

<sup>6</sup> E goonja, on goodaa laawol juraago! On annaa no yuufinirdsum sedda yuufinan conni peen laawaani fu na? <sup>7</sup> Laabinee ko'e moodon, ikkinee yuufinirdsum kiiddsum hakkune moodon, heba laatodon conni laawaani keyri, on galaa yuufinirdsum. Oon laabi ko, gam Almasiihu jawgiiri Paska meeden hiisaama. <sup>8</sup> Gam majaam, en nyaamee juulde Paska hinaa e yuufinirdsum kiiddsum dum hallande e ganyaani. Amma nyaamen de e conni peen ni walaa yuufinirdsum, laatiini alaama laabal e goonja.

<sup>9</sup> Mi winnaniino on der derewol am bi'umi, to on kawtee e wadoobe jeenu. <sup>10</sup> Himbe duuniyaaru jeenoobe bane batananmi, to dum bo suunaabe, maa bo wuybe, to dum bo saafoobe tooruuje, gam to kambe nun batananmi, doole sey burtodon duuniyaaru. <sup>11</sup> Ko binnumi woni, to on kawtee e goddo noddeteedo goondindo, go emo laatii jeenoowo, to dum cuunaado, maa bo caafoowo tooruuje, maa bo nyoo'owo himbe, dum bo jaroowo bagi, to dum bo gujjo, baa nyaamde to on kawtee e iri makko.

<sup>12</sup> Ume faalii am e hiitaago himbe be goondinay? Onon yowanaa hiitaago wonbe caka moodon. <sup>13</sup> Himbe be goondinay, Alla nun hiitotoo dum. Gam e winnaa: «Burtinee neddo kalludo caka moodon.»

## 6

### Gaccontirgo hakkune goondinbe

<sup>1</sup> To goddo mon e woodi haala gom e banniraawo mum, o suusan o yaara ka to hiitotoobe be duuniyaaru, be goondinay, o acca himbe Alla na?

<sup>2</sup> E goonja on annaa no seniibe nun hiitoytoo himbe duuniyaaru na? Den, to onon nun hiitoyto himbe duuniyaaru, noy tampirdon ko hiiti haalaaji petti? <sup>3</sup> On annaa enen nun hiitoyto malaykaabe na? Gam ume tampeten ko hiiti haalaaji goonki ki jooni? <sup>4</sup> Den, to haala gom wadii caka moodon, himbe be eklesiya daaray godsum cuboton be kiitoo ka! <sup>5</sup> Mii

bata ka gam centon! E goonja on goodaa mo hakkillo baa gooto caka moodon, baawoovo ko hiiti haala caka banniraabe na? <sup>6</sup> Goondindo e yaara goondindo bannu kiita to be goondinay!

<sup>7</sup> Maa to oon gaccontira, edsum hollita no on tampii. Ume wadi on jabataa gadanedon ko woodaa? Ume wadi on munyantaa nyaameego amaana? <sup>8</sup> Amma onon, oon parkana wobbe, oon nyaama be amaana, banniraabe moodon bo gadanton dum.

<sup>9</sup> On annaa be fonnitaaki naatataa der Laamaare Alla na? To on jammee ko'e moodon: Sobi, e saafoobe tooruuje e jeenoobe e luudiibe, <sup>10</sup> e wuybe e suunaabe e yaroobe bagi, e nyoo'obe, e pasotoobe, be fu be naatataa Laamaare Alla. <sup>11</sup> Wobbe moodon laatakeno hande non, amma jooni on lootaama, cenadon, on laatinama foontiibe e baawde inne Joomiraawo meeden Yeesu Almasiihu, e Ruuhu Alla meeden.

### Teddiniree Alla galli moodon

<sup>12</sup> Oon bi'a, oon goodi laawol wadugo huune fu. Goonja nun, amma huune fu bane nafata on. Mii woodi laawol wadugo huune fu, amma mi nootataako mi laatoo jeyaado majaam. <sup>13</sup> Oon bi'a, nyaamdu wadaaka maa gam reedu, reedu bo gam nyaamdu. Gooja nun, amma Alla halkan dum dum fu didum. Bannu bii aadama tagaaka gam wadugo jeenu, nol laatani nun Joomiraawo, Joomiraawo bo gam maggol. <sup>14</sup> Hande nun, Alla pintindo Joomiraawo meeden e maayde, fintinan en enen bo e baawde mum.

<sup>15</sup> E goonja, on annaa galli moodon laati nun jokkulal gootal der bannu Almasiihu na? Den, e haani mi etta jokkulal Almasiihu mi latina jokkulal jeenoowo na? Wadataako! <sup>16</sup> E goonja on annaa kawtudo e debbo jeenoowo fu, laatake bannu gootol e makko na? E winnaa: «Be fu dido, be laatoto bannu gootol.» <sup>17</sup> Amma kawtudo e Joomiraawo laatoto ruuhu gootu e makko.

<sup>18</sup> Boddodee haala jeenu fu. Hakke de neddo wadata fu, meemataa bannum, amma gadudo jeenu, wadif hakke der bannu mum. <sup>19</sup> On annaa galli moodon laati nun suudu Ruuhu Ceniido gondo der moodon, mo Alla hokki on na? On jeyaa ko'e moodon, <sup>20</sup> gam Alla soodirii on e huune teddudum. Gam majjum, tedinnee mo e galli moodon.

## 7

*Toonti yande dow teegal*

<sup>1</sup> Jooni kan mii yidi toontaago on yande de binnandon am. E goona, e dum woodi to gorko meemay debbo. <sup>2</sup> Amma, gam to on gonee der jeenu, e haani gorko fu e woodi debbo mum, debbo moy fu bo, e woodi gorko mum. <sup>3</sup> Gorko huntana debbo haaje mum, debbo bo hande nun. <sup>4</sup> Debbo jeyaa bannu mum, gorum jey nol. Gorko bo hande non, jeyaa bannu mum, debbo mum jey nol. <sup>5</sup> To on calontiree dow kawtal galli moodon, sey to on nannantiri dow majjum der wakkati sedda gam du'aago. Baawo majjum, kawtee kade gam to Seydan jarboo on dow tampere jogaago ko'e mon.

<sup>6</sup> Ka batumi on do, doole bane, saawari nun. <sup>7</sup> Mii yidi himbe fu laatoo hande am, amma moy fu bane Alla hokki dum. Moy fu e dokkal muudum non, oo do hande nii, oya bo hande nun.

<sup>8</sup> Mii yidi wi'ugo be bañay e be bañaka, e gowniibe, edum woodi be joodoo hande am. <sup>9</sup> Amma to be baawataa ko jogii ko'e mabbe, be bañontira. Bañontirgo e buri wonaago der suunooji.

<sup>10</sup> Bañontirbe, mii hokka be dooka, to am bane ka yiwi, amma to Joomiraawo: debbo haanay saloo gorum.

<sup>11</sup> To o salake bo, sey o joodoo nun nun, maa bo o naara e goriiko. Nun-nun gorko bo, haanay seera debbo mum.

<sup>12</sup> Amma dow horiibe, min nun batata kaa do, Joomiraawo bane. To goondindo e woodi debbo mo

goondinay, go debbo on nootii wondugo e makko, to o seeru mo. <sup>13</sup> Non non nun bo, to debbo goondindo e woodi gorko mo goondinay, to gorko on nootake wondugo e makko, to o saloo mo. <sup>14</sup> Gam gorko mo goondinay senaama gam debbo mum, nun bo debbo mo goondinay senaama gam gorko mum. To hinaa nun, bibbe mabbe laatataako seniibe, nani bo bee ceniibe. <sup>15</sup> Amma mo goondinay, to e yidi seerugo goondindo, o seera. Den fu goondindo, debbo, to dum bo gorko, doolaaka joodoo der teegal mum, Alla noddu en nun gam gonoden der jam. <sup>16</sup> Debbo, aa anni naa a hisinan gorko maa na, nun bo gorko, aa anni naa a hisinan debbo maa na?

*Moy fu wonoo hande no Joomiraawo noddri dum*

<sup>17</sup> To non, moy fu wonoo hande no Joomiraawo hokkiri dum, moy fu wonoo der goonki ki wonuno go Alla noddri dum. Kanjum umuranmi der eklesiyaaji fu. <sup>18</sup> Juulniido go Alla noddri dum, wonoroo nun nun, mo juulnaakino bo go Alla noddri dum, wonoroo nun nun. <sup>19</sup> Juulnaago e dullere juulnaago fu, laataaki godsum, sey tokkugo umurooje Alla. <sup>20</sup> Moy fu wonoro hande no laatinoo go Alla noddri dum. <sup>21</sup> To jeyaado nun laatinodaa go Alla noddri maa, taa accu dum billee. Amma to a hepii laawol no dimdiraa, taa yeeba dum. <sup>22</sup> Gam jeyaado mo Joomiraawo noddri, laatake dimo gam Joomiraawo. Dimo mo Alla noddri bo, laatake jeyaado Almasiihu. <sup>23</sup> On coodiraama e huune ko teddi. Gam majjum, to on laatinee ko'e mon jeyaabe himbe. <sup>24</sup> Banniraabe, moy fu wonoro yeeso Alla, hande no laatinoo go o noddee.

*Bañugo dum bo joodaago nun nun*

<sup>25</sup> Dow himbe be meeday bañugo, dum bo bañeego, mi woodaa umuroore gom yiwne to Joomiraawo, amma mi batan ko miilumi, min mo Joomiraawo yurmii, wadimmi

koolaado. <sup>26</sup> Mii miila to neddo wonake non, dum buran woodugo, sabbu tooraaji di jooni. <sup>27</sup> Banjudo, to seeru, mo bañay bo to daartu bañugo. <sup>28</sup> Amma banjudo waday gacce, gatol bo to bañaama, waday gacce. Amma annee no bañube e woodi billaaje der goonki mum. Kanji bo woni mi yidanaa on. <sup>29</sup> Banniraabe, ko jidum batugo on nani: Wakkati juutaa, gam majjum, bañube laatoo hande 6e bañay, <sup>30</sup> wulloobe laatoo hande 6e bullataa, seyotoobe wada hande 6e ceyataako, soodoobe bo wada hande 6e goodaa godsum, <sup>31</sup> seyortoobe jawdi duuniyaaru, wonoo hande 6e ceyataako, gam duuniyaaru nuu do faanake heennyugo.

<sup>32</sup> Ko jidumi woni, burtodon e sugullaaji. Mo bañay e hiinnitano golle Joomiraawo, ko fottanta Joomiraawo tan o dartata. <sup>33</sup> Amma banjudo, hakkillo mum, to kujje duuniyaaru wonoto, ko welata debbo makko o dartata, <sup>34</sup> hakkillo joomum seen-nake. Hande non bo, mo bañaaka, hakkillo mum to kujje Joomiraawo wonoto, gam bannu e yonki makko fu laatoo ko senaa. Amma banjudo, hakkillo mum to kujje duuniyaaru wonoto, ko welata goriiko o dartata.

<sup>35</sup> Mi batay ka, gam mi fergina on, amma gam wallugo on batanmi ka. Mii yidi gonodon der goonki kaanuki, tokkodon bo Joomiraawo e berde goote.

<sup>36</sup> To goddo e woodi dabbere mum, go o yidaa sentingo mo diga o bañay mo, o wada ko o yidi. O baña mo, o farkay to o bañii mo. <sup>37</sup> Amma to gorko wadi niiya der berne mum, hinaa e doole, laatoo bo o waawan ko jogii hoore makko, o bañay, o wadii ko woodi. <sup>38</sup> Banjudo dabbere mum wadii ko woodi, amma mo bañay mo, wadii ko buri woodugo.

<sup>39</sup> Debbo bañaado laati nun kañbaado to goriiko e wuuri. Amma to goriiko wuuraa, o rindii, o waawan ko etti mo o yidi fu, amma tawee der laawol Joomiraawo nun. <sup>40</sup> Dow miilo am, to debbo joodake bañaaka, o

buran hebugo seyo. Miilooji am nun batanmi don, mii miila bo mii woodi Ruuhu Alla.

## 8

### *Toonti yande dow tew caafiranaadum tooruuje*

<sup>1</sup> Jooni faa mi toontoo yande moodon dow tew caafiranaadum tooruuje. Goona nun, en fu, een goodi annal. Annal e wadda manju hoore, amma yidde woni ko yaarata eklesiya yeeso. <sup>2</sup> Neddo miijudo e anni, joomum annaa taw no haani anniree. <sup>3</sup> Amma neddo fu jisudo Alla, Alla e anni dum.

<sup>4</sup> Dow yakkugo tew caafiranaadum tooruuje, een anni tooruure laataaki godsum der duuniyaaru, Alla gooto tan woni. <sup>5</sup> Himbe e saafa tooruuje de dow e de ley. E goona, saafeteebe suubbe e wi'etebee joomiraabe suubbe na'on. <sup>6</sup> Amma e nun fu, enen kan, Alla gooto tan woni, Baaba tagudo huune fu, mo gam mum buuruden. Kade bo Joomiraawo gooto tan woni, Yeesu Almasiihu mo huune fu laatorii e mum, e mo gam mum kebusden yonki.

<sup>7</sup> Amma himbe fu bane anni goona kaa don. Woobbe woowunoobe tooruuje, e yakka tew caafiranaadum tooruuje, go miilooji berde maabbe tampudi e hiitoo 6e. <sup>8</sup> Nyaamdu beydantaa en godsum to Alla. To en nyaamii, dum nafataa en godsum, to en nyaamay bo, dum guytataa en godsum.

<sup>9</sup> Amma kakkilee to dimaaku moodon doyya 6e goondinki mum semmidaa. <sup>10</sup> An goodudo annal, to goddo yi'ii maa aa nyaama to tooruure saafetee, hakkillo makko tampus hokkan mo o nyaama kanko bo. Den fu, der cuudiidum berne makko, nafa caafiranaaka tooruure bane o nyaami na? <sup>11</sup> Den banniraawo tampudo halkan gam annal maa, kanko mo Almasiihu maayi gam muudsum halka gam annal maa. <sup>12</sup> To oon gada hakke dow banniraabe moodon 6e goondinki mum semmiday hande nun, oon

nawna miilooji berde mabbe, hakke nun gadoton don dow Almasiihu.  
**13** Gam majjum to nyaamdu nun doyyata banniraawo am, mi yakkataa kade tew abada, gam to mi doyyu mo.

## 9

### *Ko haanani lilaado*

**1** Mi jeyaa hoore am na? Mi laataaki lilaado na? Mi yi'ay Joomiraawo meeden Yeesu na? Diga golle de gollaniimi Joomiraawo bane goondinirdon na? **2** Baa to wobbe daaray am hande lilaado, to moodon kan, mi lilaado nun, gam onon laati ko hollitinta no Joomiraawo nun lilimmi.

**3** Daa ko bi'anmi yidubé gaccaago am: **4** Men kaanaa nyaamugo e yarugo der golle amen na?

**5** Men kaanaa woositaago e rewbe goondinbe hande no lilaabe wobbe, e miiraabe Joomiraawo, e Kefas wadata na? **6** Min e Barnabbas tan nun haani golloo gam nyaannugo ko'e amen na? **7** Soogeeru nuye habata konu e nyaanna hoore mum bo? Demoowo moy woni mo nyaamataa bibbe gesa mum? Moy woni duroowo mo yarataa kosam darne mum?

**8** Ka batanmi do, dow miilooji himbe bane dum yiwi, tawreeta bo batii dum. **9** E winnaa der tawreeta: «Taa habbu hunnuko gaari gollotooni der nafa.» Ga'i demooji nun Alla batani ka na? **10** E goonja enen bane batanaa ka na? Enen nun batanaa haala ka, gam demoowo e duggoowo fu wada golle muudum e miiliri hebugo gedu mum. **11** Men aawii der moodon kujje ruuhunkeeje. To men duggii jawdi ni gooduson, ko mawni nun na? **12** To wobbe e woodi laawol dow moodon, minon, men buraa be woodugo ηol na?

Amma minon, men naftoraaki baawde amen. Men munyanii huune fu gam to men paddoo linjiila Almasiihu yahugo yeeso. **13** E goonja, on annaa gollotoobe der suudu Alla e heba nyaamdu mum der ko sakketee na? On annaa bo no gollotoobe der

wuudfirde sadakaaji, der don nun hebata gedu mum na? **14** Hande non bo, Joomiraawo batii waajotoobe linjiila, heba nyaamdu mum diga waaji linjiila.

**15** Amma min, mi naftoraaki kujje dee fu, to mi winnii ka bo, gam mi heba de bane. Gomma mi maaya, mi nootataako goddo hadanmi juraago dow majjum. **16** Gam waajaago linjiila latanaaki am juro, doole nun mi waajoo ka. Bone woodanimmi to mi waajaaki ka! **17** To e anniya berne am nun gadiranmi golle den, mi heban riiba am. Amma min bane subi, mi yowana de nun. **18** Den fu, ume woni riiba am? Riiba am woni waajaago linjiila hinaa gam joddi. Mi dartay naftoraago ko haani mi heba gam gollal ηal.

**19** Mii dimo dow himbe fu, amma mi laatinii hoore am jaggantoodo himbe fu, gam mi hevana Almasiihu duubbe mabbe. **20** To mi na'on caka Yahuduube, mi wada hoore am hande Yahudujo, gam mi heba be. To mi yahii to tokkube tawreeta, mii wada hoore am hande tokkudo tawreeta, gam mi heba be, baa to mi tokkay tawreeta. **21** Hande nun bo to mi yahii to be annaa tawreeta, mii wada hoore am hande mo annaa tawreeta, gam mi heba be, dum yiday wi'ugo mi tokkay tawreeta Alla, gam der umuroore Almasiihu gumi. **22** To mi yahii to goondinbe tampube, mii wada hoore am hande tampudo, gam mi heba be. Walaa fu no mi laatinay hoore am dow himbe fu gam mi hisinira wobbe mabbe, baa no wadi fu. **23** Dum fu, mi wadii dum gam linjiila, gam mi heba gedu am der barke makka.

**24** E goonja, on annaa himbe fu nun doggata der jayri, to wadoobe dadontiro doggata na? Amma e non fu, gooto mabbe tan nun hebata ko resaa on. Gam majjum, doggee gam kebal. **25** Jiddo dadugo der doggudu fu, sey elta bannu mum der huune fu. Kambe, bee gada dum gam hebugo kebal meetalol

dayloowol, amma enen, een tammi hebugo meetalol ηol daylataa. <sup>26</sup> Gam majjum to emi dogga, gam baanji bane dogganmi, to emi lukka bo, dow hennu bane lukkanmi. <sup>27</sup> Amma mii gollina bannu am e naawdum faa mi jaaloo ηol, gam mii hula mi dulla hebugo yetteego baawo baajiimi wobbe linjiila.

## 10

### *To on caafee tooruuje*

<sup>1</sup> Banniraabe, mii yidī paamon dum do: baawo no kaakiraabe meeden wurtii Misira, der wakkati Muusa, 6e fu 6e gonake ley duulere ardanii ne 6e, 6e fu bo, 6e jolii maayo. <sup>2</sup> Be fu 6e gadanaama batisi der duulere e der maayo sabbu kawtal maabbe e Muusa. <sup>3</sup> Kade bo, 6e fu 6e nyaamii nyaamdu ruuhunke-wol gootol, <sup>4</sup> 6e fu 6e jarii jaram ruuhunkejam gootam, burtiidiā e teapaare ruuhunkeere, jaadannoore e maabbe. Tepaare nen woni Almasihu. <sup>5</sup> Amma e non fu, duubbe maabbe, Alla yerdaaki dum. Be baraama der ladde.

<sup>6</sup> Huune dum fu, laatanake en misaalu gam to en tokkee jidaadi yonki meeden, hande no maabbe. <sup>7</sup> To on laatee saafoobe tooruuje hande no wobbe maabbe wadi, hande no winnaa: «Himbe joodii nyaami yari, den 6e ummii gam 6e pija fijo jaayño.» <sup>8</sup> To on naatee jeenu hande no wobbe maabbe wadi. Faa himbe ujune laso e tato maayi nyalaane woore. <sup>9</sup> To on jarbee Joomiraawo hande no wobbe maabbe wadi, ko bolle halki 6e. <sup>10</sup> To on dumbitee hande no wobbe maabbe wadi, go malaykaajo maayde halki 6e.

<sup>11</sup> Huune dum fu, tawii 6e gam keben misaalu. Dum winnaama bo gam keben hakkillo, enen wonube der wakkatiji cakitiidi. <sup>12</sup> Gam majjum, miiludo e darii fu, wada hakkillo to yanu. <sup>13</sup> Jarbeeji walaa di kebuson, di wobbe hebayno. Alla e laatii koolaado, o accataa jarbedon gura semme mon. To di garii bo, o

hokkan on laawol no munyirton, e no burtortodon e majji.

<sup>14</sup> Gam majjum, banniraabe am yidaabe, boddodee caafol tooruuje. <sup>15</sup> Mii badda on hande woodube hakkillo, onon e ko'e moodon biditee ko batumi. <sup>16</sup> Jarigel hiraane seniine ηel jetteten Alla gam mum, ηel hollitintaa en kawtii e yiyam Almasihu na? Peen ceenneten een nyaama, ηa hollitintaa en kawtii e bannu Almasihu na? <sup>17</sup> Peen ηan laati nun goota, nun nun enen bo, no duudirden fu, en laati nun bannu gooton, gam en fu, een keba gedu meeden e peen goota ηan.

<sup>18</sup> Daaree Isira'iilaabe: himbe maabbe nyaamoobē sadakaaji cakkanaadi Alla, 6e goodaa kawtal e Alla cakkanteedo sadakaaji din na?

<sup>19</sup> Ko jidum wi'ugo woni: Tooruure e tew ko ne saafiranaa e laatii godsum? Aawo! <sup>20</sup> Amma, ko heeferbe saafirta, ginnaaji 6e caafanta dum, Alla bane. Nani bo mi yidaa oon goodi kawtal e ginnaaji. <sup>21</sup> On baawataa ko yariri jarigel Joomiraawo, jariron bo ηel ginnaaji, on baawataa ko nyaamidi e Joomiraawo, nyaamidon e ginnaaji bo. <sup>22</sup> Naa en jidu nun ummingo nawniraagu Joomiraawo? Een 6uri mo semme na?

### *Teddinee Alla der huune fu*

<sup>23</sup> Goonja nun: «Huune fu e dagii». Amma huune fu bane nafata. «Huune fu e dagii,» amma huune fu bane yaarata eklesiya yeeso. <sup>24</sup> To goddo moodon daartu ko nafata dum kan tan, amma ko nafata wobbe bo.

<sup>25</sup> Ko sippetee der luumo fu, on baawan ko nyaami dum, to on daartee annugo to dum yiwi, gam 6erde mon e gacoo on. <sup>26</sup> Gam: «Leydi e ko woni e mayri fu, Joomiraawo jey.»

<sup>27</sup> To mo goondinay noddinii on nyaamde, go nootidon noddoore makko, nyaamee ko o resani on fu e jam, to on biditee dum gam 6erde moodon e gacoo on. <sup>28</sup> Amma to goddo wi'ii on: «Tew dum do caafiranaadum tooruure nun,» den kan, to on nyaamee gam sabbu ceedindo

on, e gam sabbu cuudiidum berne. <sup>29</sup> Mi batantaa do miilooji berde mon, amma di oya. E goorja, gam ume miilooji berne goddo hiiitotoo dimaaku am? <sup>30</sup> To mi yetti Alla dow nyaamdu am, gam ume gacceteemi dow nyaamdu nu jettumi Alla gam mum?

<sup>31</sup> Gam majjum, on nyaaman nun, on jarun nun, ko gadoton fu de, gadee dum gam teddinon Alla. <sup>32</sup> To on laatanee Yahuduube e Yunaninkeebe e eklesiya Alla fergere. <sup>33</sup> Laatee hande am, gam dow huune fu, mii darta fottango himbe fu, mi dartataa ko nafatammi min tan, ko nafata himbe fu dartanmi, gam be kisa.

## 11

<sup>1</sup> Yemminee am hande no min e hoore am yemminiranmi Almasiihu.

### Ekkitinol dow filaago

<sup>2</sup> Mii yetta on gam oon ciwtorammi wakkati fu, e kade bo gam oon joggi ekkitinooje hande no ekkitinirmi on.

<sup>3</sup> Mii yidi bo paamon no Almasiihu nun woni hooreejo dow gorko fu, gorko bo woni hooreejo dow debbo, Alla bo woni hooreejo Almasiihu.

<sup>4</sup> To gorko e du'oo, dum bo e wada annabaaku, go e suddii hoore mum, o teddinay hooreejo makko. <sup>5</sup> Amma to debbo kan e du'oo, dum bo e wada annabaaku, go fiilaaki, o teddinay hooreejo makko, oo nandi e pemmiido laabune. <sup>6</sup> Gam to debbo fiilaaki, sey o hesa gaasa makko. Amma to hesugo gaasa, dum bo femmugo ka e sentinoo mo, den fu, o filoo. <sup>7</sup> Gorko haanay sudda hoore mum gam o laati nun nandi Alla e teddujal mum. Amma debbo, laati nun teddujal gorko. <sup>8</sup> Gam gorko bane yiwi e debbo, debbo nun yiwi e gorko, <sup>9</sup> gorko bane tagaa gam debbo, debbo nun tagaa gam gorko. <sup>10</sup> Gam daliila malaykaabe, debbo filoo gam hollita baawde mum. <sup>11</sup> Hande no Joomiraawo resiri, debbo wonataako to gorko walaa, gorko bo wonataako to debbo walaa. <sup>12</sup> Gam hande no debbo yiwiri e gorko, non non nun

gorko bo rimiraa e debbo. Amma dum fu, to Alla dum yiwi.

<sup>13</sup> Miilee onon e ko'e moodon: E woodi debbo e du'oo, o fiilaaki na? <sup>14</sup> Tawaanjal hollataa to gorko yoofitii gaasa mum, femmay ka, edum sentinii na? <sup>15</sup> Amma to debbo, teddujal muudum nun, gam o hokkaama gaasa juutuka hande fiilaanu. <sup>16</sup> Jiddo yeddugo ka fu, baa minon, baa eklesiya Alla, en goodaa tawaanjal ja don.

### Hiraane Joomiraawo seniine

<sup>17</sup> Woodi ko jidum batugo on kade dow haala no kawritirton. Dow majjum mi waawataa ko mani on, gam no kawritirton laataaki gam yaarugo on yeeso, amma gam wittingo on baawo. <sup>18</sup> Taw, mi nanii to on kawtii, hunnuko wooto walaa hakkune mon, mi hoolake bo haala kan gokka mum, goona nun. <sup>19</sup> Haani du ceen-niigu laatoo caka moodon, gam heba goonaabe wurtoo e moodon. <sup>20</sup> To on kawritii, hiraane Joomiraawo bane nyaamoton. <sup>21</sup> Gam to on kawritii oon nyaama, moy moodon fu, e yawdanoo nyaamugo nafa mum, den tawaa wobbe e rafaa, wobbe bo bagi e doyyi dum. <sup>22</sup> E goona on goodaa cuudi to haani nyaammon, jaron na? Naa on jawu nun eklesiya Alla? On jidu nun sentingo talakaabe na? Ume bi'anmi on? Mi yetta on na? Mi waawataa ko yetti on dow majjum.

<sup>23</sup> Min, diga Joomiraawo nun kebumi ko jottimmi on: Jemmaare ne der muudum Joomiraawo meeden Yeesu jammaa, o etti peen, <sup>24</sup> o yetti Alla, o nappiti ja, o wi'i: Dum do woni bannu am kokkaanjol gam moodon. Gadee dum, oon ciwtorirammi. <sup>25</sup> No be keennyi, o etti jarirgel innabojam, o wi'i: Jarirgel nel woni alkawal kesal tabbitiniraanjel e yiyyam am. De jaroton dam fu, jaree dam, oon ciwtorirammi. <sup>26</sup> De nyaamoton peen oon jara der jarirgel nel fu, oon baajoo wa don haala maayde Joomiraawo faa de o wittoy.

<sup>27</sup> Gam majjum, neddo fu yakkudo peen, yariri jarirgel Joomiraawo

hande no haaniray, wadii hakke dow bannu Joomiraawo e yiyyam mum. <sup>28</sup> Gam majjum, moy fu widitoo hoore mum go yakka peen, yara bo der jarirgel nel. <sup>29</sup> Gam neddo yakkudo peen, yari der jarirgel nel, go suttontiray ko woni bannu Joomiraawo, o foodanan hoore makko kiita diga nyaamde e jarde makko. <sup>30</sup> Gam majjum wadi ko duubbe moodon laatii nyawbe e moofidinbe, duubbe bo maayi. <sup>31</sup> To en biditake ko'e meeden, en kiiataake. <sup>32</sup> Amma Joomiraawo e hiitoo en gam o elta en, wara doyyideden kiita e himbe duuniyaaru.

<sup>33</sup> To non, banniraabe am, to on kawritii gam nyaamon hiraane Joomiraawo, kedontiree. <sup>34</sup> To woodi e moodon mo rafo wadata, joomum nyaama diga wuro mum, gam to kawtal moodon waddana on kiita, Dow ko horii fu, to mi warii, mi laabinanan on dum.

## 12

### Dokke Ruuhu Ceniido

<sup>1</sup> Banniraabe, dow haala dokke Ruuhu Ceniido hokkata, mi yidaa dul-lon annal dow mum. <sup>2</sup> Ciwtoree, den ko on goondinayno, on poodeno far to tooruuje muume. <sup>3</sup> Gam majjum wadi ko mii yidi paamon dum do. Walaa bi'oovo Yeesu laati nun naalaado to Ruuhu Alla o batirta ka, kade bo walaa bi'oovo Yeesu laati nun Joomiraawo to joomum woodaa Ruuhu Ceniido.

<sup>4</sup> Dokke Ruuhu Ceniido feere feereeje nun woni, amma Ruuhu on gooto nun. <sup>5</sup> Golle feere feereeje nun woni, amma Joomiraawo majje laati nun gooto. <sup>6</sup> Baawal golle feere feereeje nun woni, amma Alla gooto on wadata huune fu der moy fu. <sup>7</sup> Moy fu hepii kokkal kollitoowal baawde Ruuhu, nafoowal himbe fu. <sup>8</sup> Ruuhu hokkata oo do dokkal batugo e hakkillo, o hokka oo to dokkal batugo e annal. Ruuhu gooto on wadata dum. <sup>9</sup> Kanko on hokkata oo do goondinki, oo to nyawtugo nyawbe, <sup>10</sup> o hokka oo do baawde

wadugo haaynaareeji, oo to baawde wadugo annabaaku, oo do baawde annitingo ko warata diga Ruuhu, oo to baawde batugo e delle Ruuhu, goddo bo o hokka dum baawde nantingo delle den. <sup>11</sup> Ruuhu gooto on tan wadata dum don fu, o seennirana moy fu dokkal hande no o yidiri.

### Jokkule duudde der bannu gootol

<sup>12</sup> Hande no bannu laatorii gootol baa no jokkule duudde nel woodi, nun bo, jokkule duudde laatorii bannu gootol. Non Almasiihu bo wa'i. <sup>13</sup> Gam en fu, en kebii batisi diga e Ruuhu gooto gam laatoden bannu gootol, Yahuduube e Yunaninkeebe, maccube e rimbe, en fu en jarinaama Ruuhu gooto on.

<sup>14</sup> Bannu neddo laataaki jokkulal gootal, amma jokkule duudde. <sup>15</sup> To koynjal wi'i: «No mi junjo bane, mi jeyaaka e bannu,» e nun fu nel jeyaaka e bannu na? <sup>16</sup> Naa to nowru wi'i: «No mi laataaki itere, mi jeyaaka e bannu,» dum hadan ne jeyeego e bannu na? <sup>17</sup> To jokkule bannu fu laatake gite, noy neddo nanirta? Naa to de fu de laatake nowru, noy neddo luuttirta? <sup>18</sup> Amma, Alla resii jokkulal baanjale fu der bannu, hande no o yidiri. <sup>19</sup> To jokkule fu laatakeno gootal, noy bannu laatotonoo? <sup>20</sup> E goonja, jokkule e duudi, amma de fu, de laati nun bannu gootol.

<sup>21</sup> Itere waawataa ko wi'i junjo: «Mi woodaa haaje maa». Hoore bo waawataa ko wi'i koyde: «Mi woodaa haaje moodon». <sup>22</sup> Amma, jokkule bannu daaraade e buri tam-pugo, kanje bo dee nafa. <sup>23</sup> Jokkule de daareten walaa teddujal, kanje buruden tedingo. Jokkule de centirten bo kanje buruden hakkilango. <sup>24</sup> Jokkule meeden godde en kaa-jaaka hakkilango dum. Alla hawtii jokkule fu, hokki burude faandugo, teddujal, <sup>25</sup> gam to ceennirgu wadu der bannu, o acci jokkule fu e waltungira hakkune mum. <sup>26</sup> To jokkulal gootal e naawee, de fu de nana naawdum e maggal. To jokkulal

gootal teddinaama, de fu de maata welwelo e maggal.

<sup>27</sup> Onon, on laati nun bannu Almasiihu, moy moodon fu laati nun jokkulal bannu makko. <sup>28</sup> Hande nun Alla resiri himbe der eklesiya mum. Aran, lilaabe, didawre annabiibe, tatawre jannjinoobe, baawo majjum wadoobe haaynaareeji, e nyawtoobe nyawbe, e faabotoobe, e ardiibe, e batoobe delle Ruuhu. <sup>29</sup> Himbe ben fu laati nun lilaabe na? Naa be fu bee annabiibe nun? Naa be fu bee jannjinoobe nun? Himbe fu nun wadata haaynaareeji na? <sup>30</sup> Himbe fu bane hokkaa baawde nyawtugo nyawbe, be fu bane hokkaa baawde batugo e delle Ruuhu, be fu bane bo hokkaa baawde nantingo delle sen. <sup>31</sup> To non, tinnee daartee dokke burude nafugo. Jooni mi hollan on laawol burjol woodugo.

## 13

### *Yidde*

<sup>1</sup> Baa to mii waawi batugo delle himbe e delle malaykaabe fu, to mi walaa yidde, mi laati nun hande lenjuru piyeteenu, dum bo hande rimmo baggu. <sup>2</sup> To Alla hokkii am dokkal wadugo annabaaku, to mi hebii annal dow siiriji e dow huune fu, dum bo to mii woodi goondinki faa mi sottina baalle, amma mi woodaa yidde, mi laataaki godsum. <sup>3</sup> Baa to mi hokkii jawdi am fu talakaabe, mi sakka bannu am bo wuudee yiite, to mi woodaa yidde, dum nafataa am.

<sup>4</sup> Goodudo yidde e woodi munyal, nee hebbi neddaaku. Yidde walaa nawniraagu, ne jurataako, ne woodaa manju hoore. <sup>5</sup> Goodudo yidde wadataa ko sentinii, o darataa ko nafata mo tan, o monnortaako goddo, o jogataako hallande. <sup>6</sup> Goodudo yidde seyortaako ko halli, amma e seyoroogoonja. <sup>7</sup> Oo yaafuu huune fu, oo hoolo huune fu, oo hedoo Alla der ko waroyta, oo munyanu huune fu.

<sup>8</sup> Yidde heennyataa faa abada. Annabaaku heennyanyan, batugo e delle

feere feereeje heennyanyan, annal bo heennyanyan. <sup>9</sup> Annal meeden laabidaa, annabaaku meeden bo laabidaa. <sup>10</sup> Amma to huune fu laabinaama, ko laabaa fu majjitan.

<sup>11</sup> No latinoomi suka, mi batii hande suka, mi miijono hande suka, jiide am bo hande jiide suka. Amma no mawnumi, mi accii golle sukaaku. <sup>12</sup> Jooni en ji'ataa taw huune fu e laabal, dum nandi hande daanorgal niibunjal nun daanortoden. Amma wakkati waraan, en ji'an e gite meeden deydey. Jooni taw annal am laabay, amma wakkati waraan de annanmi faa laaba, hande no Alla annirimmi.

<sup>13</sup> Den, huune tati woni ko tabitii, goondingo, e hedaaago moyyere Alla, e yidde. Amma yidde buri dum dum fu mawnugo.

## 14

### *Gollirgo dokke Ruuhu Ceniido*

<sup>1</sup> To non, daartee yidde. Daartee bo dokke Ruuhu Ceniido, hakko du dokkal annabaaku. <sup>2</sup> Batoowo e delle Ruuhu, Alla nun joomum baddata, himbe bane. Gam goddo faamataa ka o batata, Ruuhu nun hokkata mo haalaaji Alla cuudiidi. <sup>3</sup> Amma gadoowo annabaaku wallan nun wobbe mawnugo der goondinki, e tiidina be, e hokka be semme. <sup>4</sup> Batoowo e delle Ruuhu, semmidinan nun goondinki mum, gadoowo annabaaku bo e walla eklesiya yahugo yeeso.

<sup>5</sup> Mii yidi on fu baton e delle Ruuhu, amma ko burumi yidugo woni, gadon annabaaku. Gadoowo annabaaku e buri batoowo e delle Ruuhu, gam batoowo e delle Ruuhu mawnintaa eklesiya to jottinoowo de walaa. <sup>6</sup> Banniraabe, hande jon bi'en, mi wara to moodon, mi yanta baddirgo on e delle Ruuhu tan, laatoo mi jannjinay on ko Alla hollitimmi, mi waddanay on bo annal kesal, mi ekkitinay on bo, ume nafanmi on?

<sup>7</sup> Daaree ji'en, baa huune jimirdum, hande jon fuuraanu dum bo moolooru. To puuroowo fuuraanu,

dum bo piyoowo mooloru fiyay hande no haaniri, moy tintotoo ko fuuretee dum bo ko fiyetee? <sup>8</sup> Naa moy siriyanto konu to puuroowo walaldu konu fuuray hande no haani? <sup>9</sup> Hande non onon bo, to haala moodon laabay, moy faamata ko jiddon wi'ugo? On boppia haala moodon! <sup>10</sup> Delle duudde nun wonider duuniyaaru nu, de fu, dee goodi ko de bi'ata. <sup>11</sup> Amma to goddo baddii am e dennjal hal mi nanataa, mi laatake janano makko, kanko bo o laatake janano am. <sup>12</sup> Hande non, onon bo, no oon tinnii daartugo dokke Ruuhu, daartee aran dokke puy, jaarooje eklesiya yeeso.

<sup>13</sup> Gam majum, batoowo e delle Ruuhu fu, eela Alla walla dum nantingo de. <sup>14</sup> Gam to mii du'oo e dennjal Ruuhu, ruuhu am e du'oo, amma hakkillo am gollataako. <sup>15</sup> Den, noy gadanmi? Mi du'oto e ruuhu am, mi du'oto bo e hakkillo am. Mi yiman e ruuhu am, mi yiman bo e hakkillo am. <sup>16</sup> To hinaa nun, to aa yetta Alla e ruuhu, noy tawaado caka hettiniibe, mo annaa dum, waawirta ko wi'i «aami» to a yettidii? Gam joomum nanataa ko batataa. <sup>17</sup> Baa to yettoore maa e woodi hande noy, dum mawnintaa goondinki joomum.

<sup>18</sup> Mii yetta Alla gam mii buri on, on fu batugo e delle Ruuhu. <sup>19</sup> Amma der eklesiya, mii buri yidugo mi bata haalaaji joy paameteedi gam ekkitingo wobbe, buri batugo haalaaji ujune sappo e delle Ruuhu de faamataake.

<sup>20</sup> Banniraabe, to on laatee hande sukaabe der hakkillo moodon. Amma dow hallande laatee hande sukaabe, dow suttontirgo huune, laatee be hakkilooji mum benni hande mawbe. <sup>21</sup> E winnaa der tawreeta: Joomiraawo wi'i:

«Himbe bee, e delle Ruuhu, e kunnude hobbe nun  
baajortoomi be.  
Amma e nun fu, be kettinantaako am.»

<sup>22</sup> Hande non, batugo e delle Ruuhu laati nun maane kiita dow 6e goondinay. Wadugo annabaaku laati nun gam goondinbe, hinaa gam 6e goondinay.

<sup>23</sup> Hande jon, to himbe eklesiya fu hawritii, den moy mabbe fu e bata delle Ruuhu feere feere, to himbe be jannjinaaka, dum bo be goondinay warii yi'ii dum, be bi'ataa ko'e mon sottake na? <sup>24</sup> Naa bo, hande jon, mo goondinay, dum bo mo annaa dum, naati der juulirde moodon, go o tawi himbe fu e wada annabaaku, ka o nanata hiitoto mo, o faama no oo woodi hakke. <sup>25</sup> Milooji berne makko cuudiidi wurtinte, den o jiccoo, o sujidana Alla, o wi'a: «E goona, Alla e wondi e moodon.»

### No haani huunefu wadoroo der Eklesiya

<sup>26</sup> Banniraabe, noy haani gaden? To on kawritii, go oo do e woodi jimol, oo to e woodi janjinol, goddo bo e woodi kollitol gom, goddo bo e bata e delle Ruuhu, goddo bo e nantina de, sey huune fu wadee gam goondinbe mawna. <sup>27</sup> To delle Ruuhu nun batete, sey himbe dido bata, to dum buru tato, moy fu e wakkati mum. Goddo moodon nantina de. <sup>28</sup> Amma to nantinoowo walaa, goodudo dokkal batugo e delle Ruuhu jeedoo der eklesiya, bata der berne mum, badda e Alla. <sup>29</sup> Dow wadoobe annabaaku, dido dum bo tato etta haala, horiibe widitoo haala mabbe. <sup>30</sup> To goddo der joodiibe e woodi ka Alla holli dum bata, sey aranneejo batoowo jeedoo. <sup>31</sup> Hande nun, on baawan ko wadi annabaaku gooto gooto, gam moy moodon fu ekkitoo, semmidina goondinki mum. <sup>32</sup> Wadoobe annabaaku sey waawa ko jogii ko'e mum, <sup>33</sup> gam Alla laataaki Alla mo jibayeere, amma Alla mo jam.

Hande no dum laatii toy fu der eklesiyaaji Alla, <sup>34</sup> sey rewbe jeedoo der eklesiya, be kokkaaka laawol be bata. Sey be baawa jogaago ko'e mabbe bee dowtii hande no winniraa

der tawreeta. <sup>35</sup> To woodi ko 6e jidi faamineego, 6e acca faa to 6e kooti wuro, 6e yama worbe mabbe. Gam to debbo batii haala der eklesiya, dum centiniidum.

<sup>36</sup> Naa oon miili to moodon nun haala Alla yiwi? Onon tan hebii ka na?

<sup>37</sup> To goddo e miili e laati annabijjo, dum bo e miili hebii Ruuhu Ceniido, e haani joomum annita ko binnanmi on laati nun umuroore Joomiraawo.

<sup>38</sup> To goddo salake ko jaabi haala ka, edum hollita no kanko e hoore makko Alla jaabay mo.

<sup>39</sup> Gam majjum, banniraabe, tinnee daartee dokke annabaaku. To on calee bo himbe bata e delle Ruuhu,

<sup>40</sup> amma kakkilee, huune fu wadoo e hakkillo, e no haaniri.

## 15

### Pintol Almasiiihu

<sup>1</sup> Banniraabe, mii yidi siwtorgo on linjiila ka baajimi on, jabudon ko oon darii dow makka e semme. <sup>2</sup> Diga e makka kisintedon to oon jogii ka hande no baajoriimi on. To hinnaa non, goondinki moodon laatoto baanji.

<sup>3</sup> Aran, mi yottinii on ko kebumi min e hoore am, kanjum woni. Almasiiihu maayii gam hakkeeji meeden, hande no Dewtere wi'i. <sup>4</sup> O uwaama, o fintii nyalaane tatawre, hande no Dewtere batiri. <sup>5</sup> O hollitanake Piyer, baawo majjum o hollitanii aahiibe sappo e dido. <sup>6</sup> Baawo majjum o hollitanii banniraabe ko buri keme joyo de woore. Duubbe mabbe e wuuri faa jooni, amma wobbe mum maayi. <sup>7</sup> Baawo majjum, o hollitanake Yaakuuba, den go o hollitanii lilaabe fu.

<sup>8</sup> Faa sakitiineere, o hollitanii am, min nandudo hande sukeel dimaanje lebbi mum hebbay. <sup>9</sup> Gam min buri lilaabe fu faandugo, mi fotay du nodeego lilaado, gam mi tooriino eklesiya Alla. <sup>10</sup> Gam moyyere Alla laatoriimi ko laatiimi. Moyyere ne o wadanimmi bo laataaki baanji, gam mi gollake ko buri lilaabe fu. Min bane wadata dum, amma moyyere

Alla wonne der am wadata dum. <sup>11</sup> To non, min nun, kambe nun, haala goota kan men piinata, kanka nun bo goondindon.

### Pintol maaybe

<sup>12</sup> To emen baajoo no Almasiiihu fintii e maayde, den noy wobbe moodon wi'irta maaybe fintataa?

<sup>13</sup> To pintol maaybe walaa, Almasiiihu e hoore mum bo fintay, <sup>14</sup> to Almasiiihu fintay bo, waaji amen laatake baanji, goondinki moodon bo laatake baanji. <sup>15</sup> Ko buri fu, to e goona maaybe fintataa, minon bo men laatake seedaniibe Alla fewre, gam emen ceedoo o fintinii Almasiiihu, nani bo goona bane, to maaybe fintataa. <sup>16</sup> Gam to maaybe fintataa, Almasiiihu e hoore mum fintay. <sup>17</sup> To Almasiiihu fintay, goondinki moodon laatake baanji, der hakkeji moodon bo gonudon faa jooni, <sup>18</sup> maayunoobe e goondinki Yeesu bo halkii. <sup>19</sup> To der duuniyaaru do tan miiluden hebugo riiba gonuka der kawtal men e Almasiiihu, enen surannoo himbe fu yurminaago.

<sup>20</sup> Amma e goona, Almasiiihu fintii, o laatake arano der maaybe fintooбе.

<sup>21</sup> Hande no maayde naatiri der duuniyaaru diga neddo, hande non bo pintol wariri diga e neddo. <sup>22</sup> Hande no himbe fu maayirta gam kawtal mum e Aadamu, hande non himbe hebirta yonki gam kawtal mum e Almasiiihu. <sup>23</sup> Moy fu fintan e wakkati mum. Almasiiihu laatii arano, baawo mum, goondinbe mo tokkina der nyalaane garki makko. <sup>24</sup> Baawo majjum, timmoode duuniyaaru waran. Almasiiihu halkan hooreebe e woodube baawde e semmeeji kalludi fu, den o hokka Alla Baaba meeden laamaare. <sup>25</sup> Gam doole Almasiiihu laamoo faa to Alla wattii waybe makko ley teppe makko. <sup>26</sup> Ganyo cakitorteedo halkeego woni maayde.

<sup>27</sup> E winnaa: «Alla wattii huune fu ley koyde makko». Amma to wi'aama, «huune fu» Alla gattudo huune fu ley koyde makko bane wondaa. <sup>28</sup> To Almasiiihu laatake hooreejo dow

huune fu, kanko Bidfo bo, o hokkan Alla hoore makko, den Alla laamoo dow huune fu, e dow moy fu.

<sup>29</sup> To non, riiba kaye wadeteēē batisi faa maayira woodi to maaybe fintataa? Ume wadi ko himbe e wadee batisi faa maayira? <sup>30</sup> Enen e ko'e meeden bo, gam ume pot-teten wakkati fu kalije maayde?

<sup>31</sup> Banniraabe, nyalaane fu der hun-nuko maayde nun gonumi. Amma e nun fu mii juroro on gam daliila kaw-tal moodon e Joomiraawo meeden Yeesu Almasiihu. <sup>32</sup> To e miilooji hebugo godsum der duuniyaaru do nun gadirmi duuro der wanjarde Efesu, kabumi e bisaaji ladde kalludi, ume dum nafatammi to maaybe fintataa? Dum laatotono hande no ballool ηol do wi'i: «Nyaamen jaren, gam jaajo en maayan.» <sup>33</sup> To on jam-mee ko'e moodon: «Yaadugo e kalludo biisan jikku boodsuju.» <sup>34</sup> Pukkinee hakkillooji moodon hande no haani, to on gadee hakke. Mi batii ka gam centon, gam wobbe moodon annaa Alla.

<sup>35</sup> Amma, wadoto goddo yama: «Noy maaybe fintirta? Bannu iri ηole be bit-tirotya?» <sup>36</sup> Onon be galaa hakkillo! To a aawi awdi, doole ni waata go ni fuda. <sup>37</sup> Awdi ni aawudaa fu, to gawri nun, dum bo awdi feereeri gom nun, gitel tan aawataa, pudol e haako mum bane. <sup>38</sup> Baawo mum, Alla nun hokkata awdi fu iri pudol mum no o yidiri, awdi fu bo e pudol muudum nun. <sup>39</sup> Kujje yonkinteeje fu bane woodi bannu gootol. Himbe e woodi bannu mum, bisaaji e bannu mum, pooli e bannu mum, liyyi bo e bannu mum.

<sup>40</sup> E woodi bannu ηol dow kammu, e bannu ηol leydi. Bannu ηol dow e ηari mum, ηol leydi bo e ηari mum. <sup>41</sup> Naanje e jayηol mum, lewru e jayηol mum, koode bo e jayηol mum, baa koode den jayηol mum e suttontiri.

<sup>42</sup> Hande non, pintol maaybe bo laatii. To bannu uwaama, ηol nyola, to ηol fintinaama, ηol nyolataa. <sup>43</sup> To ηol uwaama ηol woodaa teddujal, ηol

fintinee, ηol woodi teddujal. To ηol uwaama, ηol tampunjol, ηol fintinee ηol woodi semme. <sup>44</sup> To ηol uwaama bannu leydinkewol, ηol fintinee ηol laatti bannu ruuhunkewol. To bannu leydinkewol na'on, bannu ruuhunkewol bo na'on. <sup>45</sup> E winnaa: «Aadamu neddo aranneejo laatake yonkinteejo». Aadamu cakitiido laatake Ruuhu kokkoowo yonki. <sup>46</sup> Ruuhunkejum bane ardi, dum bannu nun ardi. Baawo mum ko dum Ruuhu tokkii. <sup>47</sup> Aadamu neddo arandeejo e sollaare leydi nun tagiraa, e leydi o yiwi, neddo didabo bo, dow kammu yiwi. <sup>48</sup> No tagiraado e sollaare leydi wa'i, hande non woodube bannu leydinkewol bo wa'i. No yiwudo dow kammu wa'i, hande non be dow kammu bo wadoya. <sup>49</sup> Hande no nandirden e neddo tagiraado sollaare leydi, hande non bo nandiroyen e neddo yiwudo dow kammu.

<sup>50</sup> Banniraabe, ko jidum wi'ugo on nani: Bannu e yiyyam waawataa ko roni Laamaare Alla, kade bo, nyoloo-jum waawataa ko roni ko nyolataa.

<sup>51</sup> Nani mi hollan on asiiri gom: en fu bane maayata, amma en fu en baylitinte, <sup>52</sup> der wakkati gooti, der mayyande itere, to rimmo walaldu sakitiinewol nanaama. To ηol fuuraama, maaybe artan finta e bannu ηol nyolataa, enen horiibe en baylitinte. <sup>53</sup> Den fu, bannu nyoloowol bornoto ko nyolataa, bannu maayoowol bo bornoo ko maayataa. <sup>54</sup> To bannu nyoloowol borninaama ko nyolataa, maayoowol bo borninaama ko maayataa, den haala annabaaku binnaaka ka hebban:

«Maayde jaalaama, modaa.

<sup>55</sup> Maayde, toy jaalorgal maa woni? Maayde, toy tooke maa woni?»

<sup>56</sup> Hakke woni tooke maayde, baawde hakke bo woni tawreeta. <sup>57</sup> Yettoore laatanoo Alla kokkoowo en jaalaago diga e Joomiraawo meeden Yeesu Almasiihu.

<sup>58</sup> Gam majjum banniraabe am yidaabe, laatee tabitiibe, be dimataako. Wakkati fu kiinnee golle

Joomiraawo, gam oon anni ko gadufodon sabbu kawtal moodon e Joomiraawo yanataa baanji.

## 16

### *Wallugo goondinbe Urusaliima*

<sup>1</sup> Jooni, wallirgo goondinbe wonbe Urusaliima e ceede nun batananmi. Onon bo gadee hande no batumi eklesiayaaji leydi Galaatiya. <sup>2</sup> Alal fu, moy moodon fu resa wecco dow ko o hebi. To on kedee mi wara go kawriton de. <sup>3</sup> To mi warii, mi lilan be cuboton be jaara ballal moodon faa Urusaliima, e dereeji paaminooji haala ballal moodon. <sup>4</sup> To fotii mi yaha min e hoore am, be jaadan e am.

### *Pole miili witta to be Korintu*

<sup>5</sup> Mi waran to moodon, amma mi yiwan e leydi Maseduwaan, gam ton tokkirranmi. <sup>6</sup> Wadoto to mi warii mi joodoo to moodon balde sedda, dum bo mi dabba ton. Den ballon am der jahaajal am mi yahira to jahanmi fu. <sup>7</sup> Gam e laawol nol do, mi yidaa yaalugo on to mii yawta, to Joomiraawo e yidi mi joodoto to moodon balde sedda.

<sup>8</sup> Amma mi joodoto taw Efesu faa juulde Pantekosta yottoo, <sup>9</sup> gam laawol manjol maabitakanake am mi wada golle am, baa no waybe bo e duudi.

<sup>10</sup> To Timote warii to moodon, jaabbee mo, jogodon mo faa wooda, gam golle Joomiraawo nun o wadata hande am. <sup>11</sup> Gam majjum, to goddo yawoo mo. Ballitee mo dow jahaajal makko. O yaha e jam, o warta to amen. Min e banniraabe emen kedii mo.

<sup>12</sup> Banniraawo meeden Apollos, mi tiidinii dum de duuddum o yaada e banniraabe to moodon, amma faa hanne o nootaaki. Amma o waran to o hefori.

### *Baynaade*

<sup>13</sup> Kakkilee, daree e semme der goondinki, kollitee cuusal mon, goodee semme. <sup>14</sup> Ko gadoton fu, gadiree dum e yidde.

<sup>15</sup> Banniraabe, ko eelanmi on woni, oon anni Estefanas e himbe wuro

mum, kambe nun arti goondini der leydi Akaya fu. Be tinnake gollanaago himbe Alla. <sup>16</sup> Dowtanee himbe iri maabbe, tinniibe e gollodoo e maabbe.

<sup>17</sup> Berne am weli e garki Estefanas e Fortunatus kan e Akaykus. Be gadanii am ko on baaway ko wadanimmi gam oon boddi. <sup>18</sup> Be pukkinii berne am e berde moodon. Gam majjum teddinee himbe hande maabbe.

<sup>19</sup> Himbe eklesiayaaji leydi Asiya fu sannii on. Akilas e Pirisikiila, e goondinbe Yeesu hawritintoobe der wuro maabbe fu e sanna on sanne e inne Joomiraawo. <sup>20</sup> Banniraabe fu e sanna on.

Moy moodon fu sanna banniraawo mum e yidde mawne.

<sup>21</sup> Min Pol mi sannii on e binni junjo am.

<sup>22</sup> Neddo fu mo yidaa Joomiraawo, o naalaado! Maranata, yaa Joomiraawo Yeesu, war!

<sup>23</sup> Moyyere Joomiraawo meeden Yeesu wonda e moodon!

<sup>24</sup> Mii yidi on on fu, gam kawtal meeden e Yeesu Almasiihu.

## Derewol ɳol Pol winnani 6e Galaatiya

### *Haala Puddirka*

Derewol Galaatiya laati nun ɳol Pol winnani eklesiyaaji dī o titi wakkati o wadi jahaale makko de Golle Lilaabé batani. Wobbe e miili, eklesiyaaji din tawa nun weccore Asiya pettel, waato to wi'etee Turkiya jooni. No Pol yawti, Yahuduube waajotoobe wobbe yahii ton e bata kalluka dow golle waaji de o wadata. Bee bi'a: haanu nun himbe dowtanoo tawreeta Muusa e juuldeej Yahuudube, e juulnol. Baawo mum, wobbe der goondinbe wi'i e woodi hoore mum, go be etti dimaaku maabbe bee gadira ko haanay. Pol fuddi toontaago dow ka be gaccortoo dum dow golle waaji de o wadata. Bee bata ka gam be gatta seko der teddunjal linjiila ka o waajoto. Yeesu Almasiihu pintudo e hoore mum nun hollitanii Pol, kanko nun bo hokki Pol linjiila ka waajoto. Lilaabé Yeesu wobbe bo e darii 6aawo Pol. Pol wooltanii Piyer der siire Antakiya gam munaafitaare makko. O habidii bo yidubé e jogii tawaanjal Yahuduube. Pol hollii be no goondindo fu laatinaama poonniido diga e goondinki mum, hande no Iburahiima habbiranaa alkawal mum. Baawo mum, Pol hollii ko laatii golle tawreeta. Goondingo Yeesu Almasiihu e waylita gonki men, laatina en rimbe, hinaa maccube. Wittitaago der dowtanaago golle tawreeta, kanjum laatinta neddo maccudo. Baawo mum, Pol heennyitiri e hollugo goonki mo Ruuhu Alla ardanii.

### **Tokkontirki haalaaji**

1. Haala puddirka, 1.1-10
2. Alla e hoore mum nun laatinii Pol lilaado, 1.11-2.21
3. Haala moyyere Alla, 3.1-4-31
4. Dimaaku goondinbe e ko 6e jowanaa, 5.1-6.10

5. Haalaaji cakitiidi e cannooje, 6.11-18.

### *Sannoore*

<sup>1</sup> Derewol ɳol do yiwi e am, min Pol, lilaado. Himbe bane lilimmi. Lilal am yiway diga e neddo. Amma Yeesu Almasiihu e Alla Baaba pintindo mo diga maayde nun lilimmi. <sup>2</sup> Min e banniraabe wondube e am fu, emen binnana on derewol ɳol, onon himbe eklesiyaaji leydi Galaatiya. <sup>3</sup> Baaba meeden Alla, e Joomiraawo meeden Yeesu Almasiihu, wadana on moyyere, hokka on jam. <sup>4</sup> Almasiihu hokkii hoore mum gam hakkeiji meeden. O wurtinii en diga e jamaanuuru hallunu nu. Hande non Alla Baaba meeden yidiri. <sup>5</sup> Teddujal laatanoo mo faa abada. Aami.

### *Linjiila feereha gom walaa*

<sup>6</sup> Dum haaynake am no baylitordon law, tokkudon linjiila gokka, accudon Alla, noddudo on e moyyere Almasiihu. <sup>7</sup> Linjiila gokka walaa. Amma himbe nun laawata on e yidi waylitingo linjiila Almasiihu. <sup>8</sup> To goddo waajike on linjiila feereha ka yaaday e ka men baajii on, baa to menen nun, dum bo malaykaajo yiwudo dow kammu nun, naaloore Alla wonoo dow joomum. <sup>9</sup> Men batino on ka, jooni bo mii batitoo on ka: To goddo waajike on linjiila feereha, cutontirka e ka men baajii on, naaloore Alla wonoo dow joomum.

<sup>10</sup> Den kan, fottango himbe nun daartanmi, naa fottango Alla? Mi daartan nun mi fottana himbe na? To mii daartanno fottango himbe, mi laatataakono maccudo Almasiihu.

### *No Pol laatorii lilaado*

<sup>11</sup> Banniraabe, mii yidi paamon no linjiila ka baajotoomi yiway e neddo. <sup>12</sup> Neddo bane hokkimmi ka, neddo bane janninimmi ka bo, amma Yeesu Almasiihu hollitanii am, hokkimmi ka.

<sup>13</sup> On nanii no laatinoomi arande, der diina Yahuduube. Mi toorii eklesiya Alla e cattal, mi tinnakeno halkugo ka. <sup>14</sup> Mii 6urunoo igoobe am

duubbe der laawol diina Yahuduube. Mii wooduno tinnaare mawne dow saloraago tawaanjal kaakiraabe am.

<sup>15</sup> Amma Alla subii am diga mii woni der reedu inna am, noddimmi sabbu moyyere mum. <sup>16</sup> O hollitii am Biyiko gam mi waajoo heeferbe habaru makko. Wakkati mum, mi seedinay goddo. <sup>17</sup> Mi yahay Urusaliima to artube am laataago lilaabe, amma mi yahii leydi Arabiya, bittoymi Damas. <sup>18</sup> Duubi tati baawo mum jahumi Urusaliima, gam mi annita Piyer, gondumi e makko balde sappo e joy. <sup>19</sup> Mi yi'ay lilaado baa gooto, to hinaa Yaakuuba, miiraawo Joomiraawo.

<sup>20</sup> Ko binnananmi on do, Alla woni seedeijo am, mi fewataa.

<sup>21</sup> Baawo majjum, jahumi leydi Siriya, e leydi Silisiya. <sup>22</sup> Wakkati majjum, goondinbe 6e eklesiayaaji leydi Yahudiya meesday yi'ugo am e gite mum. <sup>23</sup> Be nananno nun tan e wi'ee, neddo toorannoodo en, jooni na'on waajoo haala goondinki ki yiduno halkugo. <sup>24</sup> Den 6e teddinii Alla sabbu am.

## 2

### No lilaabe jabiri Pol.

<sup>1</sup> Duubi sappo e naay baawo mum, bittumi Urusaliima min e Barnabbas. Titus bo e wondi e am. <sup>2</sup> Mi yahii ton gam ko Alla hollitimi. Mi hawtii min tan e ardiibe, kollumi 6e linjiila ka baajotoomi caka 6e lenyi janani. Gam mi yidaa golle am de gadumi, e de gadanmi laatoo baanji. <sup>3</sup> Titus gonduso e am, laati nun Yunaninkeejo, o doolaaka bo julnaago. <sup>4</sup> E non fu, banniraabe fewrekuube naatuube caka men e yoyre, e yidunoo dum. Be daartii liinyugo dimaaku kebusden der kawtal meeden e Yeesu Almasiihu, gam 6e bittina en der maccunnaaku. <sup>5</sup> Amma men kokkay 6e laawol baa sedda, heba goonja linjiila tabitoo caka moodon.

<sup>6</sup> Daaraabe mawbe ben, baa to ume 6e laatiino, walaa ko faalii am, gam Alla burontirtaa himbe. Mawbe ben yowanay am godsum. <sup>7</sup> Amma 6e

paamii Alla nun yowanimmilinjiila mi waajoo 6e lenyi janani, hande no o yowirani Piyer waajoo Yahuduube.

<sup>8</sup> Alla latindo Piyer lilaado caka Yahuduube, kanko laatinimmi min bo lilaado caka 6e lenyi janani.

<sup>9</sup> Yaakuuba e Piyer e Yuhaana, laatiibe darnanal goondinbe anniti moyyere ne Alla wadanimmii. Be kokkii men juude min e Barnabbas gam hollitingo naaral amen. Hande non menen, men jaha men baajoo 6e lenyi janani, kambe bo 6e baajoo Yahuduube. <sup>10</sup> Ko 6e eeli men tan woni, men ciwtora talakaabe. Mi tinnike bo wadugo dum.

### Pol wooltanii Piyer der siire Antiyokiya

<sup>11</sup> Amma no Piyer wari Antiyokiya, mi wooltanii mo yeeso himbe gam o woofii. <sup>12</sup> Gam ko lilaabe Yaakuuba wara, Piyer e nyaamdanoo e 6e lenyi janani. Amma no 6e jotti, o takkitii 6e, o acci nyaamdugo e mabbe, gam oo hula Yahuduube.

<sup>13</sup> Yahuduube goondinbe Yeesu wobbe hawtii e makko, faa 6e naanni Barnabbas bo der munaafitaare mabbe. <sup>14</sup> No ji'umi 6e jahataa der goonja linjiila, bi'umi Piyer yeeso himbe fu:

«An Yahudujo, aa wada hande no 6e lenyi janani wadata, hinaa hande no Yahuduube, noy doolirta 6e lenyi janani 6e gada hande Yahuduube?»

### Goondingo Yeesu Almasiihu tan hisinta

<sup>15</sup> Menen, men dimaaka maa der lenyol Yahuduube, men laataaki hakkeebe 6e lenyi janani. <sup>16</sup> Emen anni neddo laatintaake poonnitiido e tokkugo tawreeta. E goondinki Yeesu Almasiihu tan neddo laatinirtee poonnitiido. Menen bo men goondinii Yeesu Almasiihu, gam men laatinee foonnitiibe diga e goondinki, hinaa gam tokkugo tawreeta. Gam walaa baa gooto laatinteedo poonnitiido e tokkugo tawreeta. <sup>17</sup> Emen daarta laatineego foonnitiibe der kawtal amen e Almasiihu. Der majjum, to tawaama men hakkeebe nun, den Almasiihu

laati nun gollantoodo hakke na? Abada! <sup>18</sup> Gam to mii mahitoo ko pusumi, min e hoore am mii tabbitina no mi boofudo. <sup>19</sup> Amma min, mi maayi dow wecco tawreeta, tawreeta kan warimmi, heba mi wuura gam Alla. Mi tiggidaama e Almasiihu dow leggal palaanjal. <sup>20</sup> Min bane wuurata, Almasiihu nun wuuri der am. Guurnam bannu buuranmi jooni, e goondinki 'Biddo Alla nun buuranmi, kanko jidso am faa hokkitiri hoore mum gam am. <sup>21</sup> Mi woppataa moyyere Alla. Gam to e tokkugo tawreeta nun neddo laatinirtee poonniido, den fu Almasiihu maayii gam baanji.

### 3

*Tokkugo tawreeta dum bo goondingo Yeesu  
(Roma. 4; 8.14-17)*

<sup>1</sup> Onon 6e Galaatiya, on galaa hakkillo! Moy jammii on? On laabinanaamaa haala Yeesu Almasiihu, tiggaado dow leggal palaanjal. <sup>2</sup> Toontee am yande dee do: Gam tokkudon tawreeta acci kefudon Ruuhu Ceniido na, naa gam on nanii linjiila go goondindon Yeesu Almasiihu? <sup>3</sup> Non hakkillo moodon faandiri? On puddirii e Ruuhu Alla, ko oon jidi heennyitirgo e semme moodon? <sup>4</sup> Huune ko hebi on dum fu laatike baanji na? Wadataako dum laatoo baanji. <sup>5</sup> Kokkudo on Ruuhu mum, go e wada haaynaareeji hakkune mon, gam tokkudon tawreeta o wadata nun na, naa gam on nanii linjiila ko goondindon?

<sup>6</sup> Dewtere wi'i: «Iburahiima goondinii, go Alla daari mo poonniido.» <sup>7</sup> Gam majjum, paamee kaa do: Goondinbe Alla nun laatii biibbe Iburahiima. <sup>8</sup> Dewtere batiino, no Alla wadan 6e lenyi janani foonniitiibe gam goondinki maabbe. Kan acci ne batunoo Iburahiima linjiila diga law, ne wi'i: «Lenyi fu barkidinte diga e maa.» <sup>9</sup> Iburahiima goondinii go o barkidinaa. Hande non goondinbe heban barkidineego e makko.

<sup>10</sup> Amma hooliibe tawreeta fu naaloore na'on dow maabbe. Gam e winnii der Dewtere: «Naaloore laatanoo mo tokkay baadey e gollira ko winnaa der tawreeta.» <sup>11</sup> Dum laabii no baa gooto laatintaake poonniido yeeso Alla e tokkugo tawreeta. Gam dewtere wi'i: «Poonniido wuuran sabbu goondinki mum.» <sup>12</sup> Nani tawreeta yiway e goondinki, gam e winnii: «Golliroowo ko tawreeta bati fu wuuran e majjum.»

<sup>13</sup> Almasiihu sooditake en diga naaloore tawreeta. O laatake naalaado gam men, gam e winnii: «Bilaado dow leggal fu laati nun naalaado.» <sup>14</sup> Yeesu wadii dum gam barke Iburahiima laatanoo 6e lenyi janani. Goondindo Yeesu Almasiihu heban Ruuhu mo Alla habbani dum alkawal.

#### *Tawreeta e alkawal*

<sup>15</sup> Banniraabe, mii bata do hande no himbe batirta. To neddo habbii alkawal tabbitini ɣal, walaa piirtando ɣal, walaa beydoowo ɣal bo. <sup>16</sup> Alla habbani Iburahiima e taaniraawo mum alkawal. Dewtere wi'ay: «Taaniraabe», hande 6e duubbe nun, amma gooto ne batani, ne wi'i: «taaniraawo maa», kanko woni Almasiihu. <sup>17</sup> Ko jidumi wi'ugo woni: Alla habbi alkawal faa woodi. Den tawreeta garuka baawo duubi keme naay e laso e sappo, waawataa ko fiirti ɣal, latina ɣal baanji. <sup>18</sup> To donju hebirte nun e tawreeta, den fu e alkawal bane ɣu hebirtee. Nani bo e alkawal nun Alla hokkiri Iburahiima moyyere.

<sup>19</sup> Den ume sariya wari wadugo? Ka hokkaamaa gam hollitingo boofi, faa ko taaniraawo Iburahiima wara, kanko nun Alla habbani alkawal. Diga e malaykaabe bo tawreeta hokkaa, der junjo hakkunneejo. <sup>20</sup> Amma to neddo gooto nun, haaje hakkunneejo walaa. Nani bo Alla kan laati nun gooto.

<sup>21</sup> Den, tawreeta luudontiran nun e alkawal Alla na? Aawo! To tawreeta waawanno ko hokki yonki, den fu e goonja neddo laatinteno poonniido diga e tawreeta. <sup>22</sup> Dewtere wi'i, hakke jaalake himbe fu. To non

goondinbe Yeesu Almasiihu heban ko be kaabanaa alkawal gam goondinki maabbe.

<sup>23</sup> Diga goondinki waray, tawreeta e habbunoo en hande der kasu. Ekaa habbi en hakko goondinki suppitttoo. <sup>24</sup> Hande non tawreeta laatorii deenoowo en faa wakkati Almasiihu wari gam laatineden foonnitiibe diga e goondinki. <sup>25</sup> Jooni no goondinki wari, en burtake e junjo deenoowo on.

<sup>26</sup> On fu, on laatake bibbe Alla gam on goondini Yeesu Almasiihu. <sup>27</sup> On fu, on kawtii e Almasiihu, gadanadon batisi e inne makko, nandudson mo. <sup>28</sup> Cuttontirol walaa hakkune Yahudujo e Yunaninkeejo, dimo naa bo maccudo, gorko naa bo debbo, gam on fu on laatike gootum der kawtal moodon e Yeesu Almasiihu. <sup>29</sup> To on laatike himbe Almasiihu, den on laatike be lenyol Iburahiima, on donan ko Alla habbannoo mo alkawal.

## 4

<sup>1</sup> Ko jidum wi'ugo woni, to donoowo e laatii sukeel, walaa ko suttontirta mo e maccudo, baa no kanko nun woodi huune fu. <sup>2</sup> Odowtanto reenoobe mo e dawranoobe jawdi makko faa wakkati ki baabiiko resi yottoo. <sup>3</sup> Enen bo, no laatinoden sukaabe, en laatikeno maccube baawdeeji duuniyaaru. <sup>4</sup> Amma no wakkati ki Alla resi hebbi, o lilii Biddo makko. Biddo on rimaama e debbo, o umminaama ley baawde tawreeta, <sup>5</sup> gam o rindina wonbe der makka, o laatina en bibbe Alla.

<sup>6</sup> Gam een laatii bibbe Alla, o lilii Ruuhu Biyiko der berde meeden. Kan-jum acci Ruuhu on e wi'a: «Abba», waato Baaba. <sup>7</sup> To non, a laataaki kade maccudo, biddo nun laatidaa. No aa laatii biddo, a ronan ko Alla resani bibbe mum.

### Ko jogii Pol dow be Galaatiya

<sup>8</sup> Den ko on annaano Alla, on jag-ganakeno safeteebe be laataaki Alla e goona. <sup>9</sup> Amma jooni no annitindon Alla, dum bo mi wi'a no Alla anniti

on, noy dum wadi ko oon bitta to ruuhuji di walaa baawde e teddujal? Ko jey sabbu ko oon jidi laataago maccube majji kade? <sup>10</sup> Oon kakki-lana nyalaade godde, e lebbi goddi, e wakkatiji goddi, e duubi goddi. <sup>11</sup> Mii hula to golle gadumi gam moodon laato baanji.

<sup>12</sup> Banniraabe, mii eela on, laatee hande am, gam min bo mii laatii hande moodon. On gaday am fu gacce gom. <sup>13</sup> Oon anni gam sabbu nyaw nun acci ko baajiimi on linjiila aran. <sup>14</sup> Nyaw am toorii on, amma on jawaaki am, on elay am bo. On jaabii am hande malaykaajo Alla, e hande Yeesu Almasiihu. <sup>15</sup> To non, toy seyo moodon goodunodon woni? Gam mii seedanoo on dum, to on baawiino, on doofanno gite moodon kokkon am. <sup>16</sup> Mi laatike ganyo moodon gam mii bata on goona?

<sup>17</sup> Tinnaare himbe ben woodi dow moodon woodaa, gam be jisu nun seennugo on e am, gam tokkodon be e tinnaare. <sup>18</sup> Wadugo ko nafata e tinnaare baadey e woodi, amma hinaa to mii woni e moodon tan. <sup>19</sup> Sukaabe am, mii tooro kade gam moodon hande no debbo nanirta njataware. Dum laato faa jikku Almasiihu wonoo der moodon. <sup>20</sup> Mii yiduno wonaago to moodon jooni, gam mi heba no baddirmi e moodon. Jooni mi annaa noy gadanmi e haala moodon.

### Alkawalji didi: Jeyaanaaku e di-maaku

<sup>21</sup> Batee am onon yidube dowtanaago tawreeta. On nanay ko tawreeta kan wi'i na? <sup>22</sup> E winnii no Iburahiima e woodi bibbe worbe dido, gooto bii kordo, gooto bo bii dimo. <sup>23</sup> Bii kordo rimaama hande no himbe fu rimirtee, bii dimo bo rimiraa e alkawal Alla. <sup>24</sup> E woodi ko soomii der haala ka. Rewbe dido ben laati nun alkawalji Alla didi. Gootal, waato Hajara, yiwi dow waanne Sinayi, kanjal rimi maccube. <sup>25</sup> Hajara laati nun hande waanne Sinayi, tawaane leydi Arabiya. Oo nandi e Urusaliima ni jooni. Gam Urusaliima e sukaabe

mum, e jeyaanaaku woni. <sup>26</sup> Amma Urusaliima ni dow kammu laati nun dimuri, kayri laatii inna meeden.

<sup>27</sup> Gam e winnii:

«Welweltu, an dimaro!  
Huubu kuubaali seyo! an mo meeday  
ko nani ḥataware.

Gam sukaabe debbo accaado duudan  
bura be debbo bañaado.»

<sup>28</sup> Onon banniraabe, on laati nun  
biibbe alkawal Alla hande Isiyaaku.

<sup>29</sup> Amma, hande no dimaado e  
bannu tooriri dimaado e Ruuhu Alla,  
hande nun bo dum laatii faa hanne.

<sup>30</sup> Amma ume nun Dewtere wi'i?  
Ne wi'i: «Riiwu kordo e biyum, gam  
bii kordo ronidintaa e bii dimo».

<sup>31</sup> Hande non banniraabe, en laataaki  
biibbe kordo, amma een biibbe dimo.

## 5

### *Goondinbe rindinaama*

<sup>1</sup> Almasiihu firtii en gam laatoden  
rimbe e goonja. Gam majjum, daree  
e semme, to on accee bittinedon der  
baawde jeyaanaaku. <sup>2</sup> Min Pol, mii  
wi'a on: To on nootike juulnadon,  
Almasiihu nafataa on godsum. <sup>3</sup> Mii  
batitoo ka kade, neddo fu nootiido  
juulnaago, sey joomum dowtanoo  
tawreeta fu. <sup>4</sup> Onon dartoobe  
laataago foonnitiibe diga e tawreeta,  
on ceedi e Almasiihu, on boddodike  
e moyyere Alla. <sup>5</sup> Menen, e men  
kedi Alla laatina men foonnitiibe diga  
e goondinki. Kanjum men kedi e  
baawde Ruuhu Ceniido. <sup>6</sup> To goddo  
hawtii e Yeesu Almasiihu, juulnol e  
dullere juulnol fu laataaki godsum.  
Ko nafata woni, goondinki gollotooki  
e yidde.

<sup>7</sup> On puddii doggudu moodon no  
woodiri. Moy haggi on, hadi on  
dowtanaago goonja? <sup>8</sup> Ko wayl-  
iti miilooji moodon yiway to Alla,  
noddudo on. <sup>9</sup> E wi'ee: Yuufinirdsum  
sedda yuufinan conni laawaani fu.  
<sup>10</sup> Min kan, mii hoolii on gam Joomi-  
raawo, mii anni miilo moodon wittay  
nokkun feere. Amma laawoowo on  
on, baa to moy nun, o doyyete kiita.

<sup>11</sup> Banniraabe, to haala juulnol  
nun baajotoomi, gam ume toore-  
teemi? To kanka baajotoomi, den

fu maayde Almasiihu dow leggal  
palaanjal laatantaakono goddo fer-  
gere. <sup>12</sup> Laawoobe on bee, yaha  
wuddita dum fu.

<sup>13</sup> Banniraabe, on noddaama  
gam laatodon rimbe. To on ettee  
dimaaku moodon gadiron jidaadi  
yonki. Amma, moy fu jagganoo  
bannun e yidde. <sup>14</sup> Gam tawreeta  
fu hawtii der haala goota kaa do:  
«Yidu banniraawo maa hande no  
jidiraa hoore maa». <sup>15</sup> Amma to oon  
yakkontira, oon nyaamontira hande  
dawaadī, kakkilee to on kalkontiree.

### *Ruuhu Ceniido e jidaadi yonki*

<sup>16</sup> Gam majjum, mii bata on:  
Accee Ruuhu Ceniido dura gonki  
mon, den on tokkataa jidaadi yonki  
moodon. <sup>17</sup> Gam jidaade yonki e  
luudontiri e Ruuhu, ko Ruuhu yidi  
bo e luudontiri e jidaadi yonki.  
Edum luudontiri hakkune majjum,  
kan acci on baawataa wañugo ko  
jidudon. <sup>18</sup> Amma to Ruuhu durata  
on, tawreeta woodaa baawde dow  
mon.

<sup>19</sup> Ko jidaadi yonki waddata e  
laabi. Kanjum woni, jeenu, ko sobi,  
kaaruwaaku, <sup>20</sup> caafol tooruuje,  
dobobooje, gayñu, hawre, nawni-  
raagu, mone, jeddi cattudi, luudon-  
tirgo, ceennirgu, <sup>21</sup> suuno, jarde bagi,  
deereraaku e ko nandi e majjum. Mii  
seedina on hande no ceedinirnoomi  
on bi'umi, wañooße iri baadi nin fu  
naatataa der Laamaare Alla.

<sup>22</sup> Amma ko Ruuhu Ceniido rimata  
woni: yidde, seyo, jam, munyal,  
neddaaku, yurmeene, goondinki,  
<sup>23</sup> diggere e jogaago hoore mum.  
Tawreeta walaa gaccotooka iri kujje  
dee. <sup>24</sup> Laatiibe be Yeesu Almasiihu  
tiggii galli mum e jidaadi yonki, e  
suuno mum fu dow leggal palaanjal.  
<sup>25</sup> To e Ruuhu nun buurirden, accee  
jahiren no Ruuhu yidiri. <sup>26</sup> To en  
mawnitee, to en corkontiree, to en  
gadontiree nawniraagu.

## 6

### *Ballontiree hakkune moodon*

<sup>1</sup> Banniraabe, to on nannii goddo e  
wada boofol, onon woodube Ruuhu,

bittinee joomum e diggere. Amma, onon bo kakkilee gam to on naatee der jarbeeji. <sup>2</sup> Ballontiree roonaago doolle moodon, hande non kebbinirton ko Almasiihu resani on. <sup>3</sup> To goddo e miili e laatii godsum, nani bo o laataaki godsum, o jammike hoore makko. <sup>4</sup> Moy fu daara golle muudum. To de potii ko o juroro, o juro gam hoore makko, amma to o jura dow golle goddo. <sup>5</sup> Gam moy fu roonoto e hoore mum doongal mum.

<sup>6</sup> Janjinteedo haala Alla, e haani seennira ko woodi e janjinoowo dum.

<sup>7</sup> To on majjinee ko'e moodon, Alla nootataako goddo yawoo dum. Ko moy fu aawi, kanjum ruggata.

<sup>8</sup> Aawudo ko suuno mum yidi, ruggan ko suuno rimata, waato maayde. Aawudo ko Ruuhu Ceniido yidi, ruggan ko Ruuhu rimata, waato yonki tabitiiki. <sup>9</sup> To en comee wadugo geetum. Gam to en tampay, en duggan to wakkati mum warii.

<sup>10</sup> To non, de gooduden wakkati, en gadanee himbe fu geetum, accu dun banniraabe meeden goondinbe.

<sup>18</sup> Banniraabe, moyyere Joomiraawo meeden Yeesu Almasiihu wonda e moodon! Aami.

### *Haalaaji cakitiidī e baynaade*

<sup>11</sup> Daaree binniji mawdi di binanmi on e junjo am. <sup>12</sup> Dartooabe hollitingo hoore mum yeeso himbe, kambe doolata on juulnaago. Bee gada dum gam be jidaa tooreego sabbu leggal Almasiihu palaanjal.

<sup>13</sup> Baa kambe juulnaabe, be tokkaaki tawreeta. Be jidu nun juulnodon gam be keba juroraago on. <sup>14</sup> Min kan, mi jurortaako godsum to hinaa leggal Joomiraawo meeden Yeesu Almasiihu palaanjal. Diga e maggal duuniyaaru tiggaam gam am, min bo tiggaami gam mayru. <sup>15</sup> Gam juulnaago e dullere juulnaago fu laataaki godsum, sey laataago neddo keso, tagitaado. <sup>16</sup> Tokkuube laawol njol fu, Alla hokku dum jam e endam, kambe e Isira'iilaabe be Alla.

<sup>17</sup> Diga jooni, to goddo tooranmi kade, gam bannu am e woodi maane battarde Yeesu.

## Derewol **ŋol Pol winnani** 6e Efesu

### *Haala Puddirkka*

Derewol Pol **ŋol** do, eklesiya Efesu tan bane o winnani **ŋol**, amma eklesiyaaji baadeere leydi Asiya fu o winnani **ŋol**, don nun wi'etee jooni Turkiya. Der binniji arandeeji, inne Efesu walaano der derewol **ŋol**. Pol e anni eklesiya Efesu, gam o wadiinton hande duubi tati. Golle Lilaabe 19 e 20. Dum nandi hande derewol Efesu **ŋol** nun Koloosi 4.16 batani.

Roma nun Pol woni o winniri derewol **ŋol** hakkune duubol 62, ko Tikikus yaari **ŋol**. Diga fuddoode maggol, Pol holii laawol **ŋol** Alla tokki o hisinira himbe diga e Yeesu Almasiihu. Alla e hoore mum resiino ko yiduno wadugo diga duuniyaaru tagaaka. Kanjum Pol noddi asiiri. O hollitii asiiri ko o resunoo wadugo diga e Yeesu Almasiihu, den o subi Pol laatoo gollantoodo asiiri on.

Baawo haalaaji di, Pol batanii goonki goondinbe hebbube Ruuhu Ceniido. O luudontirii ki e goonki 6e goondinay, 6e annaa Alla.

Hande non, 6e Pol winnanta hebirta semme jaalaago ekkitinoobe fewrekuubee, dartoobe seekina eklesiyaaji gonudi baadeere Koloosi.

Haala mawka der derewol **ŋol** woni no himbe fu laatorii gootum diga e Almasiihu baa no 6ee laatii lenyi e himbe feere feere.

### **Tokkontirki haalaaji**

1. Haala puudirkka, 1.1-2
2. Almasiihu e eklesiya mum, 1.3-1-23
3. Yahuduube e 6e lenyi janani laatake gootum baa no 6ee laatii lenyi feere feere (2.1-3.20)
4. Eklesiya e laatii goota, amma moy fu e dokkal mum der eklesiya ka wuro (4.1-16).
5. Himbe fu e laatii gootum baa no joonne maabbe e suttontirii (5.21-6.9)
6. Kabirdum goondindo e cannooje, 6.10-24.

### *Sannoore*

<sup>1</sup> Derewol **ŋol** do yiwi e am min Pol, lilaado Yeesu Almasiihu e yidde Alla. Mii winnana himbe Alla wonbe Efesu, goondinbe Yeesu Almasiihu.

<sup>2</sup> Alla Baaba meeden, e Yeesu Almasiihu Joomiraawo, wadana on moyyere, hokka on jam.

### *Barke Alla wadanta himbe diga Almasiihu*

<sup>3</sup> Yettoore laatano Alla, laatiido Baaba Yeesu Almasiihu Joomiraawo meeden. Gam kawtal meeden e Almasiihu, o barkidinii en e hokkugo en barke ruuhunkeeje feere feereeje, yiwiude dow kammu. <sup>4</sup> Diga duuniyaaru tagaaka, Alla subii en sabbu Almasiihu, gam latoden seniibe, 6e walaa gacce yeeso makko. <sup>5</sup> O subii en diga aran, gam latoden bibbe makko diga e Yeesu Almasiihu. Non non o yidiri dum sabbu geetaaku makko. Non dum fottirani mo bo. <sup>6</sup> Gam majjam, en maantee, teddinen Alla gam moyyere makko ne o wadani en, diga hokkugo en Biyiko jidaado.

<sup>7</sup> Moyyere Alla e mawni: Diga e kawtal men e Almasiihu, en pirtaama, jaafaden, sabbu yiyyam makko deyyitiidam. <sup>8</sup> O duudinanii en moyyere makko, o hokki en hakkillo e faamu kebbunu. <sup>9</sup> Geetaaku makko acci o annini en asiiri sago makko, ko o resuno wadugo diga fuddoode diga e Almasiihu. <sup>10</sup> To wakkati warii, Alla hebbinan ko resuno wadugo, o hawritan ko woni dow kammu e dow leydi fu, o wada Almasiihu laatoo hooreejo majjum.

<sup>11</sup> Der kawtal men e Almasiihu, Alla hokkii en gedu **ŋu** o habbannoo en alkawal mum, e subugo en diga law, hande no o resirno. O wadii dum, gam non o subirno e sago makko, <sup>12</sup> gam maanten Alla, teddinen mo, enen artaab e subaa, watti hoolaare mum dow Almasiihu.

<sup>13</sup> Onon bo, no kawtudon e Almasiihu, on nani haala goonja, kanka woni linjiila kaa do hisinta on. No goondindon, Alla maanake on. Maane nen woni Ruuhu Ceniido mo o habbuno alkawal mum o hokkan.

<sup>14</sup> Ruuhu Ceniido on nun laatii hande torma barke de desanaden. En keban de to nyalaane kisidam men hebbidii. To non en maantee Alla, teddinen mo.

### Pole du'anoo goondinbe Efesu

<sup>15</sup> Gam majjum, min bo, no nantu habaru no goondinirdon Yeesu Joomiraawo, e no jidirson banniraabe goondinbe, <sup>16</sup> mi accay yettugo Alla gam moodon. De du'otoomi fu, emi siwtora on. <sup>17</sup> Mii eela Alla Joomiraawo meeden Yeesu Almasiihu, Baaba mo teddujal, hokka on Ruuhu mum kokkoowo hakkillo. Ruuhu on hollita on Alla hande no o laati. <sup>18</sup> Mii eela Alla yaynina berde moodon, heba paamon ko hedfi on der noddoore ne o noddi on, paamon bo no barke de desanadon onon e himbe makko tediiri. <sup>19</sup> On paaman bo baawde mawde, semmenteeje, de o holliti dow meeden, enen goondinbe. E baawde den, e semme makko, <sup>20</sup> o fintiniri Almasiihu diga e maayde. O joosini mo wecco junjo makko nyaamo, dow kammu. <sup>21</sup> Hande non Almasiihu laatorii burudo laamuji e baawdeeji e semmeeji e mawbe fu. Kanko nun laatii hooreejo dow ko woodi inne fu, hinaa der duuniyaaru nuu do tan, amma e der duuniyaaru nu yeeso bo. <sup>22</sup> Alla wattii huune fu ley koyde Almasiihu. O wadii mo Joomiraawo dow huune fu, o laatini mo hooreejo Eklesiya. <sup>23</sup> Eklesiya kan woni 6annu Almasiihu. E makka Almasiihu hebbi, kanko mo Alla hebbi der mum.

## 2

### Almasiihu woni Kisinoowo

<sup>1</sup> Onon, on maayiino gam boofi moodon e hakkeeji moodon. <sup>2</sup> Kanji tokkunodon, hande no duuniyaaru yahirta, dowlanidon hooreejo ruuhu-iji kalludi, tawaadi hakkune dow e ley. Ruuhuji din nun gollotoo faa e hanne caka himbe yeddube Alla. <sup>3</sup> En fu, hande no maabbe laatinoden. Suunooji meeden tokkunoden. Ko milooji meeden kalludi, e jikku meeden

yidi gadetenno. Gam sabbu jikku meeden nu, mone Alla nun haandan-noo en hande no maabbe.

<sup>4</sup> Amma endam Alla walaa kaddi, o yidii en e yidde mawne. <sup>5</sup> Gam majjum, enen maayunoobe sabbu boofi men, o fintidinii en e Almasiihu. E goona, gam moyyere Alla kisudon. <sup>6</sup> No een kawti e Yeesu Almasiihu, Alla fintidinii en e makko, joodidini en e makko dow kammu. <sup>7</sup> O wadii dum gam o hollita en geetaaku makko. Jaamanuuji garooji fu yi'an manju moyyere makko ne foonnirtaake goddum. O wadani en ne gam een kawti e Yeesu Almasiihu. <sup>8</sup> Gam sabbu moyyere Alla kisudon, e gam on goondinii Almasiihu. Kisidam moodon laati nun dokkal Alla, golle moodon bane. <sup>9</sup> Kisidam mon yiway diga e mon, gam to goddo hebu juraago. <sup>10</sup> Alla nun wadi en, kanko tagi en diga e kawtal men e Yeesu Almasiihu, gam golle boodde. Golle boodde den, Alla siriylake de diga aran gam gaden de.

### Almasiihu laatinii en gootum

<sup>11</sup> Yahuduube e woodunoo maane juulnol e balli mum, bee jidi bo noddeego «juulniibe.» Onon be laataaki Yahuduube, on goodaa hande maane nen e balli mon, go bee nodda on «heeferbe.» To non ciwtoree ko laatinodon. <sup>12</sup> Wakkati mum, on goodaano Almasiihu, on kawtaano e Isira'iilaabe, on galaano der alkawalji di Alla habbuno. On kedaakino goddum yeeso, on goodaano bo Alla der duuniyaaru. <sup>13</sup> Amma jooni, no kawtudon e Yeesu Almasiihu, onon woddinoobe, on battinaama diga e yiiyam makko deyyitiidam. <sup>14</sup> Gam Almasiihu nun laatii jam meeden. O wadii laatiibe Yahuduube e be lenyi janani laatii gootum, diga e hokkugo yonki makko dow leggal palaanjel. Hande non o pusiri bombooru gaynu nuu do seennunoo be. <sup>15</sup> Almasiihu moytii Sariya e umurooje mum, e kakkilanol mum fu. Non non o wadirii Yahuduube e be lenyi janani fu laatii lenyol kesol, gam bee kawti e makko. Hande non o joonniri jam hakkune

ma  be. <sup>16</sup> Diga e maayde makko dow leggal palaanjal o weldiniri  e e Alla. O hawtii  e  e laatii bannu gootol diga e maayde makko. Diga e palaanjal  jal, o sottiniri gaynu tawanoonju hakkune ma  be. <sup>17</sup> Almasiihu warii fiinii habaru jam caka moodon, onon  e lenyi janani woddinoobe, e onon Yahuduub  e badinoobe. <sup>18</sup> Gam sabbu Almasiihu, en fu, en ke  ii laawol yottaago to Baaba, e ballal Ruuhu gooto.

<sup>19</sup> Hande non, on laataaki kade ho  be, dum bo janan  e. On laato-dake  e genni goori e himbe Alla, oon himbe wuro Alla. <sup>20</sup> On mahaama dow suudu n  l dadda mum laatii lilaabe e annabi  e. Yeesu Almasiihu e hoore mum woni hayre jogiine maadi. <sup>21</sup> Kanko nun jogiin maadi nin fu, eni mawnira, faa ni towa, ni laatoo suudu Alla Joomiraawo ceniijol. <sup>22</sup> No kawtudon e makko, on laatake mahirdum to Alla wonoto diga e Ruuhu mum.

### 3

#### *Pol, lilaado caka  e lenyijanani*

<sup>1</sup> Min Pol, mii ma  baado der kasu gam golle Yeesu Almasiihu caka moodon, onon  e lenyi janani. <sup>2</sup> Seko walaa, on nanii habaru golle de Alla yowanimmi e moyyere mum, mi wada gam mon. <sup>3</sup> O hollitanake am, o faaminimmi asiiri ko o resi o wada. Kanjum nun binnanmi on e haala sedda. <sup>4</sup> To on jannii derewol am, on annan no paamirmi asiiri dow Almasiihu. <sup>5</sup> Asiiri on, himbe hollaakano dum der jaamanuuji jawtudi. Amma jooni, diga e Ruuhu Ceniido, Alla hollitii dum lilaabe e annabi  e  e o subi  e gollanoo mo. <sup>6</sup> Nani do no asiiri on laatori: Diga e linjiila,  e lenyi janani he  i gedu mum der moyyereeji desaadi, hande no Yahuduub  e he  iri. Be laatake jokkule bannu gootol, bee goodi alkawal gootal gam  e kawtii e Yeesu Almasiihu.

<sup>7</sup> Linjiila kan nun laatiimi gollootoodo mum, sabbu moyyere ne Alla wadanimmii e golle baawde

mum. <sup>8</sup> Min  uri goondin  e fu faandugo. E non, mi he  ii moyyere waajaago  e lenyi janani habaru jawdi gonuni der Almasiihu, ni faamataako. <sup>9</sup> Mi he  ii bo dokkal faamingo no Alla tagudo huune fu hebbinirta ko o resuno o wada, cuudinoodum diga den. <sup>10</sup> Hande non Eklesiya anninirta woodube baawde e semme dow kammu, no faamu Alla duudiri. <sup>11</sup> Non o resunoo o wada diga  ooydum, ko o hebbini dum diga e Joomiraawo meeden Yeesu Almasiihu. <sup>12</sup> En kawtii e Almasiihu, en goondinii mo, to non, en baawan ko  attii Alla e hoolaare. <sup>13</sup> Kanjum wadi mii eela on, to on accee berde moodon biisoo sabbu tooraaji di ke  ammi gam moodon. Tooraaji din laati nun teddujal moodon.

#### *Yidde Almasiihu yid   en*

<sup>14</sup> Gam sabbu dum don fu, mii jiccanoo Baaba. <sup>15</sup> Diga e makko lenyi gonudi dow kammu e leydi fu he  i inne mum. <sup>16</sup> Mii eela Alla mo teddujal manjal semmidina berde mon e baawde Ruuhu mum Ceniido. <sup>17</sup> Mii eela Almasiihu wonoo der berde moodon, diga e goondingo mo. Mii eela mo kade, cemmidee der yidde, gadee dadi der mayre. <sup>18</sup> Hande non paamirton, onon e himbe Alla fu, no yidde Almasiihu foti yaajugo e juutugo e luggugo e towugo. <sup>19</sup> Mii eela Alla annina on yidde Almasiihu burune faamu fu, gam laatodon hebbube, Alla bo hebbad der moodon.

<sup>20</sup> Alla gollotoodo der meeden e baawde mum, wadana en bura ko eeleten, e ko miileten fu. <sup>21</sup> Teddujal laatanoo mo der Eklesiya, diga e Yeesu Almasiihu, der jaamanuuji fu, faa abada abadin! Aami.

### 4

#### *Laataago gootum der goondinki*

<sup>1</sup> Mii eela on, min ma  baado der kasu gam Joomiraawo, goniree no fottiri hande no Alla noddiri on.

<sup>2</sup> Buytee ko'e mon, laatee diggube e munyu  e. Munyanee himbe e yidde.

<sup>3</sup> Tinnee oon laatii gootum hakkune

mon, diga e jam mo Ruuhu Ceniido hokkata on. <sup>4</sup> Bannu gootol nun woni, e Ruuhu gooto, non bo gootum woni ko tammihidon yeeso, dum Alla nod-dani on. <sup>5</sup> Joomiraawo gooto nun woni, e goondinki gooti, e batisi gooti. <sup>6</sup> Alla gooto nun woni, laatiido Baaba himbe fu, laamaniido himbe fu, gol-lotoodo diga e himbe fu, gonudo der himbe fu.

<sup>7</sup> Moy meeden fu hebii dokkal moyyere, jakä no Almasiihu yidirani dum. <sup>8</sup> Dewtere wi'ii:  
«O eencii dow, o yaarii nanjaabe,  
o hokkii himbe dokke<sup>☆</sup>.»

<sup>9</sup> Ume nun «o eencii dow» yidi fil-litaago? Ko dum fillitii woni, o artii o jippii der nokkuure to buri lug-gugo der leydi. <sup>10</sup> Jippiido on woni, «eencudo» faa dow kammu, gam o hebba duuniyaaru fu. <sup>11</sup> Kanko nun hokki wobbe be laatoo lilaabe, wobbe annabiibe, wobbe waajotoobe, wobbe bo durugo himbe, e janjingoe be. <sup>12</sup> O wadii dum gam o siriyoo himbe Alla gam golle, be mawninira bannu Almasiihu. <sup>13</sup> Hande non tinnortoden keben goondinki gooti, e annal Biddo Alla gootal, laatoden mawbe, jottoden to Almasiihu woni laatoden hande no o wa'i. <sup>14</sup> Den, en laatataako kade sukaabe wifitinteebe nokku fu, hande laanayel diyam nel galmaaji diyam yaarata to yidi. Den bo, janjinoobe pewe majjintaa en e yoyre mum. <sup>15</sup> Amma to een bata goonja e yidde, en mawnander huune fu, een poonnorii Almasiihu laatiido hooreejo. <sup>16</sup> Diga e makko nun jokkule bannu fu jogontirii. To jokkulal fu e wada golle mum, den bannu mawnan, yaha yeeso der yidde.

### *Almasiihu laatinii en heybe*

<sup>17</sup> Mii bata on, mii batitoo e inne Joomiraawo, to on nyaamee goonki mon hande heeferbe, be miilooji mum majjinta dum. <sup>18</sup> Hakkillo mabbe niibii, bee bodfodii yonki ki Alla hokkata. Be galaa annal, ko berde mabbe e yoori. <sup>19</sup> Be annaa suttontirgo ko woodi e ko halli, bee

<sup>☆</sup> 4:8 Jabuura 68.19

nyaama goonki maabbe no be pakkiri fu, bee gada ko berde maabbe yidi.

<sup>20</sup> Amma onon, kanjum bane janninadon e Almasiihu. <sup>21</sup> On nanii habaru makko, on janninaama goonja gonuka e makko. <sup>22</sup> To non, bortee jikku moodon nu gonunodon e muudum. Kanjum woni suunooji bannu kalkooji yonkiji moodon. <sup>23</sup> Accee Ruuhu Alla latina yonki moodon e hakkillo moodon kesum. <sup>24</sup> Bornee jikku kesu nu Alla tagi dow nandi mum heba gonodon no foonnitorii e no laabiri, yiwdum diga e goonja.

<sup>25</sup> Ton non, accee batugo fewre, moy mon fu bata bannun goonja, gam en fu, en laati nun jokkule bannu gootol. <sup>26</sup> To mone wadii on, to on gadee hakke. To on accee mone wada on faa naanje yana. <sup>27</sup> To on kokkee Seydan laawol der moodon baa sedfa. <sup>28</sup> Buijannoodo acca guyka mum, wada golle geete e semme bannu mum, gam heba ko wallirta woodube haaje. <sup>29</sup> Haanay haalaaji bondi e wurtoo diga e kunnude moodon. Ko haani gadon woni, baton haalaaji nafooji, cemmidinooji goondinki wobbe, gam kettinaniibe on nana ko nafata dum. <sup>30</sup> To on mettinee berne Ruuhu Ceniido mo Alla maanorii on, gam o rindina on nyalaane darjal. <sup>31</sup> Ikkinee ko haadi e gayju, e mone, e palmooje, e jennoje e huune ko halli fu caka moodon. <sup>32</sup> Gadontiree ko woodi hakkune mon. Jurmontiree, moy fu yaafanoo bannun, hande no Alla yaaforanii on, sabbu kawtal mon e Yeesu Almasiihu.

## 5

### *Wonaago der jaynjol*

<sup>1</sup> Jooni on laatike biisse Alla yidaabe, gam majjum, yemminee mo. <sup>2</sup> Yidde ardanoo goonki mon, hande no dum laatii e Almasiihu. O yidi en, faa o hokki yonki makko gam meeden. O laatake sadaka e kiisaadum pot-tandum Alla.

<sup>3</sup> On laatike himbe Alla. Gam majum haanay jeenu, e cobudum fu, e suuno, batanee caka mon. <sup>4</sup> Hande non bo, haanay haalaaji centiniidi, di walaa hoore, e haalaaji baanji baanji, nanee caka moodon. Ko haani wurtoo e kunnude moodon woni, jetton Alla. <sup>5</sup> E haani paamon faa wooda: Jeenoobe e sobube e suunaabe, gam suuno laati nun saafugo tooruure, bee don fu walaa gedu der Laamaare Almasiihu e Alla.

<sup>6</sup> To on accee goddo majjina on e haalaaji baanji baanji, gam iri majjum nun waddata mone Alla dow saliibe dowtanaago mo. <sup>7</sup> Sabbu majjum, to on kawtee e himbe iri mabbe. <sup>8</sup> Aran, der niwre gonunodon, amma jooni, gam kawtal moodon e Joomiraawo, on naati e jaynjol. To non, buuree hande bibe jaynjol. <sup>9</sup> Gam ko jaynjol rimata woni: geetaaku e foonnaare e goonja fu. <sup>10</sup> Liinyee ko fottanta Joomiraawo. <sup>11</sup> To on gattee juude mon e golle gadeteede der niwre, de walaa nafuwe, amma cumpitee de. <sup>12</sup> Ko himbe ben wadata e suude, baa batugo dum e sentinii. <sup>13</sup> Amma to huune sumpitaama, jaynjol hollitan no dum laatii. <sup>14</sup> Huune ko wurtii fu, laatoto jaynjol. Gam majjum acci e wi'ee:  
 «Finu e doyjol maa, an daaniido!  
 Umma hakkune maaybe,  
 Almasiihu yaynante jaynjol mum.»

<sup>15</sup> Gam majjum, kakkilanee yaadu mon dow no gonirton, to on laatee hande be galaa hakkillo, amma laatee hakkilbe. <sup>16</sup> To on majjinee wakkati, gam nyalaade de gonuden e mum jooni e halli. <sup>17</sup> Gam majjum, to on laatee be walaa hakkillo, amma paamee ko Joomiraawo yidi. <sup>18</sup> To on accee bagi doyya on, gam edam watta himbe der hallumaru, amma, kebbee Ruuhu Ceniido. <sup>19</sup> Cemmidinontiree e jimi jaburaaji e jettooje, e jimi ruuhunkeeji. Jimanee Joomiraawo, maantee mo e berde mon fu. <sup>20</sup> Jettee Alla Baaba wakkati fu e gam huune fu, e inne Joomiraawo meeden

Yeesu Almasiihu. <sup>21</sup> Moy moodon fu dowtano banniraawo mum gam teddingo Almasiihu.

### *Joonne bayontirbe*

<sup>22</sup> Onon rewbe, dowtanee worbe moodon hande no dowtorantodon Joomiraawo. <sup>23</sup> Gam gorko nun laatii hooreejo dow debbo muudum, hande no Almasiihu laatorii hooreejo dow Eklesiya. Kanko woni kisinoowo Eklesiya, laatiika bannu makko. <sup>24</sup> Hande no Eklesiya dowtorantoo Almasiihu, hande non debbo fu, haani dowtorano gorko mum, dow huune fu.

<sup>25</sup> Onon worbe bo, jidee rewbe moodon hande no Almasiihu yidiri eklesiya. O yidii ka, faa o hokki yonki makko gam makka, <sup>26</sup> gam o loota ka e diyam, o laabina ka e haala makko. <sup>27</sup> O wadii dum, heba o darina ka yeeso makko e teddujal, ka laatoo ceniika, ka walaa aybe, dum bo tuuni, maa bo boofol gom, e huune ko nandi e mum fu. <sup>28</sup> Hande non, haani worbe yidira rewbe mum, hande no be jidiri galli mabbe. Jidudo debbo mum, yidii hoore mum. <sup>29</sup> Dadey, goddo meeday ko wanyi bannu mum. Amma oo nyaanna jol, oo hiinnoo jol, hande no Almasiihu wadanta Eklesiya, <sup>30</sup> gam enen nun laatii jokkule bannu makko. <sup>31</sup> Kan wadi dewtere wi'i: «Gorko accan baaba mum e inna mum, takkontira e debbo mum, be fu dido, be laatoo bannu gootol». <sup>32</sup> Asiiri mawdo nun don. Amma, Almasiihu e Eklesiya mum nun batanammi. <sup>33</sup> Amma onon ko yaali on woni, gorko fu yida debbo mum, hande no yidiri hoore mum. Debbo bo teddina gorum.

## 6

### *Sukaabe e saareeji mum*

<sup>1</sup> Onon sukaabe, dowtanee saareeji moodon, gam sabbu Joomiraawo, kanjum laatii ko fotti. <sup>2</sup> «Teddin baaba maa e inna maa.» Kanka woni umuroore arandeere, goodune alkawal. <sup>3</sup> Den: «a heban barke,

<sup>†</sup> 5:31 Laatanooji 2.24    <sup>†</sup> 6:3 Tokkitaaki tawreeta 5.16

balde maa juuta der duuniyaaru,»  
kan woni alkawal ḥjal<sup>☆</sup>.

<sup>4</sup> Onon saareeji, to on mettinee  
berde sukaabe moodon, amma, el-  
tee ɓe, oon ekkitina ɓe laawol Joomi-  
raawo hande no haani.

### *Maccube e joomiraabe mum*

<sup>5</sup> Onon maccube, downtanee joomi-  
raabe moodon ɓe duuniyaaru do, e  
kulol e diwnugo, e berde laabude,  
hande no dowtorantodon Almasiihu.

<sup>6</sup> Dowtanee ɓe, hinaa yeeso mabbe tan,  
gam fottango ɓe. Amma dowtanee ɓe  
gam on maccube Almasiihu, wadoobe  
ko Alla yidi e berde goote. <sup>7</sup> Jagganee  
ɓe e seyo, hande Joomiraawo nun  
jaggantodon, himbe bane. <sup>8</sup> Gam  
oon anni neddo fu gadudo ko woodi,  
heban riiba majjum to Joomiraawo,  
baa to oo dimo, dum bo maccudo.

<sup>9</sup> Onon joomiraabe bo, jogoree non  
maccube moodon. Accee nyaasitaago  
ɓe. Annitee, onon e mabbe fu, Joomi-  
raawo gooto goodudon dow kammu,  
o burontirtaa bo himbe.

### *Kabirdum goondindo*

<sup>10</sup> Ko horii wi'ugo on woni: Ac-  
cee baawde Joomiraawo mawde  
semmidina on. <sup>11</sup> Ettee kabirdum  
dum Alla hokki on fu, gam baawon  
daraago yeoso dabareeji Seydan.

<sup>12</sup> Gam e himbe bane kabidinten,  
amma e ruuhuji kalludi, tawaadi  
dow kammu, goodudi baawde e  
semme, e laamanii duuniyaaru  
nu niwre. <sup>13</sup> Gam majjum, ettee  
kabirdum dum Alla fu, gam baawon  
ko darii to nyalaade kallude warii,  
kebon semme baawo to hawre heen-  
nyii.

<sup>14</sup> To non, ummee daree. Kabbee  
goonja hande belbelol e punjuli  
moodon. Bornee foonnitaare hande  
toccoore janni ne konu. <sup>15</sup> Tinnaare  
waajaago linjiila ka jam laatoo  
pade moodon. <sup>16</sup> Wakkati fu, jogee  
goondinki hande taabordum kure.  
E makki nyifirton kure Iibiliisa de  
yiite. <sup>17</sup> Kuunee kisidam hande hu-  
uneere janni, jogee haala Alla hande  
kaafahi ki Ruuhu Ceniido hokkata.  
<sup>18</sup> Wakkati fu gadee du'aaje feere

feere. Eelee ballal Alla hande no  
Ruuuhu Ceniido hollitirta on. Deenee  
e tinnaare! To on accee du'anaago  
himbe Alla. <sup>19</sup> Du'anee am min bo,  
gam Alla hokkammi boliide pottude,  
mi anninira e cuusal, goonja cuudiika  
der linjiila. <sup>20</sup> Kanka nun laatiimi  
lilaado mum, mii habbiraa callalluujii.  
Du'anee am, gam mi waawa ko waajii  
ka e cuusal, hande no haaniri.

### *Baynaade*

<sup>21</sup> Mii yidi onon bo, annon no go-  
nirmi e ko gadanmi. Gam majjum,  
Tikikus banniraawo meeden jidaado,  
gollantoodo Joomiraawo e hoolaare,  
humpitan on habaru am fu. <sup>22</sup> Mii  
lila mo e moodon, gam annon no men  
goniri, o fukkina hakkillo moodon.

<sup>23</sup> Banniraabe, Alla Baaba, e Yeesu  
Almasiihu Joomiraawo, hokka on  
jam e yidde, o hokka on goondinki bo.  
<sup>24</sup> Yidube Joomiraawo meeden Yeesu  
Almasiihu fu, e yidde ne heennyataa,  
moyyere Alla laatanoo dum.

## Derewol nol Pol winnani 6e Filippi

### *Haala Puddirkka*

Filippi tawaaka maa der leydi Eropa, weccoore Maseduwaan to Romankeebe laamanii. Der jahaajal fidabal nol Pol wadi kanko e Silaasi gam waajaago linjiila, der maggal nun o waaji himbe Filippi, go eklesiya fuddi, Golle Lilaabe 16.12-40. Eklesiya arandeya nun don na Pol tiggi der leydi Eropa. Sabbu tooraaji ummiidi nun Pol nanjaa mabbaa der kasu. Diga kasu don nun o winnani himbe Filippi derewol nol do.

Wobbe e miila Efesu nun Pol woni der kasu go o winniri derewol nol. Wobbe bo e miila Kaysariya nun, amma to nandi goonja buri woni Roma. Amma e nun fu Pol e mili yoofitinte, o yaha to himbe Filippi gam o walla 6e, goondinki mabbe belydoo, berde mabbe wela.

Pol yetti himbe filippi gam ballal nol 6e balliti mo dow dokkal nol 6e lildani mo diga e junjo Epaforoditus. Baawo mum, o batii 6e no o wonorii, e ko wadata to o woni. O semmidinii 6e 6e daroo der goonja linjiila no haaniri, o tiidinii 6e 6e gonoo der joonne seese hakkune mabbe, ko dum laatoo bo, sey moy mabbe fu buya hoore mum.

Wobbe innii derewol nol, «derewol seyo» gam bolide ceyee, belbeltee kebbude der maggol.

### **Tokkontirki haalaaji**

1. Haala puddirkka e cannooje 1.1-12
2. Habaruji dow Pol 1.13-26
3. Wonaago der nannantiral e buya tugo hoore mum 1.27-2.18
4. Habaruji dow Timote e Epaforoditus 2.19-30
5. Hakkilango waajotoobe fe woobe, e kujje kallude 3.1-4.9
6. Jettooje e cannooje 4.10-23

### *Sannoore*

<sup>1</sup> Min Pol e Timote, maccube Yeesu Almasiihu, winnani seniibe

hawtube e Yeesu Almasiihu wonbe Filippi derewol nol, e onon ardiibe e gollotoobe der eklesiya.

<sup>2</sup> Alla Baaba e Joomiraawo meeden Yeesu Almasiihu hokka on moyyere e jam!

### *Pol e du'anoo 6e Filippi*

<sup>3</sup> Mii yetta Alla am de ciwtormi on fu. <sup>4</sup> Wakkati du'antoomi on on fu, e berne welne du'ortoomi, <sup>5</sup> diga nyalaane arandeere faa jooni, on darorake am, on ballii am waajaago linjiila. <sup>6</sup> Mii tabbitini, Alla puududo golle muudum boodufe der moodon hebbinan de, der nyalaane Yeesu Almasiihu. <sup>7</sup> E fotti, mii woodi miilooji dii dow mon on fu, gam mii watti on der berne am. Gam baa no kabbaami callalluuji gam mi seedanake linjiila tabbitinmi ka, on darorake am, on kawtii e am der moyyere ne. <sup>8</sup> Alla woni seedeejo am, mii yidi on on fu e yidde Yeesu Almasiihu.

<sup>9</sup> Ko eelananmi on Alla woni, belydodon yeeso yeeso, dow yidde, e dow annal, e suttontirgo goonja e fewre, <sup>10</sup> gam baawon annitingo ko buri nafugo, laatoson laabube, 6e galaa gacce der nyalaane Almasiihu wittopta. <sup>11</sup> On kebbinaama bibbe foonnaare yiwude diga e Yeesu Almasiihu, gam inne Alla teddinee, yettee.

### *Almasiihu woni yonki*

<sup>12</sup> Banniraabe, mii yidi, annon dum do: ko hebimmi walli linjiila yahugo yeeso. <sup>13</sup> Himbe hiitorde wuro laamido, e wobbe, e nokku fu e anni no gam Almasiihu nun mabbaami der kasu. <sup>14</sup> Maabtol am accii banniraabe duubbe belydii hoolaago Joomiraawo, 6e accii hulugo, 6e belydi cuusal dow waajaago haala Alla.

<sup>15</sup> E goorja, woodi waajotoobe habaru Almasiihu gam nawniraagu e jeddi, amma e woodi waajortoobe e miilooji boodudi. <sup>16</sup> Bee do e wada dum gam bee jidi Almasiihu, bee anni mi yowanaama habango linjiila. <sup>17</sup> Amma bee to, e waajo habaru Almasiihu gam nawniraagu, miilooji

ma  be bo laabaa, kade bo,   ee daarta   eydugo toora callalluuji am der kasu.

<sup>18</sup> No   e baajori fu, d  um   illataa am! to yidi anniyaaji ma  be laatoo bondi maa bo boodudi, anni inne Almasiihu waajee tan, mii seyii, mi seyoto bo kade. <sup>19</sup> Gam mii anni heennyitirde toora kan laatoto kisidam am, gam sabbu du'aaje moodon, e ballal Ruuhu Yeesu Almasiihu. <sup>20</sup> Mii hedii sanne, mii woodi bo tammuwe, mi hebataa senteene godsum. Amma hande no baadey, nun jooni bo, mii anni mi teddinan Almasiihu e tinnaare, der gurnam am, baa to mii wuuri, baa to mi maayi. <sup>21</sup> Min kan, Almasiihu woni gurnam am, maayde laatani am nun riiba, <sup>22</sup> amma, to wonaago am e duuniyaaru waddanan am wadugo golle nafooje, den mi annaa du ume nun cu  anmi. <sup>23</sup> Mii wada berde didi: ko jidumi woni, mi yaha mi wonda e Almasiihu, kanjum buranimmi woodugo. <sup>24</sup> Amma gonki am e duuniyaaru buran nafugo on. <sup>25</sup> Mii hoolii, mii anni mi wonoto e duuniyaaru taw, mi wonda e moodon on fu, gam   eydodon yeeso, berde moodon wela gam goondinki, <sup>26</sup> hande nun, to mi wittoy to moodon, daliila juroraago kawtal mon e Yeesu Almasiihu   eydoto.

<sup>27</sup> Amma, sey no gonirdon fotta e linjiila Almasiihu, gam to mi warii daarugo on, naa bo to mi waray, mi nana oon tabitii der hakkillo wooto, oon kaba gam goondinki linjiila e berde goote, <sup>28</sup> to on accee way  e huunna on baa sedda, kanjum hollitinta seedaaku halkere ma  be, amma onon, kisidam moodon, d  um fu diga to Alla d  um yiwi. <sup>29</sup> On kokkaama moyyere goondingo Almasiihu, kanjum tan bane, on kokkaama bo moyyere tooranaago mo, <sup>30</sup> e daranaago hawre woore ne ji'udon mii haba, e ne nanoton kade mii haba faa jooni.

*No Almasiihu leesiniri hoore mum, e no Alla mawniniri mo*

<sup>1</sup> Almasiihu deyyitinii berde moodon, semmidini on der yidde, oon kawti e Ruuhu, oon goodi yurmeene e endam, naa noy? <sup>2</sup> To non kan, kebbinee seyo am e laataago gootum hakkune moodon: yidde moodon, e berde moodon, e miilo moodon laatoo gootum. <sup>3</sup> To on gadee godsum e miilooji   urontiro, naa bo e manju hoore; amma leesinee ko'e mon, moy mon fu daara wob  e hande   urube d  um. <sup>4</sup> To godso moodon daarta ko nafata d  um tan, amma daarta ko nafata wob  e bo. <sup>5</sup> Goodee hakkune mon, miilo   o Yeesu Almasiihu woodunoo.

<sup>6</sup> Kanko potidindo e Alla diga fuddoode, e non fu, o daaray fotugo makko e Alla hande huune ko o jogitinto,

<sup>7</sup> amma o buyti hoore makko, o etti jayri maccudo, o nandi e him  e, o tawaama oo laatii neddo deydey.

<sup>8</sup> O leesinii hoore makko, o dowtanii Alla faa o maayi, o maayi dow leggal palaanjal.

<sup>9</sup> Gam majjum, Alla etti mo faa dow, hokki mo inne burne inde fu manju,

<sup>10</sup> gam to inne Yeesu noddaama, doole him  e fu jiccoo dow kammu e dow leydi, e der leydi fu,

<sup>11</sup> kade bo him  e fu batan wi'a, Yeesu Almasiihu woni Joomiraawo, gam inne Alla Baaba teddinee.

### *Jayneer der duuniyaaru*

<sup>12</sup> Gam majjum, banniraabe am yidaabe, hande no dowtoridon wakkati fu, hande nun, gadee kolliton kisidam moodon e kulol e diwnugo, hinaa to mii wondi e moodon tan, amma baa no mii boddodii on bo. <sup>13</sup> Gam Alla e hoore mum nun gollata der moodon, faa jidon ko weli mo, gadon dum bo.

<sup>14</sup> Ko gadoton fu, to on dumbitee, to on kabee bo, <sup>15</sup> gam laatodon   e walaa gacce, laabube,   ib  e Alla   e walaa ko elee, wonbe der jaamanuuru biisi-inu, oonyiinu, laatodon yaynoobe der

duuniyaaru hande fitillaaji. <sup>16</sup> Oon baajoo ɓe haala ka yonki gam mi juro der nyalaane wittoyo Almasiihu, mi anna doggudu am e comuri am waday baanji.

<sup>17</sup> Golle moodon laatake hande dokkal goondinki mon. Baa to yiyyam am reyyitake dow dokkal moodon, mii seyorii dum, mii seyorii on bo on fu. <sup>18</sup> Hande non onon bo, ceyee, ceyodee e am.

### *Timote e Epaforoditus*

<sup>19</sup> To Joomiraawo Yeesu jaabii, ɓooftaa mi lilan Timote to moodon, gam min bo, mi heba habaruuj i moodon di o waddanoytammi, di cemmidinammi, <sup>20</sup> gam mi walaa goddo jidudo on hande am, paaliido on e goonja, to hinaa kanko, <sup>21</sup> horiibe fu haaje mum tan mijiitoo, hinaa dum Yeesu Almasiihu. <sup>22</sup> Oon anni Timote hollitii oo laatii koolaado, o gollodake e am gam waaji linjiila hande no biddo gollorantoo baaba mum. <sup>23</sup> Kanko miilumi lilugo to moodon law, to mi annii no haala am laatortoo. <sup>24</sup> Mii hooli Joomiraawo, do e yeeso sedda, min e hoore am mi waran to moodon.

<sup>25</sup> Amma mi tawi e haani mi lila banniraawo am Epaforoditus, gollodiido am, e wallitammi hawre, kanko lilunodon to am gam o wal-lammi huuntugo haaje am. <sup>26</sup> Emo humpaa on boodum on fu, kade bo o toorakeno sanne no nanuodon emo nyawi. <sup>27</sup> E goonja, o nyawiino sanne faa o ɓadii maayugo, amma Alla yurmake mo, kanko tan bane Alla yurmii, baa min Alla yurmake am, gam to mi hebu biisere ɓerne dow biisere ɓerne. <sup>28</sup> Kan wadi, jidum lilugo mo law to moodon, gam ɓerde moodon wela e yi'ugo mo, min bo, biisere ɓerne am buytoo. <sup>29</sup> Cilminee mo e inne Joomiraawo e seyo manjo. Teddinee himbe hande makko, <sup>30</sup> gam der golle Almasiihu o ɓadino maayugo, o hokkii yonki makko der kaliire gam o hebbita ko on baaway wallugo am wadugo.

## 3

### *Goonjaaku,sey der Almasiihu*

<sup>1</sup> Banniraabe am, ko horii wi'ugo on woni: Ceyoree Joomiraawo. Mi somataa maytitaago goota kan der binni am, gam kanjum tabbitinta faamu moodon. <sup>2</sup> Kakkilanee himbe nandube e dawaadi, e gollotoobe hallube, jeeyanbe on juulnaago! <sup>3</sup> Gam enen woni julniibe e goonja, enen saafiroobe Alla e Ruuhu, jurrooibe Yeesu Almasiihu, ɓe koolaaki ko'e mum. <sup>4</sup> Min e hoore am, mi waawanno yowugo hoolaare am dow gadu bannu. Wobbe e mili waawan hoolaago hoore mum, hakko min. <sup>5</sup> Mii julnaado nyaanne jeetatawre, mii Isira'iilaajo yiwudo e lenyol Benyamin, mii Iburaninkeejo bii Iburaninkeejo. Dow wecco tawreeta, mii Farisaajo, <sup>6</sup> ko yaalani tinnaare, mi tooriino eklesiya, dow wecco foonnitaare ko tawaa der sariya, mi walaa gacce. <sup>7</sup> Dum don fu daarunoomi hande riiba, amma jooni mi daarii dum baanji gam Almasiihu. <sup>8</sup> E goonja, mi daarii huune fu baanji, gam mi hebi ko buri dum teddugo, kan woni annugo Yeesu Almasiihu Joomiraawo am. Gam makko, mi majjinii huune fu, daarumi dum hande buuri, gam mi heba mo, <sup>9</sup> mi tawee e makko, hinaa e foonnitaare yiwune diga dowtanaago tawreeta, amma e foonnitaare yiwune diga goondingo Almasiihu, ne Alla hokkata goondinbe. <sup>10</sup> Min kan, sago am woni annugo Almasiihu e baawde pintol mum, mi heba gedu am der toora makko faa mi nanda mo der maayde makko, <sup>11</sup> gam no dum wadi fu, min bo, mi heba yottaago nyalaane pintol maaybe.

### *Doggango far to riiba*

<sup>12</sup> Mi wi'ay mi hebi ko kebal am, naa bo mii kebbudo, amma emi jokki doggudu am gam mi happa ɣal law. Min e hoore am Yeesu Almasiihu happy am. <sup>13</sup> Banniraabe am, min e hoore am, mi wi'ay mi happy ɣal ko, amma ko gadanmi nun: Emi yegita ko yawti, mii foonnani ko woni

yeeso, <sup>14</sup> mii doggana heennyitirde gam mi heba riiba, noddore ne Alla noddi en diga dow kammu gam kawtal men e Yeesu Almasiihu.

<sup>15</sup> To non en fu, enen bennube der goondinki, sey gooden iri miilo ηoo, amma dow gokka, to on goodi miilo wonjo no paamirton, Alla hollan on ko haani. <sup>16</sup> Amma to jottiden do, sey tokken laawol ηol jaheten e mum jooni.

<sup>17</sup> Banniraabe, on fu, yemminee am, daaree wa'ube hande no ji'udon emen laatii. <sup>18</sup> Gam θuuθbe e yaha hande waybe leggal Almasiihu palaanjal, mi batino on ka de θuuθdum, jooni bo, mii batitoo on ka e bojji, <sup>19</sup> heennyitirde maθbe laatoto halkere, deedi maθbe laatii tooruuje maθbe, 6ee juroro ko waddanta 6e senteene, huune duuniyaaru tan 6e mijjanto. <sup>20</sup> Amma enen, dow kammu jeyaden, diga ton kediden Kisinoowo men, Joomiraawo Yeesu Almasiihu wara. <sup>21</sup> Kanko o waylitan galli meeden centiniidi, o nandina di e 6annu makko tedduŋol, o wadaf dūm diga e baawde kokkude mo laamanaago huune fu.

## 4

### Ceyoree kawtalmon e Joomiraawo

<sup>1</sup> Gam majjum, banniraabe am yidaabe, mii woodi kumpa yi'ugo on sanne, onon laatii seyo am, e tuutawal am, tabitee hande nun der kawtal mon e Joomiraawo, onon yidaabe am.

<sup>2</sup> Mii wi'a Ewodi e Sintis 6e gonda der hakkillo wooto gam Joomiraawo.

<sup>3</sup> An gollidoowo e am koolaado, mii eelee ballaa rewbe ben, 6e gollidii e am gam waaju linjiila, kambe e Kelema e gollodiibe e am woθbe, inde maθbe winnaama der dewtere yonki.

<sup>4</sup> Wakkati fu, ceyee der kawtal moodon e Joomiraawo, mii batitoo ka kade, ceyee! <sup>5</sup> Accee himbe fu annita neddaaku moodon. Joomiraawo 6adake warugo. <sup>6</sup> To on accee berde moodon biisoo gam godfum, amma huune fu kollee dum Alla. Du'ee,

eelee, eelitee, jettee Alla. <sup>7</sup> Jam Alla 6urudum faamu fu, reena 6erde moodon e miilooji moodon der kawtal mon e Yeesu Almasiihu.

<sup>8</sup> Banniraabe am, ko horii wi'ugo on woni, miilanee ko laatii gooja, ko foti teddineego, e poonniitiidum, e laabudum, e kaanudum yideego, e ko manetee, e kaanudum yetteego, e ko haani maanteego. <sup>9</sup> Ko janjinmi on jabudon, nanudon, ji'udon e am, golloree dum, Alla mo jam wonda e moodon.

### Pole yetta gam ballal

<sup>10</sup> Mii seyori Joomiraawo sanne, gam on pudditake miilango am. E gooja oon goodunoo miilooji dii dow am, amma on kebayno laawol hollitingo dūm. <sup>11</sup> Hinaa gam dullere acci ko mii bata ka, gam mi ekkitake seyoraago no gonirmi fu. <sup>12</sup> Mii waawi wonaago der dullere, mi waawan bo ko woni der kefal. Der wakkatiiji fu e no dūm laatii fu, mi ekkitake wonaago der haarande e rafo, der goonnan e dullere. <sup>13</sup> Mi waawan ko wadi huune fu, gam sabbu cemmidinoowo am. <sup>14</sup> Amma e nun, on gadii ko woodi, no balludon am der toora am.

<sup>15</sup> Onon 6e Filippi, oon anni no yiwumi Maseduwaan, der wakkati puddumi waajaago linjiila, eklesiya gom hawtay e am dow hokkugo e jaθugo, to hinaa onon, <sup>16</sup> onon tan wallimmi, gam no jahumi Tesonika, on lildii am ballal de dīdi mi huntira haaje am. <sup>17</sup> Dum wi'ay no ballal nun daartanmi, ko daartanmi woni, 6ikkon goondinki moodon 6eydoo faa duuda. <sup>18</sup> Mi hebi ballal moodon ηal lildudon am fu e junno Epaforoditus, ηal heyii am faa 6uri haaje am. ηal laatake hande wardi beldi, hande sadaka, dūm Alla jaθi.

<sup>19</sup> Alla am huunta haajeeji moodon fu, jakgoonnan mum tedduŋal, dūm wadoo der kawtal moodon e Yeesu Almasiihu. <sup>20</sup> Tedduŋal wonanoo Alla Baaba meeden faa abada, Aami!

### Cannojoe

<sup>21</sup> Cannee seniibe hawtube e Yeesu Almasiihu. Banniraabe wondube e am sannii on. <sup>22</sup> Goondinbe wonbe do fu sannii on, wonbe der wuro Kaysara bo sannii on puy.

<sup>23</sup> Moyyere Joomiraawo men Yeesu Almasiihu wonda e moodon!

## Derevol nol Pol winnani 6e Koloosi

### *Haala Puddirkä*

Der wakkati gooti nun Pol winni derewol Koloosi, e nol Efesu. Wanjarde Koloosi tawaaka maa der Turkiya ni jooni. Pol bane titi eklesiya kan, amma gollodintoobe mo gooto mum nun. Epafaras nun waajii 6e linjiila. Wadoto Epafaras nun maatini Pol tooraaji di goondinbe Koloosi woodi, gam wobbe yahit ton e jannina haalaaji di yaaday e linjiila. Kanjum laatii ko wobbe daari annal luggunjal. Ekkitinoje den yiwi diga e Yunaninkeebe, go dum hawrontiri e tawaanjal Yahuduubé, e gadu maabé, hande jon saafugo malaykaabe, e haala juulnol. Boofi janninteedi din e wittina himbe der dowsntanaago tawreeta Muusa. Baawo no Pol sanni 6e hande no o woowi wadugo. O batanii Almasiihu e gollemum. Baawo mum o batanii 6e hawrene o wadata gam linjila yaha yeeso der siire Koloosi e Lawdikiya. Den o wittoy oo batana golle Almasiihu.

### **Tokkontirki haalaaji**

1. Haala puddirkä e cannooje, 1.1-11
2. Manju Almasiihu e golle mum, 1.12-2.19
3. Goonki goondindo laati nun goonki to neddo jey hoore mum 2.20-3.5
4. No goonki kin hollitorto, 3.6-4.6
5. Cannooje, 4.7-23.

### *Sannoore*

<sup>1</sup> Min Pol, mii laatii lilaado Yeesu Almasiihu e sago Alla. Min e banniraawo meeden Timote, <sup>2</sup> men cannii on onon himbe Alla wonube Koloosi, banniraabe men hoolaabe der kawtal mum e Almasiihu. Alla Baaba meeden wadana on moyyere, hokka on jam!

### *Pole yetta Alla gam 6e Koloosi*

<sup>3</sup> Wakkati fu, emen du'anoo on, emen jetta Alla, Baaba Joomiraawo

meeden Yeesu Almasiihu. <sup>4</sup> Men nanii habaru goondinki moodon dow Yeesu Almasiihu e batane, e yidde ne goodudon dow himbe Alla fu. <sup>5</sup> Oon goodi dum gam oon kedii ko Alla resani on dow kammu. Oon kedii ko Alla resani on gam on nanii haala goonjakuwa, yiwuka e linjiila. <sup>6</sup> Linjiila kan yottake on, e rima bikkon, e sankitoo, e laya der duuniyaaru fu. Hande non dum laatii to moodon onon bo, diga nyaanne nanudon, ko paamuudon moyyere Alla e goona. <sup>7</sup> Epafaras banniraawo amen jidaado, gollodintoodo e amen, waajike on haala moyyere nen. Oo laatii koolaado, gollantoodo Almasiihu caka moodon. <sup>8</sup> O batii men bo yidde ne Ruuhu Ceniido watti der berde moodon.

<sup>9</sup> Gam majjum, menen bo, diga men nani ka, men accay du'anaago on. Emen eela Alla hokka on hakkillo fu e faamu yiwuñu diga e Ruuhu mum. Den on kebban annal sago makko faa wooda. <sup>10</sup> Hande non, on buuran der goonki pottananki Joomiraawo der huune fu. On tabitinto wadugo ko woodi feere feere, on beydoto annugo Alla. <sup>11</sup> Emen eela Alla hokka on semme, e baawde mum teddude, gam baawon tinnaago, e munyangó huune fu. <sup>12</sup> Jetee Alla Baaba e seyo, gam o wadii on fotube hebugo gedu der moyyereeji di o resani himbe makko, gonudi der jaynjol. <sup>13</sup> Kanko teeti en e baawde niwre, naanni en der Laamaare Biyiko jidaado. <sup>14</sup> O sooditake en, o yaafii hakkeeji meeden.

### *Tedduñal Almasiihu*

<sup>15</sup> Biidso on nun laatii nandi Alla moyi'ataake. Kanko woni afo, burudo huune ko tagaa fu. <sup>16</sup> E makko Alla tagiri huune fu, ko woni dow kammu, e ko woni e leydi, ko yi'etee, e ko yi'ataake fu, laamuji, e baawdeeji, e semmeeji, e hoorejum fu, diga e makko dum fu dum tagaa, e gam makko bo. <sup>17</sup> Almasiihu na'on diga huune fu tagaaka, huune ko woni fu, diga e makko dum woni. <sup>18</sup> Kanko

woni hooreejo Eklesiya laatiika bannu makko. Kanko woni fuđđode, oo laatti arano dow fintoođe diga maayde, gam o laatoo arano dow huune fu. <sup>19</sup> Gam dum fottanii Alla ko woni der mum fu wonoo der Almasiihu. <sup>20</sup> E Almasiihu nun o weldiniri huune fu e makko, ko woni dow kammu, e ko woni der leydi fu. O waddii jam, sabbu yiyyam Almasiihu deyyitiidam dow leggal palaanjal.

<sup>21</sup> Naane, oon boddodinoo e Alla, oon laatinoo waybe makko, gam miilooji moodon kalludi, e golle moodon bonde. <sup>22</sup> Amma jooni, Alla weldinii on e muudum diga e maayde Biyiko laatiido neddo, gam darodon yeeso makko oon laatii seniibe, laabube, be walaa gacce. <sup>23</sup> Amma, sey tiidon, darodon e semme der goondinki, laatodon be dimmataako. To on boddodee e linjiila, laatiika tammuwe meeden. Linjiila ka nanudon, waajaama der duuniyaaru do. Min Pol, kanka nun laatiimi gollotoodo mum.

### Golle Pol caka goondinbe Yeesu

<sup>24</sup> Jooni, berne am e weli gam tooraaji di kebammi gam moodon. Hande non, kebbiniranmi ko horii der tooraaji Almasiihu gam bannu mum, laatiijol eklesiya makko. <sup>25</sup> Eklesiya kan nun laatiimi gollotoodo mum. Alla yowanii am golle waajaago on haala mum deydey no ka wa'i. <sup>26</sup> Kanjum woni asiiri cuudaninoodo himbe diga den, der jaamanuuji duuddi, amma jooni, Alla hollitii dum himbe mum. <sup>27</sup> Gam Alla e yidi anningo himbe be lenyi janani manju asiiri mum teddudo. Asiiri on woni, Almasiihu na'on der moodon. Kanko hokki on tammuwe hebugo gefu der teddujal Alla. <sup>28</sup> Almasiihu on nun men piinata haala mum. Emen baajoo himbe fu, emen janjina be e hakkillo fu, gam men jottina moy fu yeeso Alla e hebbi der kawtal mum e Almasiihu. <sup>29</sup> Kanjum acci mii golloo, mii haba diga e baawde

Almasiihu gollotoode e semme der am.

## 2

<sup>1</sup> Mii yidi anningo on hawre mawne ne kabammi gam moodon, e gam banniraabe meeden wonube Lawdikiya, e wobbe be meeday yi'ugo am e gite muudum fu. <sup>2</sup> Mii wada dum, gam be keba cuusal, be kawta der yidde, be keewa hakkillo hebbuňo, be paama asiiri Alla cuudiido, kan woni Almasiihu. <sup>3</sup> Der makko nun jawdi ni faamu e annal fu suudii.

<sup>4</sup> Mi batii ka, gam to godđo majjin on e haalaaji beldi. <sup>5</sup> Bannu am e woddodii on, amma hakkillo am e wondi e moodon. Berne am e weli gam foonnaare tawaane caka moodon, kade bo oon darii dow goondingo Almasiihu e semme.

### Wonaago goonki kesi e Almasiihu

<sup>6</sup> Jooni, no on jađii Yeesu Almasiihu laatoo Joomiraawo moodon, tokkee mo. <sup>7</sup> Gadee dadi der makko, mahee goonki mon bo dow makko. Cemmidee der goondinki hande no janniniradon, jettee Alla puy.

<sup>8</sup> Kakkilee gam to godđo yoyra on e annal luggunjal. Kakkilanee bo haalaaji majjinooji, yiwdi e tawaanjal himbe, naa bo e semmeeji duuniyaaru. E Almasiihu bane dum yiwi. <sup>9</sup> Gam ko woni der Alla fu e yi'oo der bannu Almasiihu. <sup>10</sup> Onon bo, on kebii huune fu der kawtal moodon e makko, kanko laatii hooreejo laamuji, e baawdeeji fu.

<sup>11</sup> Der kawtal moodon e Almasiihu, on kebii juulneego. Amma juulnol ñol himbe wadata bane. Juulnol yiwuñol e Almasiihu nun. Nol laati nun hande moytugo baawde hakke jaaliide galli moodon. <sup>12</sup> Diga e batisi, on uwidaama e Almasiihu, on pintidinaama bo e makko, gam on goondinii baawde Alla pintinde mo e maayde. <sup>13</sup> Onon, on maayino gam boofi moodon, e gam on juulnaaki. Amma Alla wuurdinii on e Almasiihu, yaafi boofi meeden fu. <sup>14</sup> O moytii dferewol nyamaane men, gaccotonoo ñol en. O ikkinii ñol, o

tiggi dow leggal palaanjal. <sup>15</sup> O bortii laamuuji, e baawdeeji fu, o sentinii dī yeeso himbe fu. Alla jaalorii dī e maayde Almasiihu.

<sup>16</sup> Gam majjum, to on nootee goddo gacoo on dow ko nyaamoton e ko jaroton, dum bo dow hakkilango nyalaade juulde, e lebbi, maa bo dow nyalaade ciwteteeede. <sup>17</sup> Dum fu, kollitoojum ko waroya nun, goonja majjum fu der Almasiihu nun woni. <sup>18</sup> To on accee wadoobe hande e buyti ko'e mum, ko bee caafa malaykaabe majjina on. Koyfaali maabbe be tokkii, bee mawnito dow baanji, gam miilooji maabbe be tokkii. <sup>19</sup> Be kawtay e Almasiihu laatiido hoore. Kanko nun hokkata bannu fu ko haajaa, kanko acci jokkule e dadi fu e hawti. Kanko bo acci bannu e mawna no Alla yidiri.

### *Maayidingo e wuuringo e Almasiihu*

<sup>20</sup> On maayidii e Almasiihu, burtidon e baawdeeji duuniyaaru. Den, ume wadi ko oon nyaama goonki mon hande woniibe der baawdeeji duuniyaaru? Ume wadi ko oon nooto downtanaago bodaaji himbe resanta on: <sup>21</sup> «Taa ettu dum do, taa mettu dum to, taa meemu dum do?» <sup>22</sup> Bodaaji dii fu laati nun nyolooji, janjinol himbe tan nun. Alla tagii kujje fu gam naftoroden de. <sup>23</sup> Goonja nun, sujidango baawdeeji, e buytugo hoore mum, e toorugo bannu mum puy, e nandi ko woodi. Amma, dum don fu nafataa godsum, suuno bannu tan dum deyyitinta.

## 3

<sup>1</sup> Onon, on pintidinaama e Almasiihu. Gam majjum, daartee kujje gonude dow kammu to Almasiihu joodii nyaamo Alla. <sup>2</sup> Miilanee kujje gonude dow kammu, to on kakkilanee kujje de leydi. <sup>3</sup> Gam on maayi, yonki moodon na'on suudi e Almasiihu to Alla. <sup>4</sup> To Almasiihu laatiido yonki moodon suppitoryke, on cuppitinto e makko onon bo e teddujan.

*Goonki kesi e kiikki*

<sup>5</sup> Gam majjum, baree suunooji duuniyaaru gonudi der moodon, hande jon, baadi jayni, e cobudum, e yidde baanjaare, e suunooji kalludi, e suuno woodugo huune fu. Dum don fu, laati nun caafol tooruuje. <sup>6</sup> Kanjam waddata mone Alla dow saliibe ko downtanii mo. <sup>7</sup> Onon bo, hande non nyaamirnodon goonki mon naane, de gonunodon der hakkeeji mon.

<sup>8</sup> Amma jooni, boppee kujje dee do: mone, e bernugo, e haadugo reedu, e jennooje, e batugo kalluka. <sup>9</sup> To on pewontiree hakkune moodon, gam on boppiai jikku mon kiinju, e golle mum fu. <sup>10</sup> On laatike himbe heybe. Alla tagudo huune kesum der moodon, accataa waylitingo dum, faa dum nanda e makko, gam kebon annual kebbuujal. <sup>11</sup> To non, walaa ko suttontiri Yahudujo e mo laataaki Yahudujo, juulniido e mo juulnaaki, janjudo e mo jannay, maccudo e dimo, gam Almasiihu nun laatii huune fu, e der moy fu.

<sup>12</sup> Alla subii on laatini on himbe mum yidaabe. Gam majjum, goodee yurmeene mawne, e neddaaku, e buytugo hoore, e diggere, e munyal. <sup>13</sup> Munyontiree hakkune mon. To goddo woofanii bannun, jaafontiree hande no Joomiraawo yaaforanii on. <sup>14</sup> Ko buri dum fu, accee berde moodon hebba yidde, gam yidde e hawta himbe no woodi. <sup>15</sup> Accee jam Almasiihu laamanoo miilooji moodon, kanjam Alla noddani on, gam laatodon bannu gootol. To non, jettee mo. <sup>16</sup> Accee haala Almasiihu hebba e moodon faa wooda. Janjinontiree, tiidinontiron e hakkillo. Jimanee Alla e berde moodon fu, jettee mo e jimi jabuurraaji, e maantooje, e jimi dī Ruuhu Ceniido hokkata on. <sup>17</sup> Ko batoton e ko gadoton fu, gadee dum e inne Yeesu Joomiraawo. Jettee Alla Baaba meeden diga e makko.

*No haani goondinbe Almasiihu wonoro*

**18** Onon rewþe, downtanee worþe moodon, hande no haani rewþe tokkuþe Joomiraawo wonira.

**19** Onon worþe, jidee rewþe moodon, to on monnanee þe.

**20** Onon sukaabé, downtanee saareeji moodon dow huune fu, gam kanjum fottanta Joomiraawo.

**21** Onon saareeji bo, to on monninee sukaabé moodon, gam to berde maþþe biisoo.

**22** Onon maccubé, downtanee joomiraabé moodon þe duuniyaaru do, dow huune fu, hinaa yeeso maþþe tan, gam himþe yetta on. Ko haani nun, jagganodon þe e berde laabude, der kulol Joomiraawo. **23** Ko gadoton fu, gadee dum e berde goote, gam Joomiraawo nun jaggantodon, himþe bane. **24** Annitee Joomiraawo hokkan on riiba ka o resani himþe makko. Gam Joomiraawo mo jaggantodon woni Almasiihu. **25** Gadoowo ko halli fu, heþan riiba golle mum kallude, gam Alla 6urontirtaa himþe.

## 4

**1** Onon joomiraabé, gadanee maccubé moodon ko woodi, ko foonnitii. Annee onon bo oon goodii joomiraawo dow kammu.

### *Haalaaji cakitiidí*

**2** Tinnee der du'aare, deenee, oon jetta Alla. **3** Du'anee men menen bo, gam Alla maþbitana men laawol fiinugo haala mum, gam mi waawa ko waajii asiiri Almasiihu. Sabbu majjum nun acci jooni, mii maþbaa der kasu. **4** Eele Alla gam mi waajoo asiiri on hande no haaniri.

**5** Kakkilanee gondal mon e himþe þe goondinay. De keþudon wakkati fu, nafitoree ki. **6** Sey wakkati fu haala moodon e laatii belka, nafoowa. Annee bo no toontortodon moy fu.

### *Baynaade*

**7** Tikikus, banniraawo meeden jidaado, humpitan on no gonirmi fu. O laati nun koolaado, gollodintoodo men der golle Joomiraawo. **8** Mi lilii mo to mon gam majjum, heþa annon no men goniri, hakkillo moodon

fukkoo. **9** Mi lilidii mo e banniraawo meeden Onesimu jidaado, koolaado, neddo leydi moodon. Be batan on ko wadotoo do fu.

**10** Aristarkus mo mabbidaami e sanna on, e Marku dendiraawo Barnabas mo bi'umi to warii to moodon, jaþbodon dum no woodi. **11** Yeesu noddeedo Yustus bo e sanna on. Kambe tan laatii Yahuduubé gollodiibé e am der Laamaare Alla. Be cemmidinii am sanne.

**12** Epafaras, neddo leydi moodon, gollantoodo Yeesu Almasiihu, e sanna on. Wakkati fu, o accay haþugo gam moodon der du'aaje makko. O eela heþa cemmidon der goondinki, kebbinon sago Alla. **13** Mii seedanoo mo dum, oo hiinnanii on sanne, onon e þe Lawdikiya, e þe Hiyerapolis fu. **14** Luka lokotoroojo men jidaado, e Demas sannii on.

**15** Emen canna banniraabé meeden wonubé Lawdikiya. Emen canna bo Nimfa, e goondinþe hawritintoobe wuro makko fu. **16** To on janjii derewol þol, gadee no gadoton fu, faa himþe eklesiya Lawdikiya bo janja þol. Onon bo, janjee derewol þol þe lildanoyta on diga Lawdikiya. **17** Batee Arkippus tinnoo wada golle de Joomiraawo yowani dum no woodi.

**18** Min Pol, mi winnanii on sannoore ne e junþo am. To on jeggitee e callalluuji nun gonumi.

Moyyere Alla wonoo e moodon!

## Derevol didabol njol Pol winnani 6e Tesalonika

### *Haala Puddirkä*

Pol, e Silaasi, e Timote nun hawti winnani 6e Tesalonika derevol njol. Siire Korintu 6e goni, diga ton nun 6e binni njol. Pol yetti goondinbe Tesalonika puy, sabbu goondinki mabbe e no 6e tinnorii baa der tooraaji mabbe. O moyyinii boofol dow no 6e kedorii wittoyo Joomiraawo.

Sabbu tooraaji di 6e tooretee, 6e Tesalonika e miili nyalaane darjal nun yottii. Pol batii 6e no nyalaane nen warataa to neddo kalludo artay wari. To o warii, o habidan ko wi'etee Alla fu, e ko teddintee dow laawol diina fu.

Der hoore 3, 6aawo no Pol eeli 6e du'anoo düm, o eelii 6e 6e boddodoo e himbe 6e yidaa gollaago, gam bee miila no der wakkati cakitiiki nun 6e gonii. O batii 6e o wi'i: «Mo gollaaki haanay nyaama».

### *Tokkontirki haalaaji*

1. Haala puddirkä, 1.1-2
2. Pol manii himbe Tesalonika, du' anii 6e, 1.3-12
3. Ekkitinol dow wittoysi Almasiihu, 2.1-17
4. No haani goondinbe yahira, 3.1-15
5. Haalaaji cakitiidi e cannooje, 3.16-18.

### *Sannoore*

<sup>1</sup> Derevol njol yiwi diga e Pol, e Silaasi, e Timote. Emen canna eklesiya Tesalonika, kawtuka e Alla Baaba meeden, e Joomiraawo meeden Yeesu Almasiihu. <sup>2</sup> Alla Baaba, e Yeesu Almasiihu Joomiraawo, hokka on moyyere e jam!

### *Goondinki 6e Tesalonika*

<sup>3</sup> Banniraabe, e haani men jetta Alla wakkati fu gam moodon. Edum fotti, gam goondinki moodon e 6eydoo yeeso yeeso, kade bo yidde ne goodontirson hakkune moodon e 6eydoo der moy moodon. <sup>4</sup> Kanjum

acci emen juroro on der eklesiyaaji Alla. Emen juroro munyal moodon, e goondinki moodon, der tooraaji di tooretedon, e billaaje de munyanton.

<sup>5</sup> Tooraaji din laati nun ko hollitinta kiita Alla poonniitika, gam laatodon fotube naatugo der Laamaare Alla, ne gam mum tooretedon. <sup>6</sup> Gam edum foonnitii yeeso Alla, o yoba tooranbe on, toora. <sup>7</sup> Onon too-rootooobe, o hokkan on siwtaare e amen. Dum laatoto to Joomiraawo meeden Yeesu gonudo dow kammu suppityke e malaykaabe mum 6e baawde. <sup>8</sup> Nyalaane majcum, o suppittinto der dennjal yiite, gam o fooda noppa 6e annaa Alla, e 6e dowsanaaki linjiila Joomiraawo men Yeesu. <sup>9</sup> Poodol mabbe noppa e foonnitii, halkere tabitiine nun, 6e boddodinto e Joomiraawo e teddujal baawde mum. <sup>10</sup> Dum laatoto der nyalaane ne o wittopta. Den himbe makko tedinan mo, goondinbe mo fu haaynee gam makko. Onon bo, on gonoto caka mabbe, gam on goondinii waaji men baajii on.

<sup>11</sup> Gam majcum emen du'anoo on wakkati fu. Emen eela Alla meeden laatina on fotube noddoore ne o noddi on. Baawde makko hokka on semme hebbinga golle boodude de jidudon wadugo fu, gam on goondinii mo. <sup>12</sup> Hande nun inne Joomiraawo meeden Yeesu tedinirtee der moodon, onon bo, tedinon gam makko. Dum fu, gam moyyere Alla meeden, e Yeesu Almasiihu Joomiraawo.

## 2

### *Nyalaane Joomiraawo*

<sup>1</sup> Banniraabe, dow garki Joomiraawo meeden Yeesu Almasiihu, e no kawritirteken e makko, nani do ko men eelata on: <sup>2</sup> To on accee hakkillo moodon jiboo law. To on accee bo goddo huunna on der annabaaku mum, dum bo der haala mum, dum bo goddo wi'a, men binnii ka der derevol amen no nyalaane Joomiraawo warii ko. <sup>3</sup> To on accee goddo yoyra on baa dow laawol njole.

Gam nyalaane nen warataa to hinnaa himbe duubbe yeddi Alla, neddo kalludo, laatiido bii halkere suppitoo. <sup>4</sup> Ganyo on mawnitinto dow huune fu ko saafetee e noddee Alla, o yahan faa o joodoo der suudu Alla, o wi'a hoore makko, kanko woni Alla.

<sup>5</sup> Mi batiino on ka wakkati gonnoomi to moodon, on ciwtoray na? <sup>6</sup> Jooni kan oon anni ko faddii mo warugo. Amma o hollitinto to wakkati makko wadii. <sup>7</sup> Gam baawde hakke cuudiide e golloo ko diga jooni. Amma paddiido de na'on taw. To o yawtii, den <sup>8</sup> neddo kalludo on suppintoo. Amma Yeesu Joomiraawo waran mo e foofaanjo hunnuko mum, halka mo e jaynjol garki mum. <sup>9</sup> Neddo kalludo on waridan e baawde Seydan, o wadan kaayeefiji, e maaneeji, e kaayeefiji fewrekuuji. <sup>10</sup> O eytan halkoobe e hakkeeji diye fu. Be majjan, gam be jiday goonja kaa do hisinta be. <sup>11</sup> Gam majjum Alla lildanoya be baawde majjinooje, heba be goondina fewre. <sup>12</sup> O wadan dum gam o hiitoo be goondinay goonja, go bee ceyoroo ko foonnitaaki.

### Semmidingo der goondinki

<sup>13</sup> Banniraabe, yidaabe Joomiraawo, menen, doole men jetta Alla wakkati fu gam moodon. Alla subii on diga fuddoode, gam kison diga e Ruuhu Ceniido laabindo on, gam on goondinii goonja. <sup>14</sup> Kanjum Alla noddani on diga e linjiila ka men baajii on, gam kebon teddujal Joomiraawo meeden Yeesu Almasiihu. <sup>15</sup> Gam majjum banniraabe, tabitee wakkati fu, jogee ko men ekkitini on e haala, dum bo e dereeji amen.

<sup>16</sup> Joomiraawo meeden Yeesu Almasiihu e hoore mum, e Alla Baaba meeden, jidudo en, hokkii en moyyere mum e jam tabitiido, e tammuwe woodune. <sup>17</sup> Be deyyitina berde moodon, be tiidina on wadugo, e batugo ko woodi.

### 3

#### Du'anee men

<sup>1</sup> Banniraabe, ko horii woni, du'anodon men gam haala Joomiraawo sankitoo law, ka teddinee bo hande to moodon. <sup>2</sup> Du'ee gam men dada himbe be walaa ko'e, bonbe. Gam himbe fu bane goondini.

<sup>3</sup> Amma Joomiraawo e latii koolaado, o semmidinan on, o reena on e ganyo. <sup>4</sup> Gam daliila Joomiraawo, emen koolii on, oon tokki umurooje de men umuri on, on tokkoto de bo yaago.

<sup>5</sup> Joomiraawo acca berde moodon yida Alla, munyon hande no Almasiihu munyiri!

### Moyfu golloo

<sup>6</sup> Banniraabe, emen eela on e inne Joomiraawo meeden Yeesu Almasiihu, boddodee banniraabe be walaa gadaanjal, be tokkay ko men ekkitini on. <sup>7</sup> Onon e ko'e moodon, oon anni no haani yemminiron men, gam men gonday e moodon der dullere gadaanjal. <sup>8</sup> Walaa mo men nyaami nafa mum baanji. Jemma e nyalooma fu, men gollike e comuri, gam to men laatano goddo mon doongal. <sup>9</sup> Men baawanno ko eeli on nyaamdu, amma men gaday dum. Men gollike e ko'e amen gam men laatano on misaalu, gam yemmenen men. <sup>10</sup> Gam wakkati men gonunoo to moodon, men batiino on, men bi'i: «Mo yidaa gollaago fu, to nyaamu bo.»

<sup>11</sup> Gam men nani wobbe caka mon yidaa gadaanjal, sey naatugo haalaaji di yaalay dum. <sup>12</sup> Emen eela iri himbe ben, emen bata be e inne Joomiraawo meeden Yeesu Almasiihu, be golloo e jam, gam be nyaanna ko'e maabbe.

<sup>13</sup> Amma onon banniraabe, to on comee wadugo ko woodi. <sup>14</sup> To goddo salike ko dowlanii ko men binni der derewol ηol, maanee joomum, boddodon mo, gam o senta. <sup>15</sup> Amma, to on daaree mo hande ganyo, bagginee mo hande banniraawo.

### Cannoje

<sup>16</sup> Joomiraawo mo jam e hoore mum hokka on jam wakkati fu, e

der noy fu. Joomiraawo wonda e moodon, on fu.

<sup>17</sup> Min Pol winni e junjo am san-noore ne, hande non boowirmi wat-tirgo dereeji am fu junjo.

<sup>18</sup> Moyyere Joomiraawo meeden Yeesu Almasiihu wonda e moodon, on fu!

## Derevol aranol ηol Pol winnani Timote

### *Haala Puddirka*

Pol nanjaanoma, maabaa der Roma, Golle Lilaabe 28. Der dereeji makko goddi, o batii ko nandi hande o yoofit-inteno, Filippi 1.25; 2.24; Filemon 22. No o yoofitaa bo, o fuddii golle boosaade makko. Diga Maseduwaan o winnani Timote jisaado makko, mo o gollodintoo. O batii mo o joodoo Efesu gam o semmidina goondinbe, o jannina be bo. Haani o janjina puy, gam waajotoobe fewrekuube na'on e waajoo haalaaji di walaa hoore e luudontirdi e goondinki. E woodi o jannina, gam ekkitinol goonjawol nun accata eklesiya daroo to laabi.

Derevol Timote aranol ηol e holla ko haani accen e ko haani gaden der joonne men. Enol holla bo no haani laawol foonnitaare tokkiree der eklesiya. Enol jannina en bo ko woodi.

Derevol ηol e batana bo du'aare e no haani worße e rewße wonße der eklesiya. Pol e holla no haani ardiibe eklesiya e walooobe dum e laatii. Baawo mum, oo bata Timote takkoo Alla e gollal janninol.

Der wecco didabo, Pol e hokka himbe gebe feere feere wonbe der eklesiya saawari, hande jon: gawniibe, e ardiibe, e joomiraabe, e maccube, e jom jawdiibe.

Derevol ηol e walla en annugo no eklesiya resirnoo laabi dow ardaajal. Ardiibe duubbe nun woni der eklesiya. No haani be cubiree batanaamaa, golle maabbe bo batanaamaa. Gawniibe wobbe, go be daaree gawniibe e goonja, sey be jottoo jaka duubi gom. Haala janninol semmidinaama, gam haani goonja janninee faa laaba, gam habidingo boofi beydotoodi duudugo.

### **Tokkontirki haalaaji**

1. Haala puddirka 1.1-2
2. Ekkitinol dow eklesiya e duroobe makka, 1.3-3-16

3. No haani Timote gollira, 3.17-6.19
4. Haalaaji cakitiidi e cannooje, 6.20-21.

### *Sannoore*

<sup>1</sup> Derevol ηol yiwi e am min Pol lilaado Yeesu Almasiihu. Alla Kisi-noowo en e Yeesu Almasiihu laatiido tammuwe men, yowanimmi dum junjo.

<sup>2</sup> Emi sannee Timote, 6iyam goonjaajo, mo dimumi dow laawol goondinki. Alla Baaba meeden, e Joomiraawo meeden Yeesu Almasiihu endee, hokkee moyyere e jam.

### *Ekkitinolfewrekuwol*

<sup>3</sup> Wakkati jahannomi Maseduwaan, mi batiino maa joododaa Efesu. Himbe wobbe na'on don e jannina ekkitinol feerewol. Hadu be dum. <sup>4</sup> Batu be be acca hakkilango taalaaji e inde kaakiraabe de walaa kaddi. Jeddi tan dum wadata, dum nafataa laawol ηol Alla hisinirta himbe e goondinki. <sup>5</sup> Ka batanmi do laati nun gam mawningo yidde yiwune diga berne laabune, e milooji laabudi, e goondinki ki walaa munaaftitaare. <sup>6</sup> Wobbe seekake e majcum, be majjii der haalaaji baanji baanji. <sup>7</sup> Bee jidi laataago moodibbe tawreeta, amma be paamataa ka be batata, e ka be tabbitinta.

<sup>8</sup> Een anni tawreeta e woodi, to kaa golliree hande no haani. <sup>9</sup> Een anni no tawreeta wadaaka gam foonnitiibe. Amma ka wadaama gam hallube, e nanaruube, e be hulataa Alla, e hakkeebé, e be ted-dintaa ko senii, e yawiibe Alla, e waroobe baabiraabe e inniraabe mum, e reyyitoobe yiiyam himbe. <sup>10</sup> Ka wadaama bo gam jeenoobe, e wadoobe jeenu gorko e gorko, non bo debbo e debbo, e sippoobe maccube, e fewoobe, e hunortoobe fewre, e huune duuddsum, luudontirdsum e ekkitinol goonjawol. <sup>11</sup> Ekkitinol ηol e yaada e linjiila ka jowanaami. Eka hollita teddujal Alla maanteteedo.

*Yettoore gam endam Joomiraawo*

<sup>12</sup> Mii yetta Joomiraawo meeden Yeesu Almasiihu, kokkudo am semme. Mii yetta mo gam o daarii am koolaado, o yowanimmì golle makko. <sup>13</sup> Mii laatino batoowo kalluka dow makko. Mii toorannoo himbe makko, mi holliino mo gite bodeeje. Amma Joomiraawo meeden endike am. Mi annaano ko gadannoomi, gam mi goondinayno. <sup>14</sup> Moyyere Joomiraawo duudanii am puy. O hokkii am goondinki e yidde yiwune diga e Yeesu Almasiihu. <sup>15</sup> Haala kooliniika nani, kaanuka himbe fu jaba: Yeesu Almasiihu warii e duuniyaaru gam hisingo hakkeebe. Mii laatii arano caka maabbe. <sup>16</sup> Amma Alla endake am gam Yeesu Almasiihu hollita munyal mum dow am, min laatiido arano caka hakkeebe. Yeesu on wadii dum gam mi laatanoo goondinoobe mo, heboobe yonki tabitiiki fu misaalu. <sup>17</sup> Alla gooto woni, laamiido tabitiido, mo maayataa, mo yi'ataake bo. Daraja e teddunjal woodani mo faa abada abadin. Aami!

<sup>18</sup> Biyam Timote, saawari kokku maa mi nun don, jaadooki e annabaakuuji gadanoodi dow maa. Accu di laatanee gineiji gadiraa konu geetu. <sup>19</sup> Joga goondinki e cuudiidum berne geetum. Woobbe hakkilanay dum, go goondinki maabbe halki. <sup>20</sup> Himeneyus e Aleksandire na'on caka maabbe. Mi wattii be e junjo Seydan gam be annita no haanay be bata kalluka dow Alla.

## 2

### Du'anaago himbe fu

<sup>1</sup> Ka batanmi on aran nani: Eelee, eelitee. Du'ee, jettee Alla gam himbe fu. <sup>2</sup> Du'anee laamiiibe, e mawbe leydi fu. Du'ee gam gonoden e jam, e deyyere der kulol Alla, heba himbe dowtanoo neddaaku men. <sup>3</sup> Kanjum woodi, edum fottani Alla kisinoowo en. <sup>4</sup> Oo yidi himbe fu hisa, heba be jottoo annal goonja. <sup>5</sup> Alla gooto nun woni. Tawaado hakkune makko e himbe bo gooto nun, kanko woni Yeesu Almasiihu, laatiido neddo. <sup>6</sup> O

hokkitirii hoore makko gam sooditaago himbe fu. Non Alla hollitiri laawol nol o subi no wakkati mum wadi. <sup>7</sup> Gam mi batana dum, Alla wadimmi baajotoodo e lilaado. O yowanii am mi jannina himbe be lenyi janani haala goondinki e goonja. Goonja batammi, mi fewataa.

<sup>8</sup> Gam majjum, mii yidi worbe du'oo nokku fu, be banta juude maabbe. Be gada dum e berde laabude, hinaa e tikkere, hinaa e jeddi.

<sup>9</sup> Rewbe kan bornoo gineiji pottudi. Be gooda neddaaku e senteene. To be mooro moordi di gidi e kanjeeri, e bannaaje de cardi. To be borna gineiji di ceede puy. <sup>10</sup> Amma nari maabbe laatoo wadugo gadu geetu. Hande nun haanirani rewbe batoobe no e teddini Alla. <sup>11</sup> To e janninee, sey rewbe jeedoo, e hettinii e dowtaare. <sup>12</sup> Mi hokkay laawol, debbo janjina, dum bo laatoo hooreejo dow gorko. Ko haani nun o jeedoo. <sup>13</sup> Gam Aadamu nun artaa tagaa, ko Hawwa tokki. <sup>14</sup> Kade bo Aadamu bane Seydan jarbii, debbo nun jarbaa, go o yaartii sariya Alla. <sup>15</sup> Amma debbo hisinte diga e beyju mum, to emo tabbitii e goondinki e yidde, e laabal, e jogaago hoore mum.

## 3

### Hooreebe Eklesiya

<sup>1</sup> Haala kooliniika nani: Jiddo laataago hooreejo eklesiya fu, yidii golle boofude. <sup>2</sup> Den, sey ardiido eklesiya fu laatoo mo walaa gacce. O laatoo goodudo debbo gooto, nantiido, mo hakkillo, goodudo neddaaku, cilminoowo hobbe, baawudo ekkitingo. <sup>3</sup> Taa o laatoo jaroowo bagi, dum bo kabado. Amma o laatoo munyudo, daartoowo jam, mo suunaaka ceede. <sup>4</sup> O laatoo ardanido saare makko no woodiri. O elta bibbe makko faa be dowtanoo mo, be teddina mo. <sup>5</sup> Gam to goddo waaway ko ardanii saare mum, noy o waawirta ko hiinnii eklesiya Alla? <sup>6</sup> Haanay hooreejo eklesiya e laatii goondindo keso. To oo laatii keso,

o mawnitinto, o doyyee kiita hande no Ibiliisa doyyiraa kiita. <sup>7</sup> E haani joomum e batanee geeta yeeso himbe be goondinay. Den be jawataako mo, o yantataa bo der pitti Ibiliisa.

### *Walloobe der golle Eklesiya*

<sup>8</sup> Wallooobe der golle eklesiya bo, e haani laatoo fotube teddineego. Be galaa munaafitaare, be jarataa bagi jilloomjam. To be laatoo daartoobe ceede e laabi kalludi. <sup>9</sup> Sey be jogoo goonja goondinki ka Alla hollii. Be jogoo ka e cuudiidum berne laabudum. <sup>10</sup> Sey be poonnee taw. To be galaa gacce, be pudda golle maabbe. <sup>11</sup> Hande non rewbe bo, sey be laatoo fotube teddineego. Haanay be laatoo nyo'oobe himbe, amma be laatoo nantiibe, hooliniibe der huune fu. <sup>12</sup> Laatiido balloovo eklesiya fu, sey joomum e woodi debbo gooto. O waawa bo dawrango biibbe makko, e wuro makko hande no haani. <sup>13</sup> To wallooobe der eklesiya wadii golle mum no woodiri, be keban joonne teddune. Be keban bo semme der goondinki maabbe Yeesu Almasihu.

### *Asiiri kollitaaki*

<sup>14</sup> Mi winnanii maa derewol nol do, amma mii mila warugo to maada, yeeso sedda. <sup>15</sup> Amma to booyii mi waray, derewol nol do anninte no haani goniraa der saare Alla, laatiine eklesiya Alla yonkinteejo. Eklesiya kan laatii darmanal, e to goonja darii. <sup>16</sup> Seko fu walaa, asiiri diina meeden e mawni:  
Alla hollitake e bannu neddo,  
Ruuhu seedanike goonjaaku makko,  
malaykaabe yi'ii mo,  
lenyi fu waajaama haala makko,  
o goondinaama der lenyi janani,  
o hebii teddujal dow kammu.

## 4

### *Ekkitinoobe pewe*

<sup>1</sup> Ruuhu Ceniiido batii e laabudum wi'i: Der jaamanuuji cakitiidi, wobbe woppan goondinki. Be dowlanto ruuhuuji majjinooji, e ekkitinoobe ginnaaji. <sup>2</sup> Be accan ekkitinoobe

munaafitiibe e fewoobe majjina be. Cuudiidum berde ekkitinoobe pewe den maanaama e fewre, nandi hande cumaadum e janni bodeeri. <sup>3</sup> Bee kada himbe baontirgo, e nyaamugo nyaamduuji goddi. Amma Alla tagi nyaamduuji din. Goondinbe, annube goonja fu, waawan ko yetti Alla, nyaama di. <sup>4</sup> Ko Alla tagi fu e woodi. Walaa ko woppetee e majjum, to en jaabii dum e yettoore. <sup>5</sup> Gam haala Alla, e du'aare, e laabina huune fu.

### *Gollantoodo Yeesu geeto*

<sup>6</sup> Ekkitin banniraabe huune dum. Den a laatoto gollantoodo Yeesu Almasiihu geeto. A nyaannan hoore maa e haala goondinki, e ekkitino ol poonnitiijol nol tokkudaa e tinnare. <sup>7</sup> Haalaaji di walaa hoore, e taalaaji di himbe tafi, di jaadataa e goondinki, sala di. Amma an, eltu hoore maa aa takkii Alla. <sup>8</sup> Eltugo bannu e nafa sedda dow kujje godde. Amma takkaago Alla e nafa dow huune fu. Edum woodi alkawal der goonki duuniyaaru do, e der goonki garoowi yeeso. <sup>9</sup> Kanka woni haala kooliniika, kaanuka himbe fu jaaba! <sup>10</sup> Gam sabbu dum don fu, emen golloo emen duura, gam men jowii hoolaare amen fu dow Alla yonkinteejo. Kanko laatii Kisinoowo himbe fu, accu du goondinbe mo.

<sup>11</sup> Kanjam haani bataa himbe, ekkitinaa be dum. <sup>12</sup> Taa accu goddo yawee gam aa laatii gojankeejo. Amma latana goondinbe misaalu diga e haala maa, e gadu maa, e yidde maa e goondinki maa, e laabal maa. <sup>13</sup> Go mi wara, tinna aa janjana goondinbe dewte ceniide, aa tiidina be, aa ekkitina be. <sup>14</sup> Taa yeeba dokkal moyyere njal kebudaan. A hebii njal diga e annabaaku, wakkati dottiibe eklesiya yowi juude mum dow maa. <sup>15</sup> Tinna e golle den, kokcaa hoore maa e majje, gam himbe fu yi'a no beydortodaa yeeso yeeso. <sup>16</sup> Hakkilan hoore maa. Reenu bo janjinol maa, tinna dow majjum. To a wadii dum, den aa hoolii a hisan, an e hettinaniibe maa fu.

**5***Pole hokka Timote saawari*

<sup>1</sup> Taa falmu dottiijo e semme, amma tiidin mo hande baaba maa. Gojankeebe bo, baddu 6e hande mawniraabe maa, e miiraabe maa. <sup>2</sup> Rewbe manjusuube, baddu dum hande inniraabe maa, saanjoobe bo, hande sakikiraabe maa. Wadu dum e miilooji laabudi.

<sup>3</sup> Teddin rewbe gourniibe, 6e woodaa wallanbe dum. <sup>4</sup> Amma to debbo gourniijo e woodi sukaabe, dum bo taaniraabe, e haani 6e ekkitoo taw golloraago kulol Alla der saareeji mabbe. Be joba saareeji mabbe barjaari booduni. Kanjum fottani Alla. <sup>5</sup> Debbo gourniijo, mo walaa kiinnotoodo dum, go e woni kan tan, yowii hoolaare mum dow Alla. Jemma e nyalooma, oo tinnii, oo eela ballal Alla. <sup>6</sup> Amma gourniijo daartoowo welwelo, laati nun maaydo baa to emo foofa. <sup>7</sup> Kanjum haani bataa 6e, gam 6e laatoo 6e walaa gacce. <sup>8</sup> Mo hiinnaaki getti wuro mum, accu du himbe saare mum, joomum yeddii goondinki, oo buri mo goondinay jaasugo.

<sup>9</sup> Ko inne gourniijo winnee e derewol, sey oo woodi jaka duubi lasoy tati, tawee o laatanakeno goriiko koolaado. <sup>10</sup> O laatoo anni-raado wadugo ko woodi, hande jon: ummingo sukaabe mum hande no haani, oo laatii bernudo hobbe, e lootudo koyde goondinbe, e balludo toorotoobe. Laatoo bo o wadii gaduuji geeti duuddi.

<sup>11</sup> Amma taa winnu inde rewbe saanjoobe, laatiibe gourniibe. Gam to suunooji mabbe ummake, 6e jidan hooweego kade, 6e acca gollanaago Almasiihu. <sup>12</sup> Be keban gacce, gam 6e accii alkawal gollanaago Alla 6jal 6e kabbuno. <sup>13</sup> Ko buri dum, no 6e galaa gadaanjal, 6e ettan wakkati mabbe, 6ee boositoo wuro e wuro. Dullere gadaanjal tan bane, amma 6ee nyoa himbe. Bee naata haalaaji di yaalay 6e, 6ee una batu. <sup>14</sup> Sabbu majjum,

mii yidi saanjoobe, laatiibe gourniibe, hoowitee. Be dima sukaabe, 6e ki-inno wuro mabbe. Den 6e kokkataa waybe men laawol no biisiri inde meeden. <sup>15</sup> Wo6be mabbe selii ko laawol, tokkii Seydan. <sup>16</sup> Debbo goondindo, mo rewbe gourniibe woni e wuro mum, o walla 6e, gam to 6e laatana eklesiya doongal. Eklesiya kan, hiinno rewbe gourniibe, 6e goodaa goddo kiinnotoodo dum.

<sup>17</sup> Dottiibe ardaniibe Eklesiya deydey, e haani heba joddi golle mum de didi. Accu du tinniibe e waaji e janninol. <sup>18</sup> Gam Dewtere wi'i: «Taa habbu hunnuko gaari corboori gawri.» Ne wi'i kade bo: «Gollotoodo fu e haani joddi mum.» <sup>19</sup> To goddo waddanii maa gacce dow dottiijo eklesiya, taa jabu, to hinaa 6e gadii seedeebe dido, dum bo tato. <sup>20</sup> Wadoobe hakke, felu dum yeeso himbe fu, gam heba horiibe hula.

<sup>21</sup> Mi eelii maa yeeso Alla, e Yeesu Almasiihu, e malaykaabe subaabbe, dowlana haalaaji dii, tawee a sutton-tiray himbe, a burontiray 6e bo. <sup>22</sup> Taa yawda jowaa juude maa dow hoore goddo. Taa naannu hoore maada der hakkeeji wobbe. Reenu hoore maa aa laabi.

<sup>23</sup> Taa yaru diyam balam tan. Yaru innabojam sedda gam reedu maa, e gam aa nyawi de duuddsum.

<sup>24</sup> Hakkeeji wobbe wurtitinto diga 6e kiitaaka, di wobbe bo wurtitoo baawo ni. <sup>25</sup> Hande nun bo golle boodde hollitortoo, de hollitaaki bo, tabitintaako e suudi.

**6**

<sup>1</sup> Maccube laatiibe goondinbe, daara joomiraabe mum hande fotube teddineego. Den mum, goddo hebataa laawol bata kalluka dow inne Alla, e ekkitinol men. <sup>2</sup> Maccube woodube joomiraabe goondinbe, to wi'u gam 6ee laatii banniraabe, 6e teddintaa 6e. Amma, 6e jagganoo 6e bura, gam goondinbe yidaabe nun 6e jaggantoo.

### *Waajotoobe fewoobe e suuno jawdi*

Kanjum haani jannjinaa, baajodaa.  
<sup>3</sup> Wobbe e ekkitina ekkitinol feere-wol. Be tokkay haala Joomiraawo meeden Yeesu Almasiihu laabuka, e ekkitinol jaadoowol e kulol Alla.  
<sup>4</sup> Himbe 6en laati nun mawnitiibe, 6e annaa godsum. Bee nyawi jeddi e biditiri haalaaji. Diga e majjum nawniraagu, e kabé, e jennooje, e bisugo bannun yiwata. <sup>5</sup> Edum wadda jeddi di walaa kaddi, hakkune himbe 6e hakkillo mum wuuri. Be joofii goonja, bee miili goondinki laati nun laawol kebal.

<sup>6</sup> E goonja, goondinki laati nun laawol kebal manjal, to neddo e seyoriik ko woodi. <sup>7</sup> En gadday godsum der duuniyaaru. En baawataa bo ko hoori godsum. <sup>8</sup> Gam majjum to een goodi nyaamdu e kolte, dum heyii en. <sup>9</sup> Amma suunaabe jawdi, jarbeeji waranan 6e. Be jantan pitti Seydan e suunooji di nafataa, jaarooji der majjere e halkere. <sup>10</sup> Gam suuno ceede woni dadol kalludum. Wobbe suunake de, go 6e ceeki diga goondinki, den 6e gaddani ko'e maabbe tooraaji duuddi.

### *Joga ko batadaa*

<sup>11</sup> Amma, an neddo Alla, woddoda kujje den. Daartu foonnitaare e takkaago Alla, e goondinki, e yidde, e tinnaare, e diggere. <sup>12</sup> Habu hawre goondinki woodune, jabaa yonki tabitiiki. Gam sabbu yonki kin Alla noddu maa, gadudaa seedaaku maada boodunu yeeso seedeebe duubbe. <sup>13</sup> Mii batee kaa do yeeso Alla buurinoowo huune fu. Mii batee ka bo yeeso Yeesu Almasiihu gadudo seedaaku boodunu yeeso Ponsu Pilaatu. <sup>14</sup> Joga ko batadaa faa wooda. Laata mo walaa tuuni dum bo gacce faa nyalaane Joomiraawo meeden Yeesu Almasiihu suppitoyo. <sup>15</sup> Garki makko laatoto wakkatiire ne Alla resi, Alla maanteteedo. Kanko tan woodi baawde, Laamiido laamiibe, Joomiraawo joomiraabe. <sup>16</sup> Kanko tan woni mo maayataa, joodido der jaynol yol goddo waawataa ko battii.

Walaa mo meedí yi'ugo mo, walaa baawoovo ko yi'i mo bo. Teddujal e baawde tabitiide woodani mo faa abada abadin. Aami.

### *Haalaaji cakitiidi*

<sup>17</sup> Batu woodube jawdi der duuniyaaru do, to 6e mawnito. To 6e kooloo jawdi ni tabitintaako, amma 6e kooloo Alla. Kanko nun hokkata en huune fu, faa heya, gam ceyoroden dum. <sup>18</sup> Batu 6e 6e gada ko woodi. Wadugo geetum laatoo jawdi maabbe. Be laatoo hokkitiroobe, siriyiibe wallugo wobbe e jawdi maabbe. <sup>19</sup> Hande nun 6e cuudiranta ko'e maabbe jawdi booduni, tabitintooni, gam nyalaade garooje, 6e keba bo yonki goonjahi.

<sup>20</sup> Timote, hakkilan ko kalfinadaa, woddoda haalaaji baanji baanji di yaadataa e goondinki. Hakkilan bo jeddi dow ko wobbe wi'ata annal luggunjal. <sup>21</sup> Wobbe mawnitorake annal jal, go 6e acci goondinki.

Moyyere Alla wonda e moodon.

## Derevol didabol nol Pol winnani Timote

### *Haala Puddirkä*

Pol wittoy kade Roma, oo laatii nanjaado. Amma oo woodi toora jooni 6uri de o nanjanoo der siire nen. Himbe wobbe accii mo, Luka tan nun wondi e makko. E nandi hande Pol winnii derevol nol hakkune duu6i 66 e 68.

Pol yamii Timote wara law go dabbune wada. To oo wara bo, o wadda gulunfaare Pol e dereeji guri mum. O hoolaaki naa 6e jiidan, gam oo anni no wakkati dillugo makko yottake. Gam majjum derevol nol do laatii binnaajol dalaa, hakko o maayata. Der derevol nol, Pol yeeyitake 6aawo dow ko wadunoo, oo batana bo ko wadotoo jooni de o winnata nol, waato kiita makko e ko wadoytoo yeeso sedda, waato maayde makko ne woddaa kade.

Der derevol nol, Pol hoolii Timote ko haani wada o laatoroo koolaado der ekkitinoje de o hebi. Wakkati mum goondinbe e tooreno, faa dum wadi Pol ma6baa der kasu, ekkitinoje leliide bo e toora eklesiyaaji. Gam majjum o semmidinta Timote, o munyana tooraaji, o daroo 6aawo goonja. O acca jeddi di nafataa, o woddodoo janjinoobe ko lelili, o takkoo ko o ekkitinaa, o waajoo haala Alla, «gam Binni Ceniini fu yiwi diga e kollitinki Alla, nii nafa gam janningo goonja, e foortugo neddo, e hollugo boofi, e moyyingo di, e ekkitingo wonaago no Alla yidiri».

### **Tokkontirki haalaaji**

1. Haala puddirkä, 1.1-2
2. Yettoore e tiidinki, 1.3-2.13
3. Pol e bata Timote hakkilana hoore mum, 2.14-4.5
4. Heennyitoode goonki Pol, 4.6-18
5. Cannooje, 4.19-22.

### *Sannoore*

<sup>1</sup> Derevol nol yiwi diga e am, min Pol, lilaado Yeesu Almasiihu e sago

Alla. Mi lilaama gam mi fiina haala dow yonki ki Alla habbani en alka-wal, sabbu kawtal men e Yeesu Almasiihu. <sup>2</sup> Mi sannii maa, an Timote biyam jidaado. Alla Baaba meeden, e Joomiraawo meeden Yeesu Almasiihu endee, hokkee moyyere e jam!

### *Pol e semmidina Timote*

<sup>3</sup> Mii yetta Alla mo cujidanammi e cuudiidum 6erne laabudum, hande no kaakiraabe am wadunoo. Emi siwtoree jemma e nyalooma fu der du'aaje am. <sup>4</sup> Mii siwtora gondi maa. Mii woodi kumpa yi'itaago maa puy, gam mi seyoo puy. <sup>5</sup> Mii siwtora goondinki maa ki walaa munaafittaare. Maama maa Loyis e inna maa Enis e artu maa woodugo ki. Mii hoolii an bo aa woodi ki. <sup>6</sup> Gam majjum mii hattinee, accu dokkal nol Alla hokku maa no jowumi juude am dow maa beydoo. <sup>7</sup> Gam Ruuhu ju Alla hokki en, laatintaa en huloo6e. Amma Ruuhu kokkoowo en semme, e yidde, e nantaare o hokki en.

<sup>8</sup> Gam majjum taa sentu seedanaago Joomiraawo meeden. Taa sentu bo seedanaago am, min ma6baado der kasu gam makko. Hawtu e am der tooraaji gam linjiila, jaka baawde de Alla hokku maa. <sup>9</sup> Kanko hisini en, noddi en gam laatanoden mo. Hinaa gam gadu meeden o hisiniri en, amma gam nun nun o yidiri dum e moyyere makko. Moyyere nen o wadani en diga e Yeesu Almasiihu, diga hanne bane. <sup>10</sup> Jooni, moyyere nen hollitake e garki kisinoowo meeden Yeesu Almasiihu. Kanko halki baawde maayde. Diga e linjiila o hollii yonki tabitintooki.

<sup>11</sup> Gam sabbu linjiila kan, Alla wadimmi baajotoodo, lilaado e janjinoowo. <sup>12</sup> Sabbu majjum tooreteemi tooraaji dii do, amma mi sentiray dum. Gam mii anni mo goondinmi. Mii hoolii bo o waawan ko reeni ko o halfinimmi faa nyalaane darjal yottoo. <sup>13</sup> Joga haala goonjaha ka nanudaa diga e am. Gollir ka e goondinki, e yidde ne kebuden gam een kawti e Yeesu

Almasiihu, ka laatanee misaalu. <sup>14</sup> Joga geetum dum kalfinadaa e ballal Ruuhu Ceniido gonudo der meeden.

<sup>15</sup> Aa anni, himbe leydi Asiya fu accii am, Figelus e Hermogenes na'on der maabbe. <sup>16</sup> Joomiraawo endoo himbe saare Onesifor, gam o deyyitini am. O sentiray bo nanjoode am der kasu, <sup>17</sup> accu du no o wari Roma, o dartii am e tinnaare mawne faa o yiitimmi. <sup>18</sup> Alla Joomiraawo hokka mo endam nyaanne darmjal. An e hoore maa aa anni no woodi, golle de o wadanimmi der siire Efesu.

## 2

### *Gollantoodo Yeesu kooliniido*

<sup>1</sup> Gam majjum biyam, accu moyyere ne kebuden sabbu kawtal men e Yeesu Almasiihu semmidinee. <sup>2</sup> Ko nanudaa diga e am yeeso seedeebe duubbe, halfin dum himbe hooliniibe, waawoobe ko janjini wobbe.

<sup>3</sup> Jabu gedu toora maa hande soogeeru Yeesu Almasiihu yeeru. <sup>4</sup> To soogeeru jahooru konu e yidi fottango mawdo mum, hakkilantaa haajuuji duuniyaaru. <sup>5</sup> Nun nun bo, to gadoowo doggudu yawton-tire sowtanaaki sariyaaji doggudu, hebataa meetalol. <sup>6</sup> Demoowo golliido puy, kan nun haani arta nyaama biibbe deme mum. <sup>7</sup> Mija ka batu maa mi faa wooda, Joomiraawo faaminte huune fu.

<sup>8</sup> Siwtor Yeesu Almasiihu mo lenyol Dawda. O fintii e maayde, hande no linjiila ka baajootomi bati. <sup>9</sup> Linjiila kan nun acci mii tooree faa kabbaami e callalluubi, hande gadudo kalludum. Amma haala Alla habbaaka. <sup>10</sup> Gam majjum munyanmi huune fu, sabbu subaabbe Alla heba kambe bo, Yeesu Almasiihu hisina be, be keba teddujal makko tabitiijal. <sup>11</sup> Daa do haala kooliniika:

To en maaydii e makko, en buuridan e makko bo.

<sup>12</sup> To en munyanii tooraaji, en laamodoto e makko bo, to en calike mo, kanko bo o saloto en.

<sup>13</sup> To en laataaki hooliniibe, kanko o tabitinto oo kooliniido, gam o waawataa ko yeddi hoore makko.

### *Gollotoodo mo Alla yerdii*

<sup>14</sup> Kanjum haani ciwtoraan goondinbe, eelaa be yeeso Alla be acca jeddi dow haalahon. Jeddi iri dii don nafataa godsum, sey majjinggo hettiniibe. <sup>15</sup> Tinna darodaa yeeso Alla aa koolaado. Laata gollotoodo mo sentintaake der golle mum. Laatodaa bo janjinoowo haala goonaha, hande no fotti. <sup>16</sup> Seedu e haalaaji baanji baanji, centiniidi. Batoobe di e beydoo woddodaago Alla.

<sup>17</sup> Haala maabbe e nandi hande suure kokkollaare, layoore. Himeneyus e Filetus na'on caka maabbe. <sup>18</sup> Be celii laawol goonja. Be accii wobbe woppi goondinki mum e wi'ugo pintol maaybe wadii yawtii. <sup>19</sup> Amma Alla daddii dadda ka dimmataako. Nani do ko winnaa dow makka: «Joomiraawo e anni laataniiibe dum.» Nunnun bo: «Noddoowo inne Joomiraawo fu, woddoo wadugo ko halli.»

<sup>20</sup> Der suudu manjol, keede gadiraade jande geete e kannjeeri tan bane woni don. Keede gadiraade ledde e loope na'on don. Godde, gollirte golle de teddujal, godde bo golliree golle de walaa teddujal.

<sup>21</sup> To goddo laabinii hoore mum e kuppe dee fu, joomum laatoto hande heedo gollirteejo golle teddude. O laatoto, cenaado, nafoowo joomum, ciriyido wadugo golle boodde fu.

<sup>22</sup> Doggu suunooji gojankaaku. Dartu foonaataare e goondinki, e yidde, e jam, an e noddoobe inne Joomiraawo e berde laabude fu. <sup>23</sup> Amma an, woddoda haalaaji di walaa hoore, e jeddi baanji baanji. Aa anni di umminan nun kabbe. <sup>24</sup> Gollantoodo Joomiraawo haaniraa e hawre. Amma o laatoo diggudo yeeso himbe fu, o laatoo bo baawudo janjingo, e munyudo. <sup>25</sup> E haani o foorta yeddoobe mo e jam. Wadoto Alla walla be, be tuuba, be paama goonja.

<sup>26</sup> Den hakkilooji maabbe wittaan, be

dada pitti Seydan nanjunoodo 6e, e wadina 6e sago mum.

### 3

#### *Jaamanuuru sakitiineeru*

<sup>1</sup> Annu der jaamanuuji cakitiidi, wakkatiiji cadudi waran. <sup>2</sup> Himbe laatoto yidube ko'e mum tan, suunaabe ceede, 6e laatoto jurotoobe e mawnitintoobe, 6e jennan haala Alla. Be dowtantaako saareeji maabbe, 6e annaa gadu, 6e teddintaa ko senii. <sup>3</sup> Be laatoto 6e berde mum yoori, 6e cawrantaako goddo, nyo'oobe himbe, 6e galaa nantaare, 6e yonki bonki, 6e banyan ko woodi. <sup>4</sup> Be laatoto jammotoobe, dullube hakkillo, 6e jidan welwelo duuniyaaru bura Alla. <sup>5</sup> Be nandinan ko'e maabbe hande hulooibe Alla, amma 6ee jedda baawde mum. Woddoda iri himbe 6en. <sup>6</sup> Wo6be maabbe e naata e wurooji, 6ee yoyra rewbe 6e galaa hakkillo, 6e hakkeeji nyoyyi, go suunooji feere feere e wifita dum. <sup>7</sup> Rewbe 6en e ekkitoo wakkati fu, amma abada 6e baawataa ko yottii annal goonja. <sup>8</sup> Hande no Yannes e Yamberes habidiri Muusa, nunnun himbe ben habidirta e goonja. Hakkillo maabbe wuurake, goondinki maabbe walaa nafuwe. <sup>9</sup> Amma 6e kebataa saa'a, gam haanjaare maabbe laabanan himbe fu, hande no dum laatii e Yannes e Yamberes.

#### *Haalaaji cakitiidi*

<sup>10</sup> Amma an Timote, a yi'i no janninirmi. A yi'ii jikku am, e anniya am, e goondinki am, e munyal am, e yidde am, e tinnaare am. <sup>11</sup> Aa anni tooraaji am, e boneeji am. A yi'ii ko hebimmi Antiyokiya e Ikoniya, e Listira fu. A yi'ii bo no munyirmi dow tooraaji di kebumi. Amma Joomiraawo wurtinii am e majji di fu. <sup>12</sup> Hawtu6e e Yeesu Almasiihu, go e yidi hulugo Alla, 6e toorete. <sup>13</sup> Amma hallube e hilooibe, beydoto e halla. Be majjinan wo6be, gam kambe bo 6ee majji. <sup>14</sup> Amma an, joga ko ekkitidaa, e ko kooliidaa e semme. Aa anni moy ekkitin maa

dum. <sup>15</sup> Diga sukaaku maa, aa anni Dewte ceniide. Kanje de baawan ko hokku maa faamu, jiitiraa kisidam kebeteedam diga e goondingo Yeesu Almasiihu. <sup>16</sup> Binni ceniini fu yiwi diga e kollitinki Alla. Nafuwe majje woni, janjingo goonja, e hollugo boofi, e moyyingo di, e ekkitingo wonaago no fottiri. <sup>17</sup> Nunnun neddo Alla fu laatortoo kebbudo, ciriyiido wadugo golle geete.

### 4

#### *Tinna aa waajoo*

<sup>1</sup> Mii eelee yeeso Alla e yeeso Yeesu Almasiihu, kiitotoodo wuuru6e e maaybe. Mii eelee bo sabbu wittoyo makko e Laamaare makko: <sup>2</sup> Waaja haala Alla, waajita ka wakkati fu, baa dum fottanii 6e, baa dum fottanay 6e. Felu 6e, semmidin 6e e munyal, aa jannina 6e. <sup>3</sup> Gam wakkati waran de himbe salotoo nanugo ekkitinol poortiijol. Be tokkoto suunooji maabbe. Be dartanan ko'e maabbe janjinoobe duubbe, janjinanbe 6e ko 6e jidi nanugo. <sup>4</sup> Be cukkan noppi maabbe gam to 6e nanu goonja, 6e baylitinto far to taalaaji. <sup>5</sup> Amma an, nantu hoore maa der huune fu. Munyan tooraaji, wa6u golle baajotoodo linjiila, heennyitin golle maa faa wooda.

<sup>6</sup> Amma min, mi 6adike laataago sadaka, hande kiriseteedi, wakkati yawtugo am 6adake. <sup>7</sup> Mi habii hawre woodune, mi yottinii doggudu am, mii joggii goondinki. <sup>8</sup> Diga jooni, Joomiraawo kiitotoodo e goonjaaku, e resanimmi riiba kokketeka poonniitiido nyaanne darjal. Min tan bane hokketee ka. Amma, min e hettiniibe, yidube wittoyo makko fu, o hokkata ka.

#### *Ka Polbati dow 6e o gollodii*

<sup>9</sup> Tinna garaa to am law. <sup>10</sup> Gam Demas accii am, sabbu yidde duuniyaaru, o yahii Tesalonika. Kereskes yahii Galaatiya, Titus bo yahii Dalmatiya. <sup>11</sup> Luka tan nun wondi e am. Waddu Marku to aa wara, o nafan am sanne der golle am. <sup>12</sup> Tikikus, mi

lili dsum Efesu. <sup>13</sup> To aa wara, gadanaa am gulunfaare am ne accumi Torowas, wuro Karpus. Gaddanaa am bo dewte am, ko jogii am 6uri woni, dewte am de guri.

<sup>14</sup> Aleksandire bahillo wadanii am ko halli puy. Joomiraawo yoban mo ko o wadi. <sup>15</sup> An bo, hakkilan mo, gam o salake waaji amen e semme.

<sup>16</sup> Nyalaane arandeere ne dari-naami yeeso kiitoowo gam mi toontano hoore am, baa gooto wallay am, 6e fu 6e accii am. To Alla liman 6e dsum gacce! <sup>17</sup> Amma Joomiraawo wallii am, semmidinimmi. Kan acci keennyitimmi golle waaji am. Himbe lenyi janani fu nanii waaji din. Nun-nun dadirmi diga e hunnuko jaggere. <sup>18</sup> Joomiraawo dadinan am ko halli fu, o yottinammi jam to Laamaare makko ne kammu. Teddujal laatanoo mo faa abada. Aami!

### *Heennyitirde e cannooje*

<sup>19</sup> Mi sannii Pirisilla e Akilas, mi sannii getti wuro Onesifor. <sup>20</sup> Erastus darake Korintu, Torofimus bo, mi accii dsum Miletus oo nyawi. <sup>21</sup> Tinna garaa go dabbune wada. Ebulus e Pudes e Linus e Kalawdiya e sakikiraabe wonbe do fu, sannii maa!

<sup>22</sup> Joomiraawo wonda e maa!  
Moyyere Alla wonda e moodon.

## Derevol n̄ol Pol winnani Titus

### *Haala Puddirka*

Wakkati Pol yoofitaa de o maabbanoo der Roma, den nun o waajii haala linjiila der Kereta, siire surune manju der dunde girekiib. Wakkati o yaareteno Roma to laamiido mawdo, laana diyam maabbe yaaliniino be Kereta.

Wakkati o yawtata diga don, o acci don mo o gollodintoo, tokkiido mo, mo laataaki Yahuduuo, Galaatiya. 2.3. De duuddum Pol yowannoo mo o wada golle cadude, der Korintu du. O yowanii mo gollal moyyingo joonne eklesiya ka kanko Pol o titunoo.

Pol batii Titus be potta Nikopolis. E nandi hande diga Maseduwaan nun o winnoy derevol n̄ol do, e n̄ol Timote aranol. Haala majji e nandi.

Baawo Pol holli no haani ardiib e wa'i, o batanii bo boofi Yahuduube salotoobe ekkitinol goonjawol. O hollii bo ko haani gebe himbe feere feere wonbe der eklesiya wada. No o heen nyitiri derevol makko nani, o batanii moyyere Alla accoore neddo joodoo joonne teddinoore linjiila.

### Tokkontirki haalaaji

1. Haala puddirka, 1.1-4
2. Dottiibe eklesiya, 1.5-16
3. Golleyi gebe himbe feere feere der eklesiya, 2.1-15
4. Joonne goondinbe der duuniyaaru, 3.1-11
5. Haalaaji cakitiidi e cannooe, 3.12-15.

### *Sannoore*

<sup>1</sup> Derevol n̄ol do yiwi e am, min Pol, maccudo Alla e lilaado Yeesu Almasiihu. Alla yowanii am mi wada subaabé makko goondina mo. O yowanii am anningo be goonja jaadooha e goondinki men. <sup>2</sup> Hande non be goodirta hoolaare hebugo yonki tabitiiki. Alla mo fewataa habbaniino en alkawal yonki kin diga huune fu tagaaka. <sup>3</sup> No wakkati wadi,

o anninii haala makko diga e waaji di o yowanimm hande no Alla Kisinoowo en umuri dum.

<sup>4</sup> Titus, mi sannii maa, an, laatiido biyam e goonja diga e goondinki men gooti. Alla Baaba, e Yeesu Almasiihu Kisinoowo en wadanee moyyere, hokkee bo jam!

### *Golle Titus der Kereta*

<sup>5</sup> Mi accii maa Kereta gam moyyinaa ko horii moyyineego. Cubanaa genni fu dottiibe Eklesiya hande no bi'uno maa mi. <sup>6</sup> Sey dottiijo cubaado fu laatoo mo walaa gacce. O laatoo gorko mo debbo gooto, mo biibbe mum laatii goondinbe. Biibbe ben laatoo be nyo'irtaake baadi baanjaari, dum bo dullere dowtaare. <sup>7</sup> Doole ardiido Eklesiya fu laatoo mo walaa gacce, gam o laati nun gollantoodo Alla. Haanay o laatoo mawnitiido, dum bo mo mone, maa bo jaroowo bagi, dum bo kabaado, maa bo cuunaado riiba kalluka. <sup>8</sup> Amma sey joomum e laati bernoowo hobbe, jidudo ko woodi, mo hakkillo, poonniido, laabudo, nantiido. <sup>9</sup> Sey joomum e jogii haala kooliniika hande no ka jannjinira. Den o waawan ko semmidini wobbe e ekkitinol laabuujol, o waawan bo ko jaalii yeddoobé.

<sup>10</sup> E goonja, duubbe e laatii naruube, accu du caka Yahuduube goondinbe. Bee laatii batoobe haalaaji di walaa hoore, bee yoyer himbe. <sup>11</sup> Sukku kunnude mabbe, gam bee biisa saareeji duuddi. Bee ekkitina ko haanay, gam be keba riiba kalluka. <sup>12</sup> Neddo mabbe, mo himbe daari hande annabijjo, batii du, wi'i: «Keretaabe laati nun fewoobe wakkati fu, bee laatii bisaaji bondi, ciiwankeebe, e deereruube.» <sup>13</sup> O batii goonja. Gam majjum, felu be e semme, gam be keba goondinki geeti. <sup>14</sup> Be acca tokkugo taalaaji Yahuduube, e oodaaji himbe yoofube goonja. <sup>15</sup> Huune fu e laabi to laabube. Amma walaa ko laabi, to sobube e be goondinay, gam hakkillo mabbe e cuudiidum berne mabbe fu sobii.

**16** Bee bi'a 6ee anni Alla, amma golle maabbe e yedda no 6ee anni mo. Bee laatii nyiddube, e nanaruubee. Be baawataa ko wadi geetum baa gootum.

## 2

### *Ekkitinol goonjawol*

**1** Amma an, accu batu maada yaada e ekkitinol goonjawol. **2** Worbe nayeebe, batu 6e no haani 6e laatoo nantiibee, fotube teddineego, hakkilbe. Be laatoo 6e goondinki mum yandi, 6e gooda yidde e munyal. **3** Batu rewbe nayeebe bo, wonoo hande no haani rewbe goondinbe wonoroo. To 6e laatoo nyo'oobe himbe, dum bo horbe bagi. Amma 6e laatoo ekkitinoobe ko woodi. **4** Be ekkitina rewbe saanjoobe yidfugo worbe mum, e sukaabe mum. **5** Be laatoo hakkilbe, laabube. Be kiinnoo golle wuro maabbe, 6e laatoo yeedduube. Moy fu dowtanoo gorko muudsum, gam to haala Alla yennie.

**6** Waaja gojankeebe, 6e laatoo hakkilbe der huune fu. **7** An e hoore maa, laatana 6e misaalu der golle boodde fu. Ekkitin 6e ekkitinol goonjawol, e pottujol. **8** Haala maa laatoo goonjaha, ka yeddataako, gam waybe meeden jiboo, 6e nulla kalluka ka 6e batani en.

**9** Maccube bo, waaja 6e, 6e nanana joomiraabe maabbe der huune fu. Be gada ko welata 6e, to 6e jeddon-tir e maabbe. **10** To 6e buuju 6e, amma wakkati fu, 6e kollita 6ee laatii hoolaabe, hebbube. Be gada dum gam ekkitinol haala Alla kisinoowo en, teddinee der huune fu.

**11** E goona, moyyere Alla hollitake gam himbe fu hisa. **12** Moyyere nen e ekkitina en accen wonaago der dullere kulol Alla, e suunooji duuniyaaru. Nee ekkitina en bo laatoden hakkilbe, e foonnitiibee, e huloobe Alla der duuniyaaru nuu do. **13** Hande non kedortoden nyalaane barkidinaane, ne tam-mihiden. Nyalaane nen, Yeesu Almasiihu, Alla meeden mawdo, Kisinoowo en, hollitinto e teddujal.

**14** O hokkii hoore makko gam men, o sooditii en diga ko halli fu. O laatinii en himbe makko 6e o woodi, laabinaabe, tinniibe wadugo golle geete.

**15** Kanjum haani bataa himbe, nun bo haani baajodaa 6e, pelaa 6e e baawde maa fu. Taa accu goddo yawee.

## 3

### *No haani goondinbe Yeesu e laatii*

**1** Siwtor goondinbe 6e nanana mawbe leydi, e woodube baawde. Be dowtanoo 6e, 6ee ciriyii wadugo golle boodde fu. **2** To 6e batu kalluka dow goddo, 6e laatoo deyyube, e sawriibee, e welube deedfi dow himbe fu. **3** Gam enen bo, een laatinoo 6e walaa hakkillo, nanaruubee, e majjuube. Een laatinoo maccube jidaali, e suunooji diye fu. Een goodunoo ganyaani e nawniraagu, een banyontiri, en banyaa, een banyontiri. **4** Amma Alla Kisinoowo en hollitii himbe geetaaku mum e yidde mum. **5** O hisinii en, amma hinaa gam en gadii golle poon-nitiide, e endam makko o rimiterii en, laatiden heybe diga e Ruuhu Ceniido laabindo en. **6** Alla hokkii en Ruuhu mum ceniido puy, diga e Yeesu Almasiihu Kisinoowo en. **7** O wadii dum diga moyyere makko gam laatoden foonnitiibee, heba donen yonki tabitiiki, ki tammiden hebugo. **8** Kanka woni haala kooliniika.

Mii yidi tasinaa ka, gam goondinbe Alla tinnoo wadugo golle boodde. Kanjum woni ko woodi, ko nafata himbe. **9** Amma wosdoda haalaaji di walaa hoore, e jeddi dow habaruui lenyi, e kabé, e jeddi dow tawreeta. Haalaaji dii don fu nafataa godsum, baanji di laatii. **10** Gaddoowo ceen-nol caka himbe, felu mo de woore, de didi, to o salake, takku mo sera. **11** Annu gadoowo hande non laati nun majjudo e hakkeejo, o doyyii hoore makko kiita.

### *Cannoje e baynaade*

**12** To mi lilii Artemas naa bo Tikikus to maa, yawda garaa law, tawaa

am Nikopolis, gam ton jidumi dabbugo. <sup>13</sup> Tinna ballaa Jenas, moodibbo tawreeta, e Apollos, gam to godđum jaccu ɓe der jahaanjal maɓbe. <sup>14</sup> E haani himbe meeden bo ekkitoo wadugo golle boodde. Be balla haa jaabe walleego gam to kambe wal loobe ɓen ɓe gonoo baanji.

<sup>15</sup> Wondube e am fu sannii maa. Emen canna goondinbe yidube men fu.

Moyyere Alla wonda e moodon, on fu.

## Derewol ɳol Pol winnani Filemon

### *Haala Puddirkä*

Derewol ɳol Pol winnani Filemon do, haala joonne hakkune himbe dido nun ɳol batanta. Pol winnii derewol ɳol gam o sawrinana Onesimu, maccudo doggunodo joomiraawo mum Filemon. Filemon laati nun goondindo tawaado der wanjarde Koloosi. Onesimu tuubii, goondini Yeesu diga e waaji Pol. Kan wadi Pol e eela Filemon jaba Onesimu hande banniraawo mum, o sawranoo mo bo.

Der duugol 62 nun Pol winni derewol ɳol der nannoore mum arandeere der Roma. Dum nandi hande Tikikus nun yaari derewol ɳol e ɳol Koloosi, Kol. 4.7-9.

Ko hollitii der derewol ɳol woni, tinnaare ne Pol woodi dow moyyingo haala hakkune himbe dido, hande no o woowi wadugo hakkune himbe duuþbe. Ko Almasiihu wadani en hakkune men e Baaba mum, kanjum nun Pol wadani Onesimu hakkune mum e Filemon.

### **Tokkontirki haalaaji**

1. Haala puddirkä, 1-3
2. Yettoore Alla gam goondinki Filemon, 4-7
3. Pol e elana Onesimu sawraare, 8-22
4. Cannooje, 23-25.

### *Sannoore*

<sup>1</sup> Min Pol, e banniraawo meeden Timote nun winni derewol ɳol. Min Pol, mii laatii maþbaado gam daliila Yeesu Almasiihu. Emen canna Filemon, jidaado amen, gollodintoodo e amen. <sup>2</sup> Emen canna bo Afiya, sakiike men debbo, e Arkippus kabidoowo e meeden gam linjiila, e goondinbe hawritintoobe der wuro maa. <sup>3</sup> Alla Baaba meeden, e Yeesu Almasiihu Joomiraawo, hokka on moyyere e jam.

### *Yidde e goondinki Filemon*

<sup>4</sup> Filemon, mii yetta Alla wakkati fu, mi accay siwtorgo maa der du'aaje am. <sup>5</sup> E goonja, mi nanii yidde e goondinki maada dow Joomiraawo Yeesu e batanee, e no jidirdaa himbe Alla fu. <sup>6</sup> Emii eela Alla, gam goondinki kii do hawti en yi'oo der gadu. Den paaminaa geetum fu dum baaweten wadugo gam Almasiihu. <sup>7</sup> Banniraawo, berne am seyake puy, hakkillo am fukkake bo, gam yidde maa deyyitinii himbe Alla.

### *Pol e sawrinana Onesimu*

<sup>8</sup> Mii woodi laawol der kawtal men e Almasiihu mi eelee ko haani gadaa. <sup>9</sup> Amma, mii buri yidugo, mi eelee gam yidde, min Pol dottijio, joni bo mii maþbaado sabbu Yeesu Almasiihu. <sup>10</sup> Mii eelee gam Onesimu biyam mo kebumi goondini der kasu. <sup>11</sup> Naane, o nafayno maa, amma joni, o nafan en, min e maa.

<sup>12</sup> Mii wittina mo to maada, jaþu mo hande min e hoore am. <sup>13</sup> Mii yiduno haggugo mo to am, gam o wallammi hande no haani balliraano am joni no tawaami der kasu gam linjiila. <sup>14</sup> Amma mi yiday wadugo godfum to hinaa en baddii, gam mi yidaa wadingo maa boodfum e doole, amma dum laatoo e sago maa.

<sup>15</sup> Wadoto Onesimu seenniriino e maa wakkati sedda, gam o wonda e maa, e baadey. <sup>16</sup> O laataaki kade maccudo tan, oo buri maccudo, o laatike banniraawo men jidaado. Min, mii yidi mo sanne. Mii anni aa yidi mo buri, hinaa hande neddo tan, amma hande goondindo Joomiraawo.

<sup>17</sup> To a daarii am hande igo maa, den kan, jaþu mo hande no jabirtaa am min e hoore am. <sup>18</sup> To o woofaniino maa, dum bo to o joganiino maa nyamaane, yowanam dum. <sup>19</sup> Min Pol, mii winna ka e junjo am, mi yobete dum. Amma mii siwtoree, an bo aa joganii am nyamaane, nya-maane nen bo, an e hoore maa nun. <sup>20</sup> An banniraawo am, wadanam dum sabbu Joomiraawo, deyyitin berne am gam kawtal men e Almasiihu.

<sup>21</sup> Mii winnanee gam mii hoolii a nananan am, gam mii anni a wadan buri ko eelu maa mi. <sup>22</sup> Sikan, ciriyanolaa am suudu to beeranmi, gam mii miila, Alla jaaban du'aaje mon, o wittinanmi to moodon.

*Cannoje*

<sup>23</sup> Epaferas mo maabidaami gam Yeesu Almasiihu sanni maa.

<sup>24</sup> Marku bo, e Aristarkus, e Demas, e Luka gollidoobe e am sannii maa.

<sup>25</sup> Moyyere Yeesu Almasiihu Joomiraawo meeden wonda e moodon.

## Derewol Iburaninkeebe

### *Haala Puddirkä*

Derewol Iburaninkeebe e woodi nafuwe mawdo der Alkawal Kesal. Binnudo derewol ηol batay inne mum, ko baaweten ko bati tan woni, o laati nun Yahudujo goondindo Yeesu, woliine maamiraabe men nun hollata dum. Oo anni Alkawal Kiinjal puy, accu du dow golle Leewinkeebe. Diga seedeebe linjiila arandeebe nun o nani linjiila.

Yahuduube goondinbe Yeesu hande makko nun o winnani, kambe o baddata. Bee latii himbe tawaabe der eklesiya ka o anni, go oo yidi beraago be, dum fooyataa. Liinyoobe dewte e miili eklesiya Roma, der leydi Italiya nun o winnani derewol ηol. Gam Roma nun himbe arti nani haala derewol ηol, diga e derewol ηol Kelema mo Roma winni der duubol 95 yahugo 96 6aawo Almasiihu rimaa.

Toora batanaaka der don e laatii toora ka Kolodu laamiido toori Yahuduube goondinbe Yeesu der duubol 49 6aawo Almasiihu rimaa. O riiwi Yahuduube goondinbe jaka duubi sedda diga Roma.

Dum nandi hande derewol ηol winnaama hakkune duubol 60 yahugo 64 6aawo Almasiihu rimaa.

Binnudo derewol ηol, winnii ηol gam semmidingo be o winnani. Dum nandi bo hande be o winnani e tawaa der toora mawka. O winnanii be, gam to be boppu goondinki.

Der derewol makko, o hollii be no Yeesu e buri malaykaabe, e Muusa, e Yosuwa, e Limaamiibe be Alkawal Kiinjal. Dum don fu, e hollita no be o winnani e yiduno wittugo der tawaanjah Yahuduube dow sujidango Alla. O hollii be, no sadaka Almasiihu wadi de woore, e yiiyam mum heyii faa e baadey.

O semmidinii be e hollugo be goondinki himbe arandeebe. O batii

be, be tigga Almasiihu gite, gam kanko nun laatii misaalu munyal.

### Tokkontirki haalaaji

1. Haala puddirkä, 1.1-3
2. Almasiihu e buri malaykaabe mawnugo, 1.4-2.18
3. Almasiihu e buri Muusa e Yoosuwa mawnugo, 3.1-4.13
4. Limaamaaku Almasiihu e buri limaamaaku fu, 4.14-7.28
5. Alkawal Almasiihu e buri alkawalji fu, 8.1-9.28
6. Yiyam Almasiihu e buri kiisteedi fu nafuwe, 10.1-31
7. No goondinki buriri huune fu, 11.1-12.25
8. Haalaaji cakitiidi, 13.1-25.

### *Alla baddii himbe diga e Biddo mum*

<sup>1</sup> Diga ko booyi, Alla baddiino kaakiraabe meeden de duudsum, e laabi feere feere. <sup>2</sup> O baddii be diga e annabiihe. <sup>2</sup> Amma der nyalaade cakittiide dee do, o baddii en diga e Biyiko. E makko Alla tagiri duuniyaaru e kammu. Kanko nun bo Alla subi laatoo donoowo huune fu. <sup>3</sup> Kanko nun laatii jayηol jalboowol, kollitoowol tedduηal Alla, e no Alla laatii e goonja. Oo jogii huune fu diga e haala makko gooduka baawde. Baawo o laabini hakkeeji himbe, o joofake dow kammu, to nyaamo Alla mawdo, mo tedduηal.

### *Biddo e buri malaykaabe*

<sup>4</sup> Biddo e burii malaykaabe manju, kan wadi Alla hokki mo inne burune inde mabbe. <sup>5</sup> Malaykaajo moy nun Alla meedi ko wi'i:

«An laatii Biddo am,  
hanne min nun laatii Baaba maa<sup>☆</sup>?»  
Moy o wi'i kade:

«Mi laatanto mo Baaba,  
kanko bo, o laatanoo am Biddo<sup>☆</sup>?»

<sup>6</sup> Kade bo, no o liloysta Afo makko e duuniyaaru, o wi'i:

«Malaykaabe Alla fu sujidana mo<sup>☆</sup>.»

<sup>7</sup> Dow malaykaabe bo Alla wi'i:  
«Oo gollira malaykaabe makko hande keni,

\* 1:5 Jabuura 2.7   \* 1:5 2 Samuyiila 7.14   \* 1:6 Tokkitaaki Tawreeta 32.43   \* 1:7 Jabuura 104.4

o wadii 6e jagganoo mo hande delle yiite<sup>✳</sup>.»  
**8** Amma dow Biddo, o wi'i:  
 «Laamu maa, an Alla, wonoo faa abada!  
 A laamoranto himbe maa e sawru foonnitaare.  
**9** Aa yidi foonnitaare, aa wanyi ko halli,  
 gam majjum, Alla maada subi ma, wuju maa nebbam seyo  
 surujo ḥo wondube e maada<sup>✳</sup>.»  
**10** O wi'i kade:  
 «Joomiraawo, diga fuddoode, an tagi leydi,  
 juude maa tagi kammu.  
**11** Dum fu, dūm halkan, amma an, a tabbitinto,  
 dūm fu, dūm hiiđdan hande kolte,  
**12** a taggan dūm hande toggoore,  
 dūm waylitinte, hande kolte.  
 Amma an, a waylitintaako.  
 Duubi maa bo heennyataa<sup>✳</sup>.»  
**13** Alla meeday ko wi'i malaykaajo gom:  
 «Jooda nyaamo am  
 gam mi wada wanyube maa laatoo jaabirdum koyde maa<sup>✳</sup>.»  
**14** Malaykaabe fu laati nun ruuhuuji jaggantoodi Alla, oo lila di gam di gol-lanoo ronoobe kisidam.

## 2

### To en jeebee kisidam

**1** Gam majjum, e haani kakkilanen puy ko nanuden, gam to en bodđodee laawol. **2** Haala ka Alla hokki diga e malaykaabe goondii. Woofube e saliibe downtanaago ka fu, heban kiita kaa do haanani 6e.  
**3** To non noy dadirten, to en jee-bake kisidam mawdam hande dam do? Joomiraawo nun arti batango kisidam dam, den nanube tabbitinanii en dam. **4** Alla semmidinii seedaaku mađbe e wadugo maaneeji, e kaaydiniidum, e kaayeefiji feere feere. Alla hollitii dūm bo e seen-nango 6e Ruuhu Ceniido hande no o yidiri.

### Yeesu laatake nedđo gam hisina himbe

**5** Alla hokkay malaykaabe 6e laamano duuniyaaru garoowu nu batanten. **6** Goddo batii nokkun der Dewtere, wi'i:  
 «Ume nedđo laatii faa ciwtoraadūm?  
 naa 6ii-aadama ko paaledaa dūm?  
**7** A leesinii mo wakkati sedđa ley malaykaabe,  
 a meelii mo tedduŋal e manju.  
**8** A yowii huune fu ley koyde makko<sup>✳</sup>.»  
 No Alla yowani mo huune fu, edum holla no godđum horaaki ko o yowanay mo junjo. Jooni en ji'ataa taw no o yowanii mo kujje fu junjo.  
**9** Amma een ji'a Yeesu leesinanoodo wakkati sedđa ley malaykaabe, jooni o meelinaama tedduŋal e manju. Gam ume? Gam o toorake, o maayi. Hande non, sabbu moyyere Alla, o maayiranii himbe fu. **10** Dum fottanii Alla tagudo huune fu, e mo gam mum huune fu woni, yaara himbe duubbe 6e keba tedduŋal. Dum fottanii mo bo, o yottina Yeesu mađbitindo laawol kisidam, o laato kebbudo diga e tooraaji.

**11** Gam laabinoowo, e laabintee6e fu yiwi diga e baaba gooto. Kan wadi o sentay noddugo 6e banniraabe. **12** O wi'i:

«Mi batan banniraabe am inne maa, mi maantete caka jama'aare maa<sup>✳</sup>.»

**13** O wi'i kade:

«Mi yowan hoolaare am fu dow Alla.»

Kade bo, o wi'i:

«Mi nani, min e 6iibbe 6e Alla hokkimm<sup>✳</sup>.»

**14** Hande no 6iibbe woodiri 6annu e yiyam, hande non Yeesu bo ettiri 6annu, laatii hande mađbe. O wadii dūm gam diga e maayde makko, o halka baawde laamaniido maayde, waato Seydan. **15** Diga e majjum o rindini laatiibe maccube der gonki mum fu, gam 6e kuliino maayde. **16** Gam een anni, malaykaabe bane Yeesu wari wallugo, amma laatiibe

<sup>✳</sup> 1:9 Jabuura 45.7-8    <sup>✳</sup> 1:12 Jabuura 102.26-28    <sup>✳</sup> 1:13 Jabuura 110.1    <sup>✳</sup> 2:8 Jabuura 8.5-7  
<sup>✳</sup> 2:12 Jabuura 22.23    <sup>✳</sup> 2:13 Esaaya 8.17-18

lenyol Iburahiima nun. <sup>17</sup> Gam majjum, e haani o nanda e banniraabe makko der huune fu. Hande non o laatorii hooreejo Limaamiibé mo endam, koolaado der golle Alla, gam o moyta hakkeejijama'aare. <sup>18</sup> Kanko e hoore makko o tooraama, o jarbaa. Gam majjum, o waawan wallugo jarbaabe.

### 3

#### *Yeesu e buri Muusa*

<sup>1</sup> Banniraabe goondinbe, onon 6e Alla noddi, gattee hakkillo mon dow Yeesu. Alla lilozi mo gam o laatoo hooreejo Limaamiibé dow goondinki meeden ki ceedotoden. <sup>2</sup> O laatake koolaado yeeso Alla cubudo mo, hande no Muusa laatorii koolaado der suudu Alla fu. <sup>3</sup> E goonja, Yeesu e buri Muusa teddujal, hande no mahoowo buriri suudu 7ol o mahi teddujal. <sup>4</sup> Gam suudu fu e woodi mahudo dum, amma mahudo huune fu woni Alla. <sup>5</sup> Muusa laatike koolaado der suudu Alla fu, hande jaggiido, oo seedanoo ko batanoytee. <sup>6</sup> Amma Almasiihu laatike koolaado der suudu Alla hande biddo. Enen laatii 6e suudu makko to en tinatek een koolii, een tabbitini ko jurortoden faa heennyitirde.

#### *Naatugo der sihtaare Alla*

<sup>7</sup> Gam majjum, Ruuhu Ceniido wi'i: «Hanne, to on nanii daane Alla, <sup>8</sup> to on joorinee berde moodon hande no kaakiraabe moodon wadunoo, no 6e ummanii Alla\*, <sup>9</sup> 6e jarbii mo der ladde haro. Alla wi'i, ton 6e jarbii am, 6e poon-nimmi, baa no 6e ji'ii golle de gadumi jaka duubi lasoy didi. <sup>10</sup> Gam majjum, mone am ummii dow himbe jaamanuuru nu, bi'umi: “Wakkati fu, berde maabbe e majji, 6e annaa laabi am!” <sup>11</sup> Gam majjum, mone am ummii, kuniimi, bi'umi:

\* <sup>3:8</sup> Himbe Isira'iila ummaniihe Alla e annabi Muusa wi'i, wittan leydi Misira. <sup>3:11</sup> Jabuura 95.7-11 <sup>4:3</sup> Jabuura 95.11 <sup>4:4</sup> Laatanooji 2.2 <sup>4:5</sup> Jabuura 95.11

“Be naatataa der sihtaare am pay!.”

<sup>12</sup> To non, banniraabe, kakkilee, gam to goddo moodon woodu 6erne hallune, nulla goondingo, woddodoo Alla mo yonki. <sup>13</sup> Amma baajontiree nyalaane fu, faa dum wi'ee «hanne» gam to hakke majjin goddo moodon, yoorina 6erne mum. <sup>14</sup> To en jogake hoolaare men arandeere e semme faa heennyitirde, den en laatike hawtu6e e Almasiihu.

<sup>15</sup> Hande no Dewtere wi'i: «Hanne, to on nanii daane Alla, to on joorinee 6erne mon hande no kaakiraabe moodon wadunoo, 6e ummanii Alla»

<sup>16</sup> Bey nun nani daane Alla, go 6e ummanii mo? Kambe woni wurttiibe diga leydi Misira fu, 6e Muusa ardanii fu! <sup>17</sup> Bey nun mone Alla ummii dow muudum faa duubi lasoy didi? Kambe woni wadube hakke, go maayi der ladde haro. <sup>18</sup> Bey nun o hunanii 6e naatataa der sihtaare makko? Kambe woni saliibe dowlanaago mo. <sup>19</sup> En ji'i, 6e baway naatugo der sihtaare nen gam 6e goondinay.

### 4

<sup>1</sup> Alla habbanii en alkawal naatugo der sihtaare mum. To non, sey kulen, gam to goddo moodon miilu sakitake, dullii naatugo der mayre. <sup>2</sup> Gam enen bo, en baajaama linjiila hande kaakiraabe men. Amma, ka 6e nani nafay 6e, gam no 6e nani, 6e goondinay.

<sup>3</sup> Amma enen goondinbe, en naatan der sihtaare ne Alla batani, hande no o wi'i:  
«Mi hunake e mone bi'umi:  
“Be naatataa der sihtaare am pay!!”

Nani bo Alla heennyi wadugo golle mum diga o tagi duuniyaaru.  
<sup>4</sup> Bataama kade nokkun der Dewtere, dow nyalaane jeedidawre, wi'aa:

«Alla siwtake wadugo golle mum fu der nyalaane jeedidawre!» <sup>5</sup> O wi'i kade der nokkuure wonne: «Be naatataa der sihtaare am pay!»

<sup>6</sup> Artube nani linjiila naatay der siwtaare nen, gam 6e dowtaaki. Amma woffbe waawan ko naati kade. <sup>7</sup> Gam majjum, Alla resii nyalaane wonne kade, o noddi ne «hanne» o batanii ne baawo duubi duuddi, diga e hunnuko Dawda, o wi'i:  
 «Hanne, to on nanii daane Alla,  
 to on joorinee berde moodon<sup>◊</sup>.»

<sup>8</sup> To Yosuwa hokkiino 6e siwtaare, Alla batantaano kade siwtaare wonne baawo nii. <sup>9</sup> To non, nyalaane siwtaare e horanii kade himbe Alla. <sup>10</sup> Gam naatudo der siwtaare Alla, siwtoto e golle mum kanun bo, hande no Alla siwtorii e de mum. <sup>11</sup> Gam majjum, en tinnee naaten der siwtaare Alla. To goddo tokku misaalu dullere dowtaare himbe Isira'iila, yana.

<sup>12</sup> Haala Alla e woodi yonki, eka woodi semme. Kaa buri kaafahi kiye fu, belnaaki becce didi welugo. Kaa naata faa der, ka seenna yonki e ruuhu, jokkule e busam. Eka hiitoo maatirdum, e miilooji berne. <sup>13</sup> Walaa fu ko tagaa, ko suudanii Alla, huune fu laabi e gite makko. Kanko jottinoyten ko gaduden fu.

### *Yeesu e buri hooreeße Limaamiibe*

<sup>14</sup> Een goodi hooreejo Limaamiibe mawdo jottiido to Alla dow kammu, kanko woni Yeesu, Biddo Alla. Gam majjum,sey jogoden e berde goote goondinki meeden ki ceedotoden. <sup>15</sup> Een goodii hooreejo Limaamiibe baawoowo endaago en der tampe meeden. Gam kanko e hoore makko o jaribaama der huune fu hande no meeden, amma o waday hakke. <sup>16</sup> Gam majjum, en battee kittaal Laamaare Alla 7al moyyere e hoolaare, gam keben endam, e moyyere, de gooduden buakaata ballal fu.

## 5

### *Hooreejo Limaamiibe moyurmeene*

<sup>1</sup> Hooreejo Limaamiibe fu, subete nun caka himbe, o gollanoo Alla gam maabbe, o yaara dokke e kiisetedi yeeso Alla gam ikkingo hakkeeji.

<sup>2</sup> O waawan faamugo 6e walaa annal e majjube, gam kanko e hoore makko oo latii tampudo der becce fu. <sup>3</sup> Gam sabbu tampere nen nun haani o wada kiisetedi ikkinooji hakke, hinaa gam jama'aare tan, amma gam hoore makko bo. <sup>4</sup> Goddo waawataa ko hokki hoore mum teddujal laataago hooreejo Limaamiibe. Amma Alla nun noddala joomum hande no o noddiri Haruuna.

<sup>5</sup> Non bo dum latii e Almasiihu, kanko bane hokki hoore makko teddujal laataago hooreejo Limaamiibe.

Alla nun hokki mo dum, de o wi'i:  
 «An latii Biddo am,  
 hanne min nun latii Baaba maa<sup>◊</sup>.»

<sup>6</sup> O wi'i nokku kade:  
 «A latike Limaamiijo faa e baade hande no Malkisadaka<sup>◊</sup>.»

<sup>7</sup> Wakkati Almasiihu wonunoo e duuniyaaru, o eelii Alla, o eelitii, e bojji mawdi, e gondi, gam Alla hisina mo diga maayde. Alla bo toontake mo, gam oo woodi kulol Alla. <sup>8</sup> Baa no oo latii Biddo Alla, tooraaji makko ekkitinii mo dowtaago. <sup>9</sup> Alla latininii mo kebbudo, gam majjum o latanii dowtaniibe mo fu daliila kisidam tabitiidam. <sup>10</sup> Alla subi mo, wadi mo hooreejo Limaamiibe hande no Malkisadaka.

### *En kakkilee to en boppee goondinki*

<sup>11</sup> Dow haala kaa do, emen goodi haalaaji duuddi, e kujje cadude faamingo, gam on paamataa law. <sup>12</sup> E haanuno oon latii janninoobe diga dum booyi, amma faa jooni oon goodi buakaata jannineego puddirdum der haala Alla. Haanuno oon nyaama nyaamdu tekkujol, amma faa jooni, kosam nun musinton. <sup>13</sup> Musinoowo fu, waawataa suttontirgo haala foonnitaare, gam o laati nun suka. <sup>14</sup> Amma, mawbe, woowinbe hakkillo mum suttontirgo ko woodi e ko halli nun nyaamdu tekkujol wonani.

## 6

<sup>1</sup> Gam majjum en accee ekkitagaago ekkitinol leesuñol dow Almasiihu. En jahee yeeso e ko hebbi. To en daddee

<sup>◊</sup> 4:7 Jabuura 95.7-8    <sup>◊</sup> 5:5 Jabuura 2.7    <sup>◊</sup> 5:6 Iburaninkeeße 7.1-10

dadda kesa, hande jon: tuubugo golle jaayde, e goondingo Alla, <sup>2</sup> e ekkitinoode dow batisi, e yowugo himbe juude, e pintol maaybe, e kade kiita duumiika. <sup>3</sup> En jahee yeeso, kanjum en gadan dum, to Alla jaabii.

<sup>4</sup> Daaree haala himbe wittube der gonki mum kiikki. Be kebiino jaynjol Alla. Be mettii dokkal yiwanjal dow, go be kebi gedu e Ruuhu Ceniido. <sup>5</sup> Be mettii haala Alla geeta, e baawde jaa-manuur warooru, <sup>6</sup> e non fu, go be bitti baawo. Wadataako be bittinee be tuuba kade. Gam dum laatii hande kambe e ko'e maabbe, bee tigga kade Biddo Alla dow leggal palaanjal, bee jawna mo yeeso himbe fu.

<sup>7</sup> To leydi e yara diyam toboojam de duuddum, nii fudinana aawudo awdi geeri, den ni hebuwa don barke Alla. <sup>8</sup> Amma to gi'e, e tuppe nun ni fudinta, sey ni woppee, booyataa ko ni yaa'ee, ko sakitoytoo fu, sey ni sunnyee yiite.

<sup>9</sup> Onon, banniraabe am yidaabe, baa to emen bata hande non, emen anni oon darii dow laawol boodujol, njol kisidam. <sup>10</sup> Gam Alla laataaki mo fonnitaaki. O yeggintaa gadu mon, e yidde ne kollitindon gam inne makko. On kollitii yidde nen e golle de gadufon, e de gadoton faa hanne gam himbe Alla. <sup>11</sup> Amma emen jidi moy moodon fu hollita iri anniya kaa don faa heennyitirde, gam kebon ko kedidon. <sup>12</sup> To on laatee ciwaakuube, amma yemminee goondinki e munyal himbe heboobe donju nu Alla habbi alkawal mum diga e goondinki.

<sup>13</sup> No Alla habbanta Iburahiima alkawal, e hoore makko o hunorii, gam o waawataa ko hunorii burudo mo manju. <sup>14</sup> O wi'i: «E goonja, mi barkidinte, mi duudinan lenyol maa!» <sup>15</sup> Hande non Iburahiima munyiri, o hebi ko Alla habbani mo alkawal. <sup>16</sup> To himbe e hunoo, bee kunoro inne burdo be manju. Hunayeere nen nun tabbitinta haala, ikkina jeddi fu. <sup>17</sup> Non bo, no Alla yidi hollugo ronoobe alkawal mum

e burudum laabugo, no ka o resi waylitintaako pay, o wadii dum e hunayeere. <sup>18</sup> To non, kujje didi woni waylitintaako, de Alla waawataa ko fewi dow mum, kanje woni: hunayeere e alkawal. Kanjum semmidinta berde men, enen accoybe huune fu, go kooliden ko bi'aden. <sup>19</sup> Hoolaare nen e laatanii en hande tiggere laana diyam, tiggaane ne dimmataako gam yonkiji men. Ne yahii faa baawo wudere wirnirde nokkuure burune fu senaago. <sup>20</sup> Don nun Yeesu arti naatani en, o laatanii en hooreejoo Limaamiibe faa e baadey, hande no Malkisadaka.

## 7

### Limaamijo bi'eteedo Malkisadaka

<sup>1</sup> Malkisadaka on laati nun laamiido siire wi'eteene Salaam. Oo laatii bo Limaamijo Alla towudo. Wakkati Iburahiima wartata diga konu nu o jaalii laamiibe, den Malkisadaka fotti e makko, barkidini mo<sup>☆</sup>. <sup>2</sup> Kanko nun Iburahiima hokki jakka huune fu. Ko inne Malkisadaka filliti woni: «Laamiido foonnitaare», kade bo, oo laatii laamiido Salaam, waato «laamiido jam.» <sup>3</sup> O woodaa Baaba, dum bo inna, o woodaa bo kaakiraabe. O woodaa fuddoode, o woodaa timmoode. O nandinaama e Biddo Alla, oo laatii Limaamijo faa e baadey.

<sup>4</sup> Daaree no teddujal Malkisadaka foti mawnugo, faa Iburahiima maama meeden hokki mo jakka ko hebi diga konu. <sup>5</sup> Limaamiibe yiwbé e lenyol Leewi, kambe nun tawreeta hokki laawol jaabugo jakka to Isira'ililaabe, banniraabe maabbe, baa no kambe bo be yiwi e Iburahiima hande maabbe\*. <sup>6</sup> Amma Malkisadaka mo jeyaaka der lenyol Leewi, jaabii jakka to Iburahiima, o barkidini kebuso alkawalji Alla. <sup>7</sup> Nani bo, jeddi walaa, barkidindo e buri barkidinaado manju. <sup>8</sup> Dow wecco arano, Limaamiibe jaaboobe jakka laati nun himbe maayoobe.

\* 6:14 Laatanooji 22.16-17    ☆ 7:1 Laatanooji 14.17-20  
Haruuna.

\* 7:5 Leewi woni maama Muusa e

Amma dow wecco didabō, Malkisadaka ceedanaado e wuuri nun jaabi ka. <sup>9</sup> En baawan ko wi'i Leewi jaboowo jakka, hokkii ka diga e Iburahiima. <sup>10</sup> Gam Leewi rimaakano taw, go Malkisadaka fotti e maamiiko Iburahiima.

<sup>11</sup> Der tawreeta ka Isira'iilaabe hokkaa, be lenyol Leewi nun haani subee laatoo Limaamiiße. To golle limaamaaku Leewinkeebe e hebbuno, Limaamijo godđo hande Malkisadaka bukaakano wara, laato mo lenyol Haruuna bane. <sup>12</sup> To golle limaamaaku waylitake, doole sariya bo waylitoo. <sup>13</sup> Mo haala kan wondanaa laati nun mo lenyol feerewol, mo himbe lenyol mum gollaakino dadey to hirsirde. <sup>14</sup> Himbe fu e anni no Joomiraawo meeden yiwi diga e lenyol Yahuuda. Lenyol ηjol, Muusa batanay ηjol gokka dow limaamaaku.

### *Limaamijo godđo nandudo e Malkisadaka*

<sup>15</sup> Warugo Limaamijo godđo, nandudo e Malkisadaka, beydii laabingo haala kan. <sup>16</sup> O laataaki Limaamijo hande no himbe subirtee e sariyaaji mum. Amma, o laatike Limaamijo e baawde yonki ki heenyyataa. <sup>17</sup> Gam Dewtere wi'i:  
«A laatike Limaamijo faa e baadey hande no Malkisadaka.»

<sup>18</sup> To non, sariya artuka woppaama, gam ka tampii, ka nafay. <sup>19</sup> Gam tawreeta Muusa waday godđum kebbudum. Amma jooni, en kebii tammuwe burune woodugo, ne battortoden Alla.

<sup>20</sup> Dum don fu, e hunayeere nun laatorii. Amma bee to, laataaki Limaamiiße e hunayeere. <sup>21</sup> Amma Yeesu kan laatike dum dow hunayeere Alla, bi'udo:

«Min Joomiraawo mi hunike, mi witataa baawo:  
“A laatike Limaamijo faa e baadey<sup>☆</sup>.»»

<sup>22</sup> Hande non Yeesu laatorii torma alkawal buruŋjal woodugo.

<sup>23</sup> Gokka nani kade. Limaamiiße duubbe nun wonuno, gam maayde

e hadannoo be tabitaago. <sup>24</sup> Amma no Yeesu e laatii duumiido, limaamaaku makko godđo wattirtaa dum. <sup>25</sup> Gam majjum, o waawan hisingo no haaniri battiibe Alla diga e makko, gam oo wuuri e baadey, oo eelana be Alla.

<sup>26</sup> Hooreejo Limaamiiße hande oo don nun haanani en. Oo laatii ceniido, mo walaa gacce, ko sobi fu walaa e makko. Oo seenniri e hakkeebe, o bantaama faa dow to buri kammu towugo. <sup>27</sup> O nandaa e hooreebe Limaamiiße. O bukaaka wadugo kiisetedi nyalaane fu, aran, gam makko, baawo mum gam hakke himbe. Kanko, o sakkii hoore makko de woore tan, dum heyi faa e baadey. <sup>28</sup> Tawreeta Muusa subiino hooreebe Limaamiiße laatiibe himbe tampube. Amma hunayeere Alla warune baawo tawreeta, joodinii Biddo laatiido kebbudo faa abada.

## 8

### *Yeesu laatii hooreejo Limaamiiße*

<sup>1</sup> Hoore haala ka men batanta nani: Een goodi hooreejo Limaamiiße mawdo hande oo do. Oo joodii nyaamo leeso Laamaare Alla mawdo, mo tedduŋal, dow kammu. <sup>2</sup> Kanko nun gollotoo der nokkuure ceniine, der bukaaru goonjaaru nu Joomiraawo darini, hinaa neddo.

<sup>3</sup> Hooreejo Limaamiiße fu suba nun gam hokka Alla dokke e kiisetedi. E haani bo, oo woodi ko o sakkata. <sup>4</sup> To e duuniyaaru do nun o wonuno, o laatataakono du Limaamijo, gam Limaamiiße wadoobe sadaka hande no tawreeta Muusa batiri na'on. <sup>5</sup> Golle limaamaaku de be gadata e laatii misaalu, e nandi huune ko woni e goonja dow kammu. No Muusa yidunoo darnugo bukaaru, Alla bati mo wi'i: «Tinna, gadaa huune fu, hande misaalu mo kolladaa dow waanne<sup>☆</sup>.» <sup>6</sup> Jooni, Almasiihu hebii golle burude woodugo, gam o laatike hakkunneejo alkawal buruŋjal woodugo, dariinjal dow alkawalji burudi woodugo.

<sup>☆</sup> 7:21 Jabuura 110.4    <sup>☆</sup> 8:5 Wurtaago 25.40

<sup>7</sup> Gam e goonja, to alkawal aranal woodaano gacce, bukaata dartugo fidabal walaano. <sup>8</sup> Amma Alla felii himbe muudum wi'i:  
 «Min Joomiraawo mii wi'a on, nyalaadé waraan,  
 mi haabban alkawal kesal e himbe Isira'iila, e 6e Yahuuda.»  
<sup>9</sup> Njal nandataa e alkawal njal kabbenoomi e kaakiraabe maabbe, nyaanne ettumi 6e e junjo, burtinmi diga leydi Misira.  
 No 6e jogaaki alkawal am min bo, kokkumi 6e baawo.  
<sup>10</sup> O wi'i kade:  
 Daa no alkawal njal kabbanmi e himbe Isira'iila laatoyttoo baawo nii:  
 Mi wattan sariyaaji am der hakkillo maabbe,  
 mi winnan di der berde maabbe,  
 mi laatoto Alla maabbe,  
 6e laatoo himbe am.  
<sup>11</sup> Goddo janjintaa gondaado mum, naa bo banniraawo mum, wi'a, Annu Joomiraawo,  
 gam himbe fu annan am,  
 diga pettel faa mawdo maabbe.  
<sup>12</sup> Gam mi yaafoto boofi maabbe,  
 mi siwtortaa kade hakke maabbe<sup>☆</sup>.»  
<sup>13</sup> No Alla noddii alkawal njal do kesal, den fu, o laatinii aranal kiinnjal. Ko hiiddi, e ko nayyi bo, faanike mjjitingo.

## 9

*Sadakaaji gadeteedi wakkati Alkawal Kiinjal*  
*(Wurtaago 25.26; 40.17-33)*

<sup>1</sup> Alkawal aranal e wooduno sariyaaji dow sujidango Alla e nokkuure ceniine, nyibaane der duuniyaaru. <sup>2</sup> Bukaaru tiggaama, enu woodi gadaaji didi. Gada arana e wi'ee gada ceniika, don nun fitteel resetee, e taaburu, e peen cakkanaako Alla. <sup>3</sup> Bawbawre wudere fidawre wiirniraane, don nun gada fidaba bi'eteeka, gada buruka senaago fu woni. <sup>4</sup> Der makka, e woodi urirde wardi gadiraane kanjeeri, e keesuwal alkawal

gadiraanjal kanjeeri. Der keesuwal njal, loonjel gadiraanjel kanjeeri na'on don. Maannu e woni der loonjel njal, e sawru Haruuna bilitinnjal, e kaaye alluwaaje didi to dookaaji winnaa. <sup>5</sup> Dowdowre keesuwal njal, e woodi foto malaykaabe wi'etehee kerubaabe, tedduhe. Biyede maabbe e suddi ommoode yaaforde hakkeej. Jooni en baawataa ko batani dum gootel gootel.

<sup>6</sup> Non non nun huune dum fu resiraa. Den, nyalaane fu, Limaamiibe naata gada bukaaru arana, 6e gada golle sujidango Alla. <sup>7</sup> Amma gada fidaba, hooreejo Limaamiibe tan nun naatata don de woore der duubol. O naatataa bo, to o jogaaki yiyyam o wadirta sadaka gam yaafuye hakke makko e de himbe wadi hinaa e sago. <sup>8</sup> Diga e majcum Ruuhu Ceniido e holllita no laawol gada buruka senaago fu maabbiitaaki taw, to wecco bukaaru aranu e woni. <sup>9</sup> Huune dum e holllita ko woni jooni. Ko dum yidi wi'ugo woni: dokke e sadakaaji cakketedi waawataa laabingo berne gadoowo dum. <sup>10</sup> Sariyaaji dii don laati nun di bannu. Dii batana haala nyaamdu, e jaram, e lootuki feere feere. Sariyaaji dii nafii faa wakkati de Alla wayliti di.

### *Haala sadaka der Alkawal Kesal*

<sup>11</sup> Amma, Almasiihu warii, laatii hooreejo Limaamiibe dow kujje geete, garooje yeeso. O naatii der bukaaru burunu mawnugo, e burunu hebbugo, nu junjo neddo waday, nu jeyaaka bo e duuniyaaru do. <sup>12</sup> O naatii de woore der nokkuure burne senaago fu, dum heyi faa e baadey. O naatiday e yiyyam ginniji, e dam nyalbi, amma e yiyyam hoore makko. Non non o sooditorii en faa e baadey. <sup>13</sup> To yiyyam ginniji e ga'i, e dooni wiige miccaama dow cobudo, edam laabina mo dow laawol diina. <sup>14</sup> To non, noy yiyyam Almasiihu burirtaa laabingo cuudiidum berde meeden diga e golle mum baatude? Gam e baawde Ruuhu tabitiido o hokkiri hoore makko Alla, o laatii sadaka kaa

<sup>☆</sup> 8:12 Yeremiya 31.31-34

do woodaa tuuni, heba gollanoden Alla mo yonki.

**15** Kan acci Almasiihu laati beldinoowo, kabudo alkawal kesal, gam noddabé heba donju duumiinju ḥu Alla habbani be alkawal. Dum wadoto, gam o maayii, heba o sooditoo himbe wađunoobé hakke der alkawal aranal.

**16** To derewol donju e batanee, sey laatoo doneteedo maayii. **17** Derewol donju nafataa, to doneteedo e wuuri, sey doneteedo maaya go ḥol nafa. **18** Kan acci go alkawal aranal hađbee, sey no yiyam reyyitii. **19** Baawo Muusa janjani himbe sariyaaji gonudi der tawreeta fu, o etti yiyam nyalbi, e dam ginniji, o hawrontiri e diyam. Den o etti leebi bodeeji, e haako isop, o micci dow dewtere, e dow himbe fu, o wi'i: **20** «Kanjum woni yiyam tabbitinoojam alkawal ḥal Alla habbi wi'i, dowtanodon<sup>☆</sup>.» **21** Hande non bo o micci yiyam dow bukaaru, e dow ko be cujidiranta Alla fu. **22** Hande no tawreeta resiri, yiyam nun laabinta huune duuddum! To yiyam reyyitaaka bo, yaafuye hakkeji walaa.

### *Sadaka Yeesu Almasiihu moytii hakke*

**23** E haani kujje kollitoje ko woni dow kammu laabiniree hande non. E haani bo de laabiniree e sadakaaji burudi woodugo. **24** Gam Almasiihu naatay der nokkuure ceniine ne junjo neddo nyibi, nandune e goonaare. Amma o naatii dow kammu e hoore makko, gam o daroo jooni yeeso Alla gam men. **25** O naatay ton gam o sakka hoore makko de duuddum, hande no hooreejo Limaamiibe naatirta duubol fu der nokkuure burune senaago e yiyam mareefu. **26** To hinaa non, Almasiihu tooroton de duuddum diga fudsoode duuniyaaru. Amma jooni, o hollitake de woore tan, der heennyitirde jaamanuuji, gam o ikkina hakkeji diga e hokkugo yonki makko. **27** Neddo fu maayan de woore hande no dum

resirani dum, baawo mum Alla hiitoo mo. **28** Hande non bo, Almasiihu sakkii hoore mum de woore tan gam o ikkina hakkeji himbe duubbe. O suppitoyo de didawre, hinaa gam hakke, amma gam o hisina hettiniibe mo.

## 10

**1** Tawreeta, hollitan nun tan doogi huune geetum, garoojum, ka hollitintaa huune dum e hoore mum. Kan acci ka waawataa ko laatini battotoobe Alla hebbube e laawol wadugo sadakaaji gooti din baadey fu, e der duubol fu. **2** To tawreeta waawino laabingo be, maa be acciino wadugo sadakaaji, berde mađbe bo gaccataako be, gam be laabinaama de woore, go dum heyi faa e baadey. **3** Amma kiisetedi din e siwtora himbe hakkeji mum duubol fu. **4** Gam wadataako yiyam ga'i, e ginniji ikkina hakkeji.

**5** Gam majcum, no Almasiihu warata der duuniyaaru, o bat Alla o wi'i:  
«A yidaa sadakaaji kiisetedi e dokke, amma a siriyanake am bannu.

**6** Aseyortaako  
sadakaaji buudeteedi  
e sadakaaji ikkinooji hakke.

**7** Den bi'umi:  
“Mi nani, mii wara wadugo ko jidudaa, an Alla,  
non non dum winnaa dow am der dewtere taggeteene<sup>☆</sup>.»

**8** Aran, o wi'i: «A yidaa sadakaaji kiisetedi e dokke, e sadakaaji buudeteedi, e sadakaaji ikkinooji hakke. Nani bo, huune dum fu, sakkete nun hande no tawreeta batiri. **9** Baawo mum, o wi'i: «Mi nani, mii wara gam mi wada ko jidudaa.» Non Alla mooytiri sadakaaji arandeeji, go o joodini didaba. **10** En laabinaama e hakke, gam Yeesu Almasiihu wadii ko Alla yidi. O sakkii bannu makko de woore, dum heyii faa e baadey.

**11** Limaamijo fu e yaha golirde mum nyalaane fu. Oo sakka

<sup>☆</sup> 9:20 Wurtaago 24.8    <sup>◊</sup> 10:7 Jabuura 40.7-9

sadakaaji gooti din de duuddum, amma dī baawataa ko mooyti hakkeeji pay. <sup>12</sup> Amma oo do kan, wadii sadaka goota tan gam mooytugo hakkeeji, baawo mum o joodii ley nyaamo Alla faa e baadey. <sup>13</sup> Ton o hedii Alla wada wanyube mo laatoo jaabirdum koyde makko. <sup>14</sup> Gam e sadaka goota kan o laatiniri bē o laabini hebbube, faa e baadey.

<sup>15</sup> Kanjum bo Ruuhu Ceniido seedanii en, wi'i:

<sup>16</sup> «Joomiraawo wi'i:

Alkawal ḥjal kabbanmi e maābe nani, baawo nyalaade dee, mi wattan sariyaaji am der berde maābe,

mi winnan dī der hakkillo maābe.»

<sup>17</sup> O wi'i kade: «Mi siwtortaa hakkeeji maābe kade, e boofi maābe<sup>☆</sup>.» <sup>18</sup> Nani bo to hakkeeji yaafaama, doole bane sadaka ikkinoojum hakke wadee.

### *En battee Alla*

<sup>19</sup> Onon banniraabe, yiiyam Yeesu hokkii en laawol naatugo der nokkure burne senaago. <sup>20</sup> O maābitanii en laawol kesol, ḥjal yonki, gada wudere wirnirde, waato bannu makko.

<sup>21</sup> Een goodi hooreejo Limaamiibē ar-dinaado der suudu Alla. <sup>22</sup> Gam majjum, en battee Alla e berde goote, e goondinki kebbuki, laatoo berde meeden laabinaama e ko gaccotoo en, balli men lootiraama e diyam ceniidam. <sup>23</sup> En ceedee ko kooliden, to en tampee, gam kabbando en alkawal e laatii koolaado. <sup>24</sup> En bal-lontiree gam kolliten yidde hakkune men, gadan bo golle boodude. <sup>25</sup> To en accee hawtugo e goondinbe hande no woōbe wadata. Amma baajontiree, hakko du no oon ji'a nyalaane Joomiraawo e faanoo.

<sup>26</sup> Gam to en gadii hakke e sago men, baawo de annitinden goonja, sadaka gom kade walaa ikkinoowa hakkeeji. <sup>27</sup> Ko horii tan woni, kedoden e kulol kiita Alla, e yiite kalkoowe yeddube Alla. <sup>28</sup> To neddo tayii tawreeta Muusa, sey o waree, o yurmataake, to himbe dido naa

bo tato seedake dum! <sup>29</sup> To goddo yawike Biddo Alla, go o daarii yiiyam alkawal dam Alla laabiniri mo huune baanji, go o yenni Ruuhu kokkoowo en moyyere, e goonja, joomum heban kiita buruka hallugo. <sup>30</sup> Gam een anni Alla bi'udo: «Min nun wattotoo, min nun yobata.» O wi'i kade: «Joomiraawo hiitoto himbe mum<sup>☆</sup>.» <sup>31</sup> Yanugo e junjo Alla yonkinteejo e hunnii puy!

<sup>32</sup> Ciwtoree nyalaade arandeeje, baawo de Alla yaynani on, on jarii bone mawde, amma on darike e semme, kabudon. <sup>33</sup> Wakkati mum, on jennaama yeeso himbe, tooradon, kawtudon e tooreteebe hande moodon. <sup>34</sup> On jurmake maābaabe der kasu, nootidon e seyo ko goodudon teetaa, gam oon anni oon goodi kujje burude woodugo, tabitintoode. <sup>35</sup> Gam majjum, to on boppee hoolaare moodon, gam ne waddanan on riiba mawka. <sup>36</sup> E goonja, oon goodi bukaata munyal, gam kebon ko Alla habbani on alkawal, to on gadii ko o yidi. <sup>37</sup> E winnii der Dewtere:

«Do e yeeso sedda, sedda tan horii kaanudo wara, waran, o booyataa.

<sup>38</sup> Neddo am poonniido wuuran e goondinki, amma to o wittii baawo, berne am seyortaako mo<sup>☆</sup>.»

<sup>39</sup> Enen, en galaa caka wittooibe baawo gam halka. Amma caka goondinbe, gam yonkiji men hisa.

## 11

### *Goondinki himbe arandeebe*

<sup>1</sup> Goondinki laati nun hoolaago a hebii huune ko kedidaa e wara, e tabbitingo kujje de a yi'ay. <sup>2</sup> Sabbu goondinki nun himbe arandeebe hebiri seedaneego geeta yeeso Alla.

<sup>3</sup> Diga e goondinki nun paamirsden no duuniyaaru e kammu tagiraama e haala Alla. Ko yi'ete bo tagaama diga ko yi'ataake.

<sup>4</sup> Diga e goondinki nun Habiila hokki Alla sadaka buruka ka Kayiinu go Alla daari mo poonniido. Alla bo

<sup>☆</sup> 10:17 Yeremiya 31.33-34    <sup>☆</sup> 10:30 Tokkitaaki Tawreeta 32.35-36    <sup>☆</sup> 10:38 Habakuk 2.3-4

jabii sadaka makko. Baa no Habiila maayi, goondinki makko e waajoo en faa hanne.

<sup>5</sup> Diga e goondinki nun Anuhu eenciniraa dow kammu, o maayay. O yiitaaka, gam Alla eencinii mo dow. Ko o eencinee, dewte seedanike mo wi'i, oo fottani Alla. <sup>6</sup> Nani bo to hinaa e goondinki, walaa baawoowo ko fottani Alla. Battotoodo Alla fu, sey goondina no Alla na'on, o warjoto dartanbe mo.

<sup>7</sup> Diga e goondinki nun Alla maa-tiniri Nuuhu dow huune ko yottaaki taw. O huli Alla, den o wadi laana diyam, o dadiniri getti makko. O doyyii duuniyaaru kiita, o roni fonni-taare hebeteene diga e goondinki.

<sup>8</sup> Diga e goondinki nun Iburahiima dowtoranii noddore Alla, o yahi leydi ni Alla wi'i o ronan, o yawti, o annaa toy o Yahata. <sup>9</sup> Diga e goondinki o Yahiri der leydi ni Alla habbani mo alkawal, o joodi der bukaaji hande janano, nun nun bo Isiyaaku e Yaakuubu ronidoobe alkawaljal e makko wadi. <sup>10</sup> Iburahiima e hedinooyi'a wanjarde ne dadda sem-menteha, ne Alla diidi, mahi.

<sup>11</sup> Diga e goondinki nun Saratu hebiri baawde rimugo suka, baa no o naywii puy, gam o faamii, kaabbando mo alkawal e laatii koolaado\*. <sup>12</sup> Gam majjum diga neddo gooto naywudo, himbe duubbe rimaa. Be duudi hande koode tawaade dow kammu, e jaaneeri gonuni onde maayo, ni limataako.

<sup>13</sup> Der goondinki be fu, be maayi. Be kebay ko Alla habbani be alkawal. Amma be ji'ii dum, be ceyorii dum diga woddi. Den be bati no kambe be laati nun hobbe e jananbe der duuniyaaru. <sup>14</sup> Batoobe hande nii e holla e laabudum, no e darta leydi halal mum. <sup>15</sup> To hakkillo maabbe wittiino der leydi ni be burtinoo e mum, be baawanno ko witti ton. <sup>16</sup> Amma leydi buruni woodugo be jidi, leydi gonuni dow kammu. Gam majjum

senteene waday Alla o noddee Alla maabbe, gam oo siriyanii be wanjarde.

<sup>17</sup> Diga e goondinki nun Iburahiima sakkiri Isiyaaku no Alla foorni mo. Biyiiko bajjo, mo Alla wadani alkawalji duuddi nun o siriyno sakkugo.

<sup>18</sup> Dow makko nun Alla batuno, wi'i: «E Isiyaaku nun lenyol noddirteejol inne maa wurtotoo». <sup>19</sup> Iburahiima faamii no Alla e woodi baawde fintingo maaydo. Gam majjum Alla hokkiti mo biyiiko hande pintinaado diga maayde. Edum holla misaalu pintol diga maaybe.

<sup>20</sup> Diga e goondinki nun Isiyaaku barkidiniri Yaakuubu e Isuwa gam kujje garooje.

<sup>21</sup> Diga e goondinki kin nun Yaakuubu barkidiniri bibbe Yusufu gog-gooto, no o faanii maayugo. O tuggi sawru makko o jimminii, o teddini Alla.

<sup>22</sup> Diga e goondinki nun acci no Yusufu faanii maayugo, o bati bibbe Isira'iila haala wurtaago maabbe diga leydi Misira. O bati be bo ko be gadata e yiye makko.

<sup>23</sup> Diga e goondinki nun saareeji Muusa suudiri dum lebbi tati baawo no o rima, gam be ji'ii sukeel nel e woodi, be kulay bo ka laamiido bati.

<sup>24</sup> Diga e goondinki nun acci no Muusa mawni, o salii noddeego suka bii Fiirawna debbo. <sup>25</sup> O subii hawtugo e himbe Alla der tooraaji maabbe, e no o seyortoo der hakke wakkati sedda. <sup>26</sup> O faamii yarugo bone gam Almasiihu e laatii jawdi buruni jawdi Misira fu manju, gam oo daarii riiba gonuka yeeso.

<sup>27</sup> Diga e goondinki o wurtori leydi Misira, o hulay mone laamiido. O darii e semme, hande oo yi'a Alla mo yi'ataake. <sup>28</sup> Diga e goondinki, o wadiri juulde Paska, o wi'i, yiiyam miccee e dammude gam to malaykaajo maayde meema afube Isira'iila.

<sup>29</sup> Diga e goondinki nun, Isira'iilaabe joliri maayo Maliya hande dow leydi

\* <sup>11:11</sup> Dewte godde wi'i: Diga e goondinki nun Iburahiima hebiri baawde rimugo suka...      <sup>11:18</sup> Laatanooji 21.12

joorni. Amma እ modii Misirankeebe, no የ dartata jolugo.

<sup>30</sup> Diga e goondinki nun birniwol piiltitiijol Yeriko yani, no Isira'iilaabe filititii እ balde jeedidi.  
<sup>31</sup> Sabbu goondinki nun, Rahab, debbo jeenoowo, dadiri halkidingo e heeferbe, gam o jaabake Isira'iilaabe daaroobe no leydi resorii e jam.

<sup>32</sup> Kaye batanmi kade? Wakkati heyataa am gam mi batana habaru Gedeyon, e Barak, e Samson, e Yefta, e Dawda, e Samuyila, e kade annabiibe wobbe. <sup>33</sup> Himbe bee fu, goondinki nun acci የ jaalii laamiibe, የ gadī ko foonnitii, የ kebi alkawal Alla. Goondinki kin acci የ mubbi kunnude jagge, <sup>34</sup> የ nyifi baawde yiite, የ dadi diga e kaafaaje belde. Be kebitii semme baawo የ nyawi, የ laatii waawube konu, የ jaalii soogeeji janani. <sup>35</sup> Diga e goondinki nun rewbe wobbe hebiri maaybe mum fintinaa.

Gam goondinki nun, wobbe tooraa, salii faabeego, gam የ keba pintol burujol woodugo. <sup>36</sup> Wobbe jaancaa, fiyaa bocci, ko buri du, wobbe mum habbaa e callalluji, wattaa der kasu. <sup>37</sup> Wobbe bo faddaa kaaye faa maayi, wobbe jarbaa, wobbe, balli mum wuditaa gebe didi, wobbe wariraa e kaafaaje. Bee jiiloo toy fu, bee bornii guri baali, e be'i, ko የ goodi fu teetaa, የ tooraa, የ billaa puy. <sup>38</sup> Kambe, duuniyaaru fotay የ gonoo e mum, bee jiiloo der ladde haro, e dow baalle, e luuro kaaye, e der gayde.

<sup>39</sup> Be fu የ kebii seedaneego geeta yeeso Alla, gam goondinki mabbe. Amma የ kebay ko Alla habbani የ alkawal, <sup>40</sup> gam Alla e yidi hokkugo en ko buri woodugo, heba to የ jottoo to kebbudum woni hinaa e men.

## 12

*Joomiraawo e elta en gam oo yidi en*

<sup>1</sup> Seedeēbe duubbe e filititii en hande duule. Gam majjum enen bo, en boppee doongal fu, e hakke

taariide en e koydum. Den doggen e tinnaare der doggudu dadontiree እ desanaden. <sup>2</sup> En tiggee gite meeden dow Yeesu, laatiido puusudo goondinki meeden, kanko nun bo hebbinta ki. O hakkilanay senteene maayde dow leggal palaanjal, gam seyo እ o resanaa. Jooni oo joodii nyaamo kittaal Laamaare Alla.

<sup>3</sup> Miilanee Yeesu munyudo, e tooraaji dī hakkeebe toori mo, gam to on tampee, berde moodon biisoo.

<sup>4</sup> On kabiday taw e hakke faa yotti maayde. <sup>5</sup> On jeggitii bo waaji dī Alla waajii on hande sukaabe muudum, o wi'i:

«Biyam, taa fijir elto Joomiraawo, Taa accu berne maa biisoo to o wooltanii maa.

<sup>6</sup> Gam Joomiraawo e elta mo o yidi fu, oo fiya የ daari sukaabe makko<sup>☆</sup>.»

<sup>7</sup> Munyanee elto, annitee no Alla e daari on hande sukaabe muudum. Suka moy woni mo Baaba mum eltataa dum? <sup>8</sup> To Alla eltay on hande no o eltirta sukaabe makko fu, den, on laataaki woni sukaabe makko, amma jaaluube laatidon. <sup>9</sup> Ciwtoren no baabiraabe meeden የ duuniyaaru do e elta en, een dowtanii የ bo. Ume hadata en dowtanaago Baaba men mo dow kammu, gam buuren? <sup>10</sup> Baabiraabe meeden e elta en der wakkati sedda, no fottirani የ fu. Amma, Alla e elta en gam dum nafa en, gam o hawta en der senaare makko. <sup>11</sup> Aran, elto fu wadataa seyo, sey biisere berne. Amma baawo mum, nee waddana jaabube ne fu foonnaare e jam.

<sup>12</sup> Gam majjum, portee juude moodon comude, cemmidinee koppi moodon tampudi. <sup>13</sup> Tokkee laabi poortiidi, gam to koynjal layoowal sela laawol, amma ነ jal nyawtoo.

<sup>14</sup> Dartee jam hakkune moodon e himbe fu, dartee senaare bo, gam to hinaa e mayre, walaa ji'owo Joomiraawo. <sup>15</sup> Kakkilee gam to goddo dawu hoore mum moyyere Alla, to o laatoo hande dadol kaaduŋol bilitooowol e raaboo duubbe kaadufum

<sup>☆</sup> 12:6 Ballaaji 3.11-12

mum, e laawa 6e. <sup>16</sup> Kakkilee gam to goddo moodon laatoo jeenoowo, dum bo jawiido kujje ceniide hande no Isuwa sippiri afaku mum gam nyaama de woore tan. <sup>17</sup> Oon anni 6aawo nii, o yidii baabiiko barkidina mo, amma o salaama. O dartii e bojji, dabare no baabiiko waylitira miilo mum, amma o waaway.

<sup>18</sup> Onon, on garay to waanne meemeteene, kubboore yiite. On garay bo to duule niibude, to niwre e to hennu semmentewol woni. <sup>19</sup> On garay bo to walaldu fuuretee, e to daane towne falmata. Nanube daane nen fu, eelii to ne baddu dum kade baa woliine woore. <sup>20</sup> Gam 6e baaway ko munyani haala bi'uka: «Baa to bisa nun battii waanne nen, ja faddee kaaye ja waree.» <sup>21</sup> Ko himbe yi'i don e hunnii, faa Muusa e hoore mum wi'i: «Mi hulii sanne faa mii diwna.»

<sup>22</sup> Amma onon, on garii to waanne Siyoona, e wanjarde Alla yonkinteejo, waato Urusalima ni dow kammu, to malaykaabe uju ujuneeje hawriti e welwelta. <sup>23</sup> On garii to hawriine afube, be inde mum winnaa dow kammu. On garii to Alla kiitotoodo himbe fu, e to yonkiji foonnitiibe hebbinaabe. <sup>24</sup> On garii to Yeesu beldindo himbe e Alla der alkawal kesal, e to yiyyam mum miccaadam, burudam dam Habiila.

<sup>25</sup> Kakkilee, to on calee hettinanaago baddoowo on, gam saliibe nanango seedinbe dum der duuninyaaru do daday kiita. Noy enen miiluden dadiren to en kokkii badando en diga dow kammu 6aawo?

<sup>26</sup> Wakkati gom Alla dimmiino leydi. Jooni bo, o habbanii en alkawal, o wi'i: «Mi dimman de woore kade, hinaa leydi tan, amma kammu bo.» <sup>27</sup> No o wi'i «de woore kade» edum holla no tagaadum fu dimmoto faa ko dimmataako horoo.

<sup>28</sup> Gam majjum, no en keban laamu nu dimmataako, en jettee Alla, cujidanen mo no fottiri der kulol e ted-

dunjal. <sup>29</sup> Gam Alla meeden laati nun yiite kalkoowe.

## 13

### *Waaji cakitiidi*

<sup>1</sup> Tinnee jidontiree hakkune mon, gam on laati nun banniraabe. <sup>2</sup> To on jeggitee weernugo hobbe, gam wobbe weernii malaykaabe, be annaa naa malaykaabe nun be beerni. <sup>3</sup> Ciwtoree maabbaabe der kasu, hande onon e maabbe nun maabidaa. Ciwtoree bo tooreteebe, hande onon e maabbe nun tooridintee.

<sup>4</sup> Moy moodon fu teddina teegal, gorko laatoo koolaado dow debbo mum, debbo bo laatoo koolaado dow gorko mum. Gam Alla hiitoto wadoobe nyiddudum, e jeenoobe.

<sup>5</sup> To on accee yidde ceede arditanoor goonki moodon. Ceyoree ko goodudon, gam Alla e hoore mum wi'i: «Mi accataa maa, mi woppataa maa pay!» <sup>6</sup> Gam majjum, en baawan batugo e hoolaare bi'en: «Joomiraawo woni paabotoodo am, mi hulataa.

Ume neddo waawata ko wadanimmij?»

<sup>7</sup> Ciwtoree ardiibe, baajiiibe on haala Alla. Daaree no gonki maabbe heennyitiri, den, yemminon goondinki maabbe. <sup>8</sup> Yeesu Almasiihu gooto on nun, diga keenya, hanne, e faa abada. <sup>9</sup> To on accee ekkitinoanje janane iri dey fu fooda on. Ko haani woni, moyyere Alla semmida der berde moodon, hinaa sariyaaji dow nyaamduuji. Tokkuue sariyaaji dii don, di nafay dum godsum.

<sup>10</sup> Een goodi hiisirde, amma Liamaamiibe gollotoobe der bukaaru ceniinu woodaa laawol nyaamugo sadaka jowiika dow mayre.

<sup>11</sup> Hooreejo Limaamiibe e wadda yiyyam bisaaji cakkaadi gam moytugo hakkeeji der nokkuure cenie, amma, galli majji e wuudsee yaasi. <sup>12</sup> Gam majjum nun bo, Yeesu maayoy yaasi wanjarde, gam o laabina himbe e yiyyam makko.

<sup>13</sup> To non, en burtee taween mo

<sup>✳ 12:26</sup> Haggay 2.6    <sup>✳ 13:5</sup> Tokkitaaki Tawreeta 31.6, 8    <sup>✳ 13:6</sup> Jabuura 118.6

yaasi wanjarde, jaiben senteene ne o sentinaa! <sup>14</sup> Gam der duuniyaaru do, en goodaa wanjarde tabitintoone, amma een darta garoore yeeso.

<sup>15</sup> En cakkee wakkati fu Alla jettooje meeden diga e Yeesu, waato ceedoden inne makko wakkati fu.

<sup>16</sup> Amma to on jeggitee wadugo ko woodi. Ballontiree, gam iri kiisetedi dii don nun Alla yidi.

<sup>17</sup> Downtanee ardiibe on, leesinee ko'e mon yeeso maabbe. Gam kambe nun reeni yonkiji moodon, be jottinan bo Alla golle maabbe. Kokkee be laawol be gada golle maabbe e seyo, hinaa e dumbitaade, gam dum nafataa on.

<sup>18</sup> Du'anee men, gam emen kooli, gerde amen e laabi, men tokkoto bo wadugo ko woodi der becce fu. <sup>19</sup> Mii eela on puy, gadon dum, heba Alla maabitinanammi laawol mi warta to moodon law.

### *Du'aare e baynaade*

<sup>20</sup> Alla kokkoowo jam fintinii Joomiraawo meeden Yeesu diga maaybe. Yeesu on laatike duroowo baali mawdo, o habbi alkawal tabitiinal diga e yiyyam makko.

<sup>21</sup> Alla on hokka on baawde wadugo boodum feere feere fu, heba kebbi-non ko o yidi. O wada der men ko fottani mo, diga e Yeesu Almasiihu mo teddujal laatanii faa e baade! Aami!

### *Heennyitoode e cannooje*

<sup>22</sup> Banniraabe, mii eela on jabee waaji dii e munyal, gam sedda tan nun binnanmi on. <sup>23</sup> Mii maatina on no banniraawo meeden Timote yoofitaama. To o yottake law, mi waridan e makko yi'ugo on.

<sup>24</sup> Cannee hooreebi moodon, e himbe Alla fu. Banniraabe tawaabe leydi Itali sannii on.

<sup>25</sup> Moyyere Alla wonoo e moodon, on fu!

## Derevol Piyer Aranol

### *Haala Puddirkā*

Piyer laati nun gooto der aahiiþe Yeesu Almasiihu. O batii no o seedake tooraaji Almasiihu. O laati nun 6ii Yuhaana, mo Baytisayda, der leydi Galili. Yeesu noddii mo o laatoo aahiijo mum.

Kanko e Yuhaana e Yaakuuba nun takkii Yeesu buri, kanko nun bo arti anniti no Yeesu laati nun Almasiihu, Biddo Alla. Amma e nun fu, no gite wojji, Piyer yeddii faa de tati wi'i annaa Yeesu. Amma o annitii boofol makko, Yeesu bo yaafanake mo. Piyer wadii golle mawde der nyalaane juulde Pantekosta, Golle Lilaabe 2. Non bo kade o gollake no hawriine mawne wadetee Urusaliima, Golle Lilaabe 15. Yeesu batii no Piyer maayirta, Yuhaana. 21.18.

Kanko nun winni derevol noddiraanjol inne makko diga e junjo Silaasi. Goondinþe Yeesu Almasiihu sankitiiþe der leydi Asiya, to noddee hanne Turkiya nun o winnani derevol makko. O winnanii 6e gam o semmidina 6e, o tiidina 6e der tooraaji di 6e kebata gam goondinki maþþe. O wi'i 6e kakkilana goonki maþþe, 6e gonoo der laabäl, der kawtal maþþe e Almasiihu.

Boliide Piyer godde e hollita no himþe 6en tooraama, takkanaa haalaaji dí 6e annanaa. Gam ma-jum o yidi wittinogyo hakkillooji himþe 6en dow Yeesu Almasiihu, mo hoolaare maþþe woni dow mum, ko 6e tooree. Almasiihu e hoore mum tooraama, amma o yowanii hoore makko Alla kiitotodo e goonjaaku.

De Piyer du'oto, e maanta Alla, o siwtorii himþe 6en no Alla hisiniri dum, e no o hokkiri 6e tammuwe goonjaare diga e maayde e pintol Biddo makko Yeesu Almasiihu. Piyer tabbitinanii 6e no munyal maþþe e tinnaare maþþe dow Almasiihu wadataa baanji.

### **Tokkontirki haalaaji**

1. Cannooje 1.1-2
2. Tammuwe goonjaare 1.3-12

3. Jogaago hoore mum der laabäl 1.13-2.3
4. Hayre yonkinteere e himþe seniþe 2.4-10
5. Goonki gollantooþe Alla 2.11-25
6. Joonne der teegal 3.1-7
7. Tooraago gam goonjaaku 3.8-4.19
8. Hiinnaago baali Alla 5.1-11
9. Cannooje 5.12-14

### *Sannoore*

<sup>1</sup> Min Piyer lilaado Yeesu Almasiihu winnani on, onon 6e Alla subi laatiþe hoþþe e sankitii der leyde dee do: Pontus e Galaatiya e Kapadosiya e Asiya e Bitiniya. <sup>2</sup> Alla Baaba subii on hande no o resirnoo, o seni on e Ruuhu makko, gam dowtanodon Yeesu Almasiihu, mo yiyyam mum laabini on. Alla duudinana on moyyere e jam!

### *Tammuwe goonjaare*

<sup>3</sup> En jettee Alla, Baaba Joomiraawo men Yeesu Almasiihu, dimitoriido en e endam mum mawdam. E pintol Yeesu Almasiihu diga maayþe, o hokkiri en tammuwe goonjaare. <sup>4</sup> Een goodi tammuwe heþugo donnu ñu nyolataa, ñu biisataako, ñu daylataa bo. Kanju Alla resani on dow kammu. <sup>5</sup> O reenirii on e baawde makko gam on goondinii mo. O reenii on gam o hokka on kisidam ciriyiidam holittaago der wakkati cakitiiki.

<sup>6</sup> Oon ceyorii dum, baa no jooni doole tooraaji feere feere e tampina on der wakkati sedda. <sup>7</sup> Tooraaji din nun foonnata goondinki mon. Hande no kanjeeri ni tabitintaako lootirtee der yiite, hande non goondinki mon buruki kanjeeri saman faa to woddi, foonnirtee, ki heban maanteego, e teddujal, e manju, nyaanne Yeesu Almasiihu suppitoytoo. <sup>8</sup> Yeesu on, baa no on ji'ay mo, oon jidi mo, baa no on ji'ataa mo jooni, e nun oon goondini mo. Dum hebbinii berde moodon seyo ño teddujal, furunjo bataneego. <sup>9</sup> On keban riiba goondinki mon, kan woni kisidam yonkiji mon.

<sup>10</sup> Annabiþe wadii annabaaku dow moyyere ne desanadon, 6e dartii, 6e

biditii gam faamugo haala kisidam ðam. <sup>11</sup> Ruuhu Almasiihu gondo der mabbe, hollii ðe dum diga wakkati majjum waray, o sappake ðe tooraaji Almasiihu, e tedduñal di ñal wadata. Annabiibe ðen dartii faamugo dey dum wadata, e no dum wadirta. <sup>12</sup> Alla hollii ðe no habaruucci di ðe baajotoo, ko'e mabbe bane ðe baajantoo, amma onon ðe baajantoo. Jooni, waajotoobe linjiila ðen yottinii on habaru diga e baawde Ruuhu Ceniido, yiwudo dow kammu. Malaykaabe e hoore mum bo dartii faamugo dum no woodi.

### *Jogaago hoore mum der laabal*

<sup>13</sup> Gam majjum accee hakkillo mon e fini, jogee ko'e mon, jowee tammuwe moodon fu dow moyyere ne Alla hokkata on nyaanne Yeesu Almasiihu suppitoystoo. <sup>14</sup> Laatee hande sukaabe downtiibe, to on tokkee suunooji mon di gonnodon der muudum wakkati on annaano Almasiihu. <sup>15</sup> Amma laatee seniibe der yaadu mon fu, hande no Alla noddudo on oo Ceniido, <sup>16</sup> gam Alla wi'i der dewtere: «Laatee seniibe gam min mii Ceniido<sup>☆</sup>.»

<sup>17</sup> Der du'aaje mon, oon noddala Alla «Baaba» mon, kanko woni kiitoodo moy fu deydey gadu muudum, o suttontirtaa himbe, gam majjum nyaamee goonki moodon der duuniyaaru do e kulol Alla. <sup>18</sup> Oon anni on cooditaama diga e goonki baanjahi ki donunodon diga e kaakiraabe moodon. On cooditiraaka e huune ko heennyata, hande cardimaa bo kanjeeri. <sup>19</sup> On cooditiraama e yiyam Almasiihu teddudam, Almasiihu nandudo e jawgiiri ni walaa elande, ni walaa tuuni. <sup>20</sup> Alla subii mo diga duuniyaaru tagaaka, amma o hollitii mo der jaamanuuji caktiidi gam moodon. <sup>21</sup> Diga e makko goondindon Alla, pintindo mo diga e maayde, hokki mo tedduñal, gam goondinki mon e tammuwe mon fu daroo dow Alla.

<sup>22</sup> Jooni no downtanidon goona, on cenii ko'e moodon, on jidii banni-raabe e yidde ne walaa munaafitaare. Gam majjum, jidontiree e yidde goonaare, e berde mon fu. <sup>23</sup> On dimitaabe de didawre, hinaa e awdi nyoloori, amma e awdi ni nyolataa, e haala Alla yonkinteha, tabitiika. <sup>24</sup> E winnaa:

«Bii-Aadama e nandi hande fudo, Tedduñal mabbe nandi hande pinni fudo, to fudo yoori pinni mum saaman, <sup>25</sup> amma haala Joomiraawo tabitinto faa abada<sup>☆</sup>.»

Kanka woni linjiila ka baajadon

## 2

<sup>1</sup> Gam majjum boppee ko boni fu, hande jamma, fewre, munaafitaare, nawniraagu, e nyiore, <sup>2</sup> hande no sukahon keccon yidiri kosam ðam jillontiraaka, nun haani onon bo jidiron haala Alla, gam mawnon der makka, kison. <sup>3</sup> Hande no Binni Ceniini wi'i: «On mettii no Joomiraawo weliri<sup>☆</sup>.»

### *Hayre yonkinteere e himbe seniibe*

<sup>4</sup> Battee Joomiraawo, laatiido hayre yonkinteere, ne himbe woppi, goodune saman, ne Alla subi. <sup>5</sup> Onon bo, on laati nun hande kaaye de yonki, garee mahiredon suudu ruuhunkewol, gam laatodon waalde limaamiibe seniibe, yaaranoobe Alla sadakaaji ruuhunkeeji di o jabata diga e Yeesu Almasiihu. <sup>6</sup> Gam e winnaa der dewtere:

«Mi yowan dow Siyoona hayre gooraare, subaane, ne saman. Goondindo ne fu sentintaake.»

<sup>7</sup> Onon goondinbe, hayre nee e woodi tedduñal dow moodon, amma dow bee do goondinay, Dewtere wi'i dow mabbe:

«Hayre ne mahoobe woppi Kayre laatii burune fottugo der gooraare suudu,

<sup>8</sup> Kayre ferginta himbe, kayre bo doyyata ðe»

<sup>☆</sup> 1:16 Farillaaji Leewinkeebe 19.2.    <sup>☆</sup> 1:25 Esaaya 40.68.    <sup>☆</sup> 2:3 Jabuura 34.9.

Saliibē goondingo haala kan, fergoto dow mayre, kanjum Alla resani 6e.

<sup>9</sup> Amma onon, on laati nun lenyol cubaaŋol, on limaamiibē gollantooōe Laamiido, on himbē lenyol ceniijol, on himbē 6e o subani hoore makko, gam baajodon haala golle makko geete. Kanko woni noddudo on, wurtini on der niwre, yaari on der jaygol mum kayniiŋol. <sup>10</sup> Aran, on laataakino himbē Alla, amma jooni on laatake himbē makko, on kebayno endam makko, amma jooni on kebii dam.

### *Goonki gollantooōe Alla*

<sup>11</sup> Banniraabe am yidaabe, on laati nun hobbe e jananbe. Gam majjum mii eela on, boddodee jidaali bannu dartooji halka yonkiji moodon.

<sup>12</sup> Accee joonne moodon e woodi yeeso himbē 6e goondinay, gam baa to 6e gaccake on, e wi'ugo on, on hallube, 6e ji'a golle moodon boofude, 6e teddina Alla nyaanne o hollitanii 6e.

<sup>13</sup> Gam sabbu Joomiraawo, dōwtanee mawbe fu, dōwtanee laamiido leydi bo, gam kanko 6uri 6e. <sup>14</sup> Dowtanee mawbe genni bo, gam kambe laatii lilaabe makko, gam 6e pooda noppi wadoobe ko halli, 6e jetta wadoobe ko woodi.

<sup>15</sup> Gam ko Alla yidi woni, gadon ko woodi, muubbiron kunnude himbē batoobe ko 6e annaa. <sup>16</sup> Laatee rindinaabe, to on coomee ko halli der dimaaku moodon, gonee hande maccube Alla. <sup>17</sup> Teddinee himbē fu, jidee banniraabe goondinbe, kulee Alla, tiddinee laamiido.

### *Yemmingo Almasiihu*

<sup>18</sup> Onon jaggibe, dōwtanee joomiraabe moodon, hinaa yeeddube e diggube tan, amma e sadube fu. <sup>19</sup> To on munyanii tooraaji di kaandaa hebugo on, gam daliila Alla, on gadii ko woodi. <sup>20</sup> To on munyanii piide de piyetedon gam on gadii ko woodaa, toy tedduŋal mon woni? Amma to on munyanii tooraaji di keboton gam sabbu gadu mon geetu, edum fottani Alla, <sup>21</sup> gam kanjum

Alla noddani on, Almasiihu e hoore mum toorake, gam moodon bo o toorii. O holii on laawol gam tokkon koyde makko. <sup>22</sup> Dadey o waday hakke, goddo meeday ko nani fewre der hunnuko makko. <sup>23</sup> No 6e jennata mo, o yennitaaki 6e, de 6e kollata mo bone, o wattaaki 6e. Amma o yowanii hoore makko Alla, kiitotoodo e goonjaaku <sup>24</sup> Almasiihu roonake hakkeeji meeden dowbannu mum dow leggal palaanjal, gam laatoden maayube wecco hakke, amma laatoden foofoobe der ko foonniti. On joofake sabbu looci di o fiyaa. <sup>25</sup> Gam on latino nun hande baali majjudi, amma jooni on bittoy to duroowo, deenoowo yonkiji moodon.

## 3

### *Joonne der teegal*

<sup>1</sup> Onon rewbe bo, moy moodon fu dōwtanoo gorko muudum. Gam to wobbe mabbe goondinay haala Alla, jikku mon waawa ko wayliti 6e, baa to on batay woliine. <sup>2</sup> Gam 6e ji'an ko gadoton no laabiri, e no teddinirton Alla. <sup>3</sup> To on dartee njari ki yaasi, diga e moordi, dum bo kanjeeri, maa bo gineiji njariidi. <sup>4</sup> Accee njari moodon yiwa diga der berde, njari ki heen-nyataa, kan woni hakkillo diggunjo, e deyyuŋo, kanjum laatii ko tedi yeeso Alla. <sup>5</sup> Hande nun rewbe seniibe 6e diga den, yowube tammuwe mum dow Alla, woodiniri ko'e mum. Bee dōwtanii worbe mabbe. <sup>6</sup> Nun Saratu dōwtoranii Iburahiima, faa o noddi mo joomiraawo. Onon woni bibbe makko, to on gadii ko woodi, laatoo on kulay godsum.

<sup>7</sup> Onon worbe bo, joododee moy mon fu e debbo mum, der gondal pottunjal. Annitee no rewbe hewtay worbe semme. Teddinee 6e, gam kambe bo 6e donidan e mon, yonki ki Alla hokkata der moyyere mum, heba to godsum hadu du'aaje mon.

### *Tooraago gam goonjaaku*

<sup>8</sup> Baawo majjum, on fu laatee woodube miilo wooto, jurmontiree,

jidontiree hande mawniraabe e miiraabe, endontiree, leesinee ko'e mon. <sup>9</sup> To goddo wadanii on ko woodaa, to on battee mo, jennudo on bo to on jennitee dum: Amma barkidinee joomum, kanjum Alla noddani on gam donon barke.

<sup>10</sup> Hande no Binni Ceniini wi'i:  
«Jiddo wuurugo guurnam geetam,  
yi'a nyalaade geete,  
sey waawa denjal mum dow ko halli,  
hunnuko mum acca batugo  
pewe.

<sup>11</sup> O acca ko halli, o wada ko woodi,  
o darta jam e semme makko fu.

<sup>12</sup> Gam Joomiraawo e hakkilani foon-  
nitiibe,  
oo nana du'aaje maabbe.

Amma oo hokka wadoobe ko halli  
baawo.»

<sup>13</sup> Moy toorata on to oon tinnii  
wadugo ko woodi? <sup>14</sup> Amma baa to on  
tooraama gam wadugo ko foonnitii,  
on barkidinaabe. To on kulee himbe,  
to on accee hakkillooji moodon jiboo!

<sup>15</sup> Teddinee Almasiihu Joomiraawo  
der berde moodon. Wakkati fu  
ciriye toontaago yamudo on daliila  
tammuwe moodon. <sup>16</sup> Amma toontee  
be e diggere, e hakkillo fukkiijo.  
Goodee miiloji berde laabudi, den  
gaccotoobe on, e yenna on, gam  
joonne moodon woodune der kawtal  
mon e Almasiihu senta. <sup>17</sup> Tooreego  
dow wadugo ko woodi to nun Alla  
yidiri, e buri tooreego dow wadugo ko  
halli. <sup>18</sup> Gam Almasiihu e hoore mum  
maayi de woore, sabbu hakkeeji  
bibbe Aadama. Kanko poonniido,  
o maayanii en enen woofube gam o

yaara en to Alla. Himbe warii mo,  
amma Ruuhu Ceniido fintinii mo.

<sup>19</sup> E Ruuhu on Yeesu yahi waajoroy  
baa e yonkiji maabbaadi der kasu.

<sup>20</sup> Kanji woni ruuhuji himbe be  
downtanaakino Alla der jaamanu  
Nuuhu, baa no o munyanii be. De  
Nuuhu sebunoo laana diyam mum,  
himbe sedda tan naati nja, kambe jee-  
tato dadi diyam dam. <sup>21</sup> Diyam dam  
laati nun misaalu batisi kisinan on  
dum jooni, hinaa batisi moytoojum

<sup>◊</sup> 4:8 Ballaaji 10.12

tuuni 6annu, amma habbidingo e Alla  
alkawal e berde laabude nun, diga  
e pintol Yeesu Almasiihu. <sup>22</sup> Kanko,  
o eencii dow kammu, oo joodi  
nyaamo Alla. Malaykaabe e mawbe,  
e woodube baawde fu, e dowtanii mo.

## 4

### Goonki kesi

<sup>1</sup> Almasiihu yarii bone der 6annu  
muudum, onon bo goodee iri miiloji  
din. Jarudo bone der 6annu muudum  
seedi e hakke. <sup>2</sup> Diga jooni faa baldse  
moodon koriide der duuniyaaru, sey  
goniron hande no Alla yidiri, ceedon  
e suunooji 6annu. <sup>3</sup> Goonki mon  
ki nyaamunodon naane, gadudon  
hande heeferbe, ki heyi, on gonakeno  
der hallumaru, e suunooji e jarde  
bagi, e fijooji kalludi, e jaamanu-  
iji jarde bagi, caafudon tooruuje  
karmude. <sup>4</sup> No calidon hawtugo e  
maabbe der fijooji kalludi, kanjum  
haaynii be jooni, go bee biisa inde  
mon. <sup>5</sup> Amma be daroyto yeeso Alla,  
ciriyido hiitaago wuurube e maaybe,  
be toontoto mo. <sup>6</sup> Kanjum wadi  
maaybe bo waajaa linjiila, be kiitaa  
dow ko be gadi, hande no himbe fu  
hiitorree der 6annu, heba be buurda  
e Alla der ruuhu.

<sup>7</sup> Huune fu badake heennyugo,  
gam majjum gadee hakkillo, jogee  
ko'e mon gam gadon du'aaje. <sup>8</sup> Ko  
buri fu, jidontiree e yidde hebbune,  
gam yidde e yaafuu hakkeeji duuddi<sup>◊</sup>.  
<sup>9</sup> Beernontiree hakkune mon, hinaa  
e dumbitaago.

<sup>10</sup> Baamoy mon hebii dokkal Alla.  
Golliree njal gam nafon wobbe. Hande  
nun kollitirton oon gollira dokke  
moyyere feere feereeje de Alla hokki  
on. <sup>11</sup> Baajotoodo fu, sey waajoo  
haala Alla. Jaggotoodo bo, jaggoe e  
semme ne Alla hokki dum, gam der  
huune ko gadoton fu, teddinon Alla  
diga e Yeesu Almasiihu, mo teddunjal  
e baawde wonani faa abada! Aami

*Yarugo bone gam Almasiihu*

<sup>12</sup> Banniraabe am yidaabe, to on accee tooraaji buludi kebandi on gam foonnugo on haaynoo on, hande huune kođum. <sup>13</sup> Amma to oon kawti e Almasiihu der toora mum, ceyee oon belbelta boodum to teddujal makko suppitoke. <sup>14</sup> To on jennaama gam inne Almasiihu, barke laatanto on, gam Ruuhu teddudo, laatiido Ruuhu Alla e wondi e moodon. <sup>15</sup> To goddo e moodon yaru bone gam oo laatii ba-roowo himbe, dum bo gam emo laatii gujjo, maa bo gadoowo ko halli, to dum bo dow naatugo haala ka yaalay dum. <sup>16</sup> Amma to o tooraama gam oo tokkii Almasiihu, to o sentir dum, o yetta Alla gam oo noddee goondindo Almasiihu.

<sup>17</sup> Gam wakkati kiita faanake, Alla fuddiran hiitaago himbe muudum, to ka fuddirii en enen, noy dum laatantoo himbe be jaabay linjiila Alla?

<sup>18</sup> Binni Ceniini wi'i:  
«To poonniido hisiri no boni,  
ume laatantoo kalludo e gadoowo  
hakke?»

<sup>19</sup> Gam dum don fu, tooreteebe no Alla yidiri, yowa yonkiji mum dow Alla tagoowo, koolaado, be tokka wadugo ko woodi.

## 5

### *Hiinnaago baali Alla*

<sup>1</sup> Jooni emii badda dottiibe eklesiya wonbe caka mon, gam min bo mii dottiijo hande mabbe. Mi seedake tooraaji Almasiihu, mi wonoto der teddujal ηal o hollitoyta. <sup>2</sup> Duree himbe Alla be jowanadon. To on gadee dum e doole, amma e berde goote, hande no Alla yidiri, to on duree be gam hebugo joddi kalluni, amma gam oon jidi dum puy. <sup>3</sup> To on kollee himbe be Alla yowani on semme, amma laatanee be misaalu. <sup>4</sup> To Duroovo mawdo yottake, on meelete meetalol teddujal ηol hiiddataa.

<sup>5</sup> Onon gojankeebe sowtanee dot-tiibe. On fu, bornee yakkinaare hande togoore hakkune mon, gam e winnaa der Dewtere Ceniine: «Alla e habida mawnitiibe, amma buytube

ko'e mum oo hokka be moyyere makko.» <sup>6</sup> Gam majjam buytee ko'e mon yeeso Alla mo semme, heba o mawnina on to wakkati yottake. <sup>7</sup> Doontiree sugullaaji moodon fu dow makko, gam emo hakkilani on.

<sup>8</sup> Kakkilee, oon deeni! Gam ganyo moodon Ibiliisa e yiilito hande jaggere kalboore, dartoore mo ne yakkata. <sup>9</sup> Kabidee e makko, tiidee der goondinki, gam oon anni banniraabe moodon sankitiibe der duuniyaaru nu, e woodi iri tooraaji dii kanun bo. <sup>10</sup> Amma to on jarri bone der wakkati sedda, Alla mo moyyere noddudo on gam naaton der teddujal mum tabitiijal e Almasiihu, kanko o tiidinan on, o semmidina on, o hebbina on, o darna on. <sup>11</sup> Baawde wonana mo faa abada! Aami.

### *Cannoje*

<sup>12</sup> Silaasi banniraawo men koolaado wallii am winnango on dereyel pettel ηel, gam tiidingo on e seedanaago on no habaru moyyere Alla ne daridon dow mum laati nun goonja.

<sup>13</sup> Eklesiya gonuka Babiila ka Alla subi sannii on. Marku biyam bo e sanna on. <sup>14</sup> Cannontiree cannoje de yidde. Jam wona dow moodon onon hawtube der Almasiihu.

## Derebol Piyer Didabol

### *Haala Puddirka*

Binnudo derebol nol do innii hoore  
mum Simon Piyer, lilaado Yeesu Almasiihu.

O laatake seedeejo ji'udo no yeeso  
Yeesu waylitorii, o nanii bo daane  
Alla yiwune diga dow. O siwtorii no  
Yeesu wadii annabaaku dow maayde  
makko, kanko Piyer.

Piyer batay be o winnani, o batay  
bo to o woni o winniri derebol  
nol. Amma goondinbe Yeesu hande  
makko o winnani. Dum nandi bo  
hande Piyer winnii derebol nol der  
goonki mum sakiinehi. O batanii  
ekkitinol makko nol o janjinnoo. O  
batanii bo janjinoobe fewrekuube  
waroobe gam biisa ko o ekkitini.

Ko derebol nol tiitii woni, finningo  
hakkillo be o winnani faa be ciwtora  
ko o janjini be. Der derebol nol,  
Piyer hollii kiita desaniika janjinoobe  
pewe, o batanii bo munyal Alla mo  
yidaa baa gooto halka, amma himbe  
fu wittaa to makko, tuuba. O heen-  
nyitirii derebol makko e waggingo  
wuuroobe ko Dewtere bati.

### Tokkontirki haalaaji

1. Cannooje, 1.1-2
2. Noddoore goondinbe, 1.3-21
3. Ekkitinoobe fewrekuube, 2.1-22
4. Wittoysi Yeesu Almasiihu, 3.1-16
5. Haalaaji cakitiidi, 3.17-18

### *Sannoore*

<sup>1</sup> Derebol nol yiwi e am min Simon  
Piyer. Mii latii jaggiido e lilaado  
Yeesu Almasiihu. Mi sannii on,  
onon hebube goondinki geeti hande  
ki amen, gam sabbu foonnitaare Alla  
men, tawaane der Yeesu Almasiihu,  
kisinoowo. <sup>2</sup> Alla duudinana on  
moyyere e jam gam oon anni mo,  
kanko e Joomiraawo meeden Yeesu.

### *Hulugo Alla*

<sup>3</sup> Baawde Alla hokkii en huune fu  
ko haanani en buuriren, e no haani  
goniren e kulol Alla. Baawde den  
wallii en annugo Alla noddudo en

kawten der teddujal mum, e gee-  
taaku mum. <sup>4</sup> Diga e baawde den  
kebuden moyyereeji mawdi, teddudi,  
di gadanaden alkawal mum. O wadii  
dum gam kawton e makko, nan-  
don mo, gam dadon suunooji du-  
uniyaaru kalkooji. <sup>5</sup> Gam huune  
dum, tinnee, beydee dow goondinki  
moodon geetaaku, dow geetaaku, an-  
nal, <sup>6</sup> dow annal, nantaare, dow nan-  
taare, tinnaare, dow tinnaare, kulol  
Alla, <sup>7</sup> dow kulol Alla, banniraagu,  
dow banniraagu, yidde. <sup>8</sup> To huune  
dum fu oon jogii dum no woodi, ko e  
dum beydo der moodon, dum wallan  
on beydaago yeoso yeoso der annugo  
moodon Joomiraawo meeden Yeesu  
Almasiihu. <sup>9</sup> Neddo mo huune dum  
jacci, laati nun bumdo, o yi'ataa, gam  
o yeggitii no Alla laabini mo diga e  
hakkeeji makko jawtudi.

<sup>10</sup> Gam majcum banniraabe am, tin-  
nee no baawirdon fu, gam tabbitinon  
noddoore ne Alla noddi on, e cubol  
nol o subi on. Gam to on gadii dum on  
janataa der ko halli abada! <sup>11</sup> Hande  
non Alla maabitiranta on mammam  
dammugal Laamaare tabitiine, ne  
Joomiraawo meeden Yeesu Almasiihu  
kisinoowo en.

<sup>12</sup> Kanjum acci wakkati fu mii si-  
wtora on huune dum, baa no oon  
anni dum, heba cemmidon der goonja  
ka jabudon. <sup>13</sup> Mii miili, edum foon-  
nitii, mi finnina hakkillooji moodon  
faa ciwtoron dum to emii wuuri.  
<sup>14</sup> Gam mii anni mi booyataa e du-  
uniyaaru do kade, hande no Joomi-  
raawo meeden Yeesu Almasiihu an-  
ninirinmi dum.

<sup>15</sup> Amma mi wadan ko baawumi fu,  
gam to mi yawti, baawon ko siwtori  
kuppe dee wakkati fu.

### *Teddujal Almasiihu*

<sup>16</sup> E haalaaji di himbe tafi bane men  
anniniri on wittoyo Joomiraawo  
meeden Yeesu Almasiihu e baawde,  
amma men ceedike e gite amen  
manju makko! <sup>17</sup> Alla Baaba hokkii  
mo teddujal wakkati daane ne  
teddujal seedanii mo wi'i: «Oo do  
nun latii Biyam jidaado, mo belirmi

6erne.» <sup>18</sup> Menen e ko'e amen men nanii daane nen diga dow kammu, gam emen gondunoo e makko dow waanne seniine.

<sup>19</sup> Dum don fu 6eydanii men tabbitingo ko annabiibē batunoo. On gadii ko woodi no gattudon hakkilooji moodon dow makka, gam haala maabbe e nandi hande fitilleel jalboowel der niwre, e hande hoodere fajiri\* jalboore der berde moodon faa de fajiri wadi, <sup>20</sup> Aran, annitee no walaa baawoowo ko faamini ko winnaa der dewte annabiibē e annal hoore mum. <sup>21</sup> Hande non, walaa mo meedi ko hebi haala annabaaku e sago hoore mum, amma Ruuhu Ceniido nun wadata himbe e bata haala Alla.

## 2

### *Janjinoobe fewrekuu6e*

<sup>1</sup> Hande no annabiibē fewrekuu6e wonirno caka Isira'iilaabe, non bo janjinoobe fewrekuu6e wonortoo caka moodon. Be naannan janjinol fewrekuuwol, kalkoowol, caka mon. Be jeddan Joomiraawo cooditiido be. Hande non be poodiranta ko'e maabbe halkere yaawune. <sup>2</sup> Himbe duubbe tokkan laabi maabbe kalludi, sabbu maabbe, himbe batanan laawol gooja kalluka. <sup>3</sup> Suunooji maabbe waddanan be batugo haalaaji fewrekuuji gam be jammoo on, amma be doyyamaa kiita diga dum 6ooyii, halkere e nyudanoo be.

<sup>4</sup> Baa malaykaabe wadunoobe hakke, Alla accay dum, o habbii be e callalluuji, o faddi der niwre jahanna, faa nyalaane darrjal. <sup>5</sup> Alla accay duuniyaaru naane, amma o halkii yeddu6e Alla e ilam tufaana, sey Nuuhu baajotoodo foonnitaare Alla, e himbe jeedido wobbe hisi.

<sup>6</sup> Alla accay ci'e Sodoma e Gomora, o hiitake, o halki de e yiite faa de laatii dooni, gam dum laatanoo yeddoobe Alla fu misaal. <sup>7</sup> O dadinii Luudu, neddo poonniido, mo 6erne mum biisii puy sabbu baadiiji himbe

\* <sup>1:19</sup> Hoodere fajiri woni Almasiihu, jaynoowo der berde goondinbe dum. Daaru dewtere Kollitinki 22.16

bonbe. <sup>8</sup> Neddo poonniido joodiido caka maabbe on, 6erne mum laabune naawi dow ko yi'ata, e ko nanata nyalaane fu, sabbu baadiiji bondi di himbe hallube wadata.

<sup>9</sup> Edum holla en no Joomiraawo e anni no reenirta dōwtantoo6e dūm der tooraaji mum. Oo anni bo no o resirta himbe hallube gam be kiitee nyaanne darrjal, <sup>10</sup> accu du tokku6e suunooji galli mum, e wada jidaadi yonki mum, ko e yawii baawde Joomiraawo.

Janjinoobe fewrekuu6e ben berde mum e yoori, bee goodi manju hoore, bee bata kalluka dow teddu6e wonbe dow kammu. <sup>11</sup> Nani bo, baa malaykaabe bee do buri be semme e baawde, batataa kalluka dow maabbe yeeso Joomiraawo. <sup>12</sup> Amma himbe ben e laatii hande bisaaji di galaa hakkillo, tagaadi gam nanjee, waree. Bee bata kalluka dow ko be annaa, gam majjum be kalkiran hande no bisaaji halkirta. <sup>13</sup> Be duggan riiba golle maabbe kallude. Bee ceyoroo wadugo ko woodaa caka nyalooma. Bee laatii sobiibe e nyiddube. To be joodike gam be nyaamda e moodon der juulde, bee ceyoroo jammaago on. <sup>14</sup> Gite maabbe sawtataa daarugo rewbe e suuno, be comataa wadugo hakke, bee pooda be goondinki mum walaa semme der pitti maabbe. Berde maabbe e hebbi suuno kegal, bone laatanto be. <sup>15</sup> Be accii laawol poortiijol, be majji, be tokki laawol Balaama, jidudo heba ceede diga wadugo kalludum. <sup>16</sup> O felaama gam boofol makko. Babba makko muuma bati e daane neddo, hadi mo wadugo golle haajare makko.

<sup>17</sup> Janjinoobe fewrekuu6e ben laati nun hande fulli di galaa diyam, e duule de hennu semmentewol soggata, niwre burne niibugo nun Alla resani be. <sup>18</sup> Bee bata haalaaji mawnitiidi, di galaa hoore. Bee yoyra himbe e haalaaji suuno bannu. Himbe ben wurtikeno dum 6ooyay diga majju6e. <sup>19</sup> Bee kabana be alkawal no be

dindan, amma kambe e ko'e maabbe 6ee laatii maccube suunooji kalludi. Gam moy fu laati nun maccudo ko jaalii dum. <sup>20</sup> Wurtiibe e huune cobudum dum duuniyaaru, go be anniti Joomiraawo e Kisinoowo men Yeesu Almasiihu, den ko be bittitii der majji kade faa di jaalii be, heennyi-tirde maabbe buran fuddoode jaasugo. <sup>21</sup> To be annitayno laawol foonnaataare, dum burananno be, e annitingo njol, witta totta umuroore ceniine ne be kokkaa baawo. <sup>22</sup> Ko tawi be e tabbitina haala ballool njol do: «Rawaanu wittii e nyaamito tuure mum.» E wi'ee bo kade: «Afaaru lootaanu wittii e talloo der loope.»

### 3

*Wittoyo Joomiraawo meeden  
Yeesu  
(Matiye 24:37-38; 2 Tesalonika 1:7-  
10; Yahuuda 17:23)*

<sup>1</sup> Banniraabe am yidaabe, derewol njol do nun laatii didabol njol binnanmi on. Der dereeji didi dii fu, mii yidi finningo hakkillooji moodon gam wallugo on miilon no woodiri, ciwtoron ko ekkitinodon. <sup>2</sup> Ciwtoree haalaaji di annabiibe seniibe batunoo diga ko booyi, e umuroore Joomiraawo meeden kisinoowo, ne lilaabe mon annini on. <sup>3</sup> Aran, annitee dum do: Der nyalaade cakitiide, himbe jaancoobe, tokkube jidaadi yonki mum waran. Be jaancan on, <sup>4</sup> be bi'a: «O habbi alkawru o wittaan, toy mo? Diga ko kaakiraabe meeden maayi walaa ko waylitii, no dum laatinoo diga fuddoode duuniyaaru, non dum laatii faa jooni.» <sup>5</sup> Be jeggitii e yidde maabbe no diga ko booyi, Alla tagi kammu e leydi e haala muudum. O wi'i leydi wurtoo diga diyam, go o tagiri ni e diyam, <sup>6</sup> e diyam gootam dam kade, duuniyaaru halkiraa e ilam tufaana. <sup>7</sup> E haala makko goota kan, o jogorii kammu e leydi, dum ji'eten jooni faa nyalaane darjal yottoo, o halka dum der yiite e yeddube Alla.

<sup>8</sup> Banniraabe am yidaabe, to on jeggitee no to Joomiraawo, nyalaane woore e wa'i hande duubi ujuneere, duubi ujuneere bo e wa'i hande nyalaane woore. <sup>9</sup> Joomiraawo booyataa go hebbina alkawru mum, hande no wobbe miili, o munyan on nun tan, gam o yidaa baa gooto halka. Ko o yidi nun, himbe fu wittaa to makko tuuba.

<sup>10</sup> Nyalaane Joomiraawo waran hande gujjo. Nyalaane nen, kammu majjitan e rimmo manjo. Ko woni dow kammu fu halkete e yiite. Leydi e golle gadaade dow mayri fu, hiitete.

<sup>11</sup> To huune fu halkete hande non, sey annon no nyaamirton goonki mon der laabal, oon kuliri Alla! <sup>12</sup> Onon hedibe nyalaane Alla wara, gadee no ne warirta law! Nyaanne mum kammu halkan, huune ko woni dow kammu fu taayan e yiite.

<sup>13</sup> Amma enen, een kedii hande no Alla habbirani en alkawru, kammu keso e leydi keyri, to foonnaare tawetee.

<sup>14</sup> Gam majjum, onon banniraabe am yidaabe, tinnee laatodon be galaa gacce, e tuuni yeeso Alla. Goodee jam der kawtal mon e makko, oon kedorii nyalaane nen. <sup>15</sup> Paamee no munyal Joomiraawo meeden maabitani on laawol kisidam. Kanka banniraawo meeden Pol, jidaado, winnani on der dereeji mum hande no Alla hokkiri mo hakkillo majjum. <sup>16</sup> Non o winniri dum der dereeji makko fu. Der majji e woodi nokkuuje godde to sadie faamugo, himbe be annaa godsum, e be bennay der goondinki e waylita milooji makko, hande non be gadata e nokkuuje godde der Dewtere Ceniine. Be gaddanan ko'e mabbe halkere.

<sup>17</sup> Amma onon banniraabe yidaabe, on kebii seedineego, to non kakkilee to himbe yeddube Alla majjina on, sottina on diga darande mon.

<sup>18</sup> Mawnee der moyyere e annugo Joomiraawo meeden Yeesu Almasiihu kisinoowo en! Teddujal laatanoo mo diga jooni faa abada! Aami!

## Derewol Yuhaana Aranol

### *Haala Pussirkka*

Yuhaana lilaado Yeesu nun winni dereeji tati tokkontirdi noddiraadi inne mum, 6e bi'i, kanko nun bo winni linjiila Yuhaana e derewol kollitinki. Der derewol makko aranol, annaaka deydey bey nun o winnani, amma dum laabi no goondinbe 6e ekkitinoje fewrekuuje toorata nun o tiiti. Ekkitinoje fewoo6e, sankito6e ekkitinoje fewrekuuje den Yuhaana noddi waybe Almasiihu. Bee ekkitina no Almasiihu laataaki neddo e goona, hakke 6illataa goondindo der kawtal mum e Alla, 6e paalaaka bo e joonne der laabal.

Huune didi nun Yuhaana riiwi der derewol mum:

1 Tiidingo janjoobe derewol 6ol, 6e gona der kawtal pottu6al e Alla, e Bid6o mum Yeesu Almasiihu, dum yi'ee bo der yidde goonjaare hakkune ma6be.

2 Habidingo e ekkitinoje fewrekuuje.

Yuhaana e eela goondinbe 6e gona der jaynjol, gam Alla laati nun jaynjol. Der derewol 6ol, Yuhaana e yidi goondinbe tabbitina no bee goodi yonki tabitiiki, bee kawti bo e Alla. O hollitii der binni makko no goondindo geeto annitirtee. Kan woni hoolaago no Almasiihu laatake neddo, e dowtanaago oodaaji Alla, e yifugo banniraabe.

### **Tokkontirki haalaaji**

1. Haala yonkinteha 1.1-4
2. Niwre e jaynjol 1.5-2.29
3. Bi6be Alla e bi6be Seydan 3.1-24
4. Ruuhu goona e ruuhu fewre. 4.1-6
5. Ko yidde wadata 4.7-21
6. Goondinki jaalotooki 5.1-21

### *Haala ka yonki*

<sup>1</sup> Emen binnana on haala neddo gom gonudo\*. Men nanii daane makko, men ji'ii mo e gite amen, men daarii mo, men meemi mo e juude amen. Kanko woni haala kokkoowa himbe yonki. <sup>2</sup> Yonki kin hollitaama, men ji'ii ki, emen ceedanoo ki. Emen baajoo on haala yonki tabitiiki gonunooki to Alla Baaba, kanki men kollitaa. <sup>3</sup> Ko men ji'i, e ko men nani, kan men batata on onon bo, gam laatodon gootum e amen hande no laatoriden gootum e Baaba e Bid6o mum Yeesu Almasiihu. <sup>4</sup> Kanka men binnanta on, gam bel6um 6erne meeden hebbra.

### *Alla laati nun jaynjol*

<sup>5</sup> Habaru ko men nani e Yeesu Almasiihu, kan men batata on haala mum, Alla laati nun jaynjol, niwre walaa e makko. <sup>6</sup> To en bi'ii een laatii gootum e makko, ko een tawaa der niwre, en pewii, goona walaa der gadu meeden. <sup>7</sup> Amma to een jaha der jaynjol hande no kanko e hoore makko o wonori der jaynjol, den kan een laatii gootum hakkune meeden, kade bo yiyyam Bid6o makko Yeesu e laabina en diga hakkeeji men fu.

<sup>8</sup> To en bi'ii en galaa hakke, en pewanii ko'e men, goona walaa e meeden. <sup>9</sup> Amma to en tuubanii Alla hakke meeden, o yaafoto en, o laabina en e tuuni fu. Gam kanko, o kooliniido, o poonniido. <sup>10</sup> To en bi'ii en gaday hakke, en laatinii Alla pewoowo, haala makko bo walaa der meeden.

## 2

### *Almasiihu nun laatii balloowo meeden*

<sup>1</sup> Onon sukaabe am, mi winnanii on dum, gam to on gadee hakke. Amma to goddo moodon wadii hakke, een goodi balloowo to Baaba, kanko woni Yeesu Almasiihu, poonniido. <sup>2</sup> Kanko, o sakki yonki makko gam hakkeeji meeden yaafee, hakkeeji meeden tan bane, amma hakkeeji himbe duuniyaaru fu.

\* 1:1 Yeesu nun wi'aa Gonudo diga fuddoode. Linjiila Yuhaana 1.1-18

<sup>3</sup> Ko hollitinta no een anni Alla woni, downtanaago oodaaji makko. <sup>4</sup> Bi'udo «emi anni mo,» go downtanaaki oodaaji makko, joomum laati nun pewoowo, goonja walaa der joomum. <sup>5</sup> Amma dowtaniido haala Alla e goonja, yidde Alla hebbii dow joomum. Nunnun annitirten een kawti e makko. <sup>6</sup> Bi'udo e hawti e makko, e haani wonoo hande no Almasiihu wonirnood.

### Ooda kesa

<sup>7</sup> Banniraabe am yidaabe, ko binnanmi on hinaa ooda kesa\*, ooda booyuka nun, ka nanudon diga fuddoode. <sup>8</sup> E nun fu ooda kesa nun binnanmi on, goonja makka hollitake der Almasiihu, ka hollitake der moodon bo. Gam niwre e yawta, jaynjol goonjawol fuddii yaynugo.

<sup>9</sup> Miludo na'on der jaynjol, ko e wanyi banniraawo mum, faa hanne der niwre joomum woni taw. <sup>10</sup> Jiddo banniraawo mum der jaynjol woni, godsum walaa ko ferginta mo. <sup>11</sup> Amma banyudo banniraawo mum, der niwre woni, oo yaha der niwre, o annaa toy o yahata, gam niwre wuminii mo.

### To on jidee kujje duuniyaaru

<sup>12</sup> Sukaabe am, mii winnana on gam hakkeeji moodon yaafaama gam inne Yeesu. <sup>13</sup> Baabiraabe, mii winnana on gam oon anni gonudo diga fuddoode. Gojankeebe, mii winnana on gam on jaalake Kalludo.

<sup>14</sup> Sukaabe am, mi winnanii on, gam oon anni Baaba. Baabiraabe, mi winnanii on, gam oon anni gonudo diga fuddoode. Gojankeebe, mi winnanii on gam oon goodii semme, haala Alla bo e semmidi der moodon, kade bo on jaalake Kalludo.

<sup>15</sup> To on jidee duuniyaaru e ko woni e mayru fu. Gam jiddo kujje duuniyaaru, yidde Baaba walaa e mum. <sup>16</sup> Gam huune ko woni e duuniyaaru, hande jon ko neddo suunete, e ko gite yi'ata, suunee, e jawdi ni o mawnitorto, kujje de fu yiway e Baaba, e duuniyaaru de yiwi.

<sup>17</sup> Duuniyaaru e suuno mum fu heen-nyan, amma gadoowo ko Alla yidi, taboto faa abada.

### Ganyo Almasiihu

<sup>18</sup> Sukaabe am, duuniyaaru badake heennyugo. On nanii ganyo Almasiihu waran, jooni du waybe Almasiihu duubbe yottake. Kanjum annitirten no wakkati badake. <sup>19</sup> Caka men be yiwi, amma e goonja be laataaki be meeden. Gam to bee laatino be men, be gondanno e meeden. Amma be accii en gam dum hollita no be fu, be laataakino be meeden.

<sup>20</sup> Amma onon, Almasiihu hokkii on Ruuhu Ceniido, on fu oon anni goonja. <sup>21</sup> Mi winnanay on gam on annaa goonja. Amma gam oon anni ka. Oon anni bo fewre walaa der goonja.

<sup>22</sup> Den kan, moy woni pewoowo? Jeddudo Yeesu laati nun Almasiihu, Paabotoodo mo Alla liloy, kanko woni pewoowo, kanko woni ganyo Almasiihu, o yeddi Baaba e Biddo mum. <sup>23</sup> Jeddudo Yeesu laati nun Biddo, walaa Baaba, jaabudo Biddo, e woodi Baaba bo.

<sup>24</sup> Onon kan haala ka nanudon diga fuddoode, tinnee jogee ka der berde moodon. To haala ka nanudon diga fuddoode tabitake der berde moodon, den kan, oon goodi kawtal e Biddo e Baaba. <sup>25</sup> Almasiihu haabbanii en alkawal, alkawal jal woni yonki tabitiiki.

<sup>26</sup> Mi winnanii on dum gam sabbu himbe yiñube majingo on. <sup>27</sup> Onon kan, no Ruuhu Ceniido mo Almasiihu hokki on e tabitii der moodon, on bukaaka janjiniedon. Gam Ruuhu janjinan on huune fu, o janjinan on goonja, hinaa fewre. Den kan, kawtee e Almasiihu hande no Ruuhu janjiniri on.

<sup>28</sup> Jooni kan onon sukaabe am, tabitee der kawtal mon e Almasiihu, gam keben cuusal daraago yeeso makko nyaanne o suppito, heba dadene senteene nyalaane garki makko. <sup>29</sup> No oon annii Alla laati nun goonjaajo, anneee bo mo gadu mum foonnitii fu, laati nun biyiiko.

\* <sup>2:7</sup> Ooda kan nun laatii yifontirgo.

**3***Biibbe Alla*

<sup>1</sup> Daaree no Alla Baaba yidiri en, faa noddaden biibbe makko. Een biibbe makko e goonja. Ko acci duuniyaaru annaa en woni gam nu annaa mo.

<sup>2</sup> Yidaabe am, jooni en laatake biibbe Alla. Ko laatoytoden laabay taw. Amma een anni to Almasiihu wittoy holliti hoore mum, en nandan e makko, gam en ji'an mo hande no o wa'i.

<sup>3</sup> Goodudo tammuwe nen dow Almasiihu, laabinan hoore mum hande no kanko Almasiihu o laatori laabudo.

<sup>4</sup> Gadoowo hakke fu, yartake sariya Alla. Gam wadugo hakke laati nun yartaago sariya Alla.

<sup>5</sup> Oon anni Almasiihu wari gam moytugo hakkeeji, kanko mo walaa hakke.

<sup>6</sup> Kawtudo e makko fu wadataa hakke. Gadoowo hakke fu, yi'ay mo, annaa mo bo.

<sup>7</sup> Sukaabe am, to on accee goddo majjina on! Gadoowo ko goondi fu laati nun goonjaajo, hande no Almasiihu laatori goonjaajo.

<sup>8</sup> Gadoowo hakke fu laati nun neddo Ibiliisa, gam Ibiliisa e wada hakke diga fuddoode. Gam majcum Bidde Alla wari gam halka golle Ibiliisa.

<sup>9</sup> Laatiido binnej Alla fu, wadataa hakke, gam awdi Alla na'on der makko. Joomum waawataa ko tokkii wadugo hakke, gam Alla latii baaba makko.

<sup>10</sup> Ko seennontirta biibbe Alla e biibbe Ibiliisa nani: mo waday ko goondi fu, neddo Alla bane. Mo yidaa banniraabe mum bo, laataaki mo Alla.

*En jidontiree hakkune men*

<sup>11</sup> Habarudan dugen diga fuddoode nani: Jidontiree hakkune meeden.

<sup>12</sup> Haanay gaden hande no Kayiinu wadi kanko laatiido mo Ibiliisa, o warii minnyiiko. Gam ume wadi o warii minnyiiko? O warii mo gam golle makko wooday, go de minnyiiko laatii goonduse.

<sup>13</sup> Banniraabe, to on kaydinee to himbe duuniyaaru wanyii on.

<sup>14</sup> No een jidi banniraabe meeden, een anni en yartake maayde, en naatii der yonki. Mo yidaa banniraawo mum,

der maayde woni.

<sup>15</sup> Banyudo banniraawo mum fu, laati nun baroovo himbe. Oon anni walaa baroovo baa gooto woodi yonki tabitiiki der mum.

<sup>16</sup> No annitirden ko woni yidde nun, Almasiihu hokkitirii yonki mum gam meeden. To nun enen bo, e haani kokkitiren yonkiji meeden gam banniraabe men.

<sup>17</sup> To jom jawdijjo yi'ii banniraawo mum e talakidi, ko yurmaaki mo, noy yidde Alla waawirta ko woni e makko?

<sup>18</sup> Sukaabe am, haanay yidde meeden laatoo e haala belka tan, sey ka laatoo e gadu goonjau.

*Daraago yeeso Alla*

<sup>19</sup> Kanjum hollata, en na'on der goonja, en deyyitinan berde meeden yeeso Alla.

<sup>20</sup> To berde meeden gacake en, Alla e buri berde meeden, emo anni huune fu.

<sup>21</sup> Banniraabe am yidaabe, to berde meeden gaccaaki en, en daroto yeeso Alla e hoolaare.

<sup>22</sup> O hokkan en ko eeluden mo fu, gam en tokkii ooda makko, een gada ko fottani mo.

<sup>23</sup> Ooda ka o hokki en woni, goondinen inne Yeesu Almasiihu, Bidde makko, kade bo jidontiree hakkune meeden hande no o yamiri en.

<sup>24</sup> Dowtaniido ooda Alla fu e hawti e Alla, Alla bo e hawti e joomum. Ruuhu mo o hokki en, kanju anninta en oo hawti e meeden.

**4***Ruuhu goonja e ruuhu fewre*

<sup>1</sup> Banniraabe am yidaabe, to on goondinee wi'oobe e woodi Ruuhu Alla fu, amma biditee be, heba anniton naa to Alla be yiwi. Gam annabiibe fewoobe duubbe e sankitii der duuniyaaru.

<sup>2</sup> No annitirten goodudo Ruuhu Alla woni, to o seedake Yeesu Almasiihu warii, laatii neddo, oo don e woodi Ruuhu Alla.

<sup>3</sup> Mo annitay kaa don dow Yeesu fu, woodaa Ruuhu Alla. Ruuhu iju o woodi yiwi diga ganyo Almasiihu. On nanii garki ganyo Almasiihu batanaama, o na'on ko der duuniyaaru.

<sup>4</sup> Sukaabe am, onon on himbe Alla, on jaalake annabiibe fewoobe, gam Ruuhu gondo der moodon e buri gondo der duuniyaaru semme.

<sup>5</sup> Kambe himbe duuniyaaru be laati. Gam majjum, be batata haalaaji duuniyaaru, himbe duuniyaaru bo e hettinanoo be. <sup>6</sup> Enen, een himbe Alla, annudo Alla fu hettinanto en. Mo laataaki neddo Alla hettinantaako en. Nun ceennontirten Ruuhu goonja e ruuhu fewre.

### Alla laati nun yidde

<sup>7</sup> Banniraabe am yidaabe, jidontiree, gam yidde yiwi e Alla. Goodudo yidde fu laati nun binnej Alla, e anni Alla bo. <sup>8</sup> Mo walaa yidde annaa Alla, gam Alla laati nun yidde. <sup>9</sup> No Alla hollitiri en yidde mum nani, o lili Biddo makko bajjo der duuniyaaru, gam keben yonki diga e makko. <sup>10</sup> Daaru ko woni yidde, enen bane yidi Alla, kanko yidi en, liloy Biddo mum wari laatii sadaka gam hakkeeji meeden yaafee.

<sup>11</sup> Banniraabe am, to nii Alla yidiri en, enen bo, e haani jidontiren.

<sup>12</sup> Walaa meedudo yi'ugo Alla abada. Amma to en jidontirii hakkune men, Alla e hawti e meeden, yidde makko e hebbi der men.

<sup>13</sup> Noy annirten een kawti e makko, kanko bo oo hawti e meeden? Diga e Ruuhu makko nu o hokki en nun.

<sup>14</sup> Menen men ji'ii, emen ceedo bo no Alla Baaba liloy Biddo mum gam wara hisina himbe duuniyaaru.

<sup>15</sup> Ceediido Yeesu laati nun Biddo Alla fu, Alla e hawti e joomum, joomum bo e hawti e Alla. <sup>16</sup> Enen kan, een anni yidde Alla yidi en, een koolii ne bo.

Alla e hoore mum laati nun yidde, goodudo yidde fu, e hawti e Alla, Alla bo e hawti e joomum. <sup>17</sup> Gam to yidde makko hebbii der meeden, en keban cuusal daraago nyalaane darnjal. Gam no Almasiihu wa'i, hande nun enen bo ga'uden der duuniyaaru do. <sup>18</sup> Kulol walaa der yidde,

\* <sup>5:6</sup> Himbe duubbe e wi'a diyam dam woni diyam batisi dam Yeesu wadanaa. Yiyyam bo e hollita maayde Yeesu.

yidde hebbune e riiwa kulol, gam kulol yiwi diga yaggingo. Kuloowo fu, yidde Alla woni hebbay der joomum.

<sup>19</sup> Enen een jidi Alla gam kanko arti yidi en. <sup>20</sup> Bi'udo e yidi Alla, go e wanyi banniraawo mum laati nun pewoowo. Gam mo yiday banniraawo mum ji'eteedo, waawataa ko yidi Alla mo yi'ataake. <sup>21</sup> Daaru ooda ka Almasiihu accani en: jidudo Alla fu, sey yida banniraawo mum bo.

## 5

### Goondinki jaalotooki

<sup>1</sup> Goondindo Yeesu woni Almasiihu fu laati nun Biddo Alla. Jidudo baaba fu, e yidi biddo bo. A yidataa baaba, banyaai biddo. <sup>2</sup> No annirten een jidi biibbe Alla woni jiden Alla, den tokken oodaaji makko. <sup>3</sup> Tokkugo oodaaji makko woni yifugo mo. Oodaaji makko laataaki doongal, <sup>4</sup> gam laatiido mo Alla fu, jaaloto kujje duniyaaru. E goondinki meeden jaalortoden kujje duniyaaru. <sup>5</sup> Moy waawata ko jaali duniyaaru? Walaa, to hinaa goondindo Yeesu nun woni Biddo Alla.

### Ko Yeesu Almasiihu seedanaa

<sup>6</sup> Kanko, Yeesu Almasiihu, o wari e diyam e yiyyam\*. E diyam tan bane o wardi, o wardii e diyam e yiyyam fu. Ruuhu e hoore mum seedake dum, gam Ruuhu on woni goonja. <sup>7</sup> Seedeabe tato woni, <sup>8</sup> Ruuhu e diyam e yiyyam, seedaaku mabbe fu laatii gootu. <sup>9</sup> Een jaaba seedaaku himbe, amma seedaaku Alla buri semme, seedaaku ijun non Alla seedanii Biddo mum. <sup>10</sup> Goondindo Biddo Alla fu, hebbii seedaaku nu der berne mum. Mo goondinay Alla, laatinii mo pewoowo, gam o jaabay seedaaku Alla seedanii Biddo mum. <sup>11</sup> Nani do seedaaku nu: Alla hokkii en yonki tabitiiki, yonki kin der Biddo makko ki woni. <sup>12</sup> Goodudo Biddo e woodi yonki. Mo walaa Biddo Alla woodaa yonki.

*Heennyitoode derewol ηol*

<sup>13</sup> Onon goondinbe inne Biddo Alla, mi winnanii on dum gam anniton on kebii yonki tabitiiki. <sup>14</sup> Hoolaare ne gooduden nani: To en eelii mo huune e sago makko, oo nanana en. <sup>15</sup> No een anni oo nanana en ko eeluden mo, een anni en kebii dum.

<sup>16</sup> To goddo yi'ii banniraawo mum e wada hakke de yaarataa dum der maayde, o eelana joomum Alla, Alla bo hokkan mo yonki. Haala ka nafan dow wadoobe hakke de yaarataa dum der maayde. Amma e woodi hakke jaarooje der maayde. Mi wi'ay eelon Alla gam iri hakke de. <sup>17</sup> Kujje kallude fu laati nun hakke, amma hakke fu bane yaarata der maayde.

<sup>18</sup> Een anni laatiido 6injel Alla tokkataako wañugo hakkeeji, amma Biddo Alla e reeni mo, Ibiliisa kalludo meemataa mo.

<sup>19</sup> Een anni en himbe Alla, go duuniyaaru fu e woni der junjo Ibiliisa.

<sup>20</sup> Een anni bo Biddo Alla wari, hokkii en hakkillo annitingo Alla goonjaajo, jooni kanko woodi en, gam en kawti e Biddo makko Yeesu Almasiihu. Yeesu Almasiihu on woni Alla goonjaajo, kanko woni yonki tabitiiki bo.

<sup>21</sup> Sukaabe am, kakkilanee ko'e moodon e caafi tooruuje.

## Derewol Yuhaana Didabtol

### *Haala Puddirka*

Wōōbe e miili debbo e sukaābe 6e Yuhaana batanta laati nun eklesiya gom e himbē mum.

Haalaaji dī derewol nōl batata e nandi e ka artirkol bati. Haala buruka semme der derewol nōl woni yidde, e hakkilango waybē Almasiihu e ekkitinoobē fewrekuubē.

### **Tokkontirki haalaaji**

1. Haala puddirka 1-3
2. Goonja e yidde. 4-6
3. Hakkilango ekkitinoobē fewrekuubē 7-11
4. Cannooje 12-13

### *Sannoore*

<sup>1</sup> Min dottiijo,\* winni derewol nōl, mi winnanii maa an debbo† mo Alla subi. Mi sannii maa an e bībē maa fu, onon 6e jidum der goonja. Min tan bane yidi on, annube goonja fu e yidi on, <sup>2</sup> gam sabbu goonja tabitiika der meeden, gonotooka der meeden faa abada.

<sup>3</sup> Alla Baaba, e Biddo mum Yeesu Almasiihu hokka en moyyere e endam e jam, beydana en goonja e yidde.

### *Goonja e yidde*

<sup>4</sup> Berne am welii sanne, no nanumi bībē maa wōōbe e yaha der goonja hande no Baaba yamiri. <sup>5</sup> Jooni, an yeeraajo, ko gonum emi winnanee hinaa ooda kesa, ooda ka kebuden diga fuddoode nun, mi eelii maa, accu jidontiren hakkune meeden. <sup>6</sup> Ko woni yidde nun, jahen der ooda Alla. Kanka woni ooda ka nanuden diga fuddoode, kaanuka jahen dow mun.

### *Hakkilango ekkitinoobē fewrekuubē*

<sup>7</sup> Majjinoobē duubbe sankitake e duuniyaaru. Be jaay Yeesu Almasiihu warii latii neddo. Ga'udo nun fu, majjinoowo nun, ganyo Almasiihu

nun bo. <sup>8</sup> Kakkilanee ko'e moodon, gam to on majjin riiba golle amen heba kebon joddi kebbuni.

<sup>9</sup> Mo daraaki dow kollitol Almasiihu ko yaartii nōl, walanaa Alla. Dariido e maggot fu, e wonani Baaba e Biddo mum. <sup>10</sup> To goddo wari caka moodon go waajaaki kollitol nōl, to on jaabee mo der wuro moodon, to on cannee mo bo. <sup>11</sup> Gam cannudo mo, hawti e makko der golle makko kallude.

### *Cannooje*

<sup>12</sup> Ko Haani mi bata on e duudi, amma mi yidaa winnango on dum dum fu der derewol e dawa. Amma mi miili warugo to moodon, gam keben badden hunnuko e hunnuko, gam beldum berde meeden hebba.

<sup>13</sup> Sukaābe miiraawo maa mo Alla subi sannii maa.

\* **1:1** Inne nee don nun Yuhaana noddirteno der eklesiayaaji. Der lilaābe Yeesu fu, kanko tan horiino e yonki wakkati mum † **1:1** Wōōbe e miili debbo e sukaābe 6e Yuhaana batanta do, laati nun eklesiya gom e himbē mum. **1:8** +Ninni nun wōōbe waylitiri aayaare nen: gam to on majjin riiba golle mon.

## Derewol Yuhaana Tatabol

### *Haala puđdirka*

Gorko bi'eteedo Gayus nun Yuhaana winnani derewol mum ŋol do Enjol batana bo kade himbe dido wođbe: Diyoterefes e Demeteriyus. Enjol tiidina wallugo himbe woositintođe e fiina linjiila. Gayus wallitii iri mađbe de duuddum, Yuhaana bo yetti mo no woodi gam oo jađbo hođbe, amma Diyoterefes kan salake wallugo 6e.

Yuhaana manii Demeteriyus gam geeta ka himbe batanta mo.

### **Tokkontirki haalaaji**

1. Haala puđdirka, 1-3
2. Manoore Gayus, 4-8
3. Gaccaago Diyoterefes, 9-10
4. Demeteriyus yerdaama, 11-12
5. Cannooje, 13-15.

### *Sannoore*

<sup>1</sup> Min dottiijo\*, winni derewol ŋol. Mii winnanee an banniraawo am Gayus, jidaado der goonja.

<sup>2</sup> Banniraawo am jidaado, mii eela huune fu yahanee yeeso, bannu maa yanda hande no yonki maa yandiri.

<sup>3</sup> Berne am weli sanne no banniraabe wođbe wari seedanii am no tinnoridaa der goonja, e no jahirtaa der goonja bo. <sup>4</sup> Walaa ko buri welingo berne am, to hinaa nanugo no 6ikkol am e yaha der goonja.

### *Manoore Gayus*

<sup>5</sup> Banniraawo am jidaado, golle geete de gadataa e wallugo banniraabe baa to 6ee hođbe e hollita aa kooliniido\*. <sup>6</sup> Be ceedake yidde maa yeeso jama'aare goondinbe do. Wallu 6e hande no fottiranta Alla der jahańal mađbe, den a wadii ko woodi.

<sup>7</sup> Gam inne Almasiihu 6e gadı jahańal mađbe, 6e kebav godđum e juude 6e goondinay. <sup>8</sup> Gam majcum

haani, balliten himbe iri mađbe, gam golliden e mađbe der fiinugo goonja.

### *Feloore Diyoterefes*

<sup>9</sup> Mi winnanii jama'aare goondinbe derewol, amma Diyoterefes, jiddo ardingo hoore mum jabay haala amen. <sup>10</sup> Gam majcum, to mi warii, mi hollan ko o wadata e no o biisirta inne amen. Kanjum tan bane: O jađbataako banniraabe hođbe, kade bo, yidbe jađbaago 6e, oo hada dum, oo riiwa 6e diga e eklesiya.

### *Manoore Demeteriyus*

<sup>11</sup> Banniraawo am jidaado, taa yemmin ko boni, yemmin ko woodi. Gadoowo ko woodi fu, neddo Alla nun. Gadoowo ko halli bo, annaa Alla.

<sup>12</sup> Demeteriyus kan, himbe fu e seedanoo dum ko woodi, goonja e hoore mum bo e seedanoo mo dum. Menen bo, emen ceedo dum, aa anni bo seedaaku amen e laatii goonja.

### *Cannooje*

<sup>13</sup> Ko haani mi winnanee e duudi, amma mi yidaa winnugo dum dum fu der derewol e dawa. <sup>14</sup> Mii haabi yi'ugo maa law, gam badden hunnuko e hunnuko.

<sup>15</sup> Igođe maa wonbe do fu sannii maa. Mi sannii banniraabe fu, gooto gooto. Jam wona e maa.

\* 1:1 2 Yuhaana. 1. \* 1:5 Banniraabe 6en laatii sankitođe linjiila.

## Derewol Yahuuda

### *Haala Puddirka*

Binnudo derewol ηol do innii hoore mum Yahuuda, maccudo Yeesu Almasiihu, miiraawo Yaakuuba. Yahuuda e Yaakuuba fu laati nun miiraabe Yeesu, amma 6e kollitay haala lenyaaku ma6be e makko. Ko 6e kollii nun, bee laatii maccube Yeesu. Haala tawaaka, e miilooji tawaadi der Yahuuda e nandi puy e ko tawaa der 2 Piyer 2.

Ko derewol Yahuuda tiitii woni, seedingo goondinbe Yeesu, 6e kakklana leloo6e haala moyyere Alla, go bee jedda no Yeesu e laatii Almasiihu. O hollii 6e o winnanta, kiita tawuka himbe wadube iri majjum, hande jon Sodoma, e Gomora, e haala Koora. Misaaluji dili, goddi mum tawaaka der Dewtere, amma der dewte Yahuduube godde.

No o batani haala kiita jawtuka e garoowa, den o tiidini 6e o wi'i: «Yidaabe, ciwtoree haalaaji di lilaabe Joomiraawo meeden Yeesu Almasiihu batunoo on». Den o heennyitiri derewol makko e du'aare teddinoore Alla.

### Tokkontirki haalaaji

1. Cannooje, 1-2
2. Halkere ekkitinoobe fewrekuub6e, 3-16
3. Tinnaare der goondinki, 17-23
4. Maantugo Alla, 24-25

### *Sannoore*

<sup>1</sup> Derewol ηol yiwi e am min Yahuuda, maccudo Yeesu Almasiihu, miiraawo Yaakuuba. Mi sannii on, onon 6e Alla Baaba meeden yidi, go noddi on, onon reenaabe gam Yeesu Almasiihu. <sup>2</sup> Alla duudinana on endam e jam, e yidde!

### *Janjinoobe fewoobe hiitete*

<sup>3</sup> Banniraabe am yidaabe, mi yidiino puy winnango on dow haala kisidam kawtudam en en fu. Jooni mi tawii doole nun mi winnana on gam tiidingo on dow hawre goondinki ki

Alla hokki himbe mum de woore, go ki heyi faa baadey. <sup>4</sup> Gam himbe hallube naati caka moodon e yoyre. Bee darta lelugo haala moyyere Alla men, gam be nyaama goonki ma6be no 6e pakkiri fu. Bee jedda Yeesu Almasiihu laattiido hooreejo meeden gooto, e Joomiraawo meeden. Dewte ceniide bataniino halkere ma6be.

<sup>5</sup> Jooni, mii yidi siwtorgo on ko annudon, ko woodi. Wakkati Joomiraawo wurtini himbe Isira'iila diga Misira, 6aawo mum o halkii duubbe ma6be gam be goondinay. <sup>6</sup> Ciwtoree bo malaykaabe, saliibe ko darii to Alla resani dsum, 6e acci darande ma6be. Gam majjum Alla ma6bi 6e der kasu tabitiiju, e der niwre, faa nyalaane darpal, ko 6e kiitee. <sup>7</sup> Kade bo, ciwtoree himbe Sodoma e Gomora, e himbe genniije takkiide ton fu. Kambe bo, 6e gadiino hande non, 6e gadii jeenu e ko luudii fu. Be kalkiraama e yiite tabitiijne, gam dsum laatanoo himbe fu misaalu.

<sup>8</sup> Hande non, naatube caka moodon ben miilirta miilooji jaarandi 6e sobingo balli ma6be. Bee jawoo baawde Joomiraawo, bee bata kalluka dow teddube wonube dow kammu. <sup>9</sup> Baa Mika'ilu, hooreejo malaykaabe batay kalluka dow Seydan wakkati 6e jeddontirtano dow bannu Muusa. Ka o batii tan woni, o wi'i: «Joomiraawo hiitee.» <sup>10</sup> Amma himbe bee e bata kalluka dow ko 6e annaa. Ko 6e anni dow ko finaa tawa bo, bee laatii hande bisaaji di galaa faamu, kanjum majjinta 6e.

<sup>11</sup> Bone laatanii 6e! Gam 6e tokkii laawol Kayiinu. Be gattii ko'e ma6be der majjere, hande ne Balaama<sup>◊</sup>, gam 6e keba jawdi. Be turtii hande no gorko bi'eteedo Koora turtiri, go 6e kalki. <sup>12</sup> Kambe woni e sobina nyaamdu kawtal moodon. Be galaa senteene, bee nyaama hande bisaaji. Ko'e ma6be tan 6e paalaa. Bee nandi hande duule de hennu bottata, de galaa diyam. Bee nandi hande ledde ceedu, de galaa bikkol, e hande ledde doofaafe, yoori. <sup>13</sup> Bee cankita gadu

<sup>◊</sup> 1:11 2 Piyer 2.15

maabbe kallunu, hande no galmaaji diyam maayo wurtinirta guufo. Bee nandi hande koode boosotoode, niwre surune niibugo fu Alla resani be faa abada.

<sup>14</sup> Anuhu taaniraawo Aadamu jeedisabo, bataniino habaru maabbe diga ko 6ooyi, wi'i: «Daaree, Joomiraawo e warida e malaykaabe mum seniibe uju ujuneeye. <sup>15</sup> Oo wara gam o hiito himbe fu, o halka hallube fu, wadoobe ko halli. O hiitoto be, gam haalaaji kalludi di be bati dow makko fu.» <sup>16</sup> Himbe ben laati nun dumbitintoobe, bee bullikinoo wakkati fu, suunooji maabbe nun be tokki. Bee mawnito dow majjum, bee mana wobbe gam be keba ko be jidi.

### *Yowugo yonki mum dow goondinki*

<sup>17</sup> Amma onon yidaabe am, ciwtoree haalaaji di lilaabe Joomiraawo meeden Yeesu Almasiihu batunoo on diga law. <sup>18</sup> Be batiino on, be bi'i: «Der jaamanuuji cakitiidi, himbe jaancoobe, tokkube jidaadi yonki mum kalludi waraan.» <sup>19</sup> Kambe nun don, bee ceenna himbe, miilooji duuniyaaru be goodi, be goodaa Ruuhu Alla. <sup>20</sup> Amma onon yidaabe, cemmidinee ko'e mon dow goondinki mon ceniiki sanne, du'ee e baawde Ruuhu Ceniido. <sup>21</sup> Gonree der yidde Alla, kedee endam Joomiraawo meeden Yeesu Almasiihu jaarandam on to yonki tabitiiki.

<sup>22</sup> Jurmee himbe wadoobe seko der goondinki mum. <sup>23</sup> Paabee wobbe, gam to naatu der yiite. Jurmee wobbe bo, amma kakkilee, to be raaboo on jikku maabbe. Banyee faa e toggooe de galli maabbe sobini.

### *Yettoore*

<sup>24</sup> Alla waawan reenugo on e perge, faa o darna on yeeso teddujal makko e seyo, on galaa gacce. <sup>25</sup> Kanko woni Alla gooto, kisinoowo en diga e Yeesu Almasiihu, Joomiraawo meeden. Teddujal, e manju, e baawde, e laamaare, laatanii mo, diga huune fu tagaaka, non bo faa e jooni, e faa abada abadin. Aami!

## **Derevol Kollitinki ki Yeesu Almasiihu holliti Yuhaana**

### *Haala Puddirka*

Derevol kollitinki e laatanii goondinbe hande ko haaynii, gam sabbu kaayniidum e kunniidum ko nol batanta. Binnudo nol innii inne mum de naayi, wi'i, kan woni Yuhaana. O hollii no oo laatii maccudo Yeesu Almasiihu. Oo laatii banniraawo goondinbe, jottinoowo ka Alla bati. Yuhaana naywii puy go o winna derewol nol diga dunne Patimos to o yaaraa. Be o arti o winnani woni, eklesiyaaji jeedidi tawaadi der Asiya pettel, to wi'etee Turkiya hanne. Haala annabiibee wobbe be Alkawal kiinnjal e tawaa der derewol nol. Lambaaji duuddi, kollitooji maana huune ko sadi faamugo e tawaa der derewol nol. To en daarii, hande jon, lamba jeedidi, kollitoowa kebbuki Alla e laatii ko mawni der derewol nol.

Ko derewol nol tiitii hollitaama der aayaare arandeere e laabudum, dum wi'i: «Dewtere nee e batana haalaaji asiiri ko Yeesu Almasiihu holliti. Alla hollitii mo dum gam o holla jaggiibe mum huune ko waroya, booyataa».

Derevol nol, winnanaama goondinbe toorotoobe. Bee bukanoo annugo no kiita e wara yeeso, kalludum bo jaalataako e baadey, pintol Almasiihu maabitii wakkati kesi. Baawo to wakkati kin hebbii, den nun ko darpjal wada.

### **Tokkontirki haalaaji**

1. Dereeki di eklesiyaaji jeedidi winnanaa, 2-3.
2. Maaneeji jeedidi takkaadi, 4.1-8.6
3. Galaldi jeedidi puuretedi, 8.7-11.19
4. Maaneeji jeedidi, 12-15.8
5. Jarirkon kon mone Alla jeedidon, 16.1-20
6. Haalaaji jeedidi bataadi dow Babiila, 17.1-19.10

7. Kollitinki jeedidi dow no habaru-iji din hebbirta, 19.11-21.8
8. Urusaliima kesol laatiijol debbo jawgiyel, 21.9-22.5.

### *Haala puddirka*

<sup>1</sup> Dewtere nee do, e batana haalaaji asiiri ko Yeesu Almasiihu holliti. Alla hollii mo dum, gam o holla gollotoobe makko ko waroya, booyataa. Yeesu Almasiihu lili malaykaajo mum gam o annina dum Yuhaana, maccudo makko. <sup>2</sup> Yuhaana seedake ko o yi'i fu, o batii haala Alla, o seedii ko Yeesu Almasiihu holliti. <sup>3</sup> Barke laatanii janjoowo dewtere ne, e nanoobe haala annabaaku nu, go e jogii ko winnaa der mayre! Gam wakkati badike.

### *Yuhaana e sanna eklesiyaaji*

<sup>4</sup> Min Yuhaana nun winnani eklesiyaaji jeedidi tawaadi der leydi Asiya.

Moyyere, e jam laatanoo on diga e Alla gonudo, e goonnoodo, e garoowo. Dum laatanoo on diga e ruuhuji jeedidi, gonudi yeeso kittaal Laamaare makko. <sup>5</sup> Dum laatanoo on bo diga e Yeesu Almasiihu, cedotoodo koolaado, artudo finti diga e maaybe, laamiido laamiibee duuniyaaru.

Kanko yidi en, go o hisini en diga e hakkeeji men, e yiyam makko. <sup>6</sup> O laatinii en laamiibee, e Limaamiibee Alla baabiiko. Teddujal e Laamaare laatanoo mo, duubi duubaali. Aami.

<sup>7</sup> Daaree, oo warida e duulere. Himbe fu yi'an mo, baa yuwunoobe mo, lenyi duuniyaaru fu simoto gam makko. Dum laatoo hande non! Aami<sup>†</sup>.

<sup>8</sup> Joomiraawo Alla, gonudo, e gonnoodo, e garoowo, mo baawde wi'i: «Min woni arano, min woni sakitiineejo.»

### *Almasiihu hollitii hoore mum Yuhaana*

<sup>9</sup> Min woni Yuhaana banniraawo moodon. Mi hawtii e moodon der toora, e der Laamaare Yeesu Almasiihu, e der tinnaare makko.

<sup>†</sup> 1:7 Jekariya 12.10; Yuhaana 19.37

Mi yaaraama e semme dow duunne wi'eteene Patimos gam mi waa-jike haala Alla, ceedaniimi Yeesu. <sup>10</sup> Nyaanne nyalaane Joomiraawo\*, kebbumi Ruuhu, den nanumi baawo am daane towne hande galaldi puureteedi. <sup>11</sup> Daane nen e wi'a: «Ko ji'ataa, winnu dum der derewol, lildaa eklesiyaaji jeedidi dii do: Efesu e Samirna e Pergamu e Tiyatira, e Sardis, e Filadelfiya e Lawdikiya.»

<sup>12</sup> Den jeeyitiimi gam mi daara baddando am, ko ji'umi fitillaaji jeedidi, gadiraadi kanjeeri. <sup>13</sup> Goddo nandudo e Bii neddo e darii hakkune majji, oo bornii jabbaare, oo habbi belbelol kanjeeri to gabaare makko. <sup>14</sup> Hoore makko e gaasa makko e rawni tar hande hottollo e kosam, gite makko e wa'i hande dennjal yiite. <sup>15</sup> Koyde makko e jalba hande janni bodeeri buudaani faa wojji coy, daane makko e nandi hande rimmo diyam duuddam. <sup>16</sup> Oo jogii koode jeedidi e junjo makko nyaamo. Kaafahi belki becce didi e wurtoo diga e hunnuko makko. Yeeso makko e nandi hande naanje jalboowe caka nyalooma. <sup>17</sup> No ji'u moo mi, janumi yeeso makko, laatiimi hande maaydo. Den o yowi junjo makko nyaamo dow am, o wi'i: Taa hulu! Min woni arano, min woni cakitiido, <sup>18</sup> min woni buurudo. Mi maayiino, amma jooni mii wuuri faa abada. Mii woodi baawde dow maayde e dow joonne maaybe. <sup>19</sup> Gam majjum, winnu ko ji'ataa, ko wadotoo, e ko wadoytoo yeeso. <sup>20</sup> Nani do asiiri koode jeedidi de ji'udaa der junjo am nyaamo, e fitillaaji kanjeeri jeedidi. Koode jeedidi, laatii malaykaabe eklesiyaaji jeedidi. Fitillaaji kanjeeri jeedidi bo, laatii eklesiyaaji jeedidi.»

## 2

### *Derewol eklesiya Efesu winnanaa*

<sup>1</sup> «Winnan malaykaajo eklesiya Efesu, bi'aa:

\* <sup>1:10</sup> Nyalaane Joomiraawo nen nyaanne alal nun.

Nani haalaaji jogiido koode jeedidi der junjo mum nyaamo, jahoowo hakkune fitillaaji kanjeeri jeedidi: <sup>2</sup> Mii anni golle maa, e tinnaare maa, e munyal maa. Mii anni a mun-yantaa hallube, a foonnii wi'oobe e laatii lilaabe, amma be laataaki dum, a tawii be laati nun fewoobe. <sup>3</sup> Aa woodi munyal, a toorake gam inne am, amma a tampay. <sup>4</sup> Amma ko pelan maa mi woni, a accii yidde maa arandeere. <sup>5</sup> Gam majjum, si-wtor diga to janudaa. Tuubu, den gadaa golle maa arandeeje! To hinaa nun, mi waran, mi ikkina fitilla maa e nokkuure mum, sey to a tuubii. <sup>6</sup> Amma aa woodi gootum ko woodi: aa wanyi golle Nikolaiiibe, hande no min bo banyirmi de.

<sup>7</sup> Goodudo noppi fu, nana ko Ruuhu batata eklesiyaaji! Jaaliido fu, mi hokkan dum nyaama biibbe leggal yonki gonujal der aljanna Alla.»

### *Derewol be Samirna winnanaa*

<sup>8</sup> «Winnan malaykaajo eklesiya Samirna, bi'aa:

Nani do haalaaji di bi'eteedo arano e sakitiineeo wi'i, kanko maayunoodo ko finti. <sup>9</sup> Mii anni toora maa, e talakaaku maa, baa no aa jom jawdiijo. Mii anni kalluka ka wi'oobe e laatii Yahuduubi batata dow maa. Amma fewre, be laati nun jama'aare saafoobe Seydan. <sup>10</sup> Taa hulu toora badiika tawugo maa. Daa Seydan maabban wobbe mon der kasu, gam poonnendon, on toorete faa balde sappo. Laata koolaado faa maayde, mi hokkete kebal jaalorgal, waato yonki.

<sup>11</sup> Goodudo noppi, nana ko Ruuhu batata eklesiyaaji! Jaaliido, maayde didawre meemataa dum.»

### *Derewol be Pergamu winnanaa*

<sup>12</sup> «Winnan malaykaajo eklesiya Pergamu, bi'aa:

Nani do haalaaji jogiido kaafahi ceebuki, ki beldiji didi: <sup>13</sup> Mii anni to joodidaa, don nun laamorde Seydan woni. Aa jogii inne am, a yedday

goondingo am baa der wakkati Antipas seedeijo am koolaado waraa caka moodon, to Seydan woni. <sup>14</sup> Amma mii woodi ko pelan maa mi: Aa woodi woobbe tokkuube ekkitinol Balaama. Balaama ekkitiniino Balak wada no himbe Isira'iila yanirta. O acca be yakka tew caafiraadum tooru- uje, be gada jeenu bo. <sup>15</sup> Hande nun an bo, aa woodi tokkuube ekkitinol Nikolayiibe. <sup>16</sup> Gam majjum tuubu, to hinaa nun, booyataa, mi waran to maa, mi habidan be e kaafahi gonuki e hunnuko am.

<sup>17</sup> Goodudo noppo, nana ko Ruuhu batata eklesiyaaji! Jaaliido, mi hokkan dum nyaamdu suudiinu, wi'eteenu "maannu". Mi hokkan mo bo, kaayel daneyel. Dow maggel, inne heyre e winnaa. Goddo annaa inne nen to hinaa kokkaado ne.»

### *Derewol be Tiyatira winnanaa*

<sup>18</sup> «Winnan malaykaajo eklesiya Tiyatira bi'aa:

Nani do haalaaji Biddo Alla mo gite mum nandi hande dennjal yiite, koyde makko e nandi hande janni bodeeri. <sup>19</sup> Mii anni golle maa, e yidde maa, e goondinki maa, e ballal jal ballataa woobbe, e munyal maa. Mii anni golle maa cakitiide e buri arandeeje duudfugo. <sup>20</sup> Amma woodi ko pelan maa mi. Aa acci Ijabeeli, debbo bi'oovo hoore mum annabiijo. Oo jannina, oo jarboo gollotoobe am, gam be gada jeenu, be yakka tew caafiraadum tooruue. <sup>21</sup> Mi hokki mo wakkati gam o tuuba, amma o salike ko tuubi, o acca jeenu makko. <sup>22</sup> Gam majjum mi faddan mo dow banni toora, kanko e jeenidoobe e makko, sey to be tuubii ko be gad e makko. <sup>23</sup> Mi waran bibbe makko. Eklesiayaaji fu annan min woni liinyooovo hakkillo e berde. Mi yohan bo moy moodon fu ko wadi.

<sup>24</sup> Amma onon horiibe der Tiyatira, onon be tokkay laawol jal, onon be annaa ko woobbe wi'ata "asiiri Seydan luggudo", mi yowantaa on dongal kuunjal. <sup>25</sup> Amma, ko gooduson, jogee dum e semme faa mi wara. <sup>26</sup> Jaaliido,

gadudo golle am faa heennyitirde, mi hokkan dum baawde dow lenyi himbe. <sup>27</sup> O duriran be e sawru janni, o pusan be hande no payande loopeeje pusirtee. <sup>28</sup> Hande no min bo kebirmi baawde diga Baaba am. Hande non min bo, mi hokkan mo hoodere fajiri.

<sup>29</sup> Goodudo noppo, nana ko Ruuhu batata eklesiyaaji!»

## 3

### *Derewol be Sardis winnanaa*

<sup>1</sup> «Winnan malaykaajo eklesiya Sardis, bi'aa:

Nani do haalaaji goodudo ruuhu- uji Alla jeedidi, e koode jeedidi: Mii anni golle maa, aa wi'ee aa buurudo, amma a maaydo. <sup>2</sup> Wadu hakkillo, semmidin ko faani waatugo, gam mi tawii golle maa hebbay yeeso Alla am. <sup>3</sup> Gam majjum siwtor no kebidaa, e no nanirdaa haala Alla, jogaa ka, tuubu. To a reenaay, mi waran hande gujjo, a annataa bo wakkati de garanmi juhugo maa. <sup>4</sup> Amma, aa woodi der Sardis himbe be tuuninaay kolte mum. Be bornoto kolte daneeje, be jaada e am, gam be potanii dum. <sup>5</sup> Hande non, jaaliido fu bornoto kolte daneeji. Mi moytataainne makko diga dewtere yonki pay. Mi seedoto yeeso Baaba am e yeeso malaykaabe mum, oo laatii mo am. <sup>6</sup> Goodudo noppo, nana ko Ruuhu batata eklesiyaaji!»

### *Derewol be Filadelfiya winnanaa*

<sup>7</sup> «Winnan malaykaajo eklesiya Filadelfiya, bi'aa:

Nani do haalaaji Ceniido, Goonjaajo, jogiido maabitirgel nel Dawda e junjo mum. To o maabitii godso maabataa, to o maabitii bo, godso maabitintaa. <sup>8</sup> Mii anni golle maa. Daaru, mi maabitii dammugal yeeso maa jal godso waawataa ko maabi. A woodaa baawde mawde, amma a jogake haala am, a yedday inne am. <sup>9</sup> Daaru, mi hokkete jama'aare sujidanoobe Seydan, wi'oobe ko'e mum bee laatii Yahuduuse, amma fewre. Mi accan be gara be jiccoo

ley koyde maa, den 6e paaman mii yidu ma. <sup>10</sup> A jogake haala am, a munyii sanne. Gam majjum, min bo, mi reenete der wakkati billaare garanoore duuniyaaru gam foonna himbe. <sup>11</sup> Mi faanake warugo. Joga ko goodudaa e semme, gam to goddo etta meetalol maa. <sup>12</sup> Jaaliido fu, mi wadan dum darjanal der suudu Alla am, o wurtataako e mayru abada. Mi winnan dow makko inne Alla am, e inne wanjarde Alla am, waato Urusaliima kesol, yiwoowol diga dow kammu, to Alla am. Mi winnan bo dow makko, inne am heyre.

<sup>13</sup> Goodudo noppia, nana ko Ruuhu  
batata eklesiyaaji!»

## *Derewol be Lawdikiya winnanaa*

<sup>14</sup> «Winnan malaykaajo eklesiya Lawdikiya, bi'aa mo:

Nani do haalaaji bi'eteedo Aami, seedeejo koolaado, e goonjaajo, mo diga e mum Alla tagi huune fu. <sup>15</sup> Mii anni golle maa, a wulaa a feewaa. Laata buludo, dum bo peewudo! <sup>16</sup> Amma no aa woni caka caka, a wulaa a feewaa, mi tuutete diga hunnuko am. <sup>17</sup> Aa wi'a: "Mii laatii jom jawdiijo, mi hawritii jawdi, mi haajaaka godsum". A annaa a laati nun mo walaa godsum, jurminniido, talakaajo, bumdo, e jahoowo funtu. <sup>18</sup> Ka batan maa mi nani: Soodu to am, kanjheeri laabiniraani yiite, gam laatodaa jom jawdiijo. Soodu gineeji daneeji bornodaa, gam senteene funtu maa to yi'oo. Kade bo, soodu lekki gite mooma, gam ji'aa. <sup>19</sup> Himbe 6e jidumi, mi felan 6e, mii fooda noppi mabbe. Gam majjum, tinna tuubaal! <sup>20</sup> Mi nani darii e dammugal, mii silmina. To goddo nanii daane am go mabbiti dammugal, mi naatan wuro mum, mi nyaamda e mum, joomum bo nyaamdan e am. <sup>21</sup> Jaaliido fu, mi joodinan dum dow kittaal Laamaare am, hande no jaaloriimi go joododiimi e baaba am dow kittaal Laamaare mum.

**22** Goodudo noppı, nana ko Ruuhu  
batata eklesiyaaji!»

4

## *Alla e maantee dow kammu*

<sup>1</sup> Baawo majjum, ji'umi dammu-gal gom e maabitii dow kammu. Daane ne nanunoomi e baddammi arande, nandune e galaldfi puure-teeidi, wi'immi: «Eencu do, mi hollee ko waroya yeeso.»

<sup>2</sup> Don maa don, kebbumi Ru-  
uhu. Den ji'umi kittaal laamu dow  
kammu goddo e joodji dow maggal.

**3** Joodiido on e jalba hande hayre haakoore bi'eteene yaspa, e hayre wefoore, wi'eteene sardis. Sincings

Wodeere, wi'eteene sardis. Cincinga e fiiltitii kittaal ɳal, e jalba hande hayre wi'eteene emerooda.<sup>4</sup> Kittaaje laamu laso e naay e fiiltitii kittaal laamu ɳal. Dottiibe laso e nayo e ioodi dow maije see fornii kolte

**5** Den maavye e rimmo daade towde

Ben mduay ye, e Hiihno daade towae,  
e diggaali, e wurtoo diga kittaal  
laamu ɻal. Fitillaaji jeedidi e hubbaa  
yeeso maggal, kanji woni ruuhuuji  
Alla jeedidi. <sup>6</sup> Huune ko nandi e  
maayo e woni yeeso kittaal ɻal, e  
nandi e daanorgal laabuŋal tar.

Kujje yonkinteeje naay e woni caka kittaal ɳal, e fiftitii ɳal. Ede goodi gite duudde yeeso e baawo fu.

7 Huune dum yonki dum, aranum  
mum e nandi e jaggere. Didabum,  
e nandi nyaleel, tatabum, e woodi

yeeso hande *ŋo* neddo. Nayabum  
bo, e nandi hande ciilal piiroowal.  
<sup>8</sup> Huune yonkintejum nayum dum,  
gootum mum fu e woodi biyeede  
jeego'o. Biyeede den e woodi gite der  
e yaasi. Jemma e nyalooma fu, edum  
wi'a:

«Ceniido, Ceniido, Ceniido,  
non Joomiraawo Alla mo baawde fu  
laatii.

O na'onno, o na'on jooni, oo wara!»

**9** Huune yonkintejum dum, e teddina, e mana, e yetta joodiido dow kittaal laamu, mo yonki faa abada. **10** De dum wadata dum fu, dottiibe laso e nayo 6en e jiccoo yeeso joodiido dow kittaal laamu, bee cujidana yonkin-teejo faa abada, bee padda meetali maabbe yeeso kittaal laamu, bee bi'a:

<sup>11</sup> «An Joomiraawo Alla amen,  
a fotii heñugo tedduñal, e manju, e  
baawde,  
gam an tagi kujje fu,  
e sago maa de laatorii, e sago maa de  
tagiraa.»

## 5

### *Dewtere Alla, e kaanudo mañbita ne*

<sup>1</sup> Baawo mum, ji'umi dewtere der junjo nyaamo joodiido dow kittaal laamu. Dewtere nen e winnaa becce didi fu, ne mañbaa, ne wadanaa maaneeji jeedidi. <sup>2</sup> Den ji'umi malaykaajo semmenteejo gom e bata e daane towne, e wi'a: «Moy nun foti takkitingo maaneeji din, den mañbita dewtere nen?»

<sup>3</sup> Baa gooto walaa dow kammu, e dow leydi e der leydi, baawoowo ko mañbiti ne, dum bo daarugo der mayre. <sup>4</sup> Den bullumi puy, gam goddo hebaaki potudo mañbita dewtere nen, naa bo daarugo ko woni der mayre. <sup>5</sup> Den gooto der dottiibe ben wi'immi: «Taa wullu! A yi'ii jaggere lenyol Yahuuda, yiwudo diga Dawda, o jaalake. O waawan ko takkiti maaneeji jeedidi din, o mañbita dewtere nen.»

<sup>6</sup> Den ji'umi Jawgiyel, enjel nandi hande ñel hiisaanoma. Jawgiyel ñel e darii hakkune kittaal Laamaare, e huune nayum yonkintejum, e dottiibe. Enjel woodi galaldi jeedidi, e gite jeedidi, kanjum woni ruuhuuji Alla jeedidi, lilaadi der duuniyaaru fu. <sup>7</sup> Jawgiyel ñel wari jabí dewtere nen diga e junjo nyaamo joodiido dow kittaal laamu. <sup>8</sup> No ñel jabí ne, huune nayum yonkintejum, e dottiibe laso e nayo ben jicci yeeso maggel. Moy mañbe fu e jogii moolooru, e jarirkon gadiraakon kannjeeri, keewukon wardi. Kanjum laatii du'aaje himbe Alla. <sup>9</sup> Bee jima jimol kesol, bee bi'a der maggal:

«An foti etta dewtere nen,  
takkita maaneeji mayre  
Gam a hiisaanoma, a sooditanike  
Alla himbe e yiyam maa,

diga lenyol fu, e ñennjal fu, himbe fu, e diga leydi fu. <sup>10</sup> A wadii ñe laamiibe, e Limaamiibe Alla, gam ñe laamanoo duuniyaaru.»

<sup>11</sup> Mii daara, ko nanumi daade malaykaabe ñuubbe, uju ujuneeye. Be piiltitii kittaal laamu, e huune yonkintejum, e dottiibe. <sup>12</sup> Bee bata e daade towde bee bi'a:  
«Jawgiyel kiisanoonje fotii heba baawde, e jawdi, e faamu, e semme, e manju, e tedduñal, e maantooje!»

<sup>13</sup> Den nanumi ko tagaa fu, gonudum dow kammu, e dow leydi, e der leydi, e der maayo, e ko woni der majjum fu, e wi'a:  
«Maantoore, e manju, e tedduñal, e baawde woodani joodiido dow kittaal laamu, e Jawgiyel, faa abada!»

<sup>14</sup> Huune nayum yonkintejum ñum, toontii, wi'i: «Aami!» Dottiibe ben bo jicci, sujidi.

## 6

### *Maaneeji jeedidi*

#### *Takkitingo maane arandere*

<sup>1</sup> Wakkati daaranmi, ji'umi Jawgiyel takkiti maaneeji jeedidi din woore mum. Den nanumi huune nayum yonkintejum ñum, gootum mum e bata e daane towne hande riggaajo, e wi'a: «War!» <sup>2</sup> No daarumi, go ji'umi puccu danewol. Baddiido ñol e jogii biroogal, o hokkaa meetalol, o yawti hande jaalotoodo gam o jaaloo bo.

#### *Takkitingo maane didawre*

<sup>3</sup> Jawgiyel takkiti maane didawre, den nanumi huune yonkintejum didabum e wi'a: «War!» <sup>4</sup> Den puccu gonnol bodewol wurtii. Baddiido ñol hokkaa kaafahi mawki. O hokkaa bo baawde sottingo jam e duuniyaaru, gam himbe warontira.

#### *Takkitingo maane tatawre*

<sup>5</sup> No Jawgiyel takkiti maane tatawre, den nanumi huune yonkintejum tatabum e wi'a: «War!» Go ji'umi puccu balewol. Baddiido ñol

e jogii etirgel kilo. <sup>6</sup> Den nanumi ko wa'i hande daane yiwi hakkune huune yonkintejum nayum. Daane nen e wi'a:

«Etorde alkamaari woore, e etorde gawri tati, soodee ceede joddi golle nyalaane woore. Amma taa sadin nebbam e innabojam.»

### *Takkitingo maane nayawre*

<sup>7</sup> No Jawgiyel takkiti maane nayawre, den nanumi daane huune yonkintejum nayabum, e wi'a: «War!»

<sup>8</sup> No daarumi, go ji'umi puccu haako haakowol. Baddiido ηol e wi'ee Maayde, joonne maaybe e tokki mo. Be kokkaa baawde dow fecco duuniyaaru nayawre, gam 6e bara himbe e kaafahi, e rafo, e nyawuuji bondi, e bisaaji ladde.

### *Takkitingo maane jowawre*

<sup>9</sup> No Jawgiyel takkiti maane jowawre, den ji'umi ley hiisirde, yonkiji waraabe gam haala Alla, e gam seedaaku ηju 6e ceedanii mo.

<sup>10</sup> Bee bata e daade towde, 6ee bi'a: «Joomiraawo, ceniido, goonjaajo, faa dey kedisaa ko kiitodaa himbe wonbe der duuniyaaru, yamaa 6e yiiyam amen?» <sup>11</sup> Moy maabbe fu hokkaa togoore raneere. Be bi'aa, 6e ciwtoo taw sedda faa to limgal banniraabe maabbe, gollodiibe e maabbe, wareteebe hande maabbe hebbii.

### *Takkitingo maane jeego'awre*

<sup>12</sup> Den ji'umi Jawgiyel takkiti maane jeego'awre. Den leydi dimmii dimmaade mawde, naanje bawli hande guda baleya, lewru bo wojji hande yiiyam. <sup>13</sup> Koode kammu yani e leydi hande no bibbe ibbe kecce saamirta to hennu mawkol wifii.

<sup>14</sup> Kammu majjiti, hande no daago taggirtee, baalle, e dunde fu eggii e nokkuuje mum. <sup>15</sup> Den laamiibe duuniyaaru, e himbe teddube, e hooreebe soogeeji, e jom jawdiibe, e woodube baawde, e maccube, e rimbe fu suudii der lowi kaaye, e hakkune baalle. <sup>16</sup> Be darii 6ee bi'a baalle e kaaye: «Janee dow amen! Cuudee men e yeeso joodiido dow kittaal

laamu e mone Jawgiyel! <sup>17</sup> Gam nyalaane mawne ne mone maabbe yottake, moy dadata?»

## 7

### *Himbe 144 000 wadanaabe maane Alla*

<sup>1</sup> Baawo majjum, ji'umi malaykaabe nayo e darii to gooraaje duuniyaaru naay. Bee kada keni duuniyaaru naaywifugo dow leydi, e dow maayo, e dow ledde. <sup>2</sup> Ji'umi kade malaykaajo goddo yiwoy diga lettugal, e jogii maanordum Alla yonkinteejo. O baddi malaykaabe nayo e daane towne, hokkaabe baawde wadango leydi, e maayo ko halli. <sup>3</sup> O wi'i be: «To on gadanee taw leydi, e maayo, e ledde ko halli, faa to en gadanii maccube Alla meeden maane dow tiide.» <sup>4</sup> Den nanumi limgal wadanaabe maane dow tiide mum: Be gadii himbe ujune hemure e lasoy dido e nayo (144 000) yiwbé diga lenyi Isira'iilaabe fu.

<sup>5</sup> Yiwbé e lenyol Yahuuda, ujune sappo e dido (12 000).

Yiwbé e lenyol Ruben, ujune sappo e dido (12 000).

Yiwbé e lenyol Gada, ujune sappo e dido (12 000).

<sup>6</sup> Yiwbé e lenyol Aser, ujune sappo e dido (12 000).

Yiwbé e lenyol Neftali, ujune sappo e dido (12 000).

Yiwbé e lenyol Manaasa, ujune sappo e dido (12 000).

<sup>7</sup> Yiwbé e lenyol Simeyon, ujune sappo e dido (12 000).

Yiwbé e lenyol Leewi, ujune sappo e dido (12 000).

Yiwbé e lenyol Isakar, ujune sappo e dido (12 000).

<sup>8</sup> Yiwbé e lenyol Jabulon, ujune sappo e dido (12 000).

Yiwbé e lenyol Yusufu, ujune sappo e dido (12 000).

Yiwbé e lenyol Benyamin bo, ujune sappo e dido (12 000).

Cuudi baaba dii fu wadanaama maane.

*Jama'aare duunne diga lenyi fu*

<sup>9</sup> Baawo mum daarumi, go ji'umi jama'aare duunne, ne limataako. Be yiwi diga e leyde fu, e lenyi fu, e himbe fu, e delle fu. Bee darii yeeso kittaal laamu, e yeeso Jawgiyel. Bee bornii toggoanje daneeje, bee jogii licce papaaaje e juude maabbe. <sup>10</sup> Bee bata e daade towde bee bi'a: «Kisidam men yiwi diga e Alla meeden, joodiido dow kittaal laamu, kanko e Jawgiyel.» <sup>11</sup> Malaykaabe fu e fiiltitii kittaal laamu, e dottiibe, e huune yonkintejum nayum. Be jicci yeeso kittaal laamu, be cujidani Alla. <sup>12</sup> Bee bi'a:  
 «Aami! Maantore, e teddujal, e faamu, e jettooje, e manju, e baawde,  
 e semme woodani Alla meeden faa abada!»

<sup>13</sup> Den gooto der dottiibe yamimmi wi'i: «Beey nun himbe borniibe toggoanje daneeje? Toy be yiwi?» <sup>14</sup> Toonti moo mi: «Joomiraawo am, an nun anni.» Go o wi'immi: «Kambe woni yiwoybe diga toora mawka. Be loon-nii toggoanje maabbe, be dawnini de e yiyyam Jawgiyel\*. <sup>15</sup> Gam majjum be gonii yeeso kittaal laamu Alla. Bee cujidana mo jemma e nyalooma der suudu Alla makko ceniinu. Joodiido dow kittaal laamu reenan be. <sup>16</sup> Be dafataake, be fondaataake, naanje fiyatuaa be, guli bo wadataa be. <sup>17</sup> Gam Jawgiyel gonujel caka kittaal laamu duran be. Nel yaaran be to ciibije diyam kokkojam yonki. Alla moytan gondi gite maabbe fu.»

## 8

### Takkitingo maane jeedidawre

<sup>1</sup> No Jawgiyel takkiti maane jeedidawre, jam wadi dow kammu faa jaka feccere janni. <sup>2</sup> Den ji'umi malaykaabe jeedido dariibe yeeso Alla, be kokkaa galaldi jeedidi puureeedi. <sup>3</sup> Malaykaajo godso wari darii ley hiisirde. Oo jogii heedo urigo, jo kanjeeri. O hokkaa wardi duusdo, o ura, kanjum e du'aaje himbe Alla, o yottina dum dow

hiisirde ne kanjeeri, gonune yeeso kittaal laamu. <sup>4</sup> Curki wardi on eencidi e du'aaje himbe Alla diga e junjo malaykaajo dariido yeeso Alla. <sup>5</sup> Malaykaajo on etti heedo urigo, hebbini jo yiite hiisirde, faddi jo e leydi. Den riggaanje e rimmo wadi, maayye maayyi, leydi dimmii.

### Galaldi jeedidi puureeedi

#### Walaldu aranol

<sup>6</sup> Baawo majjum, malaykaabe jeedido jogiibe galaldi jeedidi puureeedi, siryii fuurugo di.

<sup>7</sup> Malaykaajo arano fuuri walaldu mum, den malamalluuje, e yiite jillontirje e yiyyam faddaa e leydi. Feccere leydi tatawre wulaa, den feccere ledde tatawre bo wulaa, non bo, fudo hecco fu wulaa.

#### Walaldu didabol

<sup>8</sup> Malaykaajo didabo fuuri walaldu mum. Den huune nandune e waanne hubboore yiite faddaa der maayo. Feccere maayo tatawre waylitii yiyyam. <sup>9</sup> Feccere tatawre der huune yonkintejum, gonudum der maayo waati. Feccere tatawre der laanaaje diyam bo halki.

#### Walaldu tatabol

<sup>10</sup> Malaykaajo tatabo fuuri walaldu mum. Den hoodere mawne, hubboore yiite hande doccal yiwoy diga dow kammu, yani dow feccere gooruji tatawre, e ciibije diyam. <sup>11</sup> Inne hoodere nen e wi'ee «Kaadufum.» Ne haadini feccere diyam tatawre, himbe duubbe maayi gam haadugo diyam dam.

#### Walaldu nayabol

<sup>12</sup> Malaykaajo nayabo fuuri walaldu mum. Den feccere naanje, e lewru, e koode tatawre fiyaa. No dum fiyaa, go feccere majjum tatawre nibbi, jemma e nyalooma bo majjini feccere jaynjol mum tatawre.

<sup>13</sup> Baawo mum, ji'umi ciilal e fiira dow kammu. Den nanumi ejal bata e daane towne, ejal wi'a: «Kayto!

\* <sup>7:14</sup> Maana yiyyam dawnindam toggoanje maabbe, latii hakkeeji maabbe fu yaafaama.

Kayto! Bone woodani himbe duuniyaaru to malaykaabe tato horiibe fuurii galaldi mum!»

## 9

### *Walaldu joyabol*

<sup>1</sup> Malaykaajo joyabo fuuri walaldu mum. Den ji'umi hoodere yiwi dow kammu yani e leydi. Ne hokcaa maabitirgel bunnu luggunjal nol walaa kaddi. <sup>2</sup> No ne maabitit nol, go curki tekkuki wurti e maggol. Curki kin e nandi hande curki yiwuki e suudu yiite, ki niibini naanje e hennu. <sup>3</sup> Den babatti wurti e curki kin, sankitii e leydi, di kokcaa baawde hande jahe. <sup>4</sup> Di bi'aa to di meemu fudo, e huune ko fudata dow leydi, e ledde, amma himbe be maane Alla walaa dow tiide mum. <sup>5</sup> Di kokkaaka laawol di bara himbe, amma, di toora be faa lebbi joyi. Naawella majji e nandi hande naawalla yaare to fidii neddo. <sup>6</sup> Wakkati mum, himbe dartan maayde, amma be kebataa ne. Be jidan maayde, amma ne doggan be.

<sup>7</sup> Babatti din e nandi e pucci ciriyaniidi konu. Huune ko nandi e meetali gadiraadi kannjeeri e woni dow ko'e majji. Geese majji e nandi e geese himbe. <sup>8</sup> Gaasa majji e nandi e gaasa rewbe, nyiiye majji e wa'i hande nyiiye jagge. <sup>9</sup> Gabaaje majji e wa'i hande taabordum kure. Rimmo biyeede majji e wa'i hande rimmo laanaaji di pucci duuddi, ciriyaniidi konu foodata. <sup>10</sup> Dii goodi bokkordi e kure hande jahe. Der bokkordi majji, baawde toorugo himbe faa lebbi joy woni. <sup>11</sup> Malaykaajo bunnu luggunjal kaddi walaa, laatii laamiido majji. Inne makko e Iburaninkeere woni, Abaddon, e Yunaninkeere bo, Apolliyon.

<sup>12</sup> Bone arandeere yawtii. Daa, boneeji didi e wara kade.

### *Walaldu jeego'abol*

<sup>13</sup> Malaykaajo jeego'abol fuuri walaldu mum. Den nanumi daane yiwi to galaldi hiisirde naay ne kannjeeri, gonune yeeso Alla. <sup>14</sup> Daane nen wi'i malaykaajo

jeego'abol jogiido walaldu puure-teenjol: «Fiirtu malaykaabe nayo habbaabe to maayo manjo, wi'eteenjo Efaratis.» <sup>15</sup> Malaykaabe nayo ben firtaa. Be ciriylake gam duubol, e lewru, e nyalaane, e wakkati, de be barata feccere himbe tatawre. <sup>16</sup> Minanii limgal soogeeji baddiidi pucci: be gadii himbe miliyo keme dido (200.000.000). <sup>17</sup> Nani do no ji'irmi pucci e waddiibe di der jiiki am. Waddiibe pucci din, e bornii tabbordum kure bodejum hande yiite, e bula bulajum, e nareerijum hande bu'e naanje. Ko'e pucci din e nandi hande ko'e jagge. Yiite, e curki, e bu'e naanje e wurtoo diga kunnude majji. <sup>18</sup> Boneeji tati din, waato yiite e curki, e ko nandi e bu'e naanje wurtii e kunnude pucci, wari feccere himbe tatawre. <sup>19</sup> Gam baawde, e semme pucci din tawaaka maa to kunnude e bokkordi majji. Bokkordi din e nandi e bolle, dii goodii ko'e, kanje di gadiranta himbe ko halli.

<sup>20</sup> Horiibe, be boneeji din waray, tubay ko be gadfi, be accay saafugo ginnaaji, e tooruuje gadiraade kannjeeri, e cardi, e janni bodeeri, e kaaye, e ledde. Tooruuje den yi'ataa, de nanataa, de jahataa. <sup>21</sup> Be tuubay be acca warugo himbe e saafugo ginnaaji, e jeenu, e guyka.

## 10

### *Malaykaajo e dewtel*

<sup>1</sup> Baawo majcum, ji'umi malaykaajo semmenteejo gom kade. Oo jippoo diga dow kammu. Oo bornii duulere, cincinga e fiiltitii hoore makko. Yeeso makko e jalba hande naanje, asaale makko e wa'i hande moosi yiite. <sup>2</sup> Oo jogii dewtel maabitiijel. O darini koynjal makko nyaamowal dow maayo, nanowal bo dow leydi.

<sup>3</sup> O batii e daane towne hande no jaggere halbirta. No o batii e daane towne, den palmaali jeedidi nanaa.

<sup>4</sup> No palmaali jeedidi din batidi, ko ciriyimi mi winna. Amma nanumi daane gom yiwi diga dow kammu,

wi'immi: «Suudu ko palmaali jeedidi din wi'i, taa winnu ka!»

<sup>5</sup> Den malaykaajo mo ji'unoomi e darii dow maayo e dow leydi on, banti junjo mum nyaamo faa dow.

<sup>6</sup> O hunorii inne Alla, tabitiido faa abada, tagudo kammu e ko woni der mum, tagudo leydi e ko woni der mayri, tagudo maayo e ko woni der maggo. O wi'i: «Dum booyataa kade! <sup>7</sup> Amma nyaanne malaykaajo jeedidaabo fuurata walaldu mum, Alla hebbinan asiiri mum. Dum laatoto hande no o batirnoo annabiibe gol-lantoobe mo habaru beldo.»

<sup>8</sup> Den daane ne nanunoomi, yiwoyne diga dow kammu, wi'immi kade: «Yahu ettu dewtel maabbiijel, gonujel der junjo malaykaajo dariido dow maayo e dow leydi.»

<sup>9</sup> Jahumi to malaykaajo on, bi'u moo mi, o hokkammi dewtel nel. O wi'immi: «Ettu nel, modaa! Nel welan der hunnuko maa hande juuri, amma nel haasan der reedu maa.»

<sup>10</sup> Jabumi dewtel nel e junjo malaykaajo, yakkumi nel. Nel weli der hunnuko am hande juuri, amma no modumi nel, nel haadi der reedu am!

<sup>11</sup> Baawo majjum, bi'aami: «Sey bataa kade ko Alla hollitin maa dow himbe duubbe, e lenyi duuddi, e delle duudde, e laamiibe duubbe.»

## 11

### *Seedeewe dido*

<sup>1</sup> Den kokkaami yommal nanduŋal e sawru poonnirkol. O wi'immi: «Umma, foonnu suudu Alla e hiisirde. Limu sujidoobe wonube der mag-gol. <sup>2</sup> Amma accu fageere suudu Alla yaasiire, taa foonnu ne, gam be lenyi janani nun hokkaa ne. Be jaaban wanjarde seniine faa lebbi lasoy didi e didi. <sup>3</sup> Mi hokkan seedeewe am dido baawde wadugo annabaaku faa balde ujuneere e keme didi e lasoy tati, (1260) bee bornorii saakiji.»

<sup>4</sup> Seedeewe dido ben woni ledde jay-tuuje didi, e fitillaaji didi, dariidi yeeso Joomiraawo duuniyaaru. <sup>5</sup> Jiddo wadugo ko halli fu, yiite wurtoto diga

kunnude maabbe, halka waybe maabbe. Nun nun haani jiddo wadango be ko halli fu, wariree. <sup>6</sup> Bee goodi baawde maabugo kammu gam to diyam tobu der balde de be baajotoo haala Alla. Bee goodi bo baawde waylitingo diy-eele laatoo yiyyam. Be baawan bo ko jippini boneeji feere feere de be jidi fu, e duuniyaaru do.

<sup>7</sup> To be gaynii seedaaku maabbe, tewuwa gom wurtoto diga gayka lugguka, haba e maabbe, jaaloo be, wara be. <sup>8</sup> Balli maabbe wonoto der fageere wanjarde mawne. Ton nun Joomiraawo maabbe tigganoo dow leggal palaanjal. Wanjarde nen nanditiniraamaa Sodoma e Misira.

<sup>9</sup> Himbe yiwoybe diga duuniyaaru fu, e lenyi fu, e delle fu, e leyde fu, yi'an galli maabbe, jaka balde tati e feccere. Be nootataako galli maabbe uwhee. <sup>10</sup> Wonube der duuniyaaru seyoto gam maayde maabbe. Be gadan juulde, be kokkontira dokke gam annabiibe dido ben tooriino be puy. <sup>11</sup> Amma baawo balde tati e feccere den, foofaanjo yonki yiwuŋo to Alla, naati e maabbe. Be pinti, be ummii be darii, go yi'ube be fu, kulol mannjol nannji dsum. <sup>12</sup> Den daane towne yiwi dow kammu, e wi'a annabiibe dido ben: «Eencee do!» Be eenci dow kammu, der duule, waybe maabbe e daara be. <sup>13</sup> Wakkati mum, leydi dimmii e semme, go feccere wanjarde sappo'awre mum halki. Dimmaade leydi den wari himbe ujune jeedido (7000). Den horiibe huli, hokki Alla mo dow kammu tedduŋal.

<sup>14</sup> Bone didawre yawti, amma booyataa ko bone tatawre wara.

### *Walaldu jeedidaabol*

<sup>15</sup> Malaykaajo jeedidaabo fu-uri walaldu mum. Den daađe towde nanaa dow kammu, e wi'a: «Baawde laamanaago duuniyaaru fu laatanike Joomiraawo meeden e Almasiihu mum. O laamoto faa abada!»

<sup>16</sup> Dottiibē laso e nayo joodiibē dow kittaaje yeeso Alla jicci, sujidani Alla, <sup>17</sup> bee bi'a:  
 «Joomiraawo Alla, mo baawde,  
 An gonudo naane, e jooni, men jettii  
 maa,  
 gam a gollirii baawde maa mawde,  
 a tabbitinii laamu maa.  
<sup>18</sup> Mone wadii heeferbe,  
 amma mone maa wari.  
 Wakkati kiitotodaa maaybe wadii,  
 wakkati de barjotodaa annabiiibē  
 maa,  
 gollanoobē maa, wadii,  
 wakkati de barjotodaa himbe maa,  
 hulbe inne maa wadii,  
 mawbe e petton fu,  
 wakkati bo wadii de kalkataa  
 halkooobē leydi.»  
<sup>19</sup> Suudu Alla maabitaa dow kammu, pakoroowal alkawal yi'aa der mayru. Den maayye maayyi, rimmo wadi, palmaali falmi, leydi dimmii, malamalluuje mawde tobi.

## 12

### *Debbo e kuuja gom*

<sup>1</sup> Maane mawne gom hollitii dow kammu. Debbo gom e bornii naanje, lewru e woni ley koyde makko, oo mellii meetalol ηol koode sappo e didi dow hoore makko. <sup>2</sup> Oo woodi reedu, go oo halba sabbu toora, e naawalla ηataware.

<sup>3</sup> Maane gom kade hollitii dow kammu, go kuuja gom bodeya, manja, hollitii. Naa woodi ko'e jeedidi e galaldi sappo, hoore fu e woodi meetalol laamu. <sup>4</sup> Bokkordu magga e fooda feccere koode kammu tatawre, e fadda de e leydi. Na darii yeeso debbo paaniido rimugo on, gam ηa moda biyiko to o rimii. <sup>5</sup> Den o rimi biddo gorko. Kanko woni duroowo 6e lenyi janani fu e sawru janni. Den suka on yawtinaa faa to Alla, e kittaal laamu mum. <sup>6</sup> Debbo on doggi yahi der ladde, nokkuure to Alla moyyinannoo mo. Ton o nyaannetee faa balde ujuneere e keme didi e lasoy tati (1260).

<sup>7</sup> Go konu ummii dow kammu. Malaykaajo bi'eteedo Mika'iilu, e

malaykaabe mum, habidi e kuunja ηan, kanja bo, ηa habidi 6e, e malaykaabe magga. <sup>8</sup> Amma kuunja ηan waaway jaalaago, kanja e malaykaabe magga fu, 6e dulli jayri maabbe dow kammu. <sup>9</sup> Kuunja manja ηan wurtinaama yaasi. Kanja woni boddii nayeeri, bi'eteeni Iibiliisa e Seydan, jarbotoodo duuniyaaru fu. O faddaama e leydi, e malaykaabe makko fu.

<sup>10</sup> Den nanumi daane towne diga dow kammu, e wi'a: «Jooni, kisidam, e semme, e Laamaare Alla meeden, e baawde Almasiihu makko warii. Gam gaccotoodo banniraabe meeden, to Alla jemma e nyalooma fu riiwaama diga dow kammu. <sup>11</sup> Amma, 6e jaalake mo gam daliila yiyiam Jawgiyel e gam haala seedaaku maabbe. Be jiday yonki maabbe faa 6e kula maayugo. <sup>12</sup> Gam majcum, kammu e joodiibē der mum, belbel-tee! Amma leydi e maayo, bone woodani on! Gam Seydan jippanake on e mone mawne, gam oo anni wakkati sedda horanii mo.»

<sup>13</sup> No kuuja ηan yi'i faddaama e leydi, ηa yanti toorugo debbo dimudo biddo gorko on. <sup>14</sup> Den debbo on hokkaa biyeede dulowwa manja, gam o fiira, o yaha der ladde, to nokkuure ne o moyyinanaa, gam o wosdodoo e boddii nin. Ton nun o nyaannetee faa jaka duubi tati e feccere. <sup>15</sup> Go boddii nin tuuti diyam, edam ila baawo debbo on hande maayo, gam dam ilina mo. <sup>16</sup> Amma, leydi faabii debbo on, ni omtii, ni yari diyam dam kuuja ηan tuuti. <sup>17</sup> Kuunja ηan monnii debbo on sanne, yahi haboygo horiibē der lenyol makko, waato dowtaniibē ka Alla bati ko e seedanoo Yeesu. <sup>18</sup> Den kuuja ηan darii dow jaaneeri fonjo maayo.

## 13

### *Bisaaji didi burtiidi e maayo*

<sup>1</sup> Baawo majcum, ji'umi bisaaj gom e wurtoo der maayo, ηaa woodi galaldi sappo, e ko'e jeedidi. Hoore fu e woodi meetalol laamu. Inde jennooje

Alla e winnaa dow ko'e dee fu. <sup>2</sup> Bisaa ḥaa ji'umi e nandi e muusuuru. Koyde magga e wa'i hande koyde dawaanjel. Hunnuko magga e wa'i hande hunnuko jaggere. Kuuṇa ḥan hokki bisaa ḥan baawde mum, e kitaał mum, e baawde mawde. <sup>3</sup> Ko'e bisaa ḥan woore mum, e nandi hande ko naw-nano faa waati. Amma jooni naw-nande magga hoynii. Go himbe duuniyaaru fu haaydinii, e tokki ḥa. <sup>4</sup> Be cujidanii kuuṇa ḥan, gam ḥa hokkii bisaa baawde magga. Den, be cujidanii bo bisaa, be bi'i: «Moy nandi e bisaa? Moy waawi ko habidi e magga?»

<sup>5</sup> Bisaa ḥan hokkaa hunnuko bata haalaaji mawnitaare, bata kalluka dow Alla. Na hokkaa bo laawol gol-lirgo baawde magga faa lebbi lasoy didi e didi. <sup>6</sup> Na fuddi batugo kalluka dow Alla, e inne mum, e nokkuure to o woni, non bo, e woniibe dow kammu. <sup>7</sup> Na hokkaa baawde habugo e himbe Alla, ḥa jaaloo be. Na hokkaa baawde laamanaago lenyi fu, e himbe fu, e dende fu, e leydiye fu. <sup>8</sup> Himbe wonube e duuniyaaru, be inde mum winnaaka der dewtere yonki diga fuddoode duuniyaaru, sujidanii bisaa ḥan. Jawgiyel kiisanoorjel nun woodi dewtere nen.

<sup>9</sup> Goodudo noppi fu, nana! <sup>10</sup> Mo dum resani nanjee maccunnaaku, nanjee. Mo dum resani waree e kaafahi, waree e kaafahi. Gam majju sey himbe Alla tinno, jogoo goondinki.

### Bisaa yiwuṇa e leydi

<sup>11</sup> Baawo majjum, ji'umi bisaa kuuṇa e wurtoo diga e leydi. Naa woodi galaldi didi nandudi e galaldi Jawgiyel, amma ḥaa bata hande kuuṇa ḥan. <sup>12</sup> Na gollirii baawde bisaa arana yeeso magga. Na dooli duuniyaaru e joodiibe e mayru sujidana bisaa arana nawnanooṇa yidi waatugo ko nyawtaa. <sup>13</sup> Bisaa didaaba wadi kaayeefiji mawdi. Na jippini yiite diga dow kammu e leydi, himbe fu e daara. <sup>14</sup> Na yoyri himbe duuniyaaru e kaayeefiji. Na

hokkaama baawde wađugo kaayeefiji din yeeso bisaa arana. Na bati himbe duuniyaaru wada tooruure nandune e bisaa nawnaanja e kaafahi ko dadī. <sup>15</sup> Na hokkaa baawde wattango tooruure nen yonki, faa ne bata gecca, ḥa wada mo sujidanay ne fu waree. <sup>16</sup> Bisaa ḥan dooli himbe fu, teddube e faandube, jom jawdiibe e talakaabe, rimbe e maccube, be gadanee maane to junjo nyaamo, dum bo to tiide mabbe. <sup>17</sup> Goddo hebataa sooda dum bo sippa to woodaa maane nen, maane nen bo, inne bisaa e lamba mum nun.

<sup>18</sup> Sey neddo heba faamu. Goodudo hakkillo, liiso lamba bisaa ḥan, gam lamba magga laati nun lamba neddo. Lamba kan woni, keme jeego'o e lasoy tati e jeego'o (666).

## 14

### Jawgiyel e jimol sooditaabe

<sup>1</sup> Den daarumi kade, go ji'umi Jawgiyel e darii dow waanne Siyoona. Himbe ujune hemure e lasoy dido e nayo (144 000), e wondi e maggel. Inne maggel, e inne Baaba maggel e winnaa dow tiide mabbe.

<sup>2</sup> Nanumi daane yiwoy diga dow kammu kade. Daane nen e wa'i hande rimmo diyam duuddam, e hande riggaajo manjo. Daane ne nanumi e wa'i hande moolooji nun fiyete. <sup>3</sup> Himbe ben e yima jimol kesol yeeso kitaał laamu, e yeoso tagaadum nayum yonkintejum, e yeoso dottiibe. Goddo waaway ko ekkitii jimol ḥol to hinaa himbe ujune hemure e lasoy dido e nayo (144 000), sooditaabe diga duuniyaaru.

<sup>4</sup> Himbe ben tuuninay ko'e mum e rewbe, gam be jogake ko'e mabbe bee laabi. Bee tokki Jawgiyel to ḥol yahata fu. Kambe woni sooditaabe diga caka himbe, gam be laatoo arteteabe sakkee Alla e Jawgiyel. <sup>5</sup> Fewre meeday wurtaago e kunnude mabbe, be galaa gacce.

### Malaykaabe tato

<sup>6</sup> Baawo majjum, ji'umi malaykaajo goddo e fiira hakkune dow e ley. Oo

woodi habaru beldö, tabitiido, gam o waajoo himbe duuniyaaru fu, e leydeele fu, e lenyi fu, e delle fu, e jama'aaje fu. <sup>7</sup> Oo bata e daane towne, oo wi'a: «Kulee Alla, teddinee mo, gam wakkati o hiitotoo warii. Cujidanee tagudo kammu e leydi, e maayo, e ciibije diyam!»

<sup>8</sup> Malaykaajo didabo tokkini arano, e wi'a: «Babiila wanjarde mawne yanii! Ne yanii! Ne yarnii leydeele fu jaram mayre, dam baadi mayre kalluni.»

<sup>9</sup> Malaykaajo goddo, tatabo tokkini be, e bata e daane towne, e wi'a: «To goddo sujidanii bisaa, e foto magga, go hebi maane magga e tiine, naa bo e junjo mum, <sup>10</sup> joomum yaran innabojam mone Alla. Jaram dam jilontiraaka, baanjaadam der jarigel mone makko. Joomum tooroto der yiite e kibiriita yeeso malaykaabe seniibe, e yeeso Jawgiyel. <sup>11</sup> Curki yiite tooranje be, e eenca dow faa abada. Sujidanbe bisaa, e foto mum, ko hebi maane inne magga, be kebataa siwtaare jemma e nyalooma fu.»

<sup>12</sup> Gam majcum sey himbe Alla, dowlaniibe ka o bati, go e goondini Yeesu heba munyal.

<sup>13</sup> Den, nanumi daane diga dow kammu, e wi'a: «Winnu kaa do: "Diga jooni, barke woodani maayube go e hawti e Joomiraawo." Ruuhu e wi'a: "Goonja nun! Be ciwtoto e golle mabbe, gam golle mabbe tokkan be."»

### *Wakkati dugge duuniyaaru*

<sup>14</sup> Daarumi, den ji'umi duulere raneere. Goddo nandudo e Bii neddo e joodii dow mayre. Meetalol kanjeeeri e woni dow hoore makko. Oo jogii waarudu beljol e junjo makko.

<sup>15</sup> Malaykaajo goddo wurtoy diga suudu Alla, e bata e daane towne, e wi'a joodiido e duulere on: «Faddu waarudu maa, duggaa, gam wakkati dugge yottake, ko woni e leydi fotii ruggeego!» <sup>16</sup> Joodiido e duulere faddi waarudu mum e leydi, den ko woni e mayri fu ruggaa.

<sup>17</sup> Malaykaajo goddo wurtoy diga suudu Alla gonunu dow kammu, kanko bo, oo jogii waarudu beljol.

<sup>18</sup> Malaykaajo goddo, dawranoowo yiite wurtoy diga e hiisirde. Oo bata e daane towne, oo wi'a malaykaajo jogiido waarudu welunu on: «Faddu waarudu maa welunu, duggaa biibbe innabooje gonude der duuniyaaru, gam de bennii.» <sup>19</sup> Malaykaajo faddi waarudu mum der duuniyaaru. O ruggi biibbe innabooje tawaade der leydi, o waanji de der biidfirde mawne, ne mone Alla. <sup>20</sup> Biibbe innabooje biidaa der biidfirde wounue yaasi wanjarde. Yiyyam ili diga biidfirde nen. Dam hebbi faa yottii to lagame pucci. Dam ili faa jaka kiloo keme tati (300).

## 15

### *Malaykaabe jeedido e boneeji cakitiidi*

<sup>1</sup> Baawo mum, ji'umi maane gom dow kammu. Maane nen e mawni, nee hunnii bo. Den ji'umi malaykaabe jeedido e jogii boneeji jeedidi. Kanji laatii boneeji cakitiidi di mone Alla hebbirta.

<sup>2</sup> Ji'umi ko nandi e maayo nandunjo e daanorgal, jillontiriijo e yiite. Mi yi'ii jaaliibe bisaa e foto magga, e lamba inne magga, bee darii dow maayo ηon, bee jogii moolooji Alla.

<sup>3</sup> Bee jima jimol Muusa, jaggiido Alla, e ηol Jawgiyel, bee bi'a: «Joomiraawo Alla mo baawde, golle maa e mawni, e haaydinii! Laabi maa e foortii, e laatii goonjaaji, an laamaniido leydeele!

<sup>4</sup> Joomiraawo, moy woni mo hulataa ma?

moy woni teddintaa inne maa?

Gam an tan laatii Ceniido.

Lenyi fu waran sujida yeeso maa, gam be ji'i no golle maa foonnitorii.»

### *Pehe jeedidi kebbude boneeji jeedidi*

<sup>5</sup> Baawo mum, ji'umi dow kammu, suudu Alla e mabbitii, bukaaru e woni der mayru. <sup>6</sup> Malaykaabe jeedido jogiibe boneeji jeedidi wurtoy diga suudu Alla nun. Bee bornii

gineeji laabudi, jalbooji. Bee kabbi belbeli to gabaaje maabbe. <sup>7</sup> Gootum der tagaadum nayum yonkintejum dum, hokki malaykaabe jeedido ben pehe kanjeeri jeedidi. Pehe den e hebbi mone Alla buurdo faa abada. <sup>8</sup> Den suudu Alla hebbi curki sabbu teddujal Alla e baawde mum. Goddo waaway ko naati der mayru, sey no boneeji jeedidi ci malaykaabe jeedido waddi hebbi.

## 16

### *Jarirkon mone Alla*

<sup>1</sup> Den nanumi daane towne yiwoy diga suudu Alla, e wi'a malaykaabe jeedido ben: «Jahee, deyyitee der duuniyaaru jarirkon mone Alla jeedidon!»

<sup>2</sup> Malaykaajo arano yahi, reyyiti jarirlgel mum dow leydi, buuwe kallude, naawude nannji himbe woodube maane bisaa, e sujidanoobe foto magga.

<sup>3</sup> Malaykaajo didabo reyyiti jarirlgel mum dow maayo, jo waylitii yiiyam hande dam maaydo. Den ko woodi yonki der maayo fu, waati.

<sup>4</sup> Malaykaajo tatabo reyyiti jarirlgel mum dow gooruubi, e ciibije, de baylitii yiiyam. <sup>5</sup> Den nanumi malaykaajo dawranoowo diyeele e wi'a: «An Alla, laatiido poonniido, an wonunoo, an woni jooni, an laatii Ceniido, a hitorake e foonnitaare. <sup>6</sup> Gam be deyyitii yiiyam himbe maada e dam annabiibe, an bo, a hokkii be yiiyam be jara! Be kebii ko haanani be.»

<sup>7</sup> Den nanumi daane yiwi diga hisirde, e wi'a: «Gooja! Joomiraawo Alla mo baawde, sariyaaji maa e laatii goonjaaji, dii laatii poonniido!»

<sup>8</sup> Malaykaajo nayaabo reyyiti jarirlgel mum dow naanje, den ne hokkaa baawde sunnyugo himbe e yiite magge. <sup>9</sup> Guli cattudi wadi himbe. Be jenni inne Alla goodudo baawde dow boneeji din. Amma be tuubay, be teddina mo.

<sup>10</sup> Malaykaajo joyaabo reyyiti jarirlgel mum dow kitthal laamu bisaa. Den laamu magga niibbi.

Himbe darii e nata delle mum sabbu naawella. <sup>11</sup> Be jenni Alla mo dow kammu, sabbu buuwe e naawella maabbe. Amma, be tuubay, be acca golle maabbe kallude.

<sup>12</sup> Malaykaajo jeego'abo reyyiti jarirlgel mum dow maayo manjo wi'eteenjo Efaratis, diyam maggo beetti, accani laamiibe warooobe diga lettugal laawol. <sup>13</sup> Den ji'umi ginnaaji tati, nandudi e paabi, e wurtoo e hunnuko kuunjagom, e diga hunnuko bisaa, e diga hunnuko annabiijo fewrekuujo. <sup>14</sup> Ginnaaji din yiwi e Seydan. Dii gada maaneeji, dii jaha to laamiibe duuniyaaru fu, dii kawrita be gam be kabaa konu nyalaane darjal, nyalaane Alla mo baawde. <sup>15</sup> [Joomiraawo wi'i: «Kettinee! Mii wara hande gujjo. Barke laatanii mo daanaaki e reeni gineeji mum gam to o yahu funtu, himbe yi'a centudum makko!]»

<sup>16</sup> Ginnaaji din hawriti laamiibe to nokkuure wi'eteene e Iburaninkeere, Harmagedon.

<sup>17</sup> Malaykaajo jeedidabo reyyiti jarirlgel mum dow hennu, daane towne gom nanaa diga kitthal laamu, der suudu Alla e wi'a: «Dum heenyyii!» <sup>18</sup> Maayye maayyi, rimmo e diggaale wadi, leydi dimmii e semme. Iri dimmaade leydi hande dee don meeday ko wadi diga ko himbe tagaa der duuniyaaru, gam de cattii puy! <sup>19</sup> Wannjarde mawne seenniraa pecce tati. Bannjarde mawde de leydeele godse yani. Den Alla siwtori wanjarde mawne wi'eteene Babiila. O yarini ne jarirlgel kebbunje innabojam dam mone makko mawne. <sup>20</sup> Dunde fu halki, baalle bo majjiti. <sup>21</sup> Malamalluuje mawde yani dow himbe diga kammu. Malamalluuje den teddugo woore mum fu wadan kilo lasoy didi. Himbe yenni Alla sabbu bone malamalluuje den, gam dum sattii puy.

## 17

### *No Babiila hiitortee*

<sup>1</sup> Baawo majjum, gooto der malaykaabe jeedido, jogiibe jarirkon jeedidon wari, wi'immi: «War mi hollee no kaaruwaajo mawdo, joodiido dow diyeele duudde hiitor-tee. <sup>2</sup> Laamiibe duuniyaaru wadidii jeenu e makko. Himbe buusii e jaram kaaruwaaku makko.»

<sup>3</sup> Den Ruuhu hebbimmi, go malaykaajo yaarimmi der haro. Ton ji'umi debbo gom e waddii bisaa bodeya, goodunja inde jennooje Alla. Bisaa njan e woodi ko'e jeedidi e galaldi sappo. <sup>4</sup> Debbo on e bornii kolte bode bodeeji, e wattii kannjeeri e kaaye dime, e colle. Oo jogii jarigel kannjeeri e junjo makko. Jarigel nel e hebbi karmudum e nyiddudum sum kaaruwaaku makko. <sup>5</sup> Inne ne maane mum suudii e winnii e tiine makko: «Babiila wannarde mawne, inna kaaruwaabe e wadoobe ko nyiddi fu der duuniyaaru.» <sup>6</sup> Den ji'umi debbo on e buusi sabbu no o yariri yiyyam himbe Alla, e yiyyam waraabe gam be ceedii haala Yeesu.

No ji'umoo mi, kaydiniimi sanne. <sup>7</sup> Amma malaykaajo on wi'immi: «Gam ume dum haaynii maa? Mi faaminte maanaa cuudiika dow debbo on e bisaa ja o waddii, goodunja ko'e jeedidi e galaldi sappo. <sup>8</sup> Bisaa ja ji'udaa, ja na'onno, amma jooni, ja walaa. Ja wurtoyo diga e gayka lugguka, ja yaha halkoygo. Inde himbe duuniyaaru wobbe winnaaka e dewtere yonki diga fuddoode duuniyaaru. Be kaaydinto to be ji'ii ja, gam ja na'onno, go ja walaa kade, amma ja wittitoyto.

<sup>9</sup> Haani neddo heba annal e faamu. Ko'e jeedidi den laati nun baalle jeedidi de debbo joodii dow mum. Kanje woni laamiibe jeedido: <sup>10</sup> joyo yanii, jeego'abo nun laamii jooni, jeedidabo waray taw. Amma to o warii wakkati sedda o laamotoo. <sup>11</sup> Bisaa gonunoona go ja walaa, laatii laamiido jeetatabo. Naa laatii bo gooto der jeedido, go naa yaha halkoygo.

<sup>12</sup> Galaldi sappo di ji'udaa, laatii laamiibe sappo be kebay laamaare

taw. Amma be keban baawde laamaago e bisaa yanne woore tan. <sup>13</sup> Be fu, huune gootum be tiitii, be kokka bisaa semme mabbe, e baawde mabbe. <sup>14</sup> Be kabani e Jawgiyel, amma nel jaaloto be, gam kannel laatii Joomiraawo joomiraabe, e Laamiido laamiibe. Wondube e maggel, laatiibe noddaabe, e subaabbe, e hoolaabe, jaalodinto e maggel.»

<sup>15</sup> Malaykaajo on wi'immi kade: «Diyeele de ji'udaa kaaruwaajo on e joodii dow mum, woni himbe, e jama'aaje, e leydeele, e delle. <sup>16</sup> Galaldi sappo di ji'uda, kanji e bisaa, wanyan kaaruwaajo on, forta mo, acca mo funtu. Be yakkan tew makko, be padda mo e yiite. <sup>17</sup> Gam Alla wattii der gerde mabbe be gada ko o resi. Be gada hunnuko wooto, be kokka bisaa laamu mabbe, faa de ko Alla batu fu hebbi.

<sup>18</sup> Debbo mo ji'udaa, kanko laatii wannarde mawne, laamaniine laamiibe duuniyaaru.»

## 18

### Kalkol Babiila

<sup>1</sup> Baawo majjum, ji'umi malaykaajo gom kade e jippoo diga dow kammu. Oo woodi baawde mawde, teddujal makko yayni e duuniyaaru fu. <sup>2</sup> O batii e daane towne, o wi'i: «Ne yanii! Babiila wannarde mawne yanii! Ne laatike wonorde ginnaaji, e suudorde ruuhuji cobudi, e suudorde pooli cobudi, e elliniidi fu! <sup>3</sup> Gam leydeele fu buusii e jaram kaaruwaaku mayre. Laamiibe duuniyaaru jeenii e mayre, tenkuube duuniyaaru hebi jawdi diga goonnan mayre mawdam.»

<sup>4</sup> Den nanumi daane wonne diga kammu, e wi'a: «Burtee e mayre, onon himbe am! Gam to on kawtee e hakkeeji mayre, gam to boneeji mayre hebu on. <sup>5</sup> Gam hakkeeji mayre yowontirii faa yottii dow kammu, Alla bo siwtorii gadu mayre kallunju.

<sup>6</sup> Gadanee ne hande no ne wadani on. Jobitee ne ko ne wadani on de disi. Jarigel nel ne laawirani on jaram,

laawiranee ne e maggel, semme majam gura de didi!

<sup>7</sup> Duudinanee ne toora e bojji jaka no ne teddiniri hoore mayre, e no ne wuuri der goonnan. Gam nee wi'a der berne mayre: "Min laamiido debbo nun, mi gownijo bane, mi anataa bojji maayde abada!" <sup>8</sup> Gam majcum, der nyalaane woore boneeji dii do waranan ne: maayde, e bojji, e rafo, ne jaan du yiite, gam Alla Joomiraawo kiiotoodo ne, laati nun mo baawde.»

### *Bojji dow Babiila*

<sup>9</sup> Laamiibe duuniyaaru hawtube e mayre der jeenu e goonnan mayre wullan, simoo to yi'i curki bulol yiite mayre. <sup>10</sup> Be daroto woddi, gam be kulan kiita mayre heba be. Be bi'an: «Kayto! Kayto! Babiila, wannjarde mawne, Babiila wannjarde semmenteere, der yanne woore tan, kiiadaa!»

<sup>11</sup> Tenkuube duuniyaaru wullan, simoo gam mayre, gam goddo soodataa kade gineeji maabbe.

<sup>12</sup> Kanjeeri, e cardi, e kaaye dime, e colle, e gude diggude, e gude bodeeje, e bodeeje coy, e ledde luuttooje, e huune feere feere gadiraadum nyiye nyiibi, e huune gadiraadum ledde caadiide, e janni bodeeri, e janni baleeri, e hayre wi'eteeni marba, <sup>13</sup> e kobitaaje ledde bi'eteede kanel, e li'anji, e wardi, e miira, e wardi buudetedum, e innabojam, e nebbam, e conni, e alkamaari, e na'i, e baali, e pucci, e laanaaji pucci, e maccube, e yonkiji himbe.

<sup>14</sup> Tenkuube wi'an wannjarde nen: «Ko cuuninodaa hebugo fu woddiike ma. Jawdi maa, e ko woodi fu majjii, a hebitintaako dum abada.»

<sup>15</sup> Tenkuube hebuube jawdi e mayre, daroto woddi, gam kulol kiita mayre. Be bullan, be cimoo, <sup>16</sup> bee bi'a: «Kayto! Kayto! Wannjarde mawne, nee do jurortono gude diggude e gude bodeeje, e bodeeje coy. Nee do jurortono kanjeeri e kaaye dime, e

colle! <sup>17</sup> Jawdi nii fu halkii der yanne woore!»

Boylooobe laanaaje diyam mawde, e yahooobe toy fu der majje, e gollotoobe der majje, e suubotoobe liyyi, dario woddi. <sup>18</sup> No be ji'i curki bulol mayre yiite, be kalbi, be bi'i: «Wannjarde gom walaa fotidinnoone e wannjarde nee do!» <sup>19</sup> Be dario, bee baanja leydi dow ko'e maabbe, bee bulla, bee cimoo. Berde maabbe e biisii, bee bi'a: «Kayto! Kayto! Wannjarde mawne, ne goonnan mum hokki woodube laanaaje diyam fu jawdi, der yanne woore tan, ne halkii!»

<sup>20</sup> Kammu, seya gam kalkol mayre! Onon himbe Alla e lilaabe, e annabiibe, ceyee onon bo! Gam Alla hiitake ne ko ne wadani on!»

<sup>21</sup> Den malaykaajo semmenteejo gom etti hayre mawne nandune e namarde, faddi ne der maayo, wi'i: «Ninnii nun Babiila, wannjarde mawne faddirtee e semme, ne yi'ataake kade faa abada! <sup>22</sup> Daane fiyoobe moolooji, e yimoobe, e fuuroobe algaytaaji, e fuuroobe galaldi nanataake kade der maa abada! Wadoobe golle juude feere feere yi'ataake kade der maa. Rimmo namarde nanataake kade der maa. <sup>23</sup> Jaynol fitilla yawnataa der maa. Daane jommanjo gorko e jommanjo debbo nanataake kade der maa. Gam tenkuube maa laatinoo mawbe der leydi. A jammike leydeele duudse e dobo dobooje maa.»

<sup>24</sup> Yiyam annabiibe e yiyam himbe Alla, e dam waraabe der duuniyaaru tawaama der maa.»

## 19

### *Jimi jaalorgal dow kammu*

<sup>1</sup> Baawo majcum, nanumi daane towne hande daane jama'aare duunne dow kammu, e wi'a: «Aleluya\*! Kisidam, e teddujal,

e baawde laatanii Alla meeden. <sup>2</sup> Kiitaaji makko e laatii goonjaaji, dii poonnitii! O hiitake kaaruwaajo mawdo biisudo duuniyaaru e kaaruwaaku mum. Alla hiitake mo

\* **19:1** Aleluya laati nun haala Iburaninkeere, waato «Jettee Joomiraawo»

gam o reyyitii yiiyam gollantooþe ðum.» <sup>3</sup> Be bi'i de didawre: «Aleluya! Curki bulol wannarde nen e eenca dow faa abada!» <sup>4</sup> Dottiibe laso e nayo, e tagaadum nayum yonkintejum ðum, jicci sujidani Alla joodiido dow kittaal laamu, e wi'a: «Aami! Aleluya!»

### *Bangal Jawgiyel*

<sup>5</sup> Daane yiwi diga kittaal laamu, e wi'a: «Jettee Alla meeden, onon gollantooþe mo fu, onon hulþe mo, mawþe e petton!» <sup>6</sup> Den nanumi hande daane jama'aare duunne, e hande rimmo diyam duuddam, e kade hande riggaano manjo, e wi'a: «Aleluya! Alla Joomiraawo meeden, mo baawde, laamake. <sup>7</sup> En ceyee, belbelten, teddinen mo, gam bangal Jawgiyel yottake. Dabbaado maggel siriyake. <sup>8</sup> O hokkaama o bornoo kolte diggude, jalbooje, laabude.» Kolte den laatii hande gadu himþe Alla geetu.

<sup>9</sup> Malaykaajo wi'immi: «Winnu: "Barke woodani noddinaabe nyaamde teegal Jawgiyel!"» O wi'immi kade: «Haala Alla goonjaha ka o bati nun don.»

<sup>10</sup> Jicciimi ley koyde makko, gam mi sujidana mo, amma o wi'immi: «Taa wadu ðum! Min bo, mi gollantoodo Alla nun hande maa, e hande banniraabe maa jogiibë seedaaku Yeesu. Sujidan Alla!» Goonja ka Yeesu holliti, kanka nun hokki annabiibë haala ka be bati dow makko.

### *Almasiihu waran hiitoo bisaa*

<sup>11</sup> Baawo majjum ji'umi kammu maþbitii. Den ji'umi puccu danewol. Baddiido ñol, e wi'ee Kooliniido, e Goonjajo. Goonja o hiitortoo, kanka o habirta bo konu. <sup>12</sup> Gite makko e wa'i hande dennjal yiite. Oo mellii meetali laamu duuddi. Inne e winna dow makko, goddo annaa ne, to hinaa kanko. <sup>13</sup> Oo bornii toggoore cownaane der yiyyam, inne makko woni: «Haala Alla.» <sup>14</sup> Konunkeeþe be dow kammu e tokkini mo. Bee baddii pucci daneeji, bee bornii kolte daneeje diggude, laabude. <sup>15</sup> Kaafahi

belki e wurtoo diga e hunnuko makko. Kanki o jaalortoo himþe. O laamoranto be e sawru janni. O biddan innabooje der biddirde mone Alla mawne, laatiido mo baawde. <sup>16</sup> Inne gom e winnaa dow toggoore makko, e dow asaanjal makko: «Laamiido laamiibë, e Joomiraawo joomiraabe.»

<sup>17</sup> Den ji'umi malaykaajo gom e darii dow naanje. O batii e daane towne, o wi'i pooli piirooji dow hennu fu: «Garee kawritee gam juulde Alla wadi. <sup>18</sup> On yakkan tew laamiibë, e hooreeþe soogeeji, e bannu semmenteeþe, e tew pucci, e waddiibë di, e bannu himþe fu: rimþe e maccube, mawþe e petton!»

<sup>19</sup> Den ji'umi bisaa e laamiibë duuniyaaru, e konunkeeþe mum. Be kawritii gam be kabida e baddiido puccu on, e konunkeeþe mum. <sup>20</sup> Bisaa ñan nanjaa maþbaa, kannja e annabiijo pewoowo gadunoodo haaynaareeji yeeso magga. E haaynaareeji din o jammoriinoo woodubë maane bisaa, e sujidanooþe foto magga. Be fu dido, be paddaa e yonki der maayo yiite kuþboowe, e kibiriita. <sup>21</sup> Horiibë waraa e kaafahi burtotooki e hunnuko baddiido puccu on. Pooli wari yakki balli maþbe, faa di kaari.

## 20

### *Laamaare duubi ujuneere*

<sup>1</sup> Baawo majjum, ji'umi malaykaajo gom e jippoo diga dow kammu. Oo jogii callalluwol manjol, e maþbitirgel gayka lugguka. <sup>2</sup> O nannji kuunja, boddi nayeeri, bi'eteeni Ibiliisa e Seydan, o habbi ña faa duubi ujuneere. <sup>3</sup> O watti ña der gayka lugguka, o maþbi, o fedi. Den o takki takkanne dow makka, gam to o jammoo leydeele kade faa duubi ujuneere hebba. Baawo majjum, o maþbitinte wakkati sedda.

<sup>4</sup> Den ji'umi kittaaje laamu e joodiibë dow majje. Be kokkaama baawde hiitaago. Den ji'umi yonkiiji be ko'e mum wudditaa gam be

ceedanike Yeesu, e gam 6e baajike haala Alla. Be cujidanaay bo bisaa, e foto mum. Be kebay maane dow tiide, sum bo e juude maabbe. Be pintii, 6e laamodii e Almasiihu duubi ujuneere. <sup>5</sup> Maaybe horiibe fintay faa duubi ujuneere hebbi. Kanjam woni pintol aranol. <sup>6</sup> Barke e cenaaki woodani wonube der pintol aranol! Maayde didawre woodaa baawde dow maabbe. Be laatanto Alla e Almasiihu Limaamiibe, 6e laamodoo e makko duubi ujuneere.

### *Seydan jaalaama*

<sup>7</sup> To duubi ujuneere hebbi, Seydan yoofete, wurtoo e kasu mum. <sup>8</sup> O jammoto leydeele gonude der gooraaje duuniyaaru naay, waato Gog, e Magog. O hawritan de gam konu, de duudan hande jaaneeri maayo. <sup>9</sup> Be cankitii der duuniyaaru fu, 6e piilttii himbe Alla, e wanjarde jidaane. Amma yiite jippii diga kammu, halki 6e. <sup>10</sup> Seydan jammotoodo 6e, faddaa der maayo yiite e kibiriita, to bisaa e annabijjo pewoowo woni. Don nun 6e toorooto jemma e nyalooma, faa abada.

### *Nylaane daryal*

<sup>11</sup> Baawo majcum, ji'umi kittaal laamu manjal daneyal, e joodiido dow maggal. Leydi e kammu doggi yeeso makko, yi'aaka kade. <sup>12</sup> Mi yi'ii maaybe, mawbe e petton e darii yeeso kittaal laamu. Dewte maabitaa. Den dewtere wonne maabitaa, kayre woni dewtere yonki. Maaybe hiitaa hande no winniraa der dewte, moy fu jaka golle mum. <sup>13</sup> Maayo tuuti maaybe mum. Maayde e joonne maaybe bo tuuti maaybe mum. Den moy maabbe fu, hiitaa deydey golle mum. <sup>14</sup> Maayde, e joonne maaybe wattaa der maayo yiite. Maayo yiite njon woni maayde didawre. <sup>15</sup> Neddo mo inne mum winnaaka der dewtere yonki, faddaama der maayo yiite.

## 21

### *Kammu kesu e leydi keyri*

<sup>1</sup> Baawo majcum, ji'umi kammu kesu e leydi keyri, kammu aranu e leydi arandeeri majjitii, maayo bo walaa. <sup>2</sup> Ji'umi wanjarde cenie, waato Urusaliima kesol e jippoo diga dow kammu, diga to Alla. Nol siriyake hande debbo ciriyido fotta e gorum. <sup>3</sup> Mi nanii daane towne diga to kittaal laamu, e wi'a: «Joodorde Alla caka himbe nani, o wonoto e maabbe, 6e laatoo himbe makko, Alla e hoore mum wondan e maabbe. <sup>4</sup> O moytan gondi gite maabbe fu. Maayde, e bojji, e toora wonataako kade, gam kuppe arandeeje fu yawtii.»

<sup>5</sup> Joodiido dow kittaal laamu wi'i: «Mi wadan huune fu laatoo kesum!» O wi'i: «Winnu haalaaji dii, gam di laati nun goonaaji, kooliniidi.» <sup>6</sup> O wi'immi kade, «Huune fu hebbi! Min woni arano, min woni sakitiineeo, min woni fuddoode, e heennyitirde. Dondaado fu, mi hokkan sum diyam yonki, o yobataa. <sup>7</sup> Jaaliido heban huune sum fu, mi laatoto Alla makko, o laatoo biddo am. <sup>8</sup> Amma hulhulbe, e 6e walaa goondinki, e sobube, e warroobe himbe, e jeenoobe, e wadoobe dobo dobooje, e saafooobe tooruue, e fewoobe fu, maayo yiite kuuboowe e kibiriita nun woni gedu maabbe. Kanjam woni maayde didawre.»

### *Urusaliima kesol*

<sup>9</sup> Baawo majcum, gooto der malaykaabe jeedido jogiinoobe jarirkon jeedidon kebbukon boneeji jeedidi cakitiidi, wari, baddimmi wi'i: «War mi hollee jommanjo debbo, debbo Jawgiyel.»

<sup>10</sup> Den keewumi Ruuhu, go malaykaajo on yaarimmi dow waanne mawne towne. O hollimmi Urusaliima, wanjarde seniine yiwi diga dow kammu to Alla, e jippo. <sup>11</sup> Teddujal Alla e woni der mayre. Nee jalba hande hayre rimre, e hande hayre wi'eteene yaspa, laabune hande daanorgal. <sup>12</sup> Birniwol manjol, towujol e filititii wanjarde nen. Nee woodi dammuude sappo e didi, dammugal fu e woodi malaykaajo. Inde lenyi 6ibbe Isira'iila

sappo e didi, e winnii dow dammude ñen. <sup>13</sup> Dammude tati e woni far let-tugal, tati far soððiire, tati far hoore fudo, tati bo far gorgal. <sup>14</sup> Birniwol wanñarde nen e woodi kaaye dadda sappo e didi. Inde lilaabe Jawgiyel sappo e dido, e winnii e majje.

<sup>15</sup> Malaykaajo baddannoodo am e jogii yommal poonnirgal, ñal kannjeeri, gam o foonnira wanñarde, e dammude mayre e birniwol mayre. <sup>16</sup> Becce mayre naay fu e foti, juutugo e yaajugo fu e foti. Malaykaajo fooni wanñarde nen e poonnirdum mum. Juutugo mayre wadi kilomeeta ujune didi e keme didi (2200), non bo yaajugo e towugo mayre foti. <sup>17</sup> O fooni bo birniwol mayre, ñol wadi kuule hemure e lasoy didi e naay, (144) jaka poonnol himþe. <sup>18</sup> Birniwol ñol, hayre yaspa nun mahiraa. Wanñarde nen bo mahiraa e kannjeeri laabuni, e jalba hande daanorgal laabunjal. <sup>19</sup> Wanñarde nen dadda bombooru mum moyyiniraama e kaaye dime feere feere. Arandeere, Yaspa, didawre, safiir, tatawre, agate, nayawre, emerooda, <sup>20</sup> joyawre, sardoniisi, jeego'awre, sarduwan, jeedidawre, kirisoliti, jeetatawre, haako haakoore, jeenayawre, topas, sappo'awre, kirisoparas, sappo e go'awre, yasente, sappo e didawre, ametis. <sup>21</sup> Dammude sappo e didi ñen wadiraama e sokiyaaje daneeje sappo e didi. Dammugal fu wadiraan sokiyaare woore. Jayri wanñarde nen wadira e kannjeeri laabuni, jalboori hande daanorgal laabunjal.

<sup>22</sup> Mi yi'ay suudu Alla der wanñarde nen, gam Joomiraawo Alla mo baawde, e Jawgiyel nun laatii suudu Alla mayre. <sup>23</sup> Wanñarde nen bukaaka naanje, naa bo lewru yayanana dum, gam tedduñal Alla yayananta ne, Jawgiyel laatii fitilla mayre. <sup>24</sup> Leydeele fu yahan der jayñol mayre, laamiibe duuniyaaru waddan jawdi mum der mayre. <sup>25</sup> Dammude mayre maððataako nyalooma, gam jemma walaa der

mayre. <sup>26</sup> Be gaddan jawdi e tedduñal leyðeele der mayre. <sup>27</sup> Ko sobi fu naatataa der mayre. Gadoowo ko sentinii, e pewoowo naatataa ton. Amma naatoobe ton woni, ðe inde mum winnaa der dewtere yonki, ne Jawgiyel.

## 22

<sup>1</sup> Baawo majjum, malaykaajo hol-limmi maayo diyam yonki. Diyam ðam e laabi hande daanorgal. Maayo ñon e yiwa diga kittaal laamu Alla, e Jawgiyel. <sup>2</sup> Diyam maayo ñon e ila caka jayri wanñarde nen. Leggal kokkoowal yonki e tawaa fonjo maggo didi fu. Leggal ñal e rima bikkol de sappo e didi der duubol, waato de woore der lewru fu. Haako maggall e laatii lekki nyawtoohi himþe. <sup>3</sup> Naaloore tawataake kade der siire nen.

Kittaal laamu Alla e Jawgiyel wonoto der mayre, jaggiibë makko sujidanan mo. <sup>4</sup> Be ji'an yeeso makko, inne makko winnete e tiide maððe. <sup>5</sup> Jemma walaa ton kade, ðe kaajataake jayñol fitilla, e jayñol naanje, gam Joomiraawo Alla laatoto jayñol maððe. Be laamoto faa abada.

### Gartol Yeesu

<sup>6</sup> Malaykaajo on wi'immi: «Haalaaji ðii do e laatii goonja, ðii laatii kooliniidi bo. Alla Joomiraawo gattudo haala mum der annabiibë, lili malaykaajo mum gam o holla jeyaabe makko ko waroyta, booyataa.»

<sup>7</sup> Yeesu wi'i: «Kettinee, mii wara booyataa!» Barke laatani dowtaniido ko woni der dewtere annabaaku nee do.

<sup>8</sup> Min, Yuhaana, min nani kujje dee, yi'i de. Baawo no nanumi, ji'umi de, jicciimi yeeso malaykaajo kolludo am de, gam mi sujidana mo. <sup>9</sup> Amma o wi'immi: «Taa wadu dum, min bo, mi laati nun jaggiido hande maa, e banniraabe maa annabiibë, e dowtaniibë haalaaji gonudi der dewtere nee do. Sujidan Alla!» <sup>10</sup> O wi'immi kade: «Taa suudu haalaaji annabaaku gonudi der dewtere nee do, gam

wakkati 6adake. <sup>11</sup> Gadoowo ko halli, tokkoo wadugo ko halli. Cobudo, tokka wadugo ko sobi. Poonnitiido, tokkoo wadugo ko foonnitii. Ceniido, tokkoo wonaago der senaare!»

<sup>12</sup> Yeesu wi'i: «Kettinee, mii wara, booyataa. Mi waddan barjaari gam mi warjoo moy fu deydey golle mum.

<sup>13</sup> Min woni arano e sakitiineej, min woni fuddoode e heennyitirde.»

<sup>14</sup> Barke laatanii loonnube toggooje mum gam 6e baawa ko nyaami 6ibbe leggal yonki, 6e naatira bo wannarde diga e dammude! <sup>15</sup> Amma laatiibe dawaadi, e wadoobe dobo dobooje, e jeenoobe, e waroobe himbe, e saafooobe tooruuje, e yidube fewre go e fewa fu, wonoto yaasi.

<sup>16</sup> Min Yeesu, mi lilii malaykaajo am, o seedoo kujje de der eklesiyaaji. Min woni mo lenyol Dawda, e taani-

iko, min woni hoodere fajiri jalboore!

<sup>17</sup> Ruuhu e jommanjo debbo darii e wi'a: «War!» Nanudo fu sey wi'a: «War!»

Dondaado fu, wara. Jidudo diyam yonki fu, ja6a dam, yobataa!

<sup>18</sup> Min, Yuhaana, mii bata moy fu, nanudo haala annabaaku gonuka der dewtere nee do hakkila. To goddo 6eydii godsum dow kujje dee, Alla 6eydanan joomum boneeji batanaadi der mayre. <sup>19</sup> To goddo suytii godsum der haalaaji dewtere annabaaku ne, Alla suttan gedu joomum e leggal yonki, e diga wannarde seniine, ko batanaa der dewtere ne.

<sup>20</sup> Ceediido kujje dee wi'i: «E goonja, mii wara, booyataal!» Aami! War Yeesu Joomiraawo!

<sup>21</sup> Moyyere Joomiraawo meeden Yeesu wonda e moodon on fu!